

Ұиқан ұя

1-бөлім

- Менің бабам Имаш мың да тоғыз жүз он бірінші жылы тоқсан екі жасында дүние салған. Орта бойлы, орак мұрын, от жанарлы сол шымыр шалдың төртінші перзенті - менің әкем Момыналы еken. Оны жұрт Момыш деп кеткен. Әжемнің аты Қызтумас еді. Қартайғанда сары кемпір атанған. Жарықтық, аса ажарлы, ақ дидарлы кісі еken. Ондай ару ол кезде ел арасында некен-саяқ. «Ұл біткеннің бәрі қазанның түп күйесіндегі әкесіне тартып қара болды, қызы жағы өзіме тартып аққұбаша ажарлы шықты» деп отыратын еді, жарықтық. Әжем өзінің ұлдарына өңшең аққұбаша аруларды айттыруға ынтық болған. Соның кесірінен менің әкем Момыш отыз үш жасына дейін салт басты, сабау қамшылы жүріпті. Әжем оған:

- Әй, қара құл, мен құдайдан саған ай көрікті ақ перизат жолықтырғай деп тілеймін. Тым болмаса, немерелерімді жиіркенбей сүйейін, - дейді еken. Бірде көрші ауылда үлкен той өтіпті. Той ойын-сауықсыз болған ба? Үлкен киіз үйдің ішінде жігіттер мен қыздар айтысып жатса керек. Той дегенде қу бас та домалайды. Кемпір-сампырлармен ілесіп менің Қызтумас әжем де келген

екен. Көрі құлағы елең етіп, киіз үйден шыққан айтыс әнін естіп қалады.

Біздің ауыл Мыңбұлақ басын ала,

Басындағы орамал жасыл ала.

Көңілің бізде болса, а құдаша,

Біразырақ отыршы қасыңа ала.

Қыздың даусы жайдары естілсе де, жалтара жауап қатып отыр еken. Қәдімгі бас қосқан жердегі бастама өлеңнен ұзай қоймапты. Дегенмен сөз арасында «жақсы жігіт» дегенді

жиілете берсе керек. Қызтумас әжем оны да сезіпті.

Қарашаға, ендеше, қарашаға,

Кисе киім жарасар аласаға.

Бас қосыптыз бұл тойда, жақсы жігіт,

Өлең айтсақ болмай ма тамашаға.

Бірақ жігіт жағы алғашқы екпінінен танбай ынтық көңілің ұсына беріпті:

Мыңбұлақтың сулары сыйдырайды,

Сұлу қыздың бұрымы бұлдырайды.

Құдаша деп сыртыңнан құмартуыш ем,

Ескергейсің ендігі біздің жайды.

«Кұдашасына сонша өзеуrep отырған кім екен», - деп әжем есіктен сығалап қараса:

Қара батыр, құдаша, қара батыр,

Жау қайырап жасқанбай дара батыр.

Тәнір айдап өзінмен бас қосыптыз

Осы кесе сіз жаққа бара жатыр, -

деп өлеңмен бір бойжеткен қара қызға аяқты бұрып түрган өз Момышы екен. Әжем сонда ұлына айғай салып:

- Өзің қазанның түп күйесіндейсің, күйеге күйе жұқса - не болмақ, құдайым-ау! - деп баласын үйден қуып шығыпты. Анасының айтқанын ішінен ұнатпаса да, әкем оның ырқына көнеді екен. Баласына қанша ұрсып, қатал болса да, әжем менің әкемді

жақсы көріп, мақтан тұтып:

- Бұл қара құлдың түрі маған тартпаса да, ақылдылығы тартты, соған да құдайға шүкір, деп отырар еді. Әкем содан айтыс қуып, әндептіп жүре-жүре отыз үш жасында Байтана руынан Әбдірахманның Рәзия атты қызына үйленіпті. Ол менің шешем еді. Ол кісі мен үш жасқа толар-

толмаста қайтыс болған. А남ның қандай кісі болғанын тек әжем мен әкемнің әңгімелерінен ғана білемін. Қайран әжем өле-өлгенше Рәзия келінің қазасына қайғырып өтті. Мезгіл-мезгіл тоқаш қуырып, ас пісіріп, келінің әруағына бағыштап құран оқытар еді.

Жатқан жерің жаннат болсын, маңдайыма сыймай кеткен періштем Рәзия, - деп өзінен-өзі отырып, көзіне жас алып қайғыратын. Сөйтіп, Рәзиядан қалған немерелерінің басынан сипап, маңдайымыздан сүйетін.

Рәзияның туңғышы Үбіш, онан кейінгілер Үбиан, Сәлима, Әлима кілең қыз бала болады.

Момыш әкемнің айтуынша, мен мың да тоғыз жұз оныншы жылдың қысында, ескіше декабрьдің жиырма төртінде туыппын. Әкем ол күні Әулиеата шаһарында екен. Мен тұған соң, Имаш бабам жан-жаққа кісі шаптырып, әкеме де хабаршы жіберіпті.

Біздің ауылдың Байтоқ деген кісісі алпыс шақырым Әулиеатаға ат сабылтып жетіп, әкем жатқан үйге кіріп келіп, бір ауыз сөз айтуға дәрмені келмей, Момышты құшақтап жылай беріпті. Әкемнің қарындастының үй-іші үрпісіп, бір жаманат хабар жеткен екен деп қорқып қалады. Ақыры

Бәрі Байтоқты жүлмалай, «не боп қалды, айтсаншы» деп тақақтағанда ғана, Байтоқ:

- Женешем ұл тапты, - депті.

Үрейден үрпіскен жұрт енді мәз-мәйрам болып, қуаныштары қойындарына сыймай, Байтоққа сүйіншісін беріп аттандырыпты!

Әулиеатадан әкем қайтып келгенде, ағайын-жеккет құтты болсынға жиналып қалған екен.

- О, Момыш, балаңның бауы берік болсын!
- Ақментей бабасындағы батыр болсын!
- Ақмолда Батыр бабасындағы мәрт болсын!
- Бәйдібек батырдың әруагы қолдасын!
- Домалақ анамыз жар болсын! - десіпті.

Сөйтіп, шілдехана тойға ұласыпты. Той соңында Имаш атам алақан жайып ел қарияларынан бата сұраған екен.

- Төл немерен, бел немерен гой. Бата жөні де өзіндікі, -
десіпті ақсақалдар. Сонда Имаш бабам былай деген екен:

Алатаудың қыраны мол еді -

Қырағы болсын, құлымым -

Қойнауы суға мол еді -

Бұлағы болсын, құлымым.

Елінің тілегі зор еді -

Шырағы болсын, құлымым.

Ата тілегі оң еді -

Құмары болсын, құлымым.

Бұл жер батырлар төрі еді -

Сыңары болсын, құлымым.

* * *

Жарық дуниеге келгеніме екі-үш ай болғанда, шешем мені күн көзіне шығарып, Имаш атамның алдына әкеліпті. Атам ерте көктем алдында ағаш отырғызып жүр екен.

- Атасының қолын ұзартып, қолғабыс беруге келді, - депті шешем ізетпен иіліп. Атам еміреніп мені алақанына алыпты. Қолыма жас бұтақ ұстасып:

Құрық деп берсем - құл болма,

Шыбық деп берсем - шіл болма.

Бәрінен де, шырағым,

Баяны жоқ ұл болма, -

деп келініне мені қайтарып берген еken.

Атасымен алғашқы дидарласуының құрметіне деп, алғашқы өситет өмірлік өнеге болсын деп әкем сол күні кешке мал сойып, ауыл ақсақалдарының басын қайта қосыпты.

* * *

Мен туғанда, әкем елуді еңсеріп қалған кісі еken. Әжем жарықтық әкемді балаларымның ішіндегі еті тірісі осы болды деп отырар еді. Әкем өз бетінше талпынып жүріп ескіше сауатын ашып алыпты.

Содан өле-өлгенше өз бетінше оқып-тоқыған адам. Ол есеп-қисапты тәуір біletін. Тіпті орыс алфавитін де ежіктеп шығара беруші еді. Жас күнінде ағаш ұста болыпты, етікші

де атаныпты, тәуіппшілдігі де бар еken. Әсіреке, зергерлікті жақсы көрген. Біздің елде одан өткен зергер ұста болмаған. Жігіт күнінде қыз-келіншектің көңілін аулау амалымен үйренген зергерлік өнерін әкем қартайғанда тастамаған. Мұнда ол сокқан сақина-білезікті салып жүрген көзі тірі кемпірлер бар. Ал, ол кемпірлер бір кезде уылжыған жас еді ғой.

Әкем өз жанынан өлең шығарып, жиын-тойда айттықса да түсіп жүріпті. Ескі ақын-жыраулардың термелерін, қиссаларын жақсы көріп тыңдайтын. Бірақ жатқа айта алмаушы еді.

Момыш әкем ат жалын тартып мініп, бозбала халге жеткенде, Имаш бабам шаруа билігін соның қолына беріпті. Ауылдағы келін-кепшікті бір шыбықпен айдайтын адуынды Қызтумас әжемнің өзі де:

- Момыштан сұрандар, Момыш біледі, - деп отырады еken.

Ағайын-туған арасындағы алыс-беріс, көші-қон мәселесі, ас-той, дау-дамай - бәрі-бәрі Момыштың араласуынсыз шешілмеген. Әлдеқалай ол жол жүріп кетсе, сапардан қайтып келгенше тірлікті соған қаратып, жолын күтіп отыратын болған. Имаш бабамның көзінің тірісінің өзінде

біздің шағын ауылды - Момыш ауылы дейді еken.

Шаруамыз шап-шағын еді. Біздің үйдің іші қартайған Имаш бабамнан бастап, есін енді-енді біліп келе жатқан баласына дейін жеген нанын табан ақы, маңдай терімен тапқан. Ешкімді жалдамаған, ешкімге жалданбаған.

Жас кезінде әкемді әйелдер жағы «Молда бала» дейді еken, кейін «Ұста бала» дейтін болыпты. Ал, әжем оны «Қара қатпа» деуші еді. Әкем орта бойлы, арық қара кісі

еді. Маңдайы жап-жазық, қасы қалың, көзі шұңғіл еді. Сол арықтығына қарамай, керемет құшті болатын. Әжем оны «Тарамыс» деп те атайдын. Сол құштілігіне бола атаса керек.

Мен бірде әжеме: - Неге «Тарамыс» дейсіз? - дептін, әкемді кемсіткен еken деп.

- Не десе де шешемнің еркі, - деп күлді әкем.

- Қарай гөр, мына жаманды, әкесіне болысып жатыр-ей, - деп әжем өтірік ашуланған болды.

Әлі есімде, бір рет әкемнің Момынқұл дейтін інісі әжеме:

- Қойшы, апа! - деп дауыс көтеріп қалып еді, әжем тарс кете жаздал:

- Сен тұрмақ, Момыш маған осы құнге дейін бетіме тік қарап сөйлеген емес. Сен қайдан шықтың, иттің күшігі! Жоғал, көзіме көрінбе! - деп үйден қуып шықты.

- Не боп қалды? - деп әкем кіріп келді, әжем оны аймалап, арқасынан қағып:

- Анау інің көргенсіздеу боп бара жатыр. Жөнге сал туысқаныңды, - деді.

- Макұл, апа, сазайын тарттырайын. Бірақ ұрмай-ақ қояйын, макұл ма, апа, - деді.

- Мейлің, - деп күрсінді әжем.

Момынқұл көкем сол түні қой қорада түнеп шықты.

Таңертең әкем оны жақсылап сөгіп салып, басқа бір ауылға бір аптаға аттандырып жіберді. Сол екі ортада әжем енді Момынқұлын сағынып:

- Өй, әлгі тентек неме қашан келеді? - деп қайта-қайта сұрай бергені ғой, жарықтық.

* * *

Ол кезде біздің елде хат жазып, қара танитын адам некен-саяқ. Молда дейтін молдалардың өзі құранның о жер, бұжерінен шала-шарпы жаттап алғаны болмаса, нағыз дүмшелер. Ал, Момыш болса, өз бетінше тырмысып сауатын ашқан кісі, сонысымен бүкіл аймаққа әйгілі, сыйлы адам

еді. Жаңадан билік құра бастаған орыс әкімдері алым-салық қағаздарын шығарып, қол қою, бармақ басу деген әдетке айналды. Шағым жазу, арыз жазу салт болды. Ал, қара танымайтындар арыз жазып бер деп әкеме келеді. Әкемнің әділдігіне сенеді.

Ояздың қасында о кезде тілмаш болар еді. Тілмаш дегенің - елді билеп-төстеген сұмпайының өзі. Соның аузы дуалы. Ұлыққа сол не десе - сол болады. Арызды тілмаш оязға не

деп аударып жатқанын сауатсыз қазақ қайдан білсін. Әкемнің айтуына қарағанда, тілмаш дегенің пара жегіш, дауласкер, екі жақты бірдей сорушы жемкор болған. «Сенің сөзінді сөйлеймін», - дейді де, ұлыққа әңгіменің өнін айналдырып жеткізе береді.

Ел ішінде неғұрлым дау-дамай, айтыс-тартыс, жанжал көп болса, ұлық пен тілмашқа соғұрлым тиімді. Екі жақты бір-біріне айдан салып шабындырып, сабылдырып,

шығындарып, арандарып, алдан ұрып ала беру со кездегі чиновниктердің, атқамінерлердің тәсілі болған.

Ол кезде әрбір үш жылда ояз болыстар мен билердің төтенше съезін шақырап еді. Оның қарсаңында сайлау науқаны сапырылысып, екі ұдай тартыс, жік-жік айтыс, пара беру, жала жабу, бірін-бірі тірсектен қағып, орға жығу, айла-тәсіл, құлық-сұмдық, болыстыққа талас өрттей қаулай

берер еді.

Сайлау тәртібі бойынша тас салуга елу түтіннен бір кісі өкілдік алады. Ал, іс жүзінде бір рудың атынан бір мықты ғана сайлаушы. Бір ру елдің еркін сыртынан сатып, сол елдің азаматтарының атынан сөйлеп, сонысы үшін пара алып жүретін пысықтар аз емес. Шынтуайттап келгенде, дауыс беріп, тас салу деген де жай сөз.

Чиновник оған қарамайды, болыстыққа таласқандардың қай жағы дүниені көп берсе - сол жағына қарай қағазды икемдеп жібереді, сайлау қағаздарын қалай жасаймын десе де өз қолында. Соны білген атқамінерлер оядың чиновнигінің аузын алуға жанын салып бағады.

«Ояз шықты, сияз бардың» кері келеді. Күштінің алдында байғұстар «бас изейді шыбындап». Бақталастар бірін-бірі балағаттап, қаралап бағады. Домалақ арыз ағылады-ай келіп, арызды оқып жатқан ұлық болмаса да, қайран қазекен арыз жазып қалуды парыз санайды. Ол болмаса басы ауыратындей көрінеді, бойына ас батпайтындей көрінеді, ұйқысы шала, күлкі жоқ, есі-дерті айбақтатып арыз жазсам дейді, баяғы.

Бір жолы өңшең атқамінер пысықтар сайлау алдында жиналып алып, қатты сассын. Жандары алқымға келіп, қиналдып, тығырыққа тіреліпті.

- Ойбай, қағаз тоқтап қалды! Қағаз тоқтап қалды! - дейді ғой бір-біріне қатты сасып. Асу бермес асқар белдің алдында амалы құрығандай боп тұрған кездері еken. Ішінде әкемнің нағашысы Байтана Текебай би де бар еken. Ол кісі қайта сайланудың сары уайымымен айылап-ұхілеп берекесі кете беріпті. Оязға дер кезінде мына қағаз бармайтын болды деп қатты қайғырғаны сонша, соны көріп менің әкем Момыш:

- Не боп қалды? Неге қиналдыңыз? - деп сұрайды.
- «Жартыны» ешкім жаза алмай қойды ғой, құдай-ay,
- депті би.

«Жарты» дегені 1/2 еken.

- Мен жаза аламын, - депті менің жиырма төрт жасар әкем.
- Сен жаман неме, не жазып жарытамын дейсің. Екі күннің жүзі болды, ол қызын жазуды мына оқыған молдалардың өзі түсіре алмай отыр, - деп Текебай сене қоймайды.
- Мен жазып берсем, қайтесіз, - депті әкем.

Әкемді салы суға кетіп отырған молдалардың ішіне алып барады.

Сонда Момыш 1/2 деп жазып, жарты дегеннің осы екенін түсіндіріп берілті, қанша күн басы қатып, қамалып отыргандар өні кіріп, қайта тірліп, қуанып, құнжыңдастып, әкеме тәнті болып қалса керек.

Текебайдың бақталасы - Талас Алатауының бөктерін жайланаған Жаңабайдан шықкан Байзак датқаның баласы Қабылбек деген кісі екен. Байзак датқа заманында Қоқан

ханына қарсы шығып, содан қапыда қолға түсіп, Құдияр ханның жарлығымен зенбіректің аузына байланып, атылып кеткен. Енді, міне, сол Байзактың елу жастағы ұлы Қабылбек Текебаймен тіресіп қалған кезі екен.

Қабылбек жағы Текебайды ұры деп, әділдігі жоқ парапор деп, ұлыққа жамандап жаза берсе керек. Сонда Текебайдың отыз жастағы ұлken ұлы Серкебай Қабылбек жағының әлгіндей жаласына шыдай алмай, жанына он жігіт өртіп, Қабылбектің аулына тасырлатып жетіп барған

дейді. Қабылбектің қарсы алдына отырып алып, қамшысын жерге шиіріп тастап, бір бәлеге бастап, қалың жұрттың арасында Байзак датқаның баласын ой, балағаттайды келіп. Айтпағанды айтады. Елде зәре қалмайды. Қан төгілмесе неғылсын деп қалтылдаған халық.

Ақ орданың сыртындағы әйелдер жағы әруақ, құдайға сыйынып, сыбырласып қана сөйлеседі. Ал, Серкебай ақыланып алса керек, ар-намысқа тиетін ауыр сөздер айтып айғайлап отыр. Қабылбек сонда қыбыр етпепті. Ләм деп

тіс жарманты. Қабағын да қақпапты. Жаңабай жағы улап-шулап, намыс буып, кек қысып, орындарынан тұра-тұра ұмтыла бастаса, Қабылбек оларға тек қолымен белгі беріп басып тастап отырады. Бірақ тіс жармайды. Аталас ағайын-туғаны бұған шыдамай, қаны қайнайды. Қабылбек тырс етпейді.

Оның бұл қылышына ыза болған сотқар Серкебай одан бетер одырандап, айтпағанды айтса керек. Ақырында атына қарғып мініп, он жігіті жанында, ауылына салып ұрып

қайтып келіпті.

Серкебай кеткен соң Жаңабай жағы жабылып Қабылбекке наразылық айтып жатса керек:

- Ойбай-ау, неге бізді бөгедіңіз?
- Ақ орданы басындырып қойғанымыз қалай?
- Әруақ! Әруақ! Сай-сүйегін сырқыратып қайтіп тірі жүреміз, ойбай!
- Байзак датқаның басынан ешкім асып көрмеген!

Біз не боп барамыз!

- Әлгі әупілдеген төбеттің көтінен қуып барып, қара қан құстырмасақ, жер басып тірі жүргеніміз құрысын!

- Аяғынан салбыратып ағашқа іліп қоймасақ, атымыз өшсін!

- Аттанайық! Аттан! Аттан! Байзак! Байзак!

Дес бермей, елеуреп, өкпелері өрекпіп, өршеленіп алған ағайындарын Қабылбек бір-ақ сөзбен қайырып салып:

- Тоқтат! - деп ақырып қалған. - Опық жейтін сол Серкебайдың өзі болады әлі, - депті.

Ағайындары, амал жоқ, тыйылыпты.

Ал, Серкебай әкесі Текебайдың алдына барып мақтанып тұрса керек: «Екі аяғын бір етікке тықтый Байзак әулетінің Қаһарлы Қабылбектің өзі жұмған аузын аша алмай қалды. Былай деп боктадым, былай деп балағаттадым». Текебай сонда баласына:

- Ақымақ! - депті.

Серкебай үйден атып шығып, өз отауына барып, екі құн қатарынан нэр татпай, өкпелеп жатып алыпты.

Ал, сайлауға дайындық қыз-қыз қайнап жатса керек.

Ушінші құн дегенде Серкебай әкесіне келіп, аяғына жығылады.

- Мені құдай сыйлады. Өзімнен жиырма жас үлкен Қабылбектің бетінен алып, тілім тиді. Ел көзіне қарайтын бет қалмады.

Текебай ат-шапан айыбын дайындалап, жанына жиын ертіп, Қабылбектің ордасына өзі барған екен.

Жаңабай жағы Текебай қол жиып соғысқалы келе жатыр екен деп қалса керек, өздері де сап түзеп, сақадай сай қарсы шығады.

Қабылбектің ордасына ат шаптырым қалғанда Текебай қасына Серкебайды алып, басқалардан оқ бойы озып шығып, әкелі-балалы екеуі Қабылбек жағына келе жатады.

Қабылбек те: «Е, мынау соғысатын жерді айт деп келе жатыр ғой», - деп өзі жеке шығып, Текебайға тұра тартады.

Сонда Текебай сонадайдан аттан түсіп, Қабылбектің қасына келіп:

- Менің күшігім саған қарап шәуілдесе керек, Қабылбек! Айыбын көтергелі келдім алдыңа. Кешіремісің, сірә! - депті.

Мына сөзден Қабылбектің қабырғасы сөгіліп, қалбалактап атынан аунап түседі:

- О, текті би Текебай! Сенің балаңның айыбынан менің айыбым асып кетті білем. Аға болсан да, сені мен аттан түспей тыңдаппын-ау. Сен кешіремісің мені? Бұл

әдепсіздігім бүкіл әулетімізге таңба болатын болды ғой, ой эттегене-ай. Ат-шапан айып сенен емес, менен, ақсақал! - деп үстіндегі зерлі шекпенін шешіп Текебайдың иығына

жауыпты. Сөйтіп тұрып Жаңабай жағына қарап: - Уа, ағайын! Сайлауда Текебайға дауыс беріндер! Мен қойдым дауысқа түскенді! - деп айғай салған.

Әлбетте, ағайын арасы аз күн араз-құразсыз болғанмен, мансап, дәреже, атаққа таласу, айқай-шу, дырду тоқталмаған. Аз күн жарық дүниеде атақ үшін, билік үшін алышып,

жұлысып ғұмырын өткізген қу заман екі жақты итжығыспен, алма-кезек арандатып қойған. Дүниеден Текебай би де, Қабылбек болыс та өтті. Ал олардың аттандаулы аламан-тасыр өміріндегі бір парасатты сэт әлгі сол екеуі де аттан түсіп бір-бірінен кешірім сұраған кез еken.

Текебай бидің тоқтап қалған қағазын «жүргізіп» жібергеннен кейін, Момыш әкеме талай рет болыстың писары бол деп қолқа салса керек. Бірақ әкем көнбепті.

Ұлыққа писарь болған соң бас бостандық жоқ, басыбайлы, болыстан кіріптар боп қаламын дейді еken. Жалғыз атты кедей болса да, кісіден кіріптар болғанды қорлық санап, аз күн жарық дүниеде азаттық аңсап, қатықсыз қара су ішсе де, бай-манапқа алақанын жаймаған.

Әкемді жиырма сегіз жасында ауылдың старшыны сайлапты. Он жеті жыл старшын боп тұрып, он сегізінші жыл дегенде бұл дәрежесін өз ықтиярымен құрдасы Ереш

деген кісіге берген еken. Әкем жарықтық өмірінің ақырына

дейін ел арасында «Тура Момыш» атанип кетті. Қанша жыл аз ауылдың кішігірім әкімі болса да, бүйірі томпайып, мал біткен емес. Бар байлығы жалғыз аттан артпапты.

Әйтсе де кедейдің қолы жомарт. Әкемнің қызғаншақтық, бақталастық дейтін қу мінезі жоқ, қолы ашық кісі болған. Бары болса, кісі шақырып, той-томалақ өткізуге құмар боп тұрар еді. Дүние, мал жиуды жек көретін. Бір жолы мен, ес біліп, етек жиган кезім, базар барып азын-аулақ ақшаны

жаратып қойсам керек, өгей шешеміз мұныма күнкілдеп ұрса берді:

- Әлден ұрма, ақша бітсе шашып жүреді, тұра бара не болады?!

Әкем сонда өгей шешеме жай ғана:

- Е, ақша дегеннің өзі шашуға шығарылған нәрсе де, - деп таstadtы.

Бала кезімде алыстағы ауылымызға арбаменен бақалшылар келер еді. Өрік-мейіз, алма-алқоры, қант-науат, тәтті-мәмпәси деген соларда. Бала біткен әкемізден ақша сұрап қыңқылдаймыз келіп. Бақалшы да сүм-ақ: көзімізді қыздырып қызыл алмасын көрсетіп, бірлі-жарымын топ баланың ортасына лақтырып жібереді. Әлгі алмаға сонда жатып кеп таласамыз-ай келіп.

- Алма бар, өрік бар,

Алмасаң да көріп қал, -

деп бір жағынан саудагер де сұңқылдан жан қоймайды. Алма бізге таңсық. Қайран қазақ. Сөйтсек, алма дегенің біздің Мыңбұлақтың бойына өскенде де мәуелеп қалады екен. Ол кезде бағандықты құнттамаған елміз. Ал, бақалшы айқайлап бара жатады.

Айна бар, тарақ бар,

Алмасаң да қарап қал!

Біздің апаларымыз алма-алқоры алғаннан гөрі, сол күрғыр айна-тарақ, ине, жіп алғанды пайда көреді. Тек әкем Момыш қана бала құмарлығын түсінетін еді. Әке-шешесі ақша бермей, бұртиып тұрған балалардың бәрін қаз-қатар тізіп қояды да бақалшыға:

- Эй, сарт, өрігінен бір қадақ, мейізінен бір қадақ, мәмпәсиден бір қадақ тарт,- дейді. Соның бәрін тепе-тең бәрімізге бөліп береді. Тіпті сонда бала көтерген келіндері де келіп:

- Ал, атаңа бар, атаңа бар, тәтті береді, - деп тұрар еді.

Әкем базардан қайтқан күні біздің үйде кішігірім той сияқты жиын болатын. Қоржынның екі басы базарлыққа толып келеді. Сонда өрік-мейізге бір тойып қаламыз. Бала

біткен сондықтан әкемді жақсы көретін. Асылы, істеген жақсылығынды бала тәуір біледі. Кейбір үлкенге істеген жақсылығын зая кетеді. Қолдан келсе, баланы қуанту керек. Ол қуанса - шын қуанады. Ал, ересектердің арасында «сырты жылман, іші арамдары» кездесетінін, құдайға шүкір, көріп жүрміз. Қолдан келсе, баланы қуанту керек. Әкем менің сондай кісі еді, жарықтық.

* * *

Аспанмен тілдескен ақбас шоқылар есімде. Күн шығып келе жатса керек. Ақ шоқылар алаулап көз қарығар алмастай жарқырап ала жөнелді. Күнде бұл уақытта киіз үйде пырылдан ұйықтап жататын бала, әлдеқалай оянып кетсем керек, әлгі күннің, тау шоқыға асыла шығып келе жатқанын көргенде, дүниенің бұл кереметіне түсіне алмай тұрып қалған болармын. Тау бөктерінің таңғы самалы тіс сақылдатады. Мына күннің шығып келе жатқан суретіне қадала қарап

қалған қалпымды салқын самал да бұза алмаған болар.

Ойпанда қаз-қатар киіз үйлер. Бөктерді жағалай қой өріп барады. Қойтас екенін, қой екенін біліп болмас, тау бөктері толы мал. Күн көтерілгенше, шығыстағы шоқының ұзын көлеңкесі шатқалды көлегейлеп жатып алады. Күн көтеріле, көлеңке де қысқара береді. Шатқал алтын нұрға малынып, дүниенің бір шалқыған шағы басталады.

- Ойбай-ау, мына құшіктің әлден тұрып кеткені несі, - деп киіз үйден апам шығады. Әжемді мен апа деймін. - Кішкентай ғана құлым менің, ерте тұрып кеткенің

қалай? - деп апам мені қолымнан жетектеп алады. Мен тырмысып, үйге басқым келмейді. Әлгі бір күн шоқыдан шығып келе жатқан шақтағы ғажайып суреттен айрылғым жоқ-ақ.

- Жүр, қымыз құйып берейін, ақыр ерте тұрыпсың ғой, - дейді апам. Мен жалаң аяғымды тасқа тіреп, тыртысып бағамын. Сөйтсем кәрі апам: - Жүрмесең мейлін, қымызды түк қалдырмай өзім ішіп қоямын, - деп үйге кіріп кетеді. Сонда барып мен бақыра жылап апамның соңынан тұра

жүгіремін.

Кайран, балалық-ай десенші! Алыста қалған арайлы адаптацияның менің. Онда мен кіп-кішкентай сәби едім. Ал айнала таулар да, үйлер де, қойтастар да, жылқылар да - бәрі-бәрі үлкен болатын. Адамдардың бәрі «айналайыннан» басқа сөзі жоқ, кілең мейірімді жандар болып көрінетін... Қария кісілердің сакалынан қасиет-қадір белгісі көрініп

тұрап еді маған. Ер міnez жігіттердің кесек тұлғаларынан, шашбаулары сылдыраған қыз-келіншектердің жүріс-тұрысынан мен адамзаттың асқақ сұлулығын түйсіксіз байқағандай болармын. Солардың бәрі мені аймалап, сүю үшін жаратылған жандар сияқты сезілуші еді.

Ол-ол ма, анау аскар таулар, етектегі еңісті шексіз дала, көгілдір аспан, түнде жымыңдаған жүлдыштар, толықсып туған ай, жасыл жайлау - бәрі-бәрі тек мағанғана елжірей қарап, мені ғана аймалап әлдилейтін сияқты еді. Дүние сенің сәби кезінмен көргендегідей өмір бойы қайырымды,

аспаны - күмбез, желі - жібек, әдемі ертек болып тұра берсе, кәне.

Тек оқта-текте ауылдың үстін, тау бөктерін тұнжыр бұлт торлайтын. Бұлт сонда үн-түнсіз шаруақор менің әкеме ұқсайтын. Ал күн күркіресе, апамның ересек балаларына ақырып-зекіргені есіме түсіп, жым боламын. Жаңбыр жауса - жас баланың көз жасындай, кімді аятынымды

білмеймін, әлдекімге жаным ашып, жаңбыр жауса жылағым келер. Биелер шүркырап, құлыштар күтіріп, ауылды айнала шауып еріксіз елеңдетеді. Ала-құйын айдалаға сен де жүгіре жөнелгін келеді. Енді бірде аспанға аң-таң боп қарап қаласың. Буда-буда бұлттар жалы желбіреп шауып

бара жатқан асау айғырлар сияқты. Кейде шөгіп жатқан түйелер сияқты. Кішкентай қолдарынды созып, сол керемет дүниеге ұшып барып, әлгі қанатты тұлпардың жалынан сипалағың келеді. Баланың бақытты шағы сол кереметке сенгенінде шығар. Кейін есейе келе әлгі бұлттың су екенін, күннің қызыуымен бу болып ұшатынын білу қандай қатал. Ертексіз өскен бала - рухани мүгедек адам. Біздің қазіргі балаларымызға әжелері, не шешелері ертек айта бермейді. Содан қорқам. Менің қазіргі келіндерім немерелеріме бесік жырын айта білмейді. Бесіктегі жатқанда құлағына анасының әлди әні сіңбеген баланың көкірегі кейін керең боп қалмаса деп қорқамын. Ал менің кәрі апам Қызтумас маған ертекті көп айтатын, әлди әні көп айтатын. Арада неше заман өтті! Қызтумас апамның сүйегі әлдекашан қурап кетті, ал әлди

ән айтқан үні әлі тұр құлағымда. Бөстекке отырып алып, басымды бауырына қысып, кәрі алқанымен арқамнан томп-томп қағып қойып:

- Балам менің қайда екен?

- Қыздарменен тауда екен.

- Тауда неғып жүр екен?

- Алма теріп жүр екен.

- Алмасынан кәнеки?

- Жаңа теріп жүр екен.

- Қызыл алма қолында

Қыз-бозбала соңында, -
деуші еді-ау.

Кейде қиястықпен қыңқылдан мазасын ала берсем, алдына алып отырып:

Жылама бөпем, жылама,

Жілік шағып берейін,

Жілігінің майы жоқ

Жіпке тағып берейін.

Көк сиырдың сұтінен

Көже жасап берейін.

Оның тұзын кім татар

Жыламайтын ұл татар, -

деп мәпелейтін еді. Сол кезде әдемі әнге елтіп жатып балбырап ұйықтап кетер едім.

Қайран сол балалық, қайта келермісің, сен! Кей кезде сол бір алаңсыз балалығыңды аңсан, еріксіз сағынасың. Әлдеқайдан асыр салып, жол шаңын бүркіратып, тұлымын жалбыратып, екі бетін албыратып, дүниені даңғыратып сол балалығым шыға келетіндей, айналана жалтақтай беретін кездерін жиі болады. Алайда бал балалық қайдан келсін. Ойыңа сол шақтардың өрнектері ғана, үзік-үзік бөлшектері ғана, сапырылысқан ретсіз саздары ғана оралады. Сен соны тұшынасың да тамсанасың. Тамсанасың да еріксіз жымиясың. Осы сәтте бір шеттен балалық дәуірдің бір елесі де жымышп түрғандай сезіледі.

Біздің кейде өткенді еске алсақ, тұтас тұлға ізден, бүтін бір жүйелі оқиға ізден, кесек-кесек кереметтер ізден, ерекше мән беріп қарайтынымыз бар. Дәл осы өлшем балғын кезге келе бермейді. Өйткені бала жүрегі, бала көңілі, бала ойы алғашқы көргенін, алғашқы сезгенін, алғашқы тұшынғанын қаз-қалпында, тұнық күйінде болмысына ұйытып алады да,

сол қалпында сақтай біледі. Бала қиялы ол көргендерінен көлемді ой түйіп жатпайды, қайта үзік-үзік үміттің өзінен

рахат сезімге бөлене береді. Дәл қазір менің көз алдыма да сонау сәби кездегі қызық пен қуаныштың елестері түйдек-түйдек жаңғырып, жанымды жай таптырмай отыр. Көзге ыстық көне суреттерді қайта қарағандай, соның бір-екеуін келтіре кетейін.

...Міне Үбіан әпкем үлкен үйден шықты да, қазан басына бет алды. Мен оны көре сала борсандал, сүріне-қабына еркелей жүгірем. Әпкем аяғымды жерге тигізбей қағып алып, аспанға көтереді. Мен сықылықтай берем. Әпкем биікке мені бой создырып мәз болады. Соңан соң ол кенет ет бауыры елжіреп мені қамзолының омырауын ашып, қойнына жасырып алады да, жүгіре жөнеледі. Бауыр құшағы қандай ыстық еді, шіркін...

Енді бірде ортанышы әпкем Әлиман мені ойнатып жүріп, үйдің ескі-құсқысынан дөңгелек қора жасады. Сол қораға еліктіріп әкеп қамап, аузын ермен бекіткені бар. Өзі көрші қыздармен кетіпті. Содан қоршаудан шыға алмай, жалғыз өзім бакыра беріппін, бакыра беріппін. Бұл «азаптан»

женгем келіп құтқарып, «әй, жаман қыз-ай!» - деп әпкемді жазғырып, мені әлдилеп еді. Көпке дейін ортанышы әпкемді жек көріп жүрдім...

* * *

Өлі есімде... Әкемнің кенже інісі мені оң алақанына тік түрғызып алып, алты қанат үйдің ортасында арлы-берлі жүріп алды. Мен болсам зәре құтым қалмай қорықсам да, тіземді бүкпей қаздырып тұра беріппін. Көкем «Қаз! қаз!» - деп өзімен-өзі. Атамның ескі тұлкі тұмағына отырғызып, мені керегеге іліп қойған да сол көкем ғой. Өзі киізге жайғасып алып ұзак уақыт әуестікпен әурелеп еді. «Ал, кәне, балапаным? Қанаттанып қашан ұшасың?..» деп қояды. Мен қыңқылдан жылай бастағанымда, «дуана келіп қалады» деп қорқытқан... Содан бастап көкемнің көзіне түспеуге тырысатынмын...

* * *

Әкем базардан келе жатқан. Үлкен әпкем мені әкемнің алдынан алып шықты. Әкем қоржынды түзулеп, ерге мені отырғызды. Жалма-жан ердің қасынан шап беріп ұстай алдым. Әкем ат тізгінің жетектеп келеді.

Үйге дейін отыз шақты қадам болса да, мен ердің екі жағына алма кезек ауытқып, қоржын ішіне сырғып түсе бердім. Әкем рахаттана күліп алып қайтадан ерге отырғызады. Әпкем болса қатарласа жүріп: «Қорықпа, қорықпа! Берік отыр!» - дейді.

Бұл менің ат жалына алғашқы қол артуым еді.

* * *

Тағы бір жай ойыма оралады... Киіз үйдің төрінде бір топ ауыл ақсақалдары жамбастай жайғасып баппен қымыз ішіп отыр екен... Әкем дастарқан шетінде қымыз құйып отыр. Ол мені ымдаш шақырды да құлағыма: «Сен немене, аталарыңа сәлем беруді ұмытпа дегенім қайда?!» - деп сыйырлады. Мен қатты қызарақтап, үйден шыға жөнелдім. Сыртта біраз тұрдым да, нық басып үйге қайта кірдім. Көпшілікке қол қусырып тұрып: «Ассялам алейкум, аталар» деп әр сөзді

қадап-қадап айттым. Бұған, әрине, бәрі құлісіп жатыр. Әйткенмен мені араз етіп алмау үшін бәрі де бір ауыздан «әлейкүм салам!» десті. Соңан соң әрқайсысы маңдайынан сипап мақтайды. Жақсы сөзге мәз болып мен әкемнің тізесін ала жайғасамын. Ол басымнан сипап отырып: «Жарайсың,

балам! Үйге кіргенде әрқашан ұлкендерге сәлем беруді ұмытпа. Әдепті бала сүйтеді», - дейтін.

* * *

Әкем маған ата-тегіміздің аты-жөнін үйретуші еді.

- Кімнің баласысың? - деп сұрайтын ол.
- Мен Момыштың ұлымын.
- Момыш кімнің баласы?
- Момыш - Имаштың баласы.

Осылайша жеті атаға дейін жетелеп отырып санатады. Ал келген қонақ ең алдымен атымды сұрайтын. Соңан соң менің жеті ата жөніндегі білімімді тексеретін. Ел танудың басы ең алдымен осылай басталатынын ол кезде кім білген.

* * *

Әжем малдың «тілін» ұғуды үйретуші еді. - «Қозы маңырайды, бұзау мөнірейді, құлын кісінейді, бота көзі мөлдіреп аңсайды, қодық ақырады...»

Әжем маған зұлым қасқыр, жымысқы тұлқі, дәрменсіз қоян, сүйкімді құс, сұрапыл сұңқар жайлы ертегілер айтатын...

* * *

Кавказды аралаған кезімде үш күн қатарынан ашық аспан астында түнегенім бар. Соңда ұзақ уақыт ұйқым келмей елес қуып, өмір өткелдерінің теңізіне жүзіп кеткен кездерім көп болды.

Сол өткелдердің көбіне аялдамай, балалық шағым мен әскери өмірімнің белестеріне қайта-қайта көтеріле бергенімді өзім де аңғармай жаттым. Қасымдағы серіктерім үйқыда жатқанда, мен ұшып тұрып әлгі елестерімді, ойға түсken оқиғаларымды қағазға түртіп алғым да келді. Алайда оған жарық қайда. Мен тек аспанға қарай бердім. Менің шарасыз күйімді түсінгендей жамыраған жұлдыздар жан-жақтан жымыңдап көз қысады. Әлдеқайда алыс тоғай ішінен, тау жынысының тыныштығын қорғағандай, үкінің үні құлаққа келеді. Қылаусыз ашық аспан... Жарқын құлкісі жүзін жайнатып жібергендей биіктे ай баяу жылжиғы. Майда, мамық сыйбыр бар - бұл тұнгі үйқыдағы ағаштардың тынысында секілді... Өркеш-өркеш жота. Жоқ, бұл қаз тізілген түйелердің өркешіндегі елестеді. Сонау көгілдір аспан жиегінде шөккен түйенің өркештері көз алдынан кетпей тұрып алды... Бұл Алатаудың айғыз-айғыз шыңдарына тіпті де ұқсамайтын еді. Нағыз алып өркештер көргендей болдым. Сол сэтте тағы да бала кезім ойға оралып еді...

Онда мен бесте ме, әлде алты жаста шығармын. Әжеммен бірге жатушы ем. Әже құшағы қандай ыстық, қандай мейірбан десенші. Көзім үйқыға кеткенше, әжем айналып-толғанып арқамнан қағып жатқаны. Еркелеп жатып қалғып кеткенінді өзің де аңғармай қаласың. Бір қүн тұн жарымында оянып кеттім. Орнымнан сездірмей тұрдым да, әжемнің төсегінен алыстай бердім. Ондағы ойым қораның екінші бетіндегі әкем жатқан үйге бару еді. Екі үйдің ортасында иін тіресіп,

мойындарын көкке созған күйі маңғаз түйелер жатыр екен. Жұндері ұлпілдеп тұнгі самалға желпілдегендегі сезілді. Түйелердің арасымен жүріп келе жатып мен мамық жұнді ақ ботаның қасына еріксіз тоқтадым. Осы жерде отырып жұлдызы аспанға телміріп ұзақ қарағаным есімде. Ай мені еркелете құлгендегі сезілді. Ал қаз тізілген түйелердің өркеші тау жоталарындағы көлбендең көрінгендей еді. Тұннің тымықтығы сонша, мен боталардың баяу демін айқын естіп

тұрдым.

Мен әкеме келе жатқанымды ұмытып, осы жерде таңырқап тұра беріппін...

Ертецине үйдегілер мені екі ботаның ортасында ұйықтап жатқан жерімнен тауып алды. Әкем мейірлене құлліп алды, ал әжем қатты ашуланды. Содан бастап әжем үйдің есігін бекітіп алатын болды...

Осы бір алыста қалған балалық шақтың бал тұні сұрапыл соғыс кезінде елестер деп үш ұйықтасам түсіме енген емес еді. Алайда қан майданда жүріп мен сондай тұнды елестеткенім бар. Өзімді көп өркештің ортасында, тау ішінде, нұрлы айдың аясында баяғыдай кіп-кішкентай сәби

сәтімде тұрғандай сезіндім...

Сөйтіп мен бес жаста едім. Ауылымыз Алатаудың Ақсай және Көксай шатқалынан төмен ауып, жаз жайлаудан Мыңбұлақ ойпаңына келіп қонып жатқан. Бұл жер шебі шүйгін, айналасы ашық, жалпақ жазық. Сол жазыққа аулымыз жағалай үй тіге бастады. Ерте күздің еріншек

күні қоңырқай жылуын себелейді. Ел іші көші-қоннан әлі басыла алмай абыр-сабыр. Көз жеткен жердің бәріне мал қаптап, жағалай жайылып жатыр. Үлкендер қамқор тірліктің қамымен жүргенде біз емін-еркін ен жазықта жалықпай ойнаушы едік-ая. Өстіп жүріп есейе бергенімізді де аңғармай

қалыпты. Даланың «дарқан балабақшасынан» қол үзер сәт жақындай беріпті.

* * *

Кейде менің өнеге алған, тәлім үйренген, дәріс оқыған ұстаздарымды еске түсіріп ойға бататыным бар. Сондай шырын шақтарда ең алдымен ата-аналарымның бейнесі елестейді. Солардың уағызы басымырақ бола береді...

Өйткені есейе келе көрген көп ұстаздарым талай-талай тағылымға бой ұрғызғанымен, солардың бірде-бірі нақ өзімнің әжемдей, әке-шешем мен ауылдың қадірлі ақсақалдарындағы өсиет айдынына жүздіре алған жоқ, молынан құлаш сермете алған жоқ десем, ардақты ұстаздарымның қөніліне келмес. Бұл сезім өзіме қанымның тартқанынан немесе жақыныма сезімімнің бөлектігінен,

әлде ата-анаға деген парызымның молдығынан ғана туып отырған жоқ. Өмір шындығының өзі ақиқатқа бас ұрары даусыз. Дүние тарихы, жаратылыс шежіресі, жан-жануар болмысы жайлы алғашқы әңгімені әжемнен естігенімді, адамзат қауымының қалыптасуы туралы тұңғыш мағлұматты әжемнен алғанымды қалай ғана ұмытармын... Иә, әлемнің пайда болуы, тірлік дамуы, адамзаттың шығуы, өмір жайлы шынайы сезіммен азаматтық тұрғысындағы жан баурайтын аңыздарды айтқан; ненің жақсы, не жаман екенін, нені сүйіп, неден аулак журуді үртеткен; ар заңының, әдеттің жинағынан алғашқы тарауларды таныстырған да, ең алдымен, ата-ана, ағайын-туған еді. Эрине, ол кезде мен де өзге сәбілер сияқты әжем айтқан ертегі мен аңыздардың

түпкі байыбына бара бермейтінмін, әке әңгімесінің өсиетін ұға бермейтінмін және үлкендердің талай-талай өнегесін орындаі бермейтінмін... Ол кезде мені қызықтыратыны ертегі-аңыздардың ғажайып оқиғалары еді... Енді, міне, есейіп ер ағасы болғанымда ойласам, мен сол әңгімелерден

адамзат өресінің өрісін тани берген екем гой...

Менің ұстаздарым әріптен бастап буынға дейін, соナン соң ақ қағазға қаламмен өрнек жазуға дейін үйретті. Келе-келе жүйелі оқып, есепті жүйрік шығаруға қол жетті... Ал өмірдің өзі ше? Осынша ғұмырымның ішінде түрлі- түрлі күрделі жағдайда; толқыналы тоқсан сырлы кезенде

кездесіп дидарласқан, тағдырлас болған, табақтас болған адамдар ше? Мамыражай сэттерден мазасыз майданға көшіріп, көбік шашқан өмір дариясының бір толқынынан екінші толқынына аямай лақтырған уақыт ше? Осының бәрі де менің тірлігімдегі тірек болған, жүрек болған, қол ұшын берген, қорған көрсеткен ұстаздарым деп білем. Осындау уақыт талқысы ғана, өмір өткелдері ғана, тірлік тізбегі ғана менің әжемнен үйренген «жақсы», «жаман», «макұл», «немакұл» деген сөздердің байыбына терең бойлата алды.

Әжемнің «осылай болған екен» деген сөздері мені бірде ғасырлардың шынырауына сапар шектірсе, бірде күс қанатында демеп ілгері ұмтылдырыды, биікке самғатты...

Міне, енді өзім де әке болып ұл өсіріп, қыз өсіріп отырғанда, немере сүйіп мейірленген сәттерде, олар да маған аңғал да адал, бірақ құштарлыққа толы шынайы сұрақтар береді. Тағы сол сәтте осы балаларымның дәл менікі сияқты ғұлама әжелері азайып бара жатқанына қайта

екінем, қабырғам қайысады.

«Қаншаға келдің, қарағым»... - деп қай баладан сұрасаң да, өз жасын мақтанышпен айтатыны мәлім. Қазір жыл сайын баланың туған күнін тойлау дәстүрге сініп болған

әдет. Ал менің балалық шағымда туған жылды, туған күнді емес, мүшелді кезеңдерді тойлаушы еді. Алғашқы мүшел - нәрестенің қырқынан шығатын күн. Бұл күні үй ішінде емес, ауыл-аймақта да көтерінкі көңіл, көп шаттық үстем болатын. Екінші мүшел - баланың жеті жасқа толған күні. «Жетіге келгенше бала жерден таяқ жейді» деп тегін айтылмаған ғой. Сол жетіге толған күні өрен аяғын жерде нық басты деп санайды. Азаматтыққа аттанар жолдың алғашқы қадамы да осы жерден басталса керек. Ата-ана мен төнірекке бұл үлкен қуаныш. Ендігі мүшел - 13 жас. «Он үште отау иесі» деген мақал бар. Бұл енді онды-солынды тани бастадың,

ер санатына іліктің, сенімен есептесер, ақыл бөлісер кезең келді деген сөз. Енді сен өзгенің жетегінен гөрі өзің тізгін ұстағанды, өзің ат жалын тартып мінгенді қалайсың. Азамат

мүшелінің алды осы. Ең ақыры толықсыған жігіт шақтың мүшелі - жиырма бес жас.

Әкем маған жастайымнан қазақша жыл қайыруды, күн мен ай аттарын, жыл аттарын жаттатты. «Тышқан жылды, сиыр жылды, жылан жылды, жылқы жылды, мешін жылды, тауық жылды, доңыз жылды, қоян жылды, қой жылды, барыс жылды, ит жылды, ұлу жылды» деп жаттаушы едім. Алайда әкем сол жылдардың мәнін, неліктен осылай аталатынын түсіндірген емес. Бірде әкеме жаттағандарымды жаңылмай айтып бердім. Ол мені мақтап арқамнан қақты. Осы мақтауга

масаттанып, әжем отырған үйге жүгіре жөнелдім. Сондағы ойым - білгенімді тақпақтап, олардан да құптау сөз есту еді...

Үй іші қоңыр салқын екен. Әжем қос сабаумен тулақты кезек-кезек тарсылдатып жүн сабап отыр. Сабау дыбысына құлақ тоссан, әлдебір әуен сазын ойнағандай сезіледі. Екі әпкем мен жиен қызымыз біреуі жүн тасып, екіншісі тулаққа төсеп, үшіншісі ұршық иіріп көмектесіп жүр... Мен дүниені көшіріп жіберердей ентелей келіп, әжемнің иығынан сілкілей беріппін:

- Эже, әже, тоқташы! Не үйренгенімді айтып берейінші.

- Құлым-ау, сабыр етші. Мен жүнімді сабап болайын. Сонан соң асықпай тындаимын ғой, - дейді әжем еркелетіп.

Енді менің екпінім бәсендеп, әжемнің қасына отыра кеттім де, жұн шашып ойнай бастадым. Кіші әпкем түйдекті жұлып алғып итеріп жіберді. Қатты ызаланып мен оны «маймылсың» деп келемеждедім. Әпкем өкпелеп жағымнан тартып жіберді.

- Неге маймыл дейсің?

- Өйткені сен маймыл - мешін жылы туғансың.

- Ал онда сен доңызысын. Өйткені сен доңыз жылы туғансың! - деп әпкем маған тілін шығарып келеке етті.

Мен шыдап тұрайын ба, ызаға булығып әпкеммен жұлқыса кеттім. Әжем мейірлене күліп, екеумізді арашалап жур.

- Құрманқұл қай жылы туған? - деп сұрадық біз.

- Тауық жылы, - деді әжем.

Құрманқұл тұлымы желбіреген жіп-жіңішке нәзік қыз еді.

Бәріміз енді оны «жұнін жұлған тауық» деп мазақтадық.

Құрманқұл сөз таба алмай жылап жіберді...

Сонда ғой, әжемнің бәрімізді отырғызып ыстық күлше үlestіргені. Сөйтіп өзі ортаға отырып алғып әдемі ақыз айтып еді-ау.

- Балаларым, құлақ салып тындаңдар. Көңілге түйіп, ұғып алыңдар. Жаппар ием жарық дүниені, Күн мен Айды, жарық пен қараңғыны жаратарда күнге, аптаға, айға және жылға ат қоюды ұмытып кетіпті... Жер бетіндегі тірі дүниенің бәрі, жан-жануар күн санауды, уақыт өлшеуді білмей бейберекет жүре берген екен. Ақыры дүниенің сапырылысқаны сонша, тіpten кімнің үлкен, кімнің жас екенін ажыратудан қалыпты. Жасты бойға қарап өлшейтін болыпты. Кімнің бойы ұзын болса, үлкені сол деп есептеліпті. Қытымыр қыс қашан түсіп, көгілдір көктем қай кезде келерін, жадыраған жаз мөлшерін, берекелі күз кезеңін ешкім де ажырата алмайды екен. Сондықтан қой мен түйенің

жұні түлемей сабалақ боп жүріпті. Адамдар болса, қойдың өлі жұнін, күзем жұнін қырқуды да білмепті. Жаратушы ием, осы сан-санапалақ сапырылысқан тірлікке зер сап тұрып,

дүниеге көңілі толмайды. Сондықтан да адамдарды саналы тірлікке үретпек болады. Адамдар уақытты өлшей білсін, уақытпен санаса білсін, уақытты қастерлей білсін, ол үшін айды аптаға, аптаны қундерге, ал жылды он екі айға бөлу керек деп түйіпті тәнірі. Сонда адамдар мал төлдеп, аққа ауызы жетер кезді біледі; жұн қырқып, киіз басатын уақытты біледі; жаз жайлауға шығатын шақты сезетін болар депті. Сөйтіп тәнірі әр айды жыл мезгілімен атайдын болыпты. Ал Айға адамдардың көмекшісі бол, жүзінді ашып-жауып тұрып, есеп жүргізуге көмектес депті. Жұлдыздар күн райының хабаршысы болады деген екен.

Осылайша адамзат ұзак жыл өмір сүріпті. Күндердің күнінде жыл мезгілдері қайтадан ауысып кетіп, адамдар жаңылысып қалады. Бір жыл бір жылға ұқсас: көктемнен көктемнің, қыстан қыстың айырмасын аңғара алмай, адамдар аңтарылып отырыпты. Сондықтан да олар өткені ізсіз, болашақтан бейхабар қала берген екен.

Жаратушы тәнірінің жар құлағы жастыққа тимей күндіз- тұні ойға батыпты. Ақыры жан-жануар аң біткенді жинаған екен. Осы жиында өз ойын білдіріпті. Енді есеп жүргізуі он екі ай бойынша енгізетінін айтады. Ол үшін он екі жылдың әр жылын жануарлар атымен ататынын баяндайды. Сондықтан жан-жануар тегіс жазық далаға шығып, таң сәулесін күтсін. Шығыстан күн көтеріліп алғашқы алтын нұры жер бетіне төгілген сәт жыл басы болсын. Сол нұрды

бұрын көргеніңің атымен бірінші жылды атаймын. Екінші көргендерін екінші жылға ие боласындар. Осылайша он екі жануар он екі жылға иеленеді деген екен.

Аң біткеннің барлығы ашық алаңға жиналып, бозала таң атқанша бір-біріне мактана бастайды. Біреулер көзінің қырағылығына, біреулер өзінің жүйріктігіне сеніп, күн сәулесіне бәрінен ерте жететініне шүбәсіз болады. Ал түйе болса маңғаз басып, ырғала ыңыранып, ернінен көбік

шұбыртып, мойнын сан құбылтып, төнірегіндегінің біреуін де көзіне ілмей жатқан екен... «Таласып таусыла беріңдер, бейшаралар, босқа болдырғанша алаңсыз тыныға берейін. Мен сендер сияқты күн сәулесін күтіп шығысқа жүгірмеймін де, көз майын тауысып төнірекке үңілмеймін де. Құба жондай бойым бар, құлаш-құлаш мойнын бар. Осы жатқан күйімде мойнымды бір созсам, бәрің жер бауырлап қаласындар. Күн шапағы шашырарда, мен мойнымды созып жіберіп, жыл басын өзім көрермін әлі. Тәнірден алғашқы жылдың атын өзім алып қайтам», - деп тікенек күйсеп жата береді.

Бишара тышқан өзінің дәрменсіздігін мойындал жанұшыра безек қағады. Мынау жатқан алып түйенің қасында ол өзін құмырскадай сезінгенде, бар болмысы шиыршық ата шиқылдапты. Сонда да жылдан дәмелі немесе емес пе, әркімге жалбарына қарап, жалына сұрақ берумен

болған екен: «Мен қайтемін?! Мен қайтемін?!» - дей беріпті. Тіpten түйенің қасына келіп шыңғыра шиқылдап одан да әлгі сұрағына жауап іздейді. Маңғаз түйе мойнын да бұрмай, ақкөбік жынын тышқанға бұркіп жіберіпті де былай депті: «Масадай болған бишара, мазамды алмай

көзінді жоғалтшы. Сенің бойың шөптен де аласа, шөңгемен тең емессің бе? Кеуденде жаның бар демесен, кесек құрлы мыжып кетуге жарамайтын сорлы, сен жылдан дәметпей-ақ жайына жүрсөң қайтеді...» - деп көзін жұмып ыңыраныпты түйе.

Тымық тұн төніректі әлдилеп, дүниені төп-тегіс маужыратқан кез орнапты. Соңан соң көгілдір аспанның көздеріндей болып жүлдышдар ойнақшыпты. Сар далада тек қана әлсін-әлсін алыстан шиебөрінің ұлыған үні естіліп тұрган екен. Онан өзге дыбыс та, онан өзге сыйыс та білінбепті... Айналаны торуылдаған аң біткеннің бәрі

күншығысқа қадалған күйі көз ілмей күткен екен...

Міне, таң арайы таңдайланып алыс көкжиекті ақ сүтке шомылдыра бастапты. Тұнімен тағатсыз күткен жан-жануар безек қағып берекесі кетеді. Біреуі мойнын созып, бірі

секіріп, алғашқы сәулені алдымен көруге арпалысып жүр. Ку тұлкі болса құйрығын бұлғақтатып әр түстан жылт етіп бой көрсете береді...

- Е-е, осыларды қойшы... Маған не асығыс бар, - деп есінепті түье.

Кенет оның төбе тұсынан шіңкілдеген үн естіліпті:

- Мен көрдім, мен көрдім. Алтын сәулеге шомылған ақша бұлт көтеріліп келеді.

Бұл - түйенің төбесіне шығып алып бәрінен бұрын жыл басын көрген тышқан еді.

- Үнің қайдан шығып тұр, құмалақтай болған сен бәленің? - деп бұрылыпты түье.

- Мен сенің төбенде түрмүн. Бәрі анық, бәрі әдемі көрінеді екен. Алғаш көрген өзіммін, жыл басы да өзіммін, - деп тышқан мәз болып шиқылдапты. Ашулы түйе басын сілкіп қалғанда, байғұс тышқан атқан кесектей ұшып «мен бірінші көрдім» деп айқайлаған қүйі алысқа топ ете түскен екен.

Жыл басы тышқаннан басталатыны содан, құлындарым. «Түйе бойына сеніп, жылдан құр қалыпты» деген мақал осыдан шыққан ғой. Кейде «түйедей бойың болса да, тышқандай ақылың жоқ» деп неге ұрсады дейсің адамдар. Бұл бойыңа сенбे, ойыңа сен, мақтан сөзге ерме, мағыналы тірлікке ер дегені. Сондықтан түйеге ұқсап орынсыз тұксие бермендер, шырақтарым. Ақылға жүгініндер, - деп күліп еді әжем.

Осы сэтте үйдің шаңырағынан бір қарлығаш ұшып кірді. Мұны сезген ұядағы шақалақ балапандар аузын ашып қорек тілей бастады. Бәріміз де төбеге қараппыз. Қарлығаш төбедегі

ұясының шетіне жайғасты да, балапандарын кезектеп жемдей бастады. Алғашқы шақалақтың аузына жем тастан жіберген қарлығаш қайта ұшты. Қарлығаштың аспанға тік атылып, қанат қақпай қайтадан төмен құйылғаны шаңырактан айқын көрініп тұр. Қөп ұзамай ол екінші балапанға жем

әкелді. Осылайша қалқып ұшып, қайта кіріп қанаты талды ма, ақырғы балапанын жемдеген қарлығаш енді ұя аузында отырып тарана бастады. Шіркіннің сүйкімдісі-ай. - Фю-ю! - деп ысқырып жібердім де, әжемнің сабауын ала салып, қарлығашқа сілтеп үркіттім.

- Е-е! Жаман бала болмасаң етті! Бұзақының тірлігі ғой мынауың, - деп әжем қолымнан ұстай алды. - Қарлығашқа неге тиесің? Бұл киелі құс екенін, адамның досы екенін білмеуші ме ең, сен бейбақ? Балапанын емін-еркін ұшырып, бақытын тапқанша, бұл құс менің үйімнің төріндегі ең қадірлі қонағым ғой... Қонағыма қол көтергенің - мені де сыйламағаның емес пе, шұнағым, - деп ұялтып таstadtы.

Қыздар мені мұқатқанына мәз болып құліседі. Сонда әжем мені бауырына тартып, маңдайымнан іскеп былай деп еді:

- Қоя қой, құлымынм. Кел, алдымға отыршы, мен саған қарлығаштың құйрығы неге айыр болғанын, масаның тілі неге жоқ екенін айтып берейін.

Мен қуанып кеттім. Өйткені әжемнің әңгімесі ерекше баурап, жанымызды жайлап алатын:

- Ұлы патша Сүлеймен деген өтіпті баяғыда, - деп бастайтын әжем әңгімесін. - Ақылы асқан, жер бетінде де, су астында да, аспан әлемінде де әділдігімен әйгілі екен. Патша барлық жан-жануардың, құрт-құмырсқа, бақа-шаянның, балықтың тілін біліпті. Құндердің құнінде патшалығына жау шауып, әлек салғанда, жау бетін у себелеп қайтарған жылан екен. Бұл баға жетпес ерлікке риза болған Сүлеймен патша жыланға:

- Қалауынды айт, не тілесең соны берем, - депті.

- О, ұлы патшам, - депті жылан ұш оралып жатқан күйінде басын қаздитып, - жалғыз-ақ тілегім бар. Мен және менің ұрпақтарым жер бетінде ең тәтті қанды сорып өтсе деп тілеймін...

Сүлеймен біраз ойланып қалыпты. Алайда хан сөзі қашан да біреу емес пе.

- Айтқаның болсын. Кімнің қаны тәтті екенін өзің ата, - деген екен.

- О, ұлы патшам, - деп шағыныпты жылан, - кімнің қаны тәтті екенін мен қайдан білем. Мен бір құдайдың сүйкімсіз жаратылған жәндігі емеспін бе. Көргеннің бәрі жиіркене жиырылады, бар денем тастай, өн бойымда жылу жоқ, ешкімнің мейірімін көре алмай, ешкімнің құшағына ене

алмай қалған жексүрүн бейбақпын ғой. Қауыз-қауыз алапес денемді көргенде, тірі жанның бәрі тітіркеніп теріс айналады. ұшарға қанат жоқ, жүрерге аяқ жоқ - бауырмен жер сыйған

бишарамын. Кусам жете алмай, қашсам құтыла алмай қор бол жүр емеспін бе? Тіптен күн сәулесінің өзі менен қашып, тайфанақтап тұрмайды. Амалсыз құмда қыздырынып ұзақ уақыт жатқаным. Аяғы барлар алыстап қашады. Қанаты барлар қалықтап асады. Осы мұсәпір халіммен кімнің қаны тәтті екенін қайдан білейін? Басқасын былай қойғанда, Алла Тағала сілекейімнің өзін у етіп жаратыпты!

Әділетті Сүлеймен әбден ойланыпты. Тірі жанның қай-қайсысын болса да азапты өлімнің аузына апарып беру онай дейсің бе. Сүлеймен патша соны ойлап көп кідіреді. Амал қанша, уәденің аты уәде. Патша жарлығы екі айтылмаған. Уәдесін қайтып ала алмайды. Не де болса орындау керек.

Содан патша ине тұмсық шаққыш жәндіктерді шақырыпты да, дүниенің төрт бұрышына жұмсапты. Ұшып жүріп, жан-жануарды шағып, қанын сорасындар, сонаң кімнің қаны тәтті екенін анықтап қайтасындар деп жарлық етіпти. Патша жарлығын бұлжытпай орындауға шабармандар

ұша жөнеледі.

Содан талай күндер өтеді. Шабармандар қан татып, қара біткеннің бәріне қонады. Кеудесінде жаны бардың бәрі тегіс келер хабарды қалтырап күткен екен. Бақытсыз күн қайсысының басына орнарын білмей, жандарын қоярға жер таппапты. Жылан тілінен, жылан уынан өлуді кім тілейді дейсін.

Осындай үрейлі уақытта қарлығаш күн сайын қанаттының бәрінен бұрын аспанға ұшып шығып хабаршылардың алдын тосумен шолғын шолады. Бір күні ол салпақтап ұшып, самарқау ызындалап келе жатқан хабаршы масаны көріпті. Хабаршы біткеннің алды осы маса еді. Қарлығаш оны көріпті де, алдынан қарсы шығыпты. Жай білуге асығып, жайдары амандақан болыпты.

- Аманбысың, масажан... Басынан бақ кетпесін. Сапарың оң болды ма? Сүлеймен патшаның қарауындағы аспан мен жерде, тау мен көлде, жазық пен жапанда қандай жаңалық бар екен? Не көріп, не білдің? Не тұшынып, не түйдің?

Маса қарлығаштың сәлемін көнілді қабылдамай, әңгіменден тайқып, патша жарлығын орындалап келе жатқанын, енді соны естіргуте асығыс екенін білдіріпти.

- Онда мен сенің жолсерігің бол ұшайын. Әңгіменді де жолай естірмін, - депті қарлығаш.

Екеуі қатарласа ұшып келе жатқанда маса қарлығашқа әңгімесін айтыпты. Сүлеймен патшаның жарлығын қалай орындағанын мақтана баяндапты.

- Сонда кімнің қаны бәрінен де тәтті екен? Есіткенше мен де құмартып барамын,- депті қарлығаш.

- А-дам-ның қа-ны! - деп маңғаздана ызындаиды маса.
- Жо-жоқ... Сен алдап келесің! - деп шошып кетеді қарлығаш.

- Ант етемін! Өтірік айтсам, Алланың аспаны төбеме құлап түссін. Адамның қанынан тәттісі жоқ. Тілімнен дәмі әлі кетер емес...

Кәне, тілінді көрсетші!

Ақымақ масса тілін шығара бергенде, қарлығаш оның тілін көмейімен жұлып алыпты. - Өтірік айтқанның тілі осылай кесіледі! -деп қарлығаш қуаныштан сайрап жіберген екен.

Мұнан кейін ол өзге шабармандардың да алдынан шығыпты өзгелердің де жауабы масаның жауабындаидай бол шығады. Адамға жаны ашыған қарлығаш сонаның да, араның да, көк

шыбынның да тілін суырып алыпты.

Хабаршылар түгел жиналып болғанда, Сүлеймен патша тағына келіп отырған екен. Ол алдымен масаға сұрақ қойыпты.

- Ал, кәне, кімнің қаны тәтті екен. Соны айтшы?

Маса тіл қатпақ екен, бірақ «вз33» деп ызыңдағаннан басқаға шамасы келмепті.

- Немене, маспысың? Тілің жоқ па өзіңнің? Түсіндіріп айтшы.

Тілі жұлынған маса «вз33» деуден аса алмаған екен. Масадан мардымды ешнэрсе шығара алмасын сезген патша әлгі сұрағын араға да, сонаға да, көк шыбынға да қойыпты. Алайда бірі «дз33», бірі «жжжж», бірі «жжуу» деп төніректі ызыңға толтырып жіберген екен.

- Бұларға не болған. Мына ызыңнан бірдеме ұққандарың бар ма, сірә, - деп Сүлеймен патша ашу шакырады. Сол кезде қарлығаш топ алдына ұшып шығыпты да, патшаның

аяғына бас иіп былай депті:

- Мен түсіндім. Ұлы патшам, бұлардың бәрі де бірауыздан бақаның қаны тәтті деп түр.

Сүлеймен патша тағынан тұрыпты да, жарлығын бекітіпти.

- Айтқаның болсын! Бақаны саған бұйырттым, жылан еке.

Хан тағының етегінде жатқан жылан алас ұрып жынданғаны сонша, тіптен өз уына өзі шашалыпты.

- Қарлығаш алдап түр. Бұл жалған! - деп ысылдапты жылан.

- Айтқаның болсын, - деп қайталапты Сүлеймен патша.

- Патша жарлығы екеу болмайды. Бақа қаны бұйырды саған.

Сонда айбарлы жылан қарлығашқа тап берген екен. Алайда қарлығаш қанат қағып үлгіріпті. Тек жылан оның құйрығын тіліп өтіпти.

Міне, қарлығаштың құйрығы содан айыр болған деседі, ел аңызы, шырақтарым. Ал маса, сона, шыбын, араның аузынан адам қанының дәмі әлі кетпепті деседі аңыз. Сондықтан да

адам сәл мұзғып кетсе, әлгілер үйіріліп келіп шағып кетеді екен, - деп әжем ақжарқын кейіпмен күлді де, мұрнымнан шертіп қойды. - Енді түсіндің бе, ботам?

Содан бастап мен таңертең көз ашқаннан ел үйқыға кеткенше қарлығаштың сайрауына сұқтанып, дос сезіммен қамқор боп жүретін болдым.

Әжем айтқан аңыздың тағы бірі ойыма оралып отыр... Бірақ оны кейінірек баяндармын...

* * *

Момынқұл көкем атам мен әжемнің ең кенже баласы екен.

Ұзын бойлы, сұлу, сымбатты, дөңгелек қара көзді, кертпе мұрындау, астыңғы ерні дурдіктеу, аққұба жігіт болатын.

Әжеме өз ұлының осы дүрдек ерні мен кертпіш мұрны ұнамаушы еді. Жайшылықтың өзінде жаратпай қымсынып отырғаны. «Тәнірдің мұнысына амал бар ма. Бір биеден ала

да, құла да тua береді деген осы да. Эйтпесе өзіме тартайын деп-ақ түр екен ғой», - дейтін ол. Оның есесіне көкем әжемнің ең еркесі, ең сүйікті болатын. Кенженің аты кенже ғой. Әжем оның көптеген қыңыр қылыштарын, бұрыс мінездерін кешіре беретін. Кейде сондай шалдуарлығына

күйіп кетіп жазаламақ болғанда, көкем іргедегі үйге зып беріп кетіп қалушы еді. Қайтып келгенше, әжемнің ашуынан жүрнақ та қалмайтын. Әйтеуір көкеме келгенде әжемнің ұмытшақтығы да ұлғаяды. Қайта айналып соққанда көкемді еркелетіп отырғаны. Көкем әлденені бұлдіріп көпе-кернеу тайрандал жүргенінің өзінде, әжем басын шайқап тіл қатып отыра беретін.

- Ай, тентегім! Ай, тентегім! Кімге ғана тарттың екен? - дейтін өзіне-өзі. - Әкең жуас еді... Құдды нағашы көкене, менің Серкебай ініме тартқансың ғой сен. Серкебай да төнірегін шаңдатпаса журе алмайды.

Әжемнің ашуы одан әрі аспайтын. Мұнысы кейде ашудан гөрі сүйсінуге ұқсан тұрушы еді. Ерке баланың жөні бөлек қой, шіркін! Анасының еркесі болғанға не жетсін!

Жас кезінде көкем шынында да шектен шыққан ерке, қолды-аяққа тұрмайтын мазасыз еді. Жаяу жүрсе, екі иығын жұлып жеп, сермен қолы айналасын адақтап жүретін. Атқа мінсе, жау шапқандай құйындастып, ай-шайға қарамай, ой-шұқырды елемей еліріп алатын. Атқа қарғып мініп, шауып келе жатқанда қарғып түсетін. Атқа да, аяққа да батыр еді.

Жаз айының мамыражай кеші еді. Алтын күн құлан тауына иек артып, төнірекпен қоштасқысы келмей қызара қиналып тұрғандай сезілді. Батыс жақ нарттанып күлгін шапаққа шомылып тұрған кез. Шақпак, Жабағылы, Бұралдай жондарында сол шапақ бұлаң қаққандай сезіледі. Алатаудың құзар басынан күннің соңғы сәулелері қуат алғандай көзді ұрады. Жайлауды мамық тұн баяу көмкеріп, даланың бояуын біресе қошқылдандырып, біресе бозғылдандырып

жібереді. Ақ самал аңқып тұр. Ауыл іші азан-қазан. Әркім іңір қаранғылығы алдындағы қарбалас тірлігін тамамдауға тырманып жатқан кез. Әйелдер сиыр сауып болып, бұзауларын қазыққа байлап жатыр. Бір шетте қозы көгендереп жүргендері де көп. Беткейде үйір жылқы шүйгіннен бас

көтермей жайылып жүр. Осы кеште жігіттер асау қуып, аласарсанға түсіп еді-ау. Құрық тимеген ту қашаған желмен жарысып жеткізбей-ақ бағады. Ат құлағында ойнайтын

айлакер жылқышы құрығын ептеілеп соңынан қалар емес. Танауынан шыққан дем тас ұшыраңдай жүйткіді. Құрық тиер-тиместе шүркүраған дауысы жайлауды басына көтергендей еді. Жылқышы сонда да ізінен қалмай жүр. Құрық қашағанның жалына жақындаамай жатып асау жалт

береді. Содан жігіттің екі аяғы ат бүйірін далақтай соғып, қайтып қайырылғанша, әлгі қашаған қара жердің апшысын қуырып құрықтан алыстап үлгереді. Ауыл адамдары мынау тосыннан басталған тамашаға түгелдей көз тігіп, өздерінше дабырласып тұр. Арқасы қозып айқаймен айбат шегіп тұрғандары қаншама. Кейбіреудің иығы өз-өзінен құнжыңдаған анау құрықшы жігіттің қимылын құлтайды.

- Енді құтқармайды, - деп айқайлайды бірі.
- Солай-солай... Енді құрық таста, - дейді екіншісі аулақтан ақыл беріп.
- Қап, әттеген-ай, алданып қалдың-ау, - деп қорланып тұрғандар да бар.
- Япырай, жаз бойы жалын сипаттай әбден әккі болған еken, мына асау, - деп өкінеді тағы бірі.

Қара тер боп ат үстінде әлегі шыққан құрықшыны құрдастары қарап тұрып-ақ мазақтайды.

- Оған жылқыны емес, сиыр ұстату керек қой дұрысы.
- Жігіт боп атқа мінген соң, жүгенге иелене алмағаны масқара ғой.
- Өзіңнің шаманды көрер ме еді...
- Одан қайбір ілгерілеп тұр едің сен.

Осылайша ел дабырласып, екеу-екеу пікір таластырып тұрғанда, жылқышы жігіт ат басын игеруге әлі келмей тұрып еді. Енді бері бұрылып келе жатты. Жейдесі терге малынып, желкесі төмен салынып, құйысқаны далақтап, құрығы босқа салақтап жиналған жұртқа ат басын тіреді. Демін әзер алып тұр. Астарындағы аты ақкөбік боп еліріп алған еken. Әлі біраз егеске шамам бар дегендей, көздері ұшқын атып шатынайды. Осы кезде көкем жайдақ атқа қарғып мініп, қашағанның жолына кесе-көлденең қарсы құйындана жөнелгені. Төтелей тартып, төпеп шауып барады.

- Ей, мынауың желіккен бе... желбегей шыққан батырша жөн-жозықсыз шаба жөнелгені несі! Құр асауды құрықсыз ұстамақ па, - десті топ ішінен әлдекім. Өзгелері демін тартып тына қалғандай еді. Өйткені көкем оқыс қымыл жасады. Қашағанмен қатарласа беріп құйрығына жабысқаны сол еді, жерге топ ете түсті. Көз тіккен жұрт шу ете қалды. Аттан құлап майып болды ма деген ой әркімді де бір зірк еткізген еді. Жок, сөйтсем, көкем сол асаудың құйрығынан

ұстаған күйі аяғы жерге тимей бүйірлей тартқылап барады еken. Мұнысы сілтеген тұяқты дарытпаудың амалы еkenін кейін білдім. Бексері бұрандаған қашағаннның екпіні

бәсендереп, осқырына ойқастап барады. Бір мезет асаудың сәл бұрылып шабысын кідіртуі мұн өкем, қас қағымда ат арқасына мініп үлгерді. Сөйтті де жалға жабысып қыбырсыз

жатып алды. Асау болса, жайлау жазығын жалғыз иемденіп беталды жөңкіле берді. Ақыры дәрмені кетіп, дәмсіз шабысқа шыдамады білем, әлгі асау айдалада қалт тұрып қалды. Көз

тіккен жұрт қуаныштан ду ете түсті.

Енді көкем асауды ырқына игеріп, жалынан қақпайлап бізге тақай берді.

- О, аруақ, сақтай гөр!
- Тіл-көзден аулақ, әйтеуір.
- Азамат деп осыны айт.
- Диюға да құрық тастар құдірет иесі болар.
- Не де болса епті екен, шіркін!

Жұрт осылай желпінісіп тұрғанда асауды аяңға салып көкем де келді.

Көкем мақтауды жек көрмейтін. Сол мақтауға ілігем деп ол от пен суға орынсыз қойып кетуден тайынбаушы еді. Ол мықтымын деп жүктің ауырын көтеретін. Қуреске де даяр тұрады. Жаяу жарыстан да қалған емес. Не керек, соның бір де бірін берік тұтынып, үдесінен шықпайтын. Осыған орай оның ел қойған аты да көп еді: «Епті», «Алаңғасар», «Қаракүш», «Таубұзар» - сияқты аттың талайы көкеме үйір болатын. Шынында да, ол бапкері жоқ тұлпардай, байлаудағы сұңқардай өзіне-өзі сыймай жүретін. Ат үстінде де, қаражаяу кезінде де қарап жүрген сәті жоқ-ты.

Қашан да ел көзіне түсіп, ерекше бір қырымен екшелене беретін. Осында мазасыз мінезі оны талай-талай тасқа да соқтырды.

Көкемнің көкпар десе арқасы қозып тұратын және сол көкпардан бір жерін жараламай қайтқан кезі жоқ шығар. Бір рет бұғанасы шығып келді, енді бірде - аяғы сынып қайтты, ал есінен танып, ел жігіттері көтеріп келгенде, зәре-күдітімиз қалмаған кезі де болған. Бірақ басын көтерісімен сол баяғы аласапыран тірлігіне сұңғіп жүре беруші еді. Толғақ азабын тез ұмытқан әйел сияқты, көкем көрген тауқыметін елеу дегенді білмейтін. Сақтанып жүру санасына да кірген емес.

Жаны ауырып, жамбасы төсекке тигенде кейде тістеніп жатып қатты ыңырситын. Сонда бәйек болған әжем шыжғобектеніп көзіне жас алатын:

- Сен тентек, мені ажалымнан бұрын өлтіретін болдың ғой. Әр жарақатың мені жегідей жеп, белім бүкірейіп бара жатқанын, аясан етті тым болмас! Қандай жын екен сендері алыш-ұшып тұрған. Қайтейін, шырағым, аман бол әйтеуір.

Сонан соң лезде ренішін ұмытып, әжем баяғы қамқор пейіліне көшуші еді.

- Қай жерің ауырады, құлыным? Сусын берейін бе? Жастығың жайсыз емес пе? Расында да, көкемнің әрбір аңғал қадамы әжемді қатты қайғыртатын. Ұлының қасынан бір елі кетпей, тілеуін тілеп қалтырап отырғаны. Мұндайда өзге дүние түгілі біз сияқты немерелері де шет қалатын. Бар ықыласы көкеме ауып, өзге дүниені қөзге ілмеуші еді.

Мұндайда біз әжемізді көкемізден қызғанып, кәдімгідей қынжылатынбыз.

Әкем тулап тұрған жігітке байсалдылық қонар деп, окуға отырғызыды. Алайда көкеме кітаптың да септігі тие қойған жоқ. Бұдан нәтиже шықпаған соң, әкем оған қолөнер шеберлігін, зергерлік өнерін үйретуге кірісті. Үйде жүріп мұның да үдесінен шықпайтынын білген соң, көкемді нағашыларымызға, әжемнің інісі - қатал мінезді Серкебайдың қолына бермек бол шешіпті.

Серкебай нағашымның сонда ауылға келгені әлі есімде. Ол кезде нағашым алпысқа таяған кісі еді. Бүкіл ауыл бол аяғынан тік тұрып қарсы алғаны бүгінгідей көз алдыманнан кетпейді. Сонау алыс көкжиектен қатар түзген төрт салт атты көрінгеннен-ақ ауыл адамдары күтіне бастаған. Алдыңғы жорға төбелдегісі Серкебай нағашым екенін бәріміз айнытпай таныдық. Ал желе жорытқан үшеуі қасындағы қосшылары болса керек.

- Серкебай келе жатыр. Серкебай келе жатыр! - дегенде, әжемнің қуанғаны сонша, жас балаша елпектеп кетті. Киіздің жаңасын, көрпенің шәйісін, жастықтың жайлышын әзірлей бастап еді.

Әкем мен көкем тысқа шығып, құрмет көрсеткен кейіппен қол қусырып тұрды.

Бұл екеуін көргенде Серкебай нағашым үзенгісін шіреніп, ат жүрісін аялдата бастады. Серіктері де тізгіндерін тартып баяу жүріске көшті.

Үйге тақап келгенде әжем көкемді Серкебайдың атын ұстауға жұмсады. Көкем де ебелек қағып «Саламалайкүмін» жолай айтып ат шылауына жармасып жатыр.

- Алейкүм салам! - деп Серкебай нағашым сәлемін алды да, көкемнің иығына қолын салып аттан түсे бастады. Көкем сол сәтте нағашымның қолтығынан сүйей қойды. Сонан соң Серкебай нағашым алшаң басып менің әкеммен сәлемдесті. Серіктері де аттан түсіп жатыр еді. Әкем ауыл жігіттеріне әмір берді.

- Меймандардың атын ұстандар!

Жігіттер жедел басып, ат тізгініне жармаса беріп еді, Серкебай нағашым қамшысын көтеріп, ақырып қалды.

- Маған көрсеткен құрметтерің аздай несіне елпектейсіндер, - деп тоқтатып таставады. Нағашыммен еріп келген жігіттерге осынау күрт мінез шалдың әдеті әбден сырмінез болған ба, жылмиып қарасты.

- Неменеге мәз бол тұрсындар! - деп тағы да зекірді нағашым. - Өзге ауыл болса, өзім мен сендер түгілі, еріп келген итіме де құрмет көрсет деп шіренер едім. Ал әпкемнің алдына келгенде, бәрің де үйдегідей қызмет көрсетіндер.

Осынау ашуы адырайып тұрған қатал кісіден жасқанып біздер жан-жаққа тығылып жатырмыз. Жабықтан сығалап бақылаймыз.

Әкем меймандарды үйге бастап жүрді. Есіктен ең алдымен Серкебай нағашым бас сұқты. Әжем оны балаша аймалап, еркелетіп жатыр. Осы кезде нағашымның атқосшы жігіттері ішке қоржын көтеріп кірді. Серкебай төрге жайғасып болған соң әжемнің қалжайын сұрады.

- Аманбысыз, әпке. Ауру-сырқаудан саумысыз. Көңіліңіз жайлыш ма?

- Құдайға шүкір, шырағым, - дейді әжем де елжіреп.

Мұнан соң жаппай жай сұрасу басталды. Ел адамдарының есендігі, мал-басының түгендігі сұралды.

Бұл кезде қоржынның аузы сөгіліп, нағашымның әкелген сыйлықтары көріне бастады. Өрік-мейіз, қант-шай, бауырсақтан басқа әжеме арналған көйлектік мата да шықты.

Серкебай асыл киімдерді қонымды етіп, сымбатты киініпті: алдымен құндыз бөркі құлпырып көз тартады. Бөркін шешкенде, көк тақыр етіп қырган басында оқалы барқыт тақиясы қалды. Бешпет сыртынан буған кемер белдігінің жалпақтығы кере қарыстай еді. Сабы күміспен күптелген қамшысын сәнмен қос бүктеп қасына қойыпты. Етсіз қыр мұрыны, қысынқы өткір көзі ашаң жүзін айбарландырып жібереді еken. Қияқтай етіп бастырган мұртының ұшы екі езуін жиектеп көмкеріп тұр. Селдір ұзын сақалы кеудесіне түседі. Ол аз сөйлеп, әр сөзін нығарлап, таптаپ, қарсы

отырған адамына қарай қамшысын немесе сұқ қолын нұқып сесті айтады еken. Нағашым ешкімді бет ұаратпайтын, айналасын айбармен мендеп алған, өркөкіректеу көрінді. Өз қатарларының өзін менсінбейтін кісі, біз сияқты бала-шағара көз қызығын да салған жоқ.

Бір кештің ішінде Серкебай талай рет көкемді де, қасына еріп келген жігіттерді де қыжғыртып алды. Тua біткен мінезі ме, әлде көңілінің хошы жоқ па, әйтеуір бұл кездесуінде нағашым нақ бір ескі дәуірдің қatal әміршілеріндегі елестейді.

Әжем бізге өрік-мейіз үлестіріп берді. Аузымыз томпандалап бәріміз мәз болып жүрміз. Мал сойылып, ошақта от маздайды. Жұрт құндеғісінен көтеріңкі көңілде болатын. Бәрі де абыр-сабыр асығыс үстінде. Біз одан бетер мәзбіз. Желідегі аттардың ер-әбзеліне сүйсіне қарап қызығамыз.

Күміспен көмкерілген құйысқан еріксіз көз тартады...

Қонақтар көп жатпады. Ертеңіне жолға жинала бастады. Көкемді әкетуге арнайы келген еken. Көкем бұрынғыдай емес, тіpten жуасып қалыпты. Айналсоқтап әкеме жалтақ-жалтақ қарайды. Серкебай нағашым өзі атқа нығарланып отырып алған соң, баяғы әмірлі үніне көшті. Тіpten қатуланып алған. Көкемді қамшымен екі-үш салып қалды да ақырып жіберді.

- Жаман күшікше неменеге жалтақтап тұрсың? Ұзатылатын қыздай сзыыла қалыпты ғой, қызталак. Мен саған әлі көрсетермін. Ауылға барған соң екі аяғында бір етікке тықпасам ба. - Сөйтті де әжем жаққа алара көз тастап, тістене сөйледі. - Балаңның сүйегі ғана сенікі,

әпке! Қалғанын өзіме жіберіңіз бұл тентектін...

Көкем әжем жаққа соңғы рет жалынышпен қарап еді, әжем де шыдай алмай даусы дірілдеп кетті...

- Қайдан білейін, шырағым. Сүйек өзіндікі ғой әйтеуір. Адам етсең болғаны да. Серкебай үзенгіге шіреніп тұрып бізбен қоштасты да, ат басын ауылына бұрды. Соңынан ат үстінде иығы салбырап еріксіз адамдай көкем еріп бара жатты. Бұрынғы өжеттігінен, кайсарлығынан, жігерінен

жұрнақ та қалмағанына бәріміз де таңдандық. Жат қолға түскендей жабығып кете берді. Әжем соңдарынан ұзақ қарап тұрды да, жанарына үйірлген жасты жаулығымен сұртті.

- Тәнірім жолынды оңғара көрсін, құлыным! - деді ол ұлына арнаған тілеуін болар-болмас күбірлеп.

Бір ай өтпей жатып әжем көкемді сағына бастады. Жатса-тұрса атын атап отыратынды шығарды. Ақыры үш айдың жүзі толар-толмаста әжем көкемнің соңынан іздең, төркініне аттанды. Баласының қасында бір аптадай болып, мауқын басқан соң оралды. Алайда үйге келген соң қайта сағынып аһылап-ұхілеп әкеме әр жайды айта беретінді шығарды.

- Шырағым, тіptен арып, құр сүйегі сорайып қалыпты. Серкебай оны ертелі-кеш кітап оқудан бас алдырмайды еken. Бүйте берсе жас баланың қу сүйегі қалады ғой.

Әжемнің айтуынша, Серкебай көкемді матап ұстайтын көрінеді. Әр қадамы санаулы еken. Содан бір елі ауытқуға көкемнің еркі де жоқ, шамасы да жоқ болса керек. Мен көкемдер ауылдан аттанарда Серкебай нағашым еліне барған соң, шынында да, көкемнің «екі аяғын бір етікке» тығып

қояды деп қиналған едім. Сөйтсем онысы қатал тәртіpte ұстаймын дегені еken ғой. Көкеме ұзын ақ шапан кигізіп, басына сәлде оратып оқуға ұнілдіріп қойыпты.

- Серкебайдың үйіне кіргенім де сол еді, - дейтін әжем, - қарасам, бір бұрышта ақ шапан, ақ сәлделі жас «ұлама» заулатып құран оқып отырғанын көрдім. Аңғарып қарасам, өзімнің Момынқұл құлыным еken, өз көзіме сенбей аңырып тұрып қалдым...

Енді бір барғанында әжем көкемді ауылға біраз күнге алып кетейін деп Серкебайдан өтінген еken, нағашым тыйып тастапты.

- Бұл баланы қолыңа адам етіп берем, әпке. Ал адам болмаса, итаяқ тазалайтын құл етіп қоямын.

Әжем қанша жалынса да, Серкебай айтқанынан қайтпайды. Екі жыл өткен соң ғана көкем ауылға оралды. Үстінде ақ шапан, басында сәлде, аздап едірейген тікенек мұрт қойыпты. Ауыл адамдары жас жігіттің мысық мұртына сол күні-ақ күлген.

Ертеңіне-ақ көкем сәлдені тастап, бұрынғы тұлкі тұмағын киіп еді, кәдуілгі өзімізге үйреншікті қалпына келді. Содан бастап көкемді ауылдағы екінші көзі ашық білімдар адам

санайтын болды.

Әжем өзінің кейбір көңілсіз сәттерінде бізді қасына отырғызып алғып аңыз-ертеғілер айтушы еді. Бәлкім осындаи әңгімемен көңіліндегі қомескі, қоленқелі сәттерді қуатын шығар. «Балаларым, құлақ салындар» деп бастайтын әжем.

- Бұл тәнірінің жер бетінде тірлік орнатқаннан кейін болыпты. Ол кезде жаратушы адамзатты жарылқап, топан сұынан да сақтаған еken, - дейтін әжем. - Адамдар «тәнір жарылқасын» деген сөзді, алғыс айтуды білмесе керек. Күннің жылуын, самалдың шипасын, айдың ақ сәулесін, жер жемісін керегінше пайдаланғанымен, бірде-бір іш жылытар

ықыласты сөз айтпапты... Сондықтан қажыған Күн Алла Тағалаға арыз айтыпты:

- О, жаратқан ием, дамылдауды білмей, сабырлауды білмей, үйқы көрмей, құлкі көрмей тірлік үшін қызмет етем. Дүниенің түкпір-түкпіріндегі қеудесінде жаны бардың бәрін шуағыммен қыздырам. Бір тал шөбінен бастап, жер бетінің бәріне шұғыла төгем. Таң сәріден арай шашып ғаламды түнектен арылтамын. Бәріне нұр беремін. Жарқырап көрінгенімде, тірліктің бәрі жадырайды, құледі, қуанады, жұбанады. Суықтан тонғандар жылынаады, жауыннан мес

болғандар денесін құргатады. Ал өзің өмір берген дүние бой жазып керіліп, сәулеге көміліп, гүл шашағы өріліп мамыражай қүйге енеді. Мен тұн мен түнек сияқты дүниеге ауыр зіл, қоңырқай түр әкелмеймін. Мен өзіммен бірге құлкі мен қуаныш әкелем. Мен барда қар еріп, сай-сала сылдыраған бұлаққа толады. Мен барда бұтакқа бұлбұл

қонады. Бірақ осыншама баға жетпес еңбегімді елеп бірде-бір тірлік иесі алғыс айтқан емес. Мұндай әділетсіздікке шыдар шама қалған жоқ. О, тәнірім, сондықтан мені бұл азабыннан босат. Тыным бер, аздан тынығайын!

- Бара бер. Баяғы қызметінен танба, - депті Алла Тағала Күнге, - мен сенің баға жетпес еңбегіңің алғысын немен өтеуді ойланайын...

Күн кеткен соң Алланың алдына Ай келіпті. Жадырай күліп, жарқын сөйлепті:

- О, тірліктің тірегі, бар әлемнің жүрегі - жаратушы ием, өзіңе тілекпен келіп тұрмын...

- Неден тарықтың, неден түңілдің, тұн еркесі - алтын Ай.

- Айналайын тәнірім. Сен маған қомескі нұр беріпсің, суық сәуле сыйлапсың. Күн көзі жұмылған соң, зіл қараңғы түннің бар тұнғиығын жарық етем деп мен келем! Қара аспанның қақ төрінде тұрып төңіректі мамық сәулеге бөлеймін, адасқанға нысана боламын... Бетімнен сәукелемді бірте-бірте ысырып, күн санауға, апта мен ай санауға көмектесем. Ал жүзім толған күні аспанның ақ еркесіндей ашық кейіппен күлгенімде, торғын сәулеме тояттамай бар

әлем үнсіз рахатқа батады. Ай сәулесі тұнгі үйқыны күзетіп, бақытқа бөлейді. Мен болсам, Күн сияқты шақырайып жалыннымен қарымаймын. Менің нұрым жұмсақ, сәулем саумалдай татымды. Тіптен күндіздің өзінде дамыл көрмей, Күн соңынан ілесіп жер бетіне қараумен болам. Бірақ менің бұл қимас қылышымды адамдар байқамайды. Өйткені

Күннің шақырайған сәулесі менің ұлпа нұрымды тұншықтырып тастайды. Осы уақытқа дейін менің ұзақ жылғы адал да айнымас, жайлы да жағымды еңбегімді бағалап бір тірі жан алғыс айтқан емес. Қайта адамдар жүзіндегі дағын, мандағындағы әжімін менен көріп, «ай бетіндегі шұбарланып бітіпсің гой» деп бір-бірін келемеждейді. Ал әбден толысқан шағымда ең сүйкімді болармын деп дәмеленсем, ол сәтімді де адамдар құлкіге айналдырды. Бір жақтырмайтын адамын көрсе, етженді кісіні кезіктірсе - «беті айтабақтай болып безерген біреу екен» деседі... Бұдан артық қорлық, бұдан артық мазақ бар ма маған. Енді шыдай алар емеспін. Бұл қызметіңнен босата гөр, тәңірім!

Осылай деп Ай бұлт арасына кіріп алып ықылық атып жылаған екен... Сол кезде жаңбыр жауыпты...

- Күмістей таза көзіңе жас алып жабыға берме, аппақ Айым, - депті Тәңірі, оны жұбатып. - Онан да қызметіңнен жаңылма. Мен тілеуіңнің орайын ойланып көрейін.

Осы кезде өкпек Жел құтырынып, жан-жағына жаланып, Алла Тағаланың алдына жетіп келіпті. Тәңірдің тағына қонған шаң-тозанды үрлеп жіберіпті де, аяғына оралып жатып алышты.

- Мен дамыл көрмей тау кезем, тас кезем. Ел асам, бел асам, орларды үңгімін, орманға сұңгимін, даланы шарлаймын, теңізді барлаймын. Өлкемді төтелеймін, желкенді жетелеймін, толқынды ойнатамын. Бұлтты қуып, жерге жауын сыйлаймын, елге зәуім сыйлаймын. Егер мен болмасам, адамзат аптаң ыстыққа шыдамас еді, бастарын бірге құрамас еді; аузы сусыз кебер еді, алқынып тер төгер еді. Мен соның бәрінен самал болып есемін, сағым болып көшемін. Бірақ алғыс алған күнім жоқ, сондықтан да мұңым көп. Болдырдым, тынығайын, мұрсат бер, тәңірім.

Бір шеттен сылдырап Су келіпті. Алланың аяғына бас ұрып тілегін айтқан екен.

- Менің де күнім күн емес, тәңірім. Ой-қырын кезіп даланың, дамыл көрмей ағамын. Жердің шаңын жуамын, елдің тәнін жуамын. Сусаған шөлін басады, бір жұтып демін

ашады. Соның бәрін, тәңірім, көтере берем қашанғы.

Сонда Алла Тағала ойға кеткен екен. «Иә, тіршілік біткен, шынымен-ақ алғысқа сараң екен, жақсылыққа жалаң екен. Мен бұларды жазғырайын, жазалайын!» - деп түйіпті. Сөйтіпті де бар мақұлық біткенді, адамзат атаулыны жинаңты.

- Ей, жамағат-жарандар, бәрің бері қараңдар, - депті, жаратушы жиналғандарға. Күн мен Ай, Жел мен Су сендерге өкпелі екен. Сондықтан да бұдан былай қызмет етуден бас

тартпақшы. «Еркімізге жібер, ендігі жағдайды өзімізше қарастырайық» деп тілек етеді. Тыныққысы келеді... Сендерді шақырғанымның мәнісі осы еді. Бұдан былай қалай тірлік етпексіндер, не амал таппақсындар? Сонны айтындаршы, кәне.

Бұл жайсыз хабарды естігенде Адам шошып кеткені сонша, өңі қуарып сала берген еken. Аузына сөз түспей абырап, Күн мен Айға, Жел мен Суга жығылып тағым ете

берген еken.

Жаратушы ием жиналғандарға сұрақ беріпті.

- Кімнің қандай ойы бар?

Бәрі үн қатпапты.

Жалғыз ғана жарғанат ыршып шығып, шоршып ұшып безілдей жөнелген еken:

- Жаппар ием, жайымызға құлақ сал. Пенден десен, біздің де тілегімізді тында. Егер Күніміз сөнсе, үніміз өшпей ме? Жарымыз бітпей ме? Адамзат жер сипалап, аң біткен адаспай

ма? Құс бағдарынан жаңылып жарға соқпай ма? Гүл қуарып, жер суалмай ма? Ай батса ше? Жыл мезгілінен адасып, теңіз ретсіз тасымай ма, көл ретсіз көлкімей ме? Сапырылысқан тірлік орнап, саналы сәттен қол үзіп қалмаймыз ба? Су тартылса не болмақ? Бұлақтың сылдырынан айрылар едік, қанатымыз қайрылар едік. Қимылсыз сусап жатар едік, бір тамшы суға көзімізді сатар едік? Жел тынса ше? Бір жердентүман арылмай, бір жерден тамшы табылмай, бір жерге бұлт үйірліп, бір жерге сұық шүйіліп, жылжымай жатар еді. Пенделерді аяй гөр, жаратушы ием.

Осыны айтып жарқанат Тәнірінің алдына топ ете түсіпті.

«Мынау шыбындай неме шыжгөбек боп шындықты айтып түр ғой. Расында да өмірдің астан-кестеңі шығады еken-ay», - деп ойлапты жаратушы. Сөйтіп қайтадан жарлық

береді:

- Күн мен Ай, Жел мен Су баяғыдай қызмет етсін. Сендерді тірлікке тірек болсын деп жаратқам әуелі. Содан танбандар, - депті. Бұған қатты ашуланған Күн өзінің сәулесімен жарқанаттың көзін ағызып жіберіпті.

- Енді көзіме түссен, күл етіп күйдіріп жіберемін, - депті Күн.

Жел бүрқана долданып:

- Маған тап болсан, пәрше-пәршенді шығарып, жұнше түтермін, - дейді.

- Мен сені тұншықтырып өлтіремін, - депті Су.

Ал Ай өзінің жарқын құлқісін төккен күйі ұнсіз қалған еken.

- Енді қайттім мен сорлы. Жазығым жоқ бишара едім ғой. Өзім үшін емес, бүкіл тіршілік үшін тілек білдірmedім бе, Тәнірім? - деп зарлапты жарқанат.

Сонда жаратушының жарқанатқа жаңы ашып жарлық беріпті.

- Күн көкжиектен көрінбей, көз байланы бастағанда; Айдың жүзі әлі де шыға қоймаған сэтте; Жел тынып, жекен жапырағы үйыған сэтте үшіп шығасың. Ал құндіз Күн көзінен жасырынып, қуыс-қуыс жырада, тастұнек сынада, үйдің жәрегінде жатасың. Аштан өлмес үшін қос емшек беремін. Бірінде сүт, бірінде су болады. Осылай тірлік етесің енді.

Содан бастап жасқаншақ адам Күн мен Айды, Су мен Желді сыйлайтын болған деседі, төртеуіне табынатын болған деседі. Жарқанат болса адамның абыржып, үрейі қалмағанын көргені үшін адам атаулыдан талай-талай қорлық көретін болыпты.

Адам да жарқанаттан жасқанып қорғанып жүретінді шығарыпты.

Міне, балаларым, жақсылыққа жамандықпен жауап бермендер. Жақсылықтың етегі де жақсылық болсын.

Біз осылай үлкендерден ғибрат алыш өсіп едік. Ал үлкендердің әр өсietі - өнер мен өнегенің ең шыңы ғой.

* * *

Ауылда бас қосып, байыпты әңгіме айтар кештер көп болушы еді. Мал өрістен қайткан соң, ымырт үйірілгенше бір төбенің басына шығып алыш үлкендер шүйіркелесер еді. Ел жаңалығы, құнделікті тірлік қамы, ертеңгі құннің еншісі - бәрі-бәрі осы басқосуда ортаға салынатын. Егер

әңгіме арқауы ұзаққа созылмаса, кәриялар балуан күрес, жаяу жарыс, тартыспақ сияқты ойындар үйымдастырып, қызығына мәз болып отырап еді. Қаранғы қоюланып, көз байланарда бәрі үйді-үйіне тарасатын.

Кейде ел ішіне ақын келіп қонар еді. Бұл - ең бір сәтті күн, ең тәтті күн болатын. Барша жұт ақын түскен үйге жиналыш, иін тіресіп тұратын. Үйге сыймағандары жабықтан сығалап, ал кейбіреуі ақынның үнін алыстан естігеніне риза болатын.

Көкем келgelі, ел адамдары әжемнің отауына жиналатын. Көкем әндептіп отырып халық жырларын, хиссаларды оқыр еді. Өзгелері ентелей түсіп, үйшіп мұлгіп, теңселе толқып тыңдайтын. Осылай көкем жарықтық өле-өлгенінше ел ішінің ең қалаулы жыршысындай өтіп еді-ау.

Хиссалардың маржандай тізілген таза тілі, оралымды ойы, қиял жетпес теңеулері, ертіп отыратын екпіні, үйытып тастайтын үйқасы тыңдаушының жан сарайын жарқыратып

жібергендей сезілетін. Мен осынау халық қазыналарын алғаш рет ақындардан, көкем сияқты көзі ашық білімділерден сініргем. Солардан дәм татып, солардан сусындағам.

Көкемді көрші ауылдар қолқалап шақырып әкетіп, тұнімен жыр оқытатын. Көкем де мұндай кештерден бас тартып корген емес. Көкеме жыр құмар жанның бәрі, хиссаның

қай жерін жаттап алғысы келген ынтызарлар, жұрт отырған жерде бір жырдың кей шумақтарын жырымдап

айтса да «біледі екен» деген атқа ие болу үшін қызыққандар да келетін. Көкем болса ерінбей-жалақпай әр толғауды бір айтып еске түсіретін. Шынында да, өздері қара танымайтын

жырқұмарлардың кейбіреуі келесі бір кеште өзінше жыр соғатын. Сондыктан ондай кісілердің көбі көкемді «ұстазым» десетін. Серкебай нағашым көкемнің дін жолына түспей,

сәлдесін алып тастап ойын-сауық, ән-жыр қуып кеткеніне талай рет ренжіді. «Ауылдың «жын-шайтандарының» бәрін төнірегіне жинап алышты басты ма сені» дейтін.

- Онан да ата-бабаларыңың аруағы риза болсын деп құран оқып тұрмайсың ба? «Е-е», «е-е» деп ешкіше маңырап отырғаннан қашан арылмақсың, түге? - деп көкемді мазақтағаны да бар.

- Құранды жұма сайын оқимын ғой, нағашы,-деп көкем ақталмақ еді, ана кіси ұрынғысынан бетер ашуланды:

- Тыфу, антүрган неме. Бір жұмада бір-ақ рет құран оқығаныңды да міндесінесің-ау осы, сен шірік. Құніне неше реттен оқысаң да аруақтардың парызын өтей алмайтыныңды ұмыттың ба?

Сонан соң нағашым өзінің бауырларының ынжық екенін, бүкіл ел намысы, ел ары өзінің мойнында екенін, ауылдың атын шығарам деп жүріп құранға құлап отыруға мұршасы да, уақыты да жетпейтінін айтып ренжіді.

Көкемді оқытқанда арнаулы ғұлама шығар, құранды соның қолына берермін деп үміттенгенін айтты. Енді сол үмітінің ақталмай, шәкіртінің селкілдек шегірткеге ұқсан кеткеніне өкінетінін білдірді.

Байқасам, нағашымның өзі де құранға құлшылық етіп отыруға мойны жар бермейді екен ғой. Жасынан дін құдіретіне иланып, дін жолына беріліп өскен соң, енді аруақтар алдындағы парызынан қорқып, ақыреттің тауқыметінен тайсалып көкем арқылы құнәсін жумақ екен.

Бір қызығы - нағашым ұрысқанда, көкем шынымен-ақ кінәлі адамдай мойнын салбыратып үнсіз отырып алатын. Мұнысы қатал мінез Серкебайдың көңілін басу ғана еді. Нағашым ауылына аттанысымен, көкем ескі әдетінше жыр айтып, хисса оқып өз қызығына түсіп кеткен.

Есейгенде көкем елді шулатып жүріп үш рет үйленді. Үшеуінде де дау-жанжал, ұрыс-керіс, айтыс-тартыссыз тынған емес. Ат-шапан айып төлеп, құдалардың алдына жығылып жатып, ел ақсақалдары әрең дегенде бітістіруші еді. Жас құніндегі ұрыс десе ұмтылып тұратын ұрма мінезі, жанжал десе жанып кететін жарғышақ қылышы кейін осылай тынған болатын.

Әкемнің үлкен ағасы Төлебай атам ұзын бойлы, кең жауырынды, тәмпіш мұрын шал еді. Ағара бастаған шоқша сақалын тараشتап түйік отыратын. Қолынан ұзын таяғы

түспейтін. Үйде байыздан отыру әдетінде жоқ еді. Базарға да шықпайтын. Малмен бірге өріп, өрістен малмен бірге қайтатын әдеті болатын. Отар сонынан қалып қойған қозылақты жинастырып жүргені. Ішім-жемі орталау, көп балалы кісі еді. Осылай баяу тірлікпен ілбіп жүріп сол атам бір күнде дүние салды. Ізінше үш-төрт жылдың ішінде балаларының көбі өліп, жалғыз ғана Құрманқұл атты қызы қалған болатын. Оның менен үш-төрт жас үлкендігі бар.

Ал үлкен әпкем Үбішті мен еміс-еміс қана білемін. Әкемнің айтуынша, ол ерте хат танып, кітап оқыпты. Жазу да қолынан келеді екен. Біздің аймақта алғашқы қара танып, хат жазуға қолы жеткен қыз - сол әпкемнің жалғыз өзі көрінеді. Әпкемді Байтана руынан Рысқұлбек Омаров

дегенге бесіккерті етіп атастырған екен. Ол сауатсыз, салауаты аздау боп өсіпті. Қыз бой түзеп ел көзіне көріне бастағанда, жұрт ішінен «қайран ақтотыдай сайрап тұрған қыз, аузын ашпас білімсізге қор бола ма» деген сыйбыстар көбейген екен. Әкем бата бұзбаймын, серттен кетпеймін,

бұйрықтан аса алмаймын, арыма таңба түсірмеймін деп 1912-13 жылдары әпкемді ұзатқан екен. Неден екені белгісіз, әйтеуір әпкем ұзатылып барған соң, бір жылға жетпей дүние салды. Ел бұған қатты қайғырды. Әкем өмір бойы қызының мезгілсіз өліміне қүйініп жүруші еді. Бәлкім, өзі өкініш өртін тұтатқанын сезген шығар. Осы өкініш оның өзге қыздарына деген көзқарасын, тіpten бүкіл әйел қауымына деген ұғымын өзгертіп жіберіпті. Үнемі қамқорлықпен қараушы еді.

Ауыл жатаған кесек үйлерде қыстап шығатын да, көктемде алыс жайлауға қоныс тебетін. Шабындық пен егіндікті ат тұяғы шиырламасын деп содан күз түскенше мал

біткенді жайлаудың бір танабынан екінші танабына көшіріп жүрер еді. Ауыл адамдары егінді аз еgetіn. Ағаш соқамен аздаған жерді атыздан жыртып, дән сепсе болды деп жүре беретін. Тек күзде ғана егін оруға оралады.

Егінді қол орақпен орып, ат тұяғымен бастыруши едік. Мұндайда өсіреле ат тізбегін шыркөбелек қуалап, айқай-шуға қарық боп қалатын да балалар, жұрттан қөнілді жүретін де балалар. Ақыры тамағымыз қарлығып, әбден шаршаганымызда айдауға түскен малдарды еркіне жібереміз. Соңан соң үлкендер сабанын екшеп, дән суырар еді. Жел тұрғызу үшін бар бала жиылып ыққыратынбыз. «Жел шақырғанға келеді» деген сөзді онда жиі еститінбіз.

Астық суырып, ақ сабанынан тазалаған соң - қалбырға салып елейтін. Онан соң барып бала біткен дәннің ірі тасын теруші ек. Үлкендер астықты тақиядай етіп үйетін де, шынтақтап өлшетін. Сол арқылы қанша батпан өнім алғанын есептеп шығарады. Ауылдың ақсақалы қызыл

қырманға келіп, үйілген дәннің жанына тізерлеп отырап еді. Береке сұрап, молшылық тілеп, ырыс дәметіп алақап жайып ақ тілеу арнайтын. Дәннің алдын қапқа сонан кейін ғана көсіп салатын. Диқан бабаның берген ризығынан әркім нысабына қарай қаптап-дорбалап алатын. Ешкім де бір-

бірінің қолын қақпайтын мұндайда. Өйткені егін жинап-бастыру, дән тазалап екшеу сияқты бар тірлік ортақ күшпен, асармен біткен соң, жемісі де ортақ деп білетін олар.

Бала кезімде егіншінің осындай әдемі дәстүрін көріп едім. Кейін орыс диқаншыларымен іргелес қонып, отырықшылыққа үйрене бастаған ауыл адамдары бірте-бірте жерді сапалы жыртуды, егінді бабымен егуді үйрене бастады. «Аттың жалын қамыт қажап, ат сауырын қайыс

сокқылағанның несі жақсы» дейтін қазактар, жерден алған жемістің дәміне түсіне берді. Сонан соң орыстармен ортақтасып егін салуды әдетке айналдырды.

Ал тақыр кедейлер байлардан күш-көлік, киім-кешек, тамақ алып дән сепсе, өз жерінің өніміне өзі қожа бола алмай, түсімнің төрттен бірін ғана иемденіп жүрді.

Көшпелі тірліктің көлемі тарылып, ауқымы азая бастаған сайын егіншілік үлгая берді. Малды ауыл қыс бойы Қаратаудың ар жағын жайлап, ерте көктемде елге оралар еді. Сөйтіп кедейлерге қос беретінді шығарды. Біздің Үсен әuletінен Нияз байдың тұқымдары жарлыларға қос беріп-ақ табысқа белшесінен батып жүрді.

Біздің үй қосқа жалдануды білмейтін. Өзінің шағын тіршілігін күйттеп, қысы-жазы елден үзай қоймайтын. Оның есесіне Үсеннің бір бұтағы Баймен мен Тойтабайдан тарағандар колективтендіру кезеңіне дейін жалшылықтан арылып көрген емес. Жұпыны шаруасымен жүрт қатары тірлік ететін үсендіктер, байлығы тасыған Нияз үрпағына қарағанда, өздерін бір-біріне жақындау сезінетін. Кейін жұтқа ұрынып жұтап қалған Нияз үрпағының жарымы әлгі қарабайыр ағайындарының қатарына қосылып жатты.

Менің әкем үлкен үйдің иесі есебінде үсендіктердің ішіндегі құрметтісі саналатын. Диқан ауылы әкемді мұлтіксіз тыңдал, оған арқа сүйеп отырушы еді. Нияз үрпағының екінші жартысы 1925 жылдары бір тойдың жанжалына килігіп, мал-мұліктен жүттады да, біздің диқаншыларға

қосылған болатын.

* * *

«Софыс» деген сөзді қашан естігенім жадымда жоқ. 1916 жылдың оқиғаларын дәлме-дәл елестете алмаймын. Әйтеуір әйелдердің жас төккені, ерлердің үрейлі жүзі, құннің

тұтылғаны көз алдымда.

Елге келген жолаушылар «Жұмысшылар алып жатыр! Жұмысшы қолы керек екен! Ор қазуға жұмсайтын көрінеді! Жер қаздырады!» деген сүйк хабарларды қаптатып жіберген.

Әлі ауылдан ешкімді шақыртпаса да, әлгі хабарлардың өзі-ақ көзге жас, көнілге қайғы әкеле бастаған еді.

Күні бұрын күніреніп зар илегендер де табылды: «Енді қайтем, қарағым-ау? Соғысқа сені де шақыртар күн жеткені ме шынымен... Жарығым-ау, қандай амал табайын», - деп еніреген аналардың көз жасын көргенде, жас жігіттер абыржып, еркінен айрылып қалғандай болушы

еді. Күніренген ауылда күй болар ма. Бұрынғы ән-жыр төгілетін көмейлерден зар шертілсе, ауылда не сән болар. Күндіз-түні қабактары ашылмай, мойындарына бұршақмасып тілеу тілеген әжелер, бебеу қаққан аналар, мұнайғанмжас келіншектер бар тірлікті ұмытқаны сонша, мал-мұлік тұрмак, біз сиякты бала-шағалар да назардан тыс қалып қойып едік. Амал таптай бастарын тау-тасқа ұрған ерлер алдымен көз көрмес жаққа көшпек болды. Онан соң әскерге адам жинаушылармен белдесіп ұрыспаққа бекінді... Одан болмаған соң жас жігіттерді жекжат-жұраттарына, туған- туыстарына, нағашыларына жедел жөнелтіп жатты. Бұл аласапыран бірнеше күнге созылды. Үлкендер әлдекайда бір жиынға барып, сүйк хабармен оралып жүрді. Ақыры әйелдер көз жасын тыйып, белдерін бекем буып, үй басынан қаржы жинай бастады. Шөп тартып жігіттердің бағын сынауды шығарды. Сонан соң шөп түсken жігіттерді ауыл бол улап-шулап станцияға аттандырысатын. Кешке қарай әлгі «әскерге алынғандар» қайтып оралады. Еріп барған ел жақсылары «жастарды бастықтан қүн төлеп алып қалдық» дейтін. Қайтадан түнлік басы әскерге берер адам іздеуге көшкенде, ауылдан он жігіттің орнына жалғызбасты Қожамқұл жарлыны ғана бодау ететін. Оған жылы киім кигізіп, үй басы қаржы жинап, көп болып станцияға дейін шығарысады. Тап сол күні кешке қүн тұтылып, батыс жақ үрейлі күлгін түске малынып еді.

«Күн күйді! Күн күйді!» десіп, жамандыққа жорып зарлаған әйелдердің үні қүйқа тамырынды шымырлатады.

- Ақыр заман! Ақыр заман келеді! - десіп ел қорқынышпен күбірлеседі.

- Бір шеттен молда шығып азан шақыра бастады.

- Алла акбар, алла акбар! Иля и ляха илалла, ля иляха илалла! Мұхаммед расулла. Мұхаммед расулла! Алла акбар! Алла акбар! Ля иляха иллала! - деп күнірентіп ала жөнелді.

Азан уақытында жүрттың бәрі сілтідей тынып, іштей дүға қайырып отырды. Экем мен көкем Қожамқұлды аттандырып салушылармен бірге кетті. Мен әлдебір беймәлім кесепаттың

келгенін жүргегіммен сезгендей шошынып әжемнің етегінен жармасып алдым.

- Бисмилля де! Бисмилля де! - дейді әжем менің сұп- сұр өңіме үніліп. Жұрт ес жиып өзді-өздеріне келгенше, күн бетіндегі қара дақ қайтып та қалған еді. Мұны көргенде бәрі

шу ете түсті.

- Ә, құдай! Ә, тәнірім, жар бола гөр!

Әйелдер енді қуаныштан жылап жүр. Бәрі молдаға табынып, ақыр заманнан алып қалған нақ бір соның өзіндей тағзым етіп жатыр. Әркім атаған құдайыларын, сый-сияптын да молдаға төге бастады.

Сол кештен бастап ел бір апта бойы құрбандық шалып, құдайы таратумен болды. Үлкендер «құдайың қабыл болсын» деп дәмді етке кекіре тойып жүрді. Біз болсақ, солардың сарқытына мәз боп, кешегі үрейлі күнді ұмытып та кетіп едік. Ел жадырап еркін тірлігіне қайта ауысты.

Бірнеше айдан соң Қожамқұлдан хат алдық. Өлеңмен жазылған екен. Қожамқұл алыста жүріп ауылды ансағанын, жат жерде жалғыздық шеккенін, көңілі қайғыға, көкірегі шерге толы екенін, туган-туыстарының жүзін көруге зар болып жабығып жүргенін жырмен шағынып айтыпты. Ауыл адамдары бас қосқан жерде сол хатты оқып, көздеріне жас алысатын. Әркім жаттап алып елден-елге таратып жіберген еді.

Мен әлі күнге дейін Қожамқұлдың сол хатынан кейбір жыр жолдарын ұмытқам жоқ.

Кір жуып, кіндік кескен жер, аман бол,

Шортандай жүзген айдын көл, аман бол!

Бір басы ер жігіттің не көрмейді

Келгенше біздер қайтып ел, аман бол

Не келіп, не кетпейді ер басына,

Ермейді ер жігіттің ел қасына.

Келерміз төрт-бес айда елге қайтып,

Аз уақыт ойнап жүріп ор басында.

Қожамқұл хат танымайтын. Оның үстіне жыр шығарып көрген емес. Шамасы окопта жатқан қазақтар елін сағынғанда елжіреп отырып бірігіп өлең жазса керек. Жазу білетін біреуі қалаған кісінің беріне көшіріп берген сияқты. Ел сүйген азаматтардың осы бір шынайы жыры бала күнімнен жүрегімде қалып қойыпты.

Бүкіл ауыл болып Қожамқұлға қаржы жіберіп тұрды. Айтқандай-ақ, бір жылдан соң ол елге аман-есен оралып, баршамызды қуантқаны бар. Әр үй кезекке тұрып, Қожамқұлды таласа қонақ ететін болды. Жаз бойы біздің ауылда сыйлы адам болып жүрді де, кейін сый-сияп

жылып алыш, өзінің қара жұмыста бірге болған тағдырлас жолдастарының еліне аттанып кетіп, содан қайтып оралған жоқ.

Алғашқы империалистік соғыс жайлы менің есімде қалғаны осы еді.

* * *

Ел «жаманшылық жылы» немесе «жылан жылы», «ашаршылық жылы» деп атаған сонау 17-18 жылдардың ауыртпалығы есімде қалып қойыпты. Екі жыл қатарынан біздің жақта құрғақшылық болып, жерден дән өнбеді. Көктемнің өзінде-ақ көгеріс шөп курап, айнала сартап болып сазара бастаған еді. Малдың аузына қорек ілінбей, сар даланы кезіп жүрді. Оның үстіне қыс-

та құтырынып келіп еді. Қолда қоры жоқ кісіде не шара болсын. Қыстың алғашқы қунінен-ақ мал бишара жаппай қырылды. Қора іші өлексе сасып қаңси берді. Қорадан мал, қолдан амал кеткен. Адамдар шамасыз, шарасыз қайғыға тұсті. Осылайша олар келесі көктемді құр алақан жайып қарсы алды. Біздің малдан небәрі үш ешкі аман еді. «Жуаның созылып, жіңішкенің үзілер шағы» түскенде сол үш ешкінің шандырын тартқылап амалдадық. Аз ғана сүтке су қосып ағарған атын көбейткен боламыз. Шалап болса да, талшығымызға жарайтын сол еді. Кейде әкем үй мұліктеріне айырбастап бірер қадақ ұн әкелсе, быламық көже ішіп көтеріліп қаламыз.

Сол жылы көктемде Бурное станциясына шойын жол тартылды да, бұл жер сауда-саттықтың қызу орталығына айналды. Әкем жарты пүт ұн, бірнеше қадақ құмшекер тапқан еді. Станциядан жатақ үй қарастырды да, көкем мен әжемді сонда орналастырды. Сөйтіп әлғі ұн мен шекерді әжем мен көкем базарға сатып азын-аулақ пайда түсірмек. Әжем мені өзімен бірге ала келді. Еңсілі үйлерді, ығы-жығы көшени, сапырылышқан сан халықты, ауқымды құрылысты алғаш көргенім осы еді. Бұрын есектің ақырғанынан күшті дауыс жоқ деп жүруші едім. Сөйтсем, паровоздың жай ысқырғанының өзі құлағынды бітеп жіберердей ашы келеді еken. Бір күнде көрген жаналығым мен әртүрлі әсерден қатты шаршаптын. Ауыл мен станция арасы төрт шақырымдай еді. Мені шаршатқан жолдан бұрын жолай көрген қызықтарым сияқты. Әкем бізді әкеп салды да, қайтып кетті. Әжем болса бірден өз тірлігін қамдастыра бастады. Мені төсекке жатқызған соң, өзі ұн мен құмшекерді араластырып жент жасай бастады. Әжемнің қимылына көз салып жатып ұйықтап кетіппін.

Танертең әкем келіпті. Көзінді ашсам үйдегілердің бәрінің жүзі қуарып отыр екен. Үрейленіп сыйырласады. Еш нәрседен бейхабар жатқан мен «не болды?» деп ұшып тұрыптын... Алайда әжем басымнан сипады да: «Ұйықтай бер, құлымның» деп сыйырлады.

Үй-іші дымқыл тартып күңгірттенеді. Төбеден тамшы ағып түр. Тұнде нөсер жауын жауған еді.

- Жоқ, апа,- деді аз үнсіздіктен кейін әкем, жиналыңыз, ауылға қайтамыз. Тәуекел дейтін түк те қалған жоқ. Көк піскенше, амалдан құн көрерміз.

- Мен өзім қала берейінші, - дейді көкем.

Әкем ашуулана тіл қатты.

- Саған сенген тәуекелің бар болсын!

Тез арада жиналышп та үлгердік. Төртеуміз тысқа шықтық. Көрші үйдің алдында, неге екені белгісіз, жұрт топталышп тұр. Біз жылдамдатып өте шықтық. Жолай әжемнен үкқаным: «көрші үйде бір жапырақ наң үшін адамды тамақтап өлтіріп кетіпти».

Енді көкем үйде бадырайып отыра алмайтын болды. Жаяулатып Қаратай жақтағы әпкелеріне тартып кетеді. Мінер көлік жоқ. Алайда ол жақтан көкем құр қол, салбырап

қайтып кеп тұрганы.

Ауылымыздың екінші қапталынан Ташкент-Пішпек (Фрунзе) тас жолы өтуші еді. Біз оны «Қара жол» депм атайдынбыз. Мыңбулақтың бір көзі - Қолбастауда почтамстанциясы болатын. Көкем сонда барып ат айдаушы болып морналасты. Әжем көкеммен бірге сол «Бекетке» кетті. Үйде қалғандарымыз ақ шалап пен быламықты қанағат тұтып отыра бердік. Бір күні әкем жолаушылап барып көгеріп кеткен екі қап бидай әкелді. Сол бидайды қайнаған сумен жуып, кептіріп, шетінен қуырып жеп қаужалақтап қалдық.

Біраз уақыттан соң күн жылынып, жер кебе бастады. Әкем ары-бері шапқылап жүріп өлмес ауқат тауып жүр. Бір күні ол бірнеше қадақ құмшекер, жарты пүт ұн және бір түйір шай әкелді. Мұны советтік азық-түлік комитеті көмекке беріпті. Сүт көже жасап, аздап тойынып қалдым. Күн көзі әбден жылынған соң, әкем мені ертіп «Бекетке» әжеме әкелді.

Әжем қатты сағынған екен. Бізді көргенде көзіне жас алып босап кетті. Бәріміз де жүздесіп жадырап отырмыз. Әкелген шай-қантымызды, ұн мен жармамызды бердік. Көкем жолға шығып кетіпти. Барлық ат айдаушылар ұзын сарайға ұқсас жатақта тұрады екен. Жағдайлары мәз емес.

Біз көкемнің келуін күттік. Көкемнің қуанышында шеек жоқ еді. Мені аймалап сүйіп, аспанға көтеріп, әпкелерімнің хал-жайын сұрап жатыр. Біраз шүйіркелесіп отырған

соң, әкем мен көкем станция бастығына кетті. Біржола есеп айырысып, жұмыстан босап қайтып келді. Көп аялдамай төртеуміз ауылға қуанып қайтып едік. Әжем ат айдаушылардың әйелдерімен, бала-шағаларымен көнілді қоштасты.

- Құдайға шүкір, немерем келіп ертіп барады. Тәнірім бұл қуанышқа да жеткізді. Сендер де жақсылыққа жетіндер, - деді әжем жолға шығар алдында.

Жолай әжемнің досы - Иманқұлдың үйіне аялдадық. Әйелі бізді айранмен сусындарып, барын алдымызға тосты. Жолға шығарда Иманқұл бұзаулы кер сиырды алдымызға

көлденен тартты. Әкем ақшасын төлеп, көкеме жетелетті. Иманқұл бізге бір пүт тары сыйлап, қошеметпен шығарып салып еді.

Ауылға келген соң ақ көбейіп, аузымыз қою айранға тие бастады.

Сөйтіп жүргенде май айы да туған еді. Көкем төрт күн бойы жер аударып, оған тары септі. Эпкелерім даладан әлдебір шөптерді теріп әкелетін. Қандай шөп еkenі есімде жоқ. Әжем сол шөптерді сүтке қайнатып, кейде құр суға салып ас жасайтын. Біз соны жеп қанағат етеміз. Бірде сондай көк сорпаны ішкен соң, бір сағат өтпей жатып шетімізден баудай түсіп құлағанымыз бар. Менің жағым қарысып, көзім тұнып кетті. Басым айналып, лоқси бердім. Әжемнің зәре-құты қалмады. Әрқайсысымыздың басымызды бір сүйеп зыр жүгіріп жүр. Жалма-жан сиырдың желініне

жабысып, сүт сауып әкелді. Сол сүтті кезек-кезек біздің ернімізге тосады. Кешке келген әкем мен көкем біздің кирап жатқанымызды көргенде көздері шарасынан шыға жаздады.

Біз белгісіз шөптен уланып қалсақ керек. Содан бастап көк сорпа жасауды мұлде доғардық.

Әкемнің астына ат бітіп, ауыл-елді аралай бастады. Көкем үйден ұзаган жоқ. Іргемізге бөтен бір бай адамы қоныс тепкен еken. Көкем сонда барып қойларын қырқысып, қозыларын отап жалданып жүрді. Кейде станцияға барып жүк түсіріп, тапқанына бір бөлке нан әкелетін.

Акем төрт қозылы қой әкеліп тастады да, қайтып жол жүріп кетті.

Бір айдан соң үйге өгей шеше алып келді.

Осылайша қаз тұрып, қаңбақша қалтырап жүріп, екінші жылды да аяқтап едік. Көршілеріміздің көбі күн көріс қамымен жан-жаққа тараپ кеткен. Солардың кейбірі үшінші жылы ғана бас қосты. Бұл жылы ел мемлекеттен тұқымдық қор алған еді. Патша құлапты, «қызылдар» мен «ақтар» айқасып жатыр дегенді сол кезде естідік. Үлкендер «күніміз туды, кедейлердің таңы атты» десіп жүрді. «Енді патшаның шабармандары халықты қалай алдайды. Ел мен

елді, адам мен адамды теңестірген заң шығыпты» дескен жүрттың қуанышында шек жоқ еді. «Қара тізім» жасалып, байлар соған тіркелді. Алты ай сайын сайлау жүретін болды. Старшындар дамылсыз ауыса берді. «Қосшы» одағының бастығы сайланатын болды. Жаңа заман, жаңа заң, жаңа тірлік жайлы, ұлы төңкерістің көсемі Ленин жайлы ел жиі айтатынды шығарды. Совдептің төтенше өкілдері келе бастады. Басшылар кедейден сайланды. Әрбір он үйден бір белсенді сайланатын еді. Сол белсенділердің ішінде көкем де жүрді. Оны талай рет ауылсоветтің председателіне де сайлады.

Жаңаша жер бөліс орнады. Бұрын кедейдің жерін иемденіп шалқып отырған байлар жерінен айрылды. Жер кім баптаса, соныкі болды. Жүрт иығы көтеріліп, жаңа өмірге жұмыла құлаш ұрды. Бас-аяғы бес жылдың ішінде бәрі тойынып, қабағы жадырап, қайғысы азайып еді.

Әкем мені арабша, орысша оқуға үйрете бастады. Есепті де үйретіп жүрді. Эртүрлі тірлікке араластырып, бұғанамды қатайта бастағанын сонда сездім. Ат суарып, ақырға жем

салу, өгізге мініп тас бастыру сияқты жұмыстар енді менің де қолымнан келе бастады.

* * *

Біздің Өтеулі тұқымынан Бабас дейтін кісі өткен. Бабастың Қабаш атты інісі болыпты. Қабаш жекжат-жұрат, тамыр-таныстарды аралағыш екен. Бір аттанса, үйіне айлап

оралмайтын әдеті болса керек. Үйге келуін келгенмен, байыз тауып отыра алмайтын көрінеді. Ертерек ел қызыруға шыққанша асығып жүреді екен. Осындағанда кезекті бір сапар алдында атын ерттеп жатқан інісіне Бабас тіл қатыпты:

- Ей, сен қайда тағы да...

Інісі де ожарлау болса керек. Ағасын қағыта сөйлепті:

- Сендер сияқты қашанғы үйқұшік болып отырайын. Ошақ түбін аңдууды саған-ақ бүйіртсын. Менің қатыным жоқ, балам жоқ. Салт басты, сабау қамшылы, арқам кең адам емеспін бе. Сен-ақ қатыныңды құшақтап жата бергін.

- Қабажан-ау, қолымызды мал қысқартып отыр ғой. Әйтпесе отау тігіп беріп, келінімнің қолынан дәм татып отырмас па едім.

Ағасының мына мәймөңке сөзіне Қабаш тағы да қияс жауап беріпті:

- Қолың ұзарғанша, жолым ашық шығар. Менің қайда жүргенімді қадағалап қайтесің, - деп аттанып кетіпті...

Содан Қабаштан хабар болмай үш айдың жүзі өтіпті. Бабас қобалжып, үй-іші үрпісі бастаған екен. Осындай бір күпті күні Тұлкібастағы Темір руының адамдары Қабаштың қолын байлап ауылға алып келіпті.

Қашан да даушының даусы өктем шығатын әдеті емес пе. Қабаш болса, қабағы түсіп, елге қарай алмай жер шүкілап тұр. Оны байлап әкелген жігіттер ел адамдарына қамшы үйіргендей қара бұлтты төндіре сөйлейді.

- Мінеки, мынау сұмаяқ, сұыққол туысқандарыңды Шымкент базарынан ұстап әкелдік. Ауылымыздан ат ұрлап әкеп сатқалы тұрған жерінен тұтылды бұл бетсіз...

Бабас қатты абыржып қалбалақтай берсе керек. «Ел арасына жік түспесін, ала жіп аттаған алаяқ атанбайық» деген намыс іші-бауырын жегідей жеген жайы бар көрінеді.

- Айналайындар-ай, амалым қанша! Қатар жатқан ел едік. Алыс-беріс, барыс-келісіміз жарасқан ауыл едік қой. Аттан түсіп, аяқ сұтындаршы тым болмаса. Дәм үстінде,

дастарқан басында отырып келісімге келелік. Айып бізден, ағайын, ауыртпалықтарыңды көтеруге әзірмін, - деп Бабас қол қусырып, тізе бүгіпті.

Жок іздең, ұрысын ұстаған ауылдың жігіттері ат ұстінде шатқаяқтан, шамалары келгенше шіренсе керек. Бабас онан сайын шыжтөбектеніп жалынады.

- Тілегімізді қабыл етіндер. Жерге қаратып кете көрмендер, айналайындар.

Айыптының жүзі төмен ғой, ауыл адамдары Темір елінен келген жігіттерді жүгіріп жүріп күтіпті. Аяғының ұшымен кіріп, қаңбақша қалқып, дамыл алмай дастарқан тасыпты. Бәрі де мал иесі қуғыншылар мен дау иесі - билердің алдына шала жүгініп қызмет көрсетіпті. Мейлінше егіл-

тегіл шашылады.

Қуғыншыларды Әлмембет бидің баласы басқарып келген екен. «Олар да бірқауым ел ғой. Жөн-жобасын білетін кісілері бар шығар. Мына жігітті ауылына алыш барындар. Бір жылқының дауын өздерің-ақ шешерсіндер» деп кіші баласы мен үш жігітті жұмсаса керек.

Бидің өзі келсе, салмағы ауыр түсетініне түсінген біздің елдің билері лайықты жөн-жоба таба алмай, қиналып отырғанда, Бабастың өзі ретін тапқан көрінеді:

- Менің алты қарам бар. Енді тағы да алты қара керек.

- Бұның қай сасқаның? Алты қара іздегенің не? - деп билердің біреуі сөзге араласыпты.

- Е-е, ақсақалдар-ай, әйтеуір көңілден шығып, көпке түрткі болмасақ дегенім ғой. Тоғыз қара айыпқа деңіздер, ал қалған үш қара сіздердің әділ қазылыштарыңға төленеді. Мұны естіген билер тапқыр шешімге тәнті болған екен.

- Дұрыс айтасың Бабас. Әлмембет бидің келгенінен келмегені бізге ауыр тиіп тұрганын түсініп айтқан сөзің ғой бұп... - деп күрсінеді би. - Ал онда не отырыс бар, әлгі жетпей жатқан малыңың біреуін мен берейін.

- Ойбай, биеке! Жасыңызға құлдық, - деп Бабас қол қусырып орнынан ұшып тұрады.

- Сабыр ет, Бабас. Әлі сөзімді аяқтаған жоқпын, - деп би қолын сермел, менің бабам Имашқа қарапты. - Ал, Имаш Әжібаласы не бермек.

- Біз де бір жылқы береміз ғой, биеке.

- Ақабай-ау, Имаштан сенің жолың үлкен емес пе. Сенің лебізің қалай екен, - дейді би біздің үрпақтың үлкенине.

- Біз де қатардан қалмаспыз, биеке.

Би аз үнсіздіктен соң, бәсен үнмен төнірегіндегі билерге тіл қатыпты.

- Иә, енді міне тоғыз қара болды... - деп жер шұқылап отырады. - Жетер осы да... Өзге билер бір жолға тілегімді аяқсyz қалдырmas деп үміттеніп отырмын. Осы жолы екі тізгін мен шылбырды маған беріңдер, кейіннен көре жатармыз.

Өзге билер әділдікке жүгініп, әлгі уәждің алдын кеспепті.

- Сіздікі жөн, сіздікі жөн, - деп бәрі де құп алады.

Осылайша Бабастың есебінше жетпей жатқан үш қараның да орны толыпты. Айып төленіп, даушылар ауылдарына аттанады. Барын беріп қара жерге қарап қалған Бабастың үйі, ескі қоныстан көтеріле алмай отырып қалған екен. Ел маңынан өткендер «қарақшылар қонысы», «ұрының ұясы», «алаяқтар ауылы» деп өтетін болса керек. Қара таңба әркімнің бетіне шіркеу болып, жүздері төмен жүреді.

Тіптен бас қосыла қалған жерде әлгі айғакты ат бадырайып шыға келеді екен. Бірде сейсенбі базарына барған біздің базаршыларды біреулер мұқатыпты:

- Е-е, сендер ұры ауылының жігіттері екенсіндер ғой.

Бұл сөзге жауап қата алмай, ауыздарына құм құйылған біздің жігіттер, іздерінше ат басын ауылға бұрган екен. Базаршылардың алдынан шыққан ел, құралақан жігіттерді көріп аңтарысып қалған көрінеді.

- Неменеге тесіле қалдындар. Елге қарауға бетіміз күйіп, «ұры» деген атақтан қашып кеп тұрмыз, - дейді базаршылар.

Мұны естіген Бабас қайғыдан қатты күйіп, қаһарға мінген екен. Қабаштың шашын ұстарамен қырыпты. Соң соң құйқасын мандайынан желкесіне дейін, он самайдан сол самайына дейін тіледі. Басына жарғақ тұмақ, ұстіне айналдырған тон кигізеді де, қолына таяқ ұстатады.

- Енді қайда барсан, онда бар. Сендей арам ағайыннан адал арым артық, - деп теріс батасын беріп, ата қоныстан аластап шығарған екен. Ол заманда қарғыс ауыры «теріс

бата», жазаның үлкені «қасқа» етіп әйгілеп, елден қуып қаңғытып жіберу болыпты ғой. Сол Бабастың кенже ұлы Орманқұл менің көкем Момынқұлмен жасты еді.

Нағашымыз Текебай бидің кенжесі Құлжабай да бұлармен құрдас болатын.

Орманқұл қырықтан асқанша кедейлік қолын кесіп, үйлене алмаған. Ал Құлжабайдың атастырып қойған қалындығы өліп, оның 8-9 жастағы сіңлісінің бой жетуін күтіп, амалсыз жүрген кезі екен. Ол кездे қос бойдақтың да жастары отызды иектеп қалып еді.

Қысқы шілде кезінде құтырынған боранның құрсауынан шыға алмай Құлжабайдың ауылда жатып қалғаны бар. Құлжабай мінез жағынан ағасы Серкебайға мұлдем тартпаған. Ол сабырлы, биязы, өзін-өзі қай жерде болса да, қай ортада болса да ұстай білетін байсалды, орта бойлы, қара торы жігіт еді.

Сондағы боз боранға қарамай ол Момынқұлды ертіп алатын.

- Жүр, малтамға барып, қайтайық, - деп қымтана киініп үйден шығып жүрді. Аздан соң қас-кірпігіне дейін қар болып қайтып келеді.

- Ух! Астапыралла-ай, мұндай боранды кім көрген, үйытқып ұлып, үйіре борап тұр ғой тегі. Көз қаратар түрі жоқ. Тыныс алдырмайды. Жотаның жазы жақсы болғанмен,

қысы тата қиямет қайымның өзі ғой, - деп киімдерін шешіп, қарын сілкілейтін.

Мұндайда қысқа күннің өзі ыбылжып тұрып алатыны бар ғой. Бәріміз үйге сыймай, ермек іздейміз. Содан кешкі тамақтан соң ертегі, жұмбак, құлдіргі әңгімелер айтып, Құлжабай бізді еліктіріп отырушы еді.

- Ой, шырағым-ай, сен болмасаң, әсіресе мынадай қарлы күн, қараңғы түнде ішіміз пысып, жарылып кететін екенбіз ғой. Тіптен сенің айтып отырғандарың мына балаларға рахат

болды-ау, - деп әжем Құлжабайға алғыс айтып отыратын.

Бір кеште ол «Сұрмергенді» айтып берді.

Екінші кеште «Сұрмергенді» асықпай қайталады. Момынқұл көкеме жаздырып отырды.

Менің екі құлағым соларда болатын. Үшінші естігенде мен өзіне айтып бергенімде:

- Оу, Бауыржан-ау, өзің құйма құлақ екенсің ғой, шырағым, - деп Құлжабай арқамнан қақты.

- Е-е, нағашысына тартқан ғой, - деп әжем мақтанып қалды.

Оның ертеңіне әкем аспаптарын құрып, Момынқұл су жылдытып, балшық иледі. Одан әкемнің айтуынша қалыптар құйды. Мен үлкен табаншаның үстіне ағаштан құркешелеп отын жағып, көрік басып отырмын.

- Ал, апа, күн қысқарсын, бәріміз де тірлік істеп отыралық, - дейді әкем әжеме. Сөйтеді де әр жерде шоқшиып зерігіп отырған қыздарды нұскады. - Сіз мыналарды да қарап отырғызыңыз, апа.

Әжем орнынан тұрып, үлкен алашаны бөлменің бір босағасына жаяды.

- Сен, балам, ауызғы бөлмеден бір қап жүн алғып кел, - деп қыздардың үлкені Үбианды жұмсайды. Өзі мүйіштен екі үршықты әкеліп, алашаның төр жақтағы бұрышына қояды. Үбіан алғып келген жүнді алашаның ортасына үйіп, қыздарға орын көрсете бастайды. Өзі де көрпешенің үстіне жайғасады. Әжем бәріне тиесілі жұмысын тапсырып жатыр.

- Сен, Әлиман мен Құрманқұл, екеуің жүн тұтесіндер. Асықпай үлпілдетіп жібекше тұтіндер.

Екі қызы әжемнің айтқанын екі етпей, іске кірісті. Енді әжем Үбіанға бұрылды:

- Сен мына ұршықтың біреуін қолыңа ал. Екеуміз жіп иірелік.

Жалтақтап отырған келіндеріне көзі түскен әжем, оларды да құр қол қалдырған жоқ.

- Үйлерінді сыйрып, ыдыс-аяқтарыңды жуып, құлдерінді шығарып, қазан-ошактарыңды реттеп, тамақ пісірудің қамына кірісіндер. Сендерге сол да жетер.

- Әпке! Маған да бір нәрсе жүктесеңізші...

- Сен қонақсың ғой, қарағым!

- Қашанғы қонақ болып отыра бермекпін, әпке.

- Ұңылдаپ өлеңінді айтып отыра берсөнші, қарағым, Құлжатай, - дегенде бәріміз құліп жібердік.

- Тоба, сондай да тірлік болады еken-ay,-деп Құлжабай да құліп жатыр.

Жұн түтіліп, ұршық иіріле бастады. Көрік басылып, көмір оттанып, күміс еріп қалыпқа құйылды. Қорытындының беті қарайып қатая бастағанда, оны қысқашпен алып, темір

тегенедегі суға тастап жібергенде, су баж етіп шашырап, буы бүркүрайды. Суыған күміске төс үстінде балға соғылады. Осылайша әрқайсымыз өз тіршілігімізben отырғанда байқамаппын. Қайдан алып келгенін білмеймін, Құлжабай жуандығы сұқ саусақтай, ұзындығы төрт-бес қарыстай

талшыбықты бәкісімен жонып отыр екен. Сөйтіп біздің үйде «өндіріс цехтарының» жұмыстары қыза бастады. Біреумен біреудің ісі жоқ. Әркім өз тірлігін үделеп отырған.

Тұскі тамаққа қою майлы быламық істелген екен. Сол кездерде біздің ауылда сүйік тамақты да «екеуара», «үшеуара» табақтасып бір қасықпен ішетін әдет бар еді.

Быламықтың түрі де көп болатын. Ең сүйіғын «атала», күбіге ашытса - «ашыған быламық», айран қатса - «ақ быламық», сүтке пісірсе «сүт быламық», тек суға пісірсе - «қара быламық», оған құрт езіп қатса - «құрт быламық», май салса - «майлы быламық» деуші еді.

Құлжабай тамақ үстінде быламық туралы талай құлдіргі сөздер айтып отырды...

Алыс жолдан арып келген екі жолаушы бір үйге түстенгелі ат басын тірепті. Үй иесі шайдан кейін өзге рәует білдірмей, тымпиып отыра берсе керек. Қарны тойып, қабағы жадырамасын білген жолаушының біреуі тысқа шығып келген соң, серігіне «аттаналық» деп тықыр салыпты.

- Тұр енді, аттаналық. Отыра бергенмен оңала қоймаспыш, - депті.

Серігі орнынан козғалғысы келмей қипақтай берген екен.

- Әй, тұрсаңшы енді...

- Досым-ау, қалай тұрайын. Жай-күйім өзіңе әйгілі ғой, - деп мынадай өлең айтқан екен:

Ішсем тамақ болмайды шай антұрған,
Әйт, шүү десем жүрмейді тай антұрған.

Ат бер десем бермейді бай антұрған
Шай шіркінді шығарған қай антұрған.
Шу дегенде суырылған құла мықты,
Сынығынды бекіткен сына мықты.

Қалай ғана құр ауыз аттанайын,
Тым болмаса қимады-ау быламықты.

Біздің елде жүқпа дейтін тамақ болады. Қамырды жүқалап жайып, ыстаған қазан түбіне кептеп жапсырып пісіреді. Қамыр жабысып күймес үшін қазан түбін құйрықпен майлап

отырады. Жүқпа піскен нанды қатырма дейді. Қатырманы суға не сүтке салып қайта пісіріп былбыратады да, үстіне сары май салып орап дастанғанға қояды.

Бір үйге қонақтар түсіпті. Үй иесі сараң бай екен. Аузынан берекелі сөз шықпай, әйеліне қайта-қайта «қонақтарға жүқпа істендер, жүқпа істендер», - дей беріпті.

Пейілі тар үйден тамақ ішіп жарымасын білген қонақтардың ұлкені мұқата сөйлепті.

- Байеке, сонша «жүқпа-жүқпа» дей бердіңіз. Жүқпайтын болса, құдағиды әурелеп қайтесіз, - деп орындарынан тұрып шығып кеткен екен...

Осы сияқты әңгімелерді көп білетін Құлжабай нағашым бізді күлкіге қарық қылып отыруши еді.

Тұсі тамақтан кейін Құлжабай шыбықтарын қайтадан жонуға кірісті. Кейбіреуін істіктеп, үстіктеп жатыр. Жуандau шыбықтың екі ұшынан ұстап иді де, алға созып қарады. Кендір жіппен екі басынан байлап тартты. Ұшталған шыбықтың біреуін алып өзі жасаған «садақпен» кірер есіктің

мандайшасын көзделеп атты. «Оғы» нысанаға дәл тиді.

- Мінеки, Сұрмерген осылай «атқан», - деді.

Отыргандар күлісіп, біз сияқты балалар мәз болып жатырмыз. Эрине, садақты маған берді. Содан бастап мен ауылдағы садақшы «Сұрмерген» атанды...

Боран саябырси бастады. Үлкендер ауа райын болжалдал:

- Әй, ертең жоқ, арғықұні қойып қалар, - десіп отырды.

Айтқандай-ақ боран да басылды, күн де ашылды. Бұғаудан босанған долы арыстанша қайраттанып, Момынқұл мен Құлжабай үйдің маңдайшасына дейін басып қалған құртік қарға қүрек салды. Қүреген жоқ, текшелеп ойып лақтырып, есік алдынан сыртқа жол ашты. Сай-жылғаның қайда екенін аңғара алмай аң-таңбыз. Айналаның бері күнге шағылышып көз қаратпайды. Аппак дастарқандай теп-тегіс, тып-типыл төңірек шетсіз-шексіз ұлғайып кеткендей. Үш-төрт күніміз

қар басқан үйді аршып, суатқа жол салумен өтті. Бұлақ басындағы бытырап жатқан ауылдың тұтінін көргеніміз болмаса, әлі қарым-қатынас жоқ.

* * *

1921 жыл еді. Ел етек-женін жинап тойына бастаған кез. Жаздың бел ортасы болатын. Ауыл қара жол үстіндегі жайлауда. Үлкендер қыстау басында пішен шауып, егін суарып жүрген. Малшылар Ақсай бөктеріндегі жайлауда коныс тепкен.

Мен қозы баққан балалармен бірге жүремін. Шілік ойнаймыз.

Осындай ойын қызған шақ еді. Кенет қара жолдың бүйра шаңын баяу тұтіп торқасқа мінген жолаушы келеді екен. Бізге жақындағанда ат тізгінін тежеп, тіл қатты.

- Әй, балақайлар, бері келіндер!

Біз тобымызбен жүгіріп бардық. Бір байқағанымыз - жолаушының ат-тұрманы, киімі ел адамдарына қарағанда өзгешелеу екен. Ширатқан қара мұртты, қырынған көк иекті,

қара көз, атжақты, қырмұрын жігіт бізге қарап жымиып тұр. Жас шамасы отызды жағалап қалған сияқты. Ол кілем қоржынына қол салып бір-бір уыс өрік үлестірді. Соңан соң қамшысын шошайта сілтеп, бізге тіл қатты.

- Ана ауыл Үсен әuletінің тұрағы ма?

- Иә, - деп шу ете тұстік біз.

- Дәуренбай тірі ме?

- Иә, атам әлі өлген жоқ, -- деді менен екі-үш жас кіші Мырзабай.

Ат үстіндегі жігіт езуін жиып күліп алды.

- Сен өзің кімнің баласысың?

- Мырзабаймын ғой.

Жігіт тағы да мейірлене жымиды.

- Атаңның кімі боласың?

- Атам мен апамның баласымын ғой. Егер сенбесеніз, мына балалардан сұраңыз.

Жігіт енді қарқ-қарқ құлді.

- Неге сенбейін, айналайын. Сендім, қарағым, сендім.

- Бұл - Дәуренбай атамның үлкен ұлы Ормантай көкемнің баласы, - дедім мен білгірсініп.

- Ал, сен өзің кімнің баласысың?

- Момыштың баласымын.

- Әлгі молда Момыш па?

- Иә, молда атамның баласы, - деп менен бұрын Мырзабай жауап қатты.

Жолаушы бізге тағы да үш-төрт өріктен үлестіріп берді де ауылға қарай тартты. Біз танымайтын кісінің берген базарлығына мәз болып қозымызға қарай жүгірдік...

Әкем бір күміс білезікке мәймөңке шауып нақыстап отыр еді. Сырттан дауыс естілді.

- Момыш! Үйдемісің?

Әлдекімнің қырылдақтау үнін естігенде, әкем орнынан ұшып тұрып, сыртқа ұмтылды

- Ассалаумағалейкүм.

- Ұағалейкүм салам.

- Үйге кіріңіз, Дәуке...

Әлгі қалтырақ үннің карт кісінің даусы екенін енді білдім.

Дәуренбай ақсақал төрге жайғасып, бүкіл омырауын қаптаған, (жас кезінде ол кісіні жеңгелері «қабасақал» дейді екен) аппақ сақалын сипады. Дәуренбай атамның әдеттегідей

өзгешелеу толғанып отырғанын сезді ме, әкем мені сыртқа жұмсады.

- Әй, сен бара бер...

- Отыра берсін. Ешқандай оңашалайтын ағат сөз жоқ, - деді Дәуренбай атам.

Дәуренбай Бабастың үлкен баласы екен. Өз бетімен ауыл қыдырмайтын, шақырмаса бармайтын ерекше сыпайы кісі десетін. Сол кезде жетпістен асқан шағы болар, шамасы.

- Ал, Дәуке, екі құлағым сізде, - деді әкем аздан соң.

- Сенер-сенбесімді білмей отырмын, Момыш.

- Неге? Не боп қалды, Дәуке?

- Өлгөн тірілді дегенге сенесің бе? - деп үлкен қой көзімен әкеме тік қарады.

- Сен десеніз, сенейін, Дәуке, - деп әкем жымиды. - Жұмбақтамай-ақ айта берсеңізші.

- Жұмбақ па, жоқ әлде шынымен-ақ ақиқат па. Сенер-сенбесімді білмей отырмын дегенім сол ғой.

- Тәңірі-ай, енді не болса да айтсаңызы, - деп әкем тықыршып тағы да жымиды.

- Жұр біздің үйге. Есітерінді сонда естисің, - деп Дәуренбай орнынан тұрды...

Олар кетті. Мен аң-таң болып үйде қалдым.

Әкем тұн ортасында оралыпты...

Мал өргізіп болған соң өзі тағы да Дәуренбайдың үйіне қарай беттеді де, жұмбақ үсті жұмбақты шеше алмай мен қалдым. «Кешегі жігіт кім екен?», «Дәуренбай атам

неменеге сенер-сенбесін білмей жұр екен?», «Әкем ол үйге неге қайтадан кетті?», «Өлгөн тірілді дегенге сенесің бе?», «Сен десеніз, сенейін...»

- Шырағым-ау, сен әлі үйде екенсің ғой. Өзге балалар өрісте қозыларының соңында жұр,- деген әжемнің даусынан селк ете қалып, орнынан ұшып тұрдым. Жалма-жан үйден жүгіре шықтым...

Екі күн өтті. Қозы қайырып жүргенбіз. Қос салт атты қара жолмен күнбатысты бетке алып аттанып барады екен. Біреуі - бүрнағы күні балаларға өрік үлестірген торықасқа атты

жігіт, екіншісі - көк дөненге мініпті. Бұл - Мырзабайдың әкесі Ормантай. Үшінші күні Мырзабай да қозы қайырысуға шықты. Бәріміз жаңалық білуге құмартып Мырзабайды ортага алдық. Алайда жарытып ештеме айта алған жоқ.

- Қайдан білейін. Мені атамның үйіне жолатпай қойды. Әйтеүір өздері құбірлесіп сөйлеседі. Көп адамның басын да қоспады. Молда атам, Аққұл атам, Тоқмырза атамдардан

бөтен ешкім де болған жоқ.

Мырзабай одан өзге ауыз тұшыр әңгіме айта алмады...

- Молдеке, анау күні Дәуренбайдың үйіне келген жігіт кім екен? - деп сұрады әкемнен бір туысымыз.

- Ормантай оралған соң, бір-ақ білерсіндер. Әзірше сабыр ете тұрындар, - деді әкем оған...

Қара жолдан қос дөңгелекті үш сартарба, бір топ аттылар көрінді. Атты топтан үш жігіт суырыла шығып, ауылға қарай құйынданша шауып келді.

- Сүйінші! Сүйінші.

Дәуренбай атам көзі жасаурап, қол-аяғы дірілдеп, қызыл тұлкінің терісін әлгі жігіттерге ұсынды. Менің әкем жарты уыс күміс теңге салды. Өзгелер де жамырасып, жақсы хабар әкелген жігіттерді сыйласап жатқанда, естігеніміз қуанышты жалғыз сөз еді. Жүрттың бәрі:

- Жаңа туысқандар келді. Жаңа туысқандар келді, - деп елпілдей жүгірісіп жүр.

Ауыл адамдары қарсы алуға шықты. Екі жақ бір-біріне жақындағанда, бір шоқша сақалды шал атынан ырғып түсіп, елпелектей жүгірген күйі ауыл адамдарын бастап келе жатқан Дәуренбай атамның алдына:

- Әруақ! Әруақ! - деп етпетінен жығылды.

У-шу, ығы-жығы. Бұрын бейтаныс кісілер көрісіп, құшақтасып, сынсыласып, төс түйістіріп опыр-топыр араласып кетті...

«Өлген тіріледі дегенге сенейін бе, Момыш?»

«Сен десеніз сенемін...» деген жұмбақтың шешімі осы екен деп екі нүктे қоя тұрайық:

Сөйтсек, әлдеқашан ұмытылған Қабаш тіріліп елге, өзі қарабет болып қуылған ататегі, адал қонысына қайтқан екен. Оның баласы алпыстан әлдеқашан асқан Бапыш деген кісі болып шықты. Дәуренбай атамның алдына жығылған сол кісі екен. Қабаштың немерелері Ыстықұл мен Әбдіш

екен. Елін ізден келген жігіт сол Ыстықұл болып шықты. Ал шөберелері Айнаш, Оспан, Әмір, Әлиялар да келіпті. Бапыштың кемпірі мен екі келіні және бар. Қабаш тіріліп қайтты дегеннің мәні осы еді.

Қабаш елден жиырма бесінде кеткен екен. Ал оның тұңғыш баласы Бапыш ауылды алғаш рет алпыстан асқанда көріп отыр. Олар келген жылы әкем алпыстың бесінде болатын. Дәуренбай атам шамасы жетпістің бесеуінен асқан кезі болса керек. Сонда Дәуренбай атам Қабашты он бір-он екі жасында көрсе керек.

Қабаш елден кеткен соң, Ташкентке жақын Шыршық өзенінің жағасына барып бір-ақ тоқтайды. Осында бір орта диқанға жалданып жүреді. Күріш, бау-бақша, мақта өсіруді үйренеді. Кірпіш құйып, үй түрғызыу, аяқ-киім жамау сияқты өнерлердің де дәмін татады. Осылайша ол қолынан іс келетін икемді жігіттердің санатына қосылыпты.

Сөйтіп жүріп ол екі жылдан соң жалданған үйдегі кіші кенаимды (женгей)... алып қашып, ізіне су құйып жоқ болыпты...

Бапыш Терmez қаласының маңындағы өзбек ауылында туады. Бапыш жетіге келгенде, Самарқанның салқын тауларының бөктеріне қоныс аударады.

- Иә, балам, біз Құли деген ел боламыз. Атамекеніміз Алатаудың Ақсай-Көксай деген

бөктерлерінің баурайында еді. Мыңбылақ аталатын жайсаң жер еді ғой. Жазы салқын, қысы қатал келеді...

Құлилардың ішінде біз Үсен деген тарауына жатамыз. Үсен болса Өтеулі, Батырбек, Әжі үрпақтарына бөлінеді. Біз болсақ Өтеуліденбіз. Менің ағам Бабас дейтін кісі болған. Менен мүшел жас үлкен еді... Мен ағайыныммен араздасып жиырма бес жасымда осы жаққа ауып кеткенмін...

Сендер менің бетімді жауып, асымды бергеннен кейін, сол елді тауып, үйірлеріңе қосылу жағын ойландар, - деп қарт Қабаш көз жұмған екен...

- Ол кезде менің кішкене бала кезім. Неге ренжіскендерін аңғара алмаппын. Қайдан білейін, - дейді Дәуренбай.

- Мен онда жарық дүниеге келмеппін де... Ағайын арасында бола береді ғой, Қапеке, ол жағын қазбалай беріп қайтесіз... Құдайға шүкір, үйіріңізге бала-шаға, немерелеріңізбен топтана қосылып отырызыз, - депті менің әкем.

- Әйтеуір маған бір жұмбақ, - депті Бапыш терең курсініп.

Жаңа туысқандар ұқыпты еңбекқор екен. Біздің ауылға тез сіңісп кетті.

Бістықұл ауылсовет, аудандық советтерге қатысып, ел ішіндегі белгілі активтердің қатарында болып жүрді. Оның Оспан дейтін ұлы менімен түйдей жасты еді. Бірге өстік. Әбдеш те өз қатарынан қалып көрген емес.

«Жаңа туысқан» деген жанама ат бір-екі жылда-ақ ұмытылып еді.

* * *

Қабаштың басын «қасқалаған» Бабастың кенжесі Орманқұл еді. Ол Момынқұл, Құлжабайлармен құрдас екенін айттық кой. Атын атаған соң сол кісінің де құлағын аздал шулatalық. Орманқұл орта бойлы, атжақтау, қалың қара қасты, мұнаркөз, қыр мұрын, қара мұрт, қабасақал жігіт еді. Жалғыз аты жазатайымда мертігіп өліп, Орманқұл біздің ауылдың тілімен айтқанда пиязда кедейлік кешкеніне төрт- бес жылдай болған. «Атсыздың аяғы тұсаулы» дегендей, қутомар кедейдің өзі болғандықтан, ол жиын-тойдан қашқақтап, қыстауынан ұзай қоймайтын. Тұйық тірлік кешіп, көніл көтерері жалғыз домбырасы еді. Жұрт аралап жұғымсыз боп та көрген емес.

Біздің үйде көп жатып зеріккен Құлжабай басқа жегжаттарын аралаған соң қайта оралды.

- Әдейі ымырт жабылғанда келді... Мына Орманқұлды біреу болмаса, біреу көріп қала ма деп қара жолдан қайрылып орағытып жеттік, әпке, - деді әжеме құлімсірей қарал.

- Жақсы бопты, шырағым. Келгендеріңе қуаныштымыз, деді де апам енді Орманқұлға ойысты. - Апаң қалай, жақсы ма, қарағым?

- Шүкір, әнеу күндері аздал тұмауратып еді, енді айықты.

- Мына қақыраған қыста менің де оқта-текте түш- кіріп-пышқырып қалатыным бар. Ондай-ондай бола береді. Апаңның амандығына шүкір, қарағым. Қысылмай-кынтырылмай жайбарақат жайғасып отырғын, шырағым.

Сонан соң апам ошак басындағы келініне тіл қатты:

- Қазанға Орманқұлдың сыбағасын атап салындар. Тамақ алдындағы шайды тездетіндер.

Әкемнің жай сұрасқанына Орманқұл:

- Иә, солай. Шүкір, молдеке... Ләпбай... Әрине... әбден Сөйтті ғой... Жүдә болмаяқ қойды ғой... Тіптен айтпаңыз, молдеке... Сөйтті білем, - деп қысқа жауап қатып отырды.

Шай үстінде Құлжабай жүрген жерлерінің әңгімесін айтып отырды. Біраз әңгіме араласқаннан кейін бірнеше шумақ өлеңнің аяғында:

Орманқұл, сен қайдағы, мен қайдағы,

Біреудің мен де өзіндей сар бойдағы.

Осындаі оқта-санда жолыққанда

Өлең айт сырынды ашып қай-қайдағы, -

деп кезек бұрды. Орманқұл төмен қарады.

- Менің өлең айтпайтынымды білмеуші ме едің? Домбыра болмас...

- Е-е, онда домбыранды қолыңа алғын. Маған да соның керек еді, - деп Құлжабай күлді.

- Қысылма, қарағым. Бұнда бөтен ешкім жоқ қой, - деді әжем.

«Мен ақын емеспін - әншімін», - дейді біреу

«Мен әнші емеспін - құйшімін», - дейді біреу.

Орманқұл күйші еді. Бір ғажабы, ол домбыра тартқанда дүниені ұмытып, тілден қалатын. Домбыра көмейінен қайдағы бір зарлы мұнды төгіп отырады. Ал енді қүй тартқысы келмесе, домбыра атаулыны таңдан:

- Жоқ, болмайды екен, - деп жаратпайтын.

Орманқұл әйтеуір томага-түйік жан еді. Ішінен қүй қайтарып, іштей тынып, өзімен-өзі сырласатын саяқ жан еді. Бұл жолы да үн қатпай, домбырасын баптай береді. Тиегін түзеп, құлағын бұрап үнін бабына келтіргеннен кейін баяулатып тарта бастады.

Ол домбыраның құлағынан басқа ешкімге қараған жоқ. Өз тартқанын өзі шын зейінімен, тыңдал отырғандай, өзге домбырашылардай он саусағын серпи қақпайды,

сол саусақтарын ербенде жүргітпейді. Арқасының құрысын жазғандай жұлқынып сілкінбейді. Тұнық терең ой түбінде мамырлап қалғып кеткендей.

Бір күйді аяқтаған соң алдындағы шайын ұрттап тыныс алды. Осы кезде Құлжабай желпіне сөйледі.

- Эй, мынауың сарқырап ағып жатқан Ақсай сұнының сарыны емес пе?

- Эй, мынауың Шақпақтың кейде байсал, кейде ызғарлы желі шығар?

- Эй, мынауың көкпардың қиқуы мен сайыс-тартыс дүбірі ғой.

- Эй, мынауың кешегі жұмадағы үлей-түлей ұйытқыған, ұлыған боранға ұқсайды, ей.

Орманқұл басын изеп ұнсіз құптады.

- Қап, өлеңді жазып алуға болады, әнді тыңдал үйреніп алуға болады. Күйді жазып алуға болмайды еken-ay, - деді санын соғып Құлжабай.

- Әншінің даусы домбыраның көмейі емес. Өлеңнің жолы домбыраның пернесі емес. Күйдің үні - домбыраның төл меншігі... Оны күйшінің жүрегі ғана ұға алады, - деді Орманқұл.

- Сенікі рас, Орманқұл, - деді Құлжабай ойлана отырып.

Қазақтың халық композиторларының нотадан хабары болмаған ғой. Олардың күйлері дарынды шәкірттері арқылы ұрпақтан-ұрпаққа ауысып отырған. Күйді де жазып алуға болатынын тап сол кезде Орманқұл мен Құлжабай да, әжем мен әкем де, мен де білмеппіз ғой.

Енді ойлап отырсам, Орманқұл сөзсіз композитор болуы керек. Ол нота түгіл хат та танымаған. Ол кедейліктің зардабынан жалғыз еді, саяқ еді. Қолы қысқалықтан қорынып оның ұстазы да, оның ізін қуған шәкірттері де болған емес. Оның шығармалары өзімен келіп, өзімен бірге кетті ғой, әттең...

* * *

Қыстың ұзак кештерінде әкем бізге ертек айтып беретін. Өлең үйретіп, дауыстап кітап оқытын. Шағатай тілінен оқытын болу керек, сөйлемдері «боладур», «геладур», «бередур», «үшбу» деп келеді еken. Кейбір түсінбеген сөздерімізді әкем ежіктең отырып мағынасын ұғындырады.

Совет үкіметінің алғашқы жылдары біздің өлкемізде бүркырап тез өте шықты. Қым-қиғаш тартыспен, таптық қүреспен, рулық айтыспен, жікшілдікпен, топ үйимдастырып тор жаюмен, жала жауып, жарға итерумен шұғылданған бүрынғы байлар жасырын тұзақ құрып жанталасып

бақты. Олар кедей туыстарының тасасында тұрып алып жаңа өмірге тас атқылады, адаптандарды аяқтан шалуга ұмтылды. Ауылдағы үстемдікке, болыстыққа, уездегі ықпалға ие болуға қол созды.

Әдетте мұндай қым-қиғаш талас сайлаудың алдында басталушы еді.

Байлардың мұддесін қорғап, соның сойылын соққандар мұндай тартыстарды лезде өз пайдасына жаратып, қарапайым еңбеккөр халықтың назарын негізгі нысанадан ауытқытып жіберуге тырысты. Бұл сияқты жікшілдіктің салдарынан ауыл арасының бірлігі шытынай берген еді.

Елге уәкіл келгіштеп алды. Олар жаңа тәртіптің, жаңа нұсқаның мәнін, кедейлердің правосы жайлы жиналыстарда түсіндірді. Мұндай уәкілдердің көп келетіні сонша, тіptен ел олардың аты-жөнін де біліп үлгермейтін. Сондықтан өздерінше ат қойып, айдар тағып алады. Үәкілдің түр-тұрпатына, жүріс-тұрысына, мінез-құлқына, ақыл-ойына қарай әрқайсысы өзіне лайық атқа ие болады. Дударбас, шаш қойғанын - «шашты уәкіл», тақыриек қырмасақалдысын - «көк иек уәкіл», шошайма бас киім кигенін -«молдаторғай» тағы бірін «жаутұмақ уәкіл» деп атайдын. Енді бір уәкіл әрбір сезін «боевой приказ» деп айта берген соң, оны «бообой пркез» деп атағаны есімде. Тағы бір уәкіл астына ат мінсе, қарасорпа етіп қамшылайтын да жүретін. Мұны көрген ел уәкілді «атсоры» деп атап кетті. Келген өкілдің мән- жайына, жөн-жобасына қарай қойылған аттар қаншама еді: жер уәкілі, су уәкілі, салық уәкілі, ағарту уәкілі, сайлаушы уәкілі, айдаушы уәкілі дегендердің бәрі де - біздің ауылға ат ізін салғандар. Уәкілдер неге екені белгісіз, тез ауысуышы

еді. Ел мұны әр саққа жүгіртіп жүрді. Менің бала қиялым соның бәрін егжей-тегжей байыптай бермейтін.

Әкем бұл кезде алпысты алқымдап қалған еді. Сондықтан, ауылдағы қызу өмірге белсене араласа алған жоқ. Оның есесіне көкем үй бетін көрмейтін болды. Жиналыс атаулының бәріне қатысып, сайланбаған қызметі қалмады. Сондықтан елуліктің, жүздіктің арасынан делегат бол сайланды, ауыл советтің төрағасы да болды, «Қосшы» одағы бастығының орынбасарына сайланғаны да бар. Дегенмен, қанша тал-

пынып, қанша құлшынғанымен, көкем «әйгілі адам» бола алмады. Сайлау сайын көтерілудің орнына, қызметінен зырғып түсіп жататын. Бұған кінәлі оның кабілетінің аздығы емес еді. Көкем ауылдағы жікшілдердің жемі боп қала беретін. Серкебай нағашым көкеме кездескен сайын қыжғырып, «өз орны үшін таласа алмаған ынжықсың, нағашы бабаң Текебай биге тартпай түп сүйегінді қорлап жүргсің. Соның бәрі құраннан безіп, құлдық етуді ұмытқаныңың кесірі», - деп кейіп отыратын.

- Ел жақсылары қара тізімге ілігіп жүргенде, алты ай қызметке ақымақ торғай да шыдайды, - деп келемеждеуші еді нағашым. - Міне, мен жарықтық әкем Текебай бидің аруағына таңба түсірмей әлі қүнге дейін Серкебай би атанып жүргем жоқ па, - деп қамшысымен жер сабалайды. - Ал сен күшік болсаң мас кісідей әр қызметтен бір құлаумен келесің. Намыстанып өлетін болдық қой, түге.

Көкем ақталмақ бол, жаңа тәртіп жайлы түсіндіре бастайды. Ондайда:

- Тауыққа жұмыртқасы ақыл үйрететін болған ба, - деп кекететін Серкебай нағашым. - Есердің естіге жөн үйреткені ме, шынымен!

- Нагашы-ау, сіздің шалқыған дәуіріңіз өтіп барады ғой. Ендігі өмір талабы өзгешелеу.

- Сен не деп отырсың, ей ынжық, - деп Серкебай көкемнің қеудесінен қамшысымен нұқиды. - Қалай деп көкисің, шірік? Не дедің сен?

- Түк те дегенім жок. Жай аузынан шығып кетті, - деп міңгірледі көкем.

- Үлкеннің бетінен алғанды саған көрсетермін мен, - деп нағашым бұлқан-талқан болады. - Кіммен бәсекелесетініңді тапқан екенсің. Қотыр бұзаудай арқандап қоюға әлі шамам келеді.

Көкем арқасын қамшы осып кетпесін деп үнсіз отыра беретін. Оңтайлы сәті келгенде осынау адуынды шалдан аулак жүргуге тырысып, сыртқа зып беріп шығып кетеді. Шал оның соңынан біраз ұрсып, бұрқылдаپ отырады.

- Япырау, заман не боп барады. Әлдилеген балаң әдептен асып, арпалыса бастаса, жақсы адам бола ма деп үміттенген адамың өзінмен жағаласса не дерсің. Әттең, мына тасырандаған жаман неме өз сүйегім ғой. Әйтпесе аяқ-қолын керіп тұрып көкпар етер едім...

Сонан соң қабағын тұнжыратып, сақалының ұшын шайнап біраз үнсіз отырады да, әжеме тиіседі:

- Мұндай әумесер жиенді несіне тудың, әпке?

- О, не дегенің, қарағым, - деп әжем абыржи қалатын. Алланың бергені осы болса, амалым қанша.

- Иә! Өз қолынды өзің кесе алмайсың. Әйтпесе ғой, әйтпесе!.. Мынау өңшең шолақ белсенділер-ақ титығыма тиіп болды, - деп ашуланады Серкебай. - Ең ақыры өз жиенің бетің бар, жүзің бар демей... Сіздің дәуіріңіз өткен деп былжырайды. Бұл қартайғанда есітер сөзім бе еді.

- Сен енді, Серкешжан, балаға кешірімді бола ғой. Байқамай айтып қалған шығар, - деп әжем бәсек үнмен күбірледі.

- Байқамай қалған шығар!.. Қайдағы байқамай!.. Эх-эх! - деп Серкебай кекесінмен құлді.-Мен оған байқамағанды көрсетермін. Мен есірген белсенділерді итке тастайтын сүйекке таластырармын әлі. Аш қасқырдай арсылатып қоярмын.

- О не дегенің, Серкеш! Өз адамдарың емес пе? - деп шошып кетті әжем.

- Әй, есек! - деп айқайлайды Серкебай. - Үйге кір.

Көкем сонда ғана қайтып оралады.

- Аяғыма жығылып кешірім сұра! - деп бұйырады шал.

Көкем не істерін білмей дағдарып тұрып қалды.

- Момынтай-ау, оның не, кешірім сұрай ғой, жасы үлкен нағашың ғой, - деп араға әжем түседі.

Көкем өжеттігін қойып, тізе бүгеді.

Серкебай нағашым да ашуын лақ еткізіп төге салып, көкемнің тентектігін лезде кешіретін...

Біздің үйдегі тап тартысының таңбасы осылай есімде қалып қойыпты. Ал ел арасындағы таптық күресті мен жол-жөнекей баяндап, өзімнің өмірге араласқан сэттеріме орай

айтармын. Ауылдың қоғамдық жағдайы, ел ішінің өресі қандай болғанын өзімнің де өсу өреме сәйкес әңгімелермін.

Әзірше асықпай-ақ қоялық.

* * *

«Әйелдер тенденсі», «қалыңмал жойылады», «қыздар сүйген жігітіне шығады». Революция жылдарында әйел тенденсі жөнінде алғаш есіткен сөздерім осындай. Бұл сөз көп адамды ойландыrsa, көп адамның көңілінде күдік те тудырды. Әйелдер не де болса бір жақсылықтың нышанын іштей ұққандай үнсіз қуанып еді. Әлденені асыға күтіп, тағатсыз толғаныска түскен жайлары бар сияқты.

Әжем ғана бұл сөзге құлақ аса қойған жоқ. Атамзаманнан қалыптасқан, сүйекке сіңіп сірі болған әдет лезде сендей бұзылып журе берді дегенді бір түрлі үғымына сыйдыра алмайтын сияқты. Бұл ойын бізге де білдіріп қояды.

- Қалыңмал деген ата-бабамыздың салып кеткен жолы ғой. Қашаннан қалыптасқан кәдеміз емес пе. Менің шешеме де қалыңмал төлеген, маған да қалыңмал төледі. Қыздарымның қалыңмалын алып құтты орнына кондырғанмын, ұлдарыма қалыңмал төлеп келін түсіргем. Енді немерелерім қалыңмалсыз-ақ жөндерін табады дегені несі еken?-Ол осылайша күңкілдеп қояды.-Қалыңмалсыз өзге босағаны аттаған қызда қандай қасиет бар дейсін? Құны жоқ қызды кім сыйламақ? Ондай қызды байлары тегін алып, тегін қуып жібермей ме? Өз аяғымен келіп, өз аяғымен кетті деген сөз болмай ма? Қалыңмал алмадым дегенше - жасау жасалмайды, той өтпейді десенші. Оның не қасиеті қалар дейсін, - деп өз-өзінен бүркүлдайды. - Жоқ, олай бола

қоймас. Мен тірі тұрғанда қалыңсыз қыз бермеспін. Менің жолыммен, менің жөніммен жүресіндер. Ал мен өлген соң не істесендер де еріктерің.

Салалы тараشتап өрген сегіз бұрымы иығына төгілген апаларым түкке түсінбей, әжеме аңтарыла қарайтын. Әжемнің қатулы жүзі, тұнерген қабағы, зілді даусы олардың нәзік жанын қалтыратып, өздерін абыржытып тастаушы еді.

Осынау сәби сезімнің қайғысына масаттанғандай мен орныман ұшып тұрдым да, әжеме тіл қаттым:

- Ал мені қалай үйлендірмексің?

Әжем күліп алды:

- Алдымен мына шүйкебастарға., құда түскендерден қалыңмал алайын. Қабырғамызға шыр байлап, әлденіп алайықшы. Соңан соң іздел жүріп сұлу қалыңдық тауып берем. Қалыңмалын да аяマイ төлеп, өзінді де аяктандырамын. Соңан соң үй болды деген осы. Өз отауың бар. Томпандаған келінімді жұмсақ қойып, жылы-жұмсағын жеп, ізетін көріп, көсліп отырмаймын ба, - деп мейірлене күліп сөзін жалғастырды. - Тек тәнірім соған жеткіzsін, сол

куанышты кезге дейін тірі жүрсем деп тілеймін тәнірімнен.

Әжем күрсініп қойды. Қиялды әлдеқайда жетелеп кеткендей өз сезіміне кенеліп отырған сияқты.

Апаларым мен жаққа ала көзбен қарап, жауығып алғандай. Өйткені әжем мен үшін, менің болашақ кербез келіншегім үшін оларды косақтап күйеуге беретіндей көріп тұр. Мен болсам, оларды табалаған жаңармен талап тастағандай маңғазданып киіз үйден шықтым да, ойнау үшін әуіт жаққа жүгіре жөнелдім.

Күн ашық еді. Асқар таудың алып бейнелері айнадай таза судың түбінен көрініп тұр. Балшық илеп балалық ойынға беріліп кеткен екем. Кенет әлдебіреу өзім илеген балшығыммен өзімді төпеп, үсті-басыма жағып, бас-көзге қарамай жұмарлап, кез келген жеріме соққылап есімді

кетірді. Не болғанымды білмей шыңғырып жіберіппін.

Байқасам эәрі ерке, әрі өжет, әрі намысқой, менен екі-ақ жасы үлкен ортанышы апам Әлиман екен.

Мен долданып қуа жөнелдім. Кесекпен атқылап келем. Әлиман көйлегінің етегі далбаңдап безіп барады. Сол күйі үй төбесіне шығып, жиулы тұрған пішенге жасырынды. Соңда отырып мені мазақтайды.

- Масқара-ай, албастыдай сауым-сауым, кір-қожалақ құбыжық ұсқынын қарай гөр. Көзінен сорасы ағып тұр. Тағы сұлу қызға үйленем дейді-ау! Соңан соң пішен төбесінде жатқан жарты қышты ұстап түсті. Кеудесін менменси тік көтеріп:

- Есі болса, бірде-бір сұлу қыз саған тие қоймас, - деді.

- Әжеме айтып сазайынды тартқызармын. Сені өзі ақсақ, көзі көр, тісі кетік, мұрны пұшық, кемиек, басы таз сүмелек біреуге бергізермін, - деп дүниедегі ұсқынсыз нәрсенің бәрін асығып-үсігіп санап жатырмын.

Шыдай алмаған апам:

- Ондайыңа бара қоймаспын. Басыңа шайнап жақ! - деп қолындағы кесегін маған қарай атып жіберді.

Мен бұғып қалдым да шегіншектей бердім. Апам маған тигізе алмағанына ызаланып жұдырықты жаудырып жіберді. Қалай қарсыласарымды да білмей жанталасып жатырмын.

Бұйығы әйел қауымымен алғаш рет осылай қақтығысып едім. Тұңғыш рет ортаншы апам өз ожданын қорғау үшін мен сияқты «қалыңмал иесімен» ашық айқасқа шыққанын көріп едім.

Әжемнің айтқаны болды. Менің әпкелерімнің бәрі әже жолымен ұзатылып, қалынмалға сатылды.

* * *

Үбіан жастайынан Шегір руынан Жарылқап байдың Мамыт деген баласына атастырылған екен. Олардың елі Шақпақ тауының етегінде еді. Жарылқаптың біздің Нығмет

әзүлетіне жақындығы да бар көрінеді. Қыз беріп, қыз алысып отырған екі ел сүйек жаңғыртпақ болып Ұбиан мен Мамытты атастырса керек. Жұт кезінде Жарылқаптар мал-мұліктен жүрдай болып, қаратаяқ кедейлерге теңескен екен. Содан көп ұзамай әкесі мен шешесі дүние салыпты да, Мамыт пен кіші інісі Нығмет байдың Сайлаубай деген үлкен баласының қолына келіпті. Мамыттың інісі менімен құрдас еді. Нығмет үрпағы екі анадан тарағандықтан, бас қосып, екі топ бол аталатын. Бәйбішенің балалары «қара кемпірдің үрпағы», тоқалдан туғандар «ақ кемпірдің немесе Анаргұл кемпірдің балалары» деп бөлінуші еді. Нығмет біткендер тұмысынан кекеш, сақау тілді келетін. Мамыт солардың қолында жалшылық етті де, інісі байдың қозысын бақты. Нығметтерді

мен біздің жайлауға көшіп келген жаздан бастап білемін. Ел басына ауыртпалық түсіп, арып-ашқан кезде нығметтіктер ауылға жоламай, алшақ жүруші еді. Енді еңсеміз көтеріле бастағанда, қайтадан іргелес бола бастапты. Байдың малы егінге, шабындыққа қырғидай тиіп, берекемізді ала берді.

Алайда баяғыдай бай тізесі батып қалған кедейлер бұл басынуға бас көтере алған жок. Сырттай жек көріп, алыстан айбат шегумен шектеліп жүрді.

Әсіресе байдың шалық мінез, есуастау кемпірі Анаргұл шайпау еді. Ол етек-жені елбе-делбе болып, өрістегі мал соңынан қалмайтын. Балаларынан бастап көрінген кісінің бәрін қарғап-сілеп шаңытып бара жатқаны. Өзім ортасында жүрмесем малымды біреулер талап алады деп табаны жерге тимейтін. Кеш батса, түні бойы көз ілмей қиқулап кораны айналып жүріп алады.

Өз басым ол кісінің жайласып отырғанын көрмеппін. Әрдайым желе жорытып бара жатады.

Ауыл адамдары Анаргұлден аулақ жүргүге тырысуши еді. Егер абайсызда ұшырасып қалсанған, бір балағат сөз естімей құтылмайсын. Елді басынғаны сонша, ол қораптағанда қойларды егіндіктің үстінен айдалеп өтуден де тайынбайтын.

Балалары оған қой деп, тоқтау айтып көрген емес. Осыған орай өздері де шетінен сараң, құнамақор. Қыруар айран ашып, күбі-күбі қымыз қыжынап кетсе де, не өздеріне қимай, не жұртқа қимай отыра беретін.

Ауыл адамдары байдың басынған қылышына ашық қарсы шыға алмайтын. Сондықтан алыстан жамандық шақырып, ырымшыл байдың қеудесіне үрей ұялатуға тырысатын. «Ай ақсайды», «Жұлдыз орнынан ауытқыды», «бұлт керуені бұлінді», - демек бір жамандық жақын дейтін олар кемпірге. Сондықтан малға жұт келе ме, әлде топалаң тие ме әйтеуір бір опат болатыны хақ дегенді айтатын. Кемпірдің суқаны қашып, әркімнен амал сұрап, бәледен құтылуға

тырысатын.

- Құдай-ай, сүмдығынды сақтай гөр. Бұған не амал табамын,- дейтін.

Сонда өзгелер:

- Мұның бәрі диқан атандың қарғысына ұшырағаннан. Егінді таптап, шөпті рәсса еткен малға Алла Тағала жаппай жамандық әкеледі. Бұдан аман құтылу үшін егінді таптаған қой мен сиырдың екі сауын сүтін елге таратып берген жөн. Сөйтіп сауабын алмаса, ел қарғысы атады,-деп шошытады екен.

Сараң кемпір бұған көнсін бе. Сондықтан жұрт өзге бір оқиға ойлап табуға кірісетін. Әйткенмен есі-дерпті байлығынан айрылып қалмауга ауған кемпір екі-үш күн егіндікке жоламай, малды ойқастай қайырып жүруші еді. Сонан соң баяғы таз қалпына қайта түседі.

Ауылдың Жамақ деген адамы бар еді. Қылжақпас, жұртты әзілмен жазалауға жақын жүретін кісі болатын. Жас ет аңсан, қалайда тіске басар табу керек деп ойлапты да, ол бір күні құлық істепті. Асқабақтан бүркеншек бас киім жасапты да, көзі көретін, дем алатын, тілі шығатын тесік ойыпты. Сонан соң ескі тонды теріс айналдырып киеді де, әр жеріне сылдырмақ қонырау іледі. Сөйтіп осынау албастыдай кейпімен бейіт арасына барып жасырынып жатады.

Мезгіл бесін кезі болса керек. Анаргұлдің ұлы Дәulet түйе мініп диірменнен келе жатады. Дәulet бейіт маңынан өте бергенде, Жамақ жалбыр тонын сүйретіп, қонырауын

жанғыртып, даусын дарылдатып шыққан екен.

Дәuletтің қорыққаны сонша, ес-түссіз түйеден құлап түсіпті. Жамақ жанына келеді де, жағасынан алып бірнеше рет сілкілейді. Дәulet есін жия бастағанда, күнгірлек үнмен

зекіп сөйлейді.

- Мен де тілеулерінді тілеп, әuletтеріңің әuletті болуына ақ батамды арнап жүрген әруақтарыңың бірі едім. Бірақ сендер байыған сайын бізді ұмытып барасындар. Әруаққа атайтын жанды құдайыларың кеміді, біз ашығудамыз. Бүйтіп сарандана берсендер, сендерді әруақ атады.

Біз сендерді қарғаймыз - малдарыңды арбаймыз, жандарыңды жалмаймыз. Төбелеріңе құйын ойнатып, шаңырактарыңды жерге түсіреміз. Ауыздарыңды асқа жеткізбей,

көздерінді жастан кеткізбей қанғыртып жібереміз. Осыдан үйіңе барған соң, анау пірінен безген ата-анаң мен ағайын-

дарыңа айт. Әруаққа атап бес мал құдайы берсін. Құран оқытып, ауылдың тайлышына дейін тегіс шақырып етін таратсын. Әйтпесе ажалдарың да бізден, азаптарың да бізден...

Осыны айтып Жамақ зып беріп кетіп қалады да, Дәulet күн батқанда сүйегін әрен сүйретіп үйіне келеді. Өні құп-қу, қан-сөлсіз қалжырап тұр. Тісі-тісіне тимей қалшылдайды.

Жағы қарысқандай жарытып сөз де айта алар емес. Ақыры бейіт арасынан әруаққа кездескенін әрен жеткізіпті. Жаман сөз жатсын ба, ауылдың өсекші әйелдері естігендеріне май құйып маздатып, елге жая береді. Содан құдайыға мал сойылып, талай күн ел жиылып ет жесіседі. Әрине, орталарында Жамақ та жүреді. Бір күні ол мас болып отырып өзін-өзі әшкерелеп алыпты.

Кейін Жамақтың әке-шешесі дүние салған соң, балалары байға жақпай жалшы болып еді. Анаргұлдің сол балаларға көрсеткен бір қорлығы, әсіресе, әлі күнге дейін көз алдынан кетпейді.

Жарылқасын жалшы балалардың ішіндегі ең кішісі болатын. Қозы соңында тірсектері соғылып, қеудесін әрен сүйретіп жүруші еді. Жарытып тамақ ішпей, жайғасып ұйықтамай зар қағып жүрген бала қайсыбір онушы еді. Әйтеуір соны көргенде аяныштан жүрегің сымбактың кететін.

Мойылдай қара көзі жайнап тұрады. Қасына келсен, иісі көк татып, еріндері жапырақ түстес жасылданып жүретін.

Бірде ойын балалары Анаргұлдің сүмдық қатыгездігіне тап болдық. Ол өзге қозылардан қалып қойған бір қозыны көтеріп алып, Жарылқасынды қарғап-сілеп барады екен. Жарылқасынға жетісімен таяқпен сабай бастады.

- Қу жетімек, көзіңе шел бітті ме? Осы қозымен ұшықтап жіберейін бе. Өлігі сұраусыз сүмелек? - деп бажылдайды.

Байқұс бала құтылмақ боп тырманып жатыр. Бірақ Анаргұл жібермейді. Баланың тақыр басына таяқпен ұрган сайын ісіп шыгады. Осылайша бас терісі түгелдей буылтықтанып, Жарылқасын шыр-шыр етіп жалбарынады.

- Апатай! Айналайын, апажан! Аяңызшы! Өлдім-ау, - дейді үні әлсіреп. Бірақ құтырынып алған долы кемпір баланы тулақша сүйретіп ескі құдыққа алып келді.

- Сен жүгермекті құдық ішіндегі құрт-құмырсканың жемі етейін, - дейді Анаргұл шабаланып.

Жарылқасынның қорыққаны сонша, тіpten үні өшіп қалды. Кемпір қаршадай баланың сирағынан ұстады да, құдық аузынан төмен салбыратып тұр. Біз де шыркебелек айналып дәрменсіз жүрміз. Жарылқасын қыр-қыр етіп тырманып жандәрмен далбасамен құдықтың қабыргаларынан таяныш іздейді. Тырналай-тырналай алақаны мен тырнағынан қан ағыпты. Кемпір сонда да рақымы түсер емес.

Біресе көтеріп, біресе құдыққа қайта сұңгітіп баланы әлі сілкілеп тұр. Жарылқасын болса енді қармануға да шамасы келмей есінен тана бастады. Былқ-сылқ етіп, оқта-текте

қорқыраған дауысы шығады.

Біз шыдай алмай шүрқырап жылай беріппіз. Кемпір онымызды елеген де жоқ. Қимылсыз салбырап қалған баланы көтеріп алды да, жерге зірк еткізіп тастай салды. Өзі жемтікке төнген құзғындаі торуылдан баланың қимылын бағып отыр.

Әлден соң барып Жарылқасын есі кіргенде, кемпір оны дедектетіп ауылға қарай сүйрей жөнелді. Біз жасымызды тыя алмай сондарынан қарадық та тұрдық. Ойынымыз жайына қалды. Көз алдымыздан Жарылқасынның боп-боз боп талып жатқан кейпі кетер емес.

Кешке бұл көргенімізді әкеме айттым. Әкем тұнерген күйі үнсіз киінді де, Нығметтің үйіне бет алды. Әкем барғанда, Жарылқасын үйдің іргесінде сандырактап жатыр екен.

Алақанына салып көтеріп әкелді. Аузына сұт тамызып еді, Жарылқасын құса берді. Әкемнің тұсі түтеп кетіпті. Баланы төсекке жатқызды да, іргенің киізін түріп қойды. «Байғұс

баланы мазаламандар», - деді де өзі тыскә шығып кетті.

Жарылқасын қыбырсыз жатыр. Қинала дем алғаны сонша, кеудесі қыр-қыр етеді. Кейде әлденені айтып, қатты бақырып жібереді. Еріндері қансыз бозарып, еміс-еміс жыбырлайды. Біз демімізді ішке тартып, орын-орнымызда отырған күйі Жарылқасыннан көз алар емеспіз...

Әкем даладан дәрі шөп теріп әкепті. Сол шөптерді қайнатып, сүян тұндырып алды да, сүыған соң баланың аузына қасықтап құйды. Әпкелерім Жарылқасынның маңдайына су шүберек таңып қойды. Оның қызуы көтерілгені сонша, шекесіне таңған орамал кебе берді.

Тұні бойы кірпік қақпай, әл үстіндегі Жарылқасынды қүзетіп отырдық. Тек таң алдында ғана бала көзін ашып, төңірегіне қарады. Қайда жатқанын анғара алмай баж ете түсті. Әкем маңдайынан сиап еркелете тіл қатты. Жұбатып отыр.

- Қорықпа, қарағым, қорықпа, - дейді өзі теріс айнала беріп кемпірге сырттай кіжіне ашуланды. - Алжыған қақпастың айуандығын қарашы.

Әкем Жарылқасынды алдына отырғызып, дәрі шөптің, сүйнан ішкізді. Соңан соң жуындырып алды. Жарылқасын қайтадан безгек тигендей қалшылдан кеткен соң сұт беріп,

төсекке қайта жатқызды.

Бұл кезде күн шығып қалған еді. Жарылқасын тынышталып ұйықтап кетті. Бәріміз де қуанып, көз шырымын алуға қисая-қисая кетіппіз. Осылайша Жарылқасын бір

жұма төсекте жатып айыға бастады. Алайда шошынғаны сонша тіптен есі ауған жандай елемеленіп жүрді. Біз қолымыздан келген бар жақсылығымызды аямаушы едік.

Анаргұл бүкіл ауылда әкемнен ғана именетін. Әкемнің молдалығы бар, құран біледі деп қорқады екен. Тіптен жас кезінде «оқыған бала» деп атын тергейтін болыпты. Содан ба, әйтеуір ол Жарылқасынды ізделеп келмеді.

Бір күндері Анаргұлдің баласы Сайлаубай келді. Әкемнің бетіне қарай алмай, мінгірлеп кешірім сұрады да, Жарылқасынды алып кетпек болды. Сонда әкем қатты ашуланып, былай деп еді:

- Мұның әкесі сенен де бай, сенен де басалқалы еді. Сенің де Жарылқасынның әкесі сияқты жұтқа кездеспесінді қайдан білдің. Жарылқасын сияқты сенің балаларын да

панасыз қалмасын қайдан білдің. Сенің есуас шешенің таяғынан өліп кетсе, бүкіл Шегір ел болып келіп, ер құнын даулар еді. Сонда күнің бір уыс болмас па, Сайлаубай?

- Әкем тағы да көптеген аталы сөз айтты да, сөз соңын Анаргұлге бұрды. - Ал сенің шешенмен өзім көзбе-көз сойлесемін.

Бишара Жарылқасын үйден шығып бара жатып бізге жалтақтай берді. Сайлаубай оны дарға апара жатқандай амалсыз ілесті.

Анаргұлмен әкем айтқандай-ак жеке сөйлесті. Содан біршама уақыт кемпір тыныш жүрді де, қайтадан баяғы таз қалпына тұсті.

Менің Ұбиан әпкем сол Жарылқасынның ағасымен атастырылған екен. Өзінің болашақ өмірлік жолдасын ауылда алғаш көргеннен-ақ Ұбиан жақтырмапты. Екеудің бір-бірінен

қалау таппай алшақтай беріпті. Әкем ертеде берген уәдесін бұзбай, алысқан батадан аттағысы келмей, көпке дейін қызының қарсылығын құлағына да ілген жоқ. Осылай үш жыл жүрді.

Алайда әжем немересінің құн сайын солғындал, уайымшыл болып бара жатқанын көріп, әкемді алғашқы шешімінен қайтарды. Бұл туралы Мамытқа ескертіп, әкем бұрынғы алған қалыңмалын қайтармақ болды.

* * *

Байтана руындағы ең сыйлы адамның бірі, атақты да қадірменді, ықпалы мол, әл-ауқаты мығым Нұrbай деген кісінің Зәпира атты сұлу қызының аулымызға алғаш келгенін ұмыта алмаспыш. Оның үй-ішінің бәрі таңдал тапқандай бір- біріне сақадай сай, бірінен-бірі өткен жақсы адамдар екен.

Бес ұлының бәрі де сұңғақ бойлы, сымбатты да көрікті, аздап ақсиған алдыңғы құрек тістері өздеріне жарасымды әдемі жігіттер болатын. Жұрт іші мін тапқыш, сын айтқыш, ат қойғыш келеді ғой. Оларға да ол лезде «құрек тістер» деп ат қойып алды.

Нұрбайдың жалғыз қызы Зәпира да ағалары сияқты сымбатты, сұнғақ бойлы, толықсыған қызы еді. Оның аулымызға келін боп келіп, алғаш аттан түскені, басын тік ұстаған күйі маңғаз басып үйге кіргені әлі есімде. Ол Нығмет байдың Анаргұл деген есуас әйелінен туған бесінші ұлы - реңсіз, мыртық, кекеш Дәuletке екінші әйел боп келді. Алғашқы әйелінің қайтыс болғанына да көп уақыт өткен жоқ еді. «Аузы қисық болса да, байдың ұлы сөйлесін» немесе «құрығы ұзын қуып жүріп алады, құрығы қысқа құры қол қалады» дегендей, айдын көлдің аққуын қалыңмал Дәuletке аяқ-қолын байлап берді...

Осынау теңсіздік құрығында бұлқынған қайғылы неке күні:

... Мал бергені барады алып кетіп,

Қолымды кедейшілік кесіп отыр,-

деп бір сабаз сүйгенінен айрылып, құсадан күйіп-жанып қараша үйде қан құсқандай, өз тағдырына тағылық заңына лағынет айтып, Зәпирасын жоқтап күніренген де болар.

Зәпира келбетті келген жан еді. Талдырмаш сұнғақ бойына әркім-ақ сұқтана қарайтын. Оның атжақты жүзі, қыр мұрыны, үлбіреген беті шығыстың сұлуларын елестететін. Жайнаған мөлдір көзі, қарлығаштың қанатындағы қияқ қасы, шоқтай қызыл қалындау ерні өзгеше бір сұлұлықтың нышанын аңғартып тұруши еді.

Өзі де айналасындағы күйкі көріністі мойындағысы келмей, өзін қоршаған сұрықсыз тірлікті көзіне де ілмей, батыл да еркін жүретін.

Жас келіннің мінезіндегі мұншалық еркіндік ел ішінде күңкіл де туғызды. «Әдепті білмейтін, тәрбие көрмеген» деген сөздер де айтыла бастады. «Әйтпесе қазақтың қай келіні босағаны аттай салып тайрандалап еді». «Жусаннан аласа, бетегеден биік» бол иіліп жүрмеуші ме еді.

Зәпира осынау қалыптасқан қараңғы дағдыға бірден қарсы тұрды. Ол енесі Анаргұлге де, қайнағалары мен абысындарына да орынсыз бас иіп төмендемеді. Оның көзқарасынан, қимылы мен ісінен, үні мен мінезінен жәрбиген жаман қүйеуіне деген, қүйеуінің ағайын-туғанына деген өшпенделік оты ұшқындалап тұратын.

Енесі Анаргұл мен өзінің қүйеуі ерке келінді көнбіс етіп алуға, иін жұмсартып, айтқандарына көндіруге талай-талай әрекеттер жасады. Бірақ қайсар да жігерлі Зәпира ұшқын атқан бір көзқарасымен ғана олардың аузына құм құйып, үндерін өшіруші еді. «Жалғыз қатынға шамаң келмесе, бай болғаның құрысын» деп Дәuletті шешесі де, ағалары да тұқырта беруші еді.

Осындаға жәрбендей келіп, қоқырандай қыр көрсетіп тиісе беретін Дәulet кербез келіншектің жүзінен жасқанып күңкілдеп қала беретін. Соның бәріне де, өзінің тағдырына да Зәпира құлақ аспай, кекесін кейіппен жүре беретін. Қара жұмысқа қол тигізбей, қолы көсөу, шашы

сыптыртқыға айналмай, қыз күнінің еркелігін жоғалтқысы келмеді. Қасақана ақсаусаққа айналғандай, еркіндік атаулыға ерік беріп еді.

Нығмет әuletінің өзге тұnlігіне, біздің үйге Зәпира ерекше ізет көрсетіп, барынша биязы болатын. Келін боп келген алғашқы жылдары осылай еді ол. Біздің үйге жиі келетін. Кім білсін, бәлкім, өзі сыйыспаған ортасынан аз болса да аулақ кеткенді аңсайтын шығар. Оның басын шалқайта ұстап, маржандай тізілген ақ тістерін көрсете бұралып отырғаны әлі есімде. Ақторғын кимешектің сыртынан әсем ораган қундігі ерекше жарасып тұрушы еді. Мен одан көз алмай қарайтынмын. Бұрын өзім аңғармаған әлдебір сезім жанымды жайлап алатын. Әлі толық ояна қоймаған ынтығу мен іштей аяныш ізін менің балғын жүзімнен оқи ма, әйтеуір Зәпира маған ерекше елжірейтін.

Күз түсісімен, Нығмет әuletі Ақкол жақтағы қыстауға көшіп, бүкіл қысты Нұrbай ауылының маңында өткіzetін. Бұл кезде Зәпира перзент көріп ұлгеріп еді. Тұңғыш қызы Дәүлеттеп аумай қалыпты. Жайынауыз, шегір көз біреу әйтеуір. Мұны көрген Зәпиранның жаны түршігіп еді.

Айналасынан зәбір көріп, кеудесін қарыған қайғыға іші ысталып құса боп келген Зәпира қүйеуін отаудан қуып шығып, ағайындарын аластап әкесінің үйіне кете барады. Нығмет әuletінің бірде-біреуі шұрқ етіп, оның жолына тұра алмады.

Келінің қайтару үшін соңынан барғандарға Зәпира мен Нұrbай ырық берменгі. Сондықтан Нығмет әuletімен әкем мен бүкіл Үсен әuletіне хабар жіберіпті. Алыста жүріп

мұқатылғанын, келіні кетіп, күлкі боп отырғанын, бұл тек ер атына мін емес, бүкіл руға түскен сын, ақсаулы ақау екенін айтЫПты. Ру намысына таңба түсірмей кек алуға, болмаса бітістіруге келсін депті.

Өзге үсендіктер Нығмет әuletімен тату болмаса да, мына хабар оларға қозғау салып еді. Ру намысын әрқайсымыздың арымыздай қорғаймыз деп жиырма шақты жігіт атқа қонды. Оларды менің әкем басқарып, Нығметтерге жүріп кетті.

Бұл бүкіл аймақтағы ұлken бір дау болып еді. Анау-мынау кикілжіңге қарағанда, бұл жанжал екі рудың қактығысқан қара күшіндегі еді. Бірін-бірі ақырына дейін тұқыртып кетпей тынбайтын тірескен шақ болатын. Әрқайсысы ата намысына, ауыл намысына арқа сүйеп, алыспай беріспейтін кезенге таянған сәт сияқты.

Нұrbай қайраты мол, айтқанынан қайтпайтын, айналасына ықпалды адам еді. Оны ырыққа көндіру де онайға түспейтін жай болатын. Би кесімі бойынша мұндауда кейде келісіп, кейде керісіп, кейде қоркытып, кейде қол күшімен үкім айтЫлады.

Келін дауы екі рудың арасында қыс бойы созылды. Бірак бітер болмады. Байланған түйін шиелене берді, шиелене берді. Ұзак дауға шыдамай, біздің жақтың жігіттері бірі ауылға оралып, оның орнына бірі қайтып бара жатты. Бүкіл ауылдың құлагы түрліп, осы даудың шешімін тағатсыз күтүмен болды. Дүрліккен жұрт дүбірге елендеп, екі арада барып-келіп жүрген жігіттерден мән-жайды сұрастырып сыр тартады. Оралғандар келісім қай ауылда, кімнің үйінде жүріп жатқанын, кімдердің қалай сөйлеп, кімнің адудыны қаншалықты екенін әңгімелейді. Хабаршылардың айтуынша, менің әкем билердің айтысында аскан шешендік көрсетіп, өзін салауатты ұстай біліпті. Үсендіктердің үлкені ретінде бүтін бір рудың атынан сөйлеп, пәтуа сұрапты, тұрысар жерді нұскапты.

Алайда, қайсар Нұрбай дегенінен қайтпапты. Қызын қайтарудан бас тартып, сөз дарытпапты. Қызымын қайтара алмаймын, малға келісілік деп отырып алған көрінеді. Нұрбайдың мұнысына біздің жақтың даушылары көнбепті. Мал-мұлік емес, адам керек екенін айтып бұлар болмайды.

Ол кезде қай қазақ шаруасын мандытқан дейсің. Көктем шықса, алақандай жерді жырту - екі-үш күннің тірлігі. Бұл да әдетке сіңіп кете қоймаған жай. Елдің бәрі жер жыртып егін салмайды. Сондықтан шаруашылыққа керекті азын-аулақ мардымсыз құралжабдықты да кезінде бүтіндеп алады. Бұл ретте қыс мезгілі еріккеннің ермек іздейтін шағы сияқты. Бүкіл аймақтың ерек кіндігі кеш болса қыдырып боза ішіп, таң атса, туысқан аралайтын әдеті еді.

Осындай ұрынарға қара таппай жүргендер аз ғана қақтығыстың өзіне желігіп шыға келетіні де сондықтан. Сыбыс шықсан ауылға сойыл сүйретіп жетіп баруға әзір тұратыны да сондықтан. Ауыл арасын шаңдатып, атой салып өткенге мәз мұндайда. Құрысқан арқалары жазылардай құлшына кірісетіні де сондықтан. Оның үстіне әлеке түскен Нығмет әулеті Үсен әулетіне ат шаптырып, адам жіберіп отырғанда қарап қалсын ба? Ағайынға ара түскен боп, даурықпалы сапар шексе, сараң байдың соғымын төрінде шіреніп жатып жеп қайтса, еріккен жігіттердің несі кетіп барады. Бай ауылының хабарына тез құлак түргені де осыдан болса керек.

Күн сайын жиырма-отыз адам жамbastap жатып, жақ- жақ бол айттысады да, егесken жаққа арадағы ағайын ақыл беріп, дау төресі - билер шешімін айтады. Жанжал иелеріне шешімнің әділдігін ойлануға бір-екі күн мұрсат береді де, өздері жамағайын, жегжат-жұрағаттарын аралауга кіріседі. Қайта жиналышп бітіспес дауды жалғастырады. Осылайша бұл тартыс бір-екі айға созылады.

Әркімнің аузына бір-бір жалтақтап, күйеу баладан да күй кетіп еді. Онсыз да тумысынан тұрқы келіспеген Дәулет бүріскең үстіне бүрісіп, жарғанатша жәпірейіп бітті. Жақсылық келсе, сен жақтан болар дегендей, Үсен ауылының адамдары мініп келген аттардың айналасынан

шықпайтынды шығарды. Күйбендең әр аттың жалын сипап, күбірлеумен жүргені.

Амал не, Дәулет тілеуін бермей-ақ қойды тәнір. Нұрбай айтқанынан қайтпай отырып алды. Зәпира болса жаны сүймеген жарына, қаны сүймеген жұртына қайта барғысы келмеді. Жалғыз қызының тағдырына пыشاқ салып, өзі отқа итергендей болған Нұрбайдың қанында әкелік сезім қайта қайнап шыға беріп еді. Қалайда қайғы тырнағынан босатып алу үшін аянып қалған әке жоқ. Құда жақтың сан түрлі ұсынысына құлак аспай мұлдем қатайып алды қайралған пышақтай бірте-бірте сөзі де алғырланып барады. Перзентінің алдындағы айыбын, мейірімсіз қаталдығын

біржола сәуір жаңбырындай жуып өтпек жайы бар сияқты.

Біз жақтың құғыншылары да талабынан танбапты. Ат сабылтып арын ту етіп келгенде, арқасын жерге тигізіп қалай қайтсын. Қадалып отырып, қалайда дегеніне көндіруге түйініп алған бәрі де.

Талайдан бергі тартыс, іштей толку мен сапырылысқан ой ұстамды деген Нұрбайдың өзін сарсанға салып әбден болдырып, ақыры дау иесі Дәuletті сайысқа шақырып еді. Күні кеше өзінің сүйікті қызының ері болған мынау сұрықсыз Дәulet бес ұлының қалағанымен жекпе-жекке шығып, жеңе алса Зәпираны әкете берсін. Ал жеңіліп қалса, Зәпира деп аузын ашпасын, ат-шапан айыбын төлеп ауылына аттансын дейді Нұрбай.

Біздің жақ қарсы алдында қаңбақша қалтырап тұрған бір шөкім кекеш Дәuletтің кейпінен шошып, Нұрбайдың ұсынысына келіспейді. Нұрбай екінші ұсыныс айтты.

- Ау, халайық, ауылымда ат ойнатып жатқаның аз болған жоқ. Сен иісі Үсен әuletінің намысын жыртып аттана шапқанда, мен үкіше үлбіретken жалғыз қызыымның жанына

сая бола алмасам, несіне тірі жүргенім. Сен руынды қорғасаң, мен бауыр еті баламды қорғаймын. Сен ата намысын айдар тұтсаң, мен баламның көз жасына тұншығудамын. Сен сағым сынбасын деп күрессең, мен құса мен қүйіктің лаулаған ошағына өзім тастап, жанып жатқан жас өмірге жайбарақат қарап тұра алмадым. Ендігі өмірімде сол өртке қарлығашша су тасып сөндіріп, қызыымды қанатыма қайта аламын. Аянып қалар халім жоқ. Айбат шексең, алдыңа қаймықпай

кеуде тосам. Бес белестей биігім деп жүрген бес ұлым да алақанында аялаған жалғыз қарындастының қарғысына қала алмайды. Ендеңе бес мың қолдай бел тұтқан бес ұлымды атқа қондырып, алтыншы боп өзім де айқасқа шығамын. Нығметтің намысын жамылған азамат арасынан алтауың қарсы шығындар. Әділ күресте бағымызды сынайық.

Дәuletтің дәрменсіздігінен жер шұқылап, қор болып отырған даушылар бұл жолы Нұрбайдың ұсынысынан бұрыла алмапты.

Ақыры Нығмет әuletінің алты жігіті Нұрбай тобына қарсы шығады. Қалған жүрт екі жаққа бөлініп, тілеулес боп тұрады. Әр көңілде құдік ұялаған, жанарда жас ұялаған жабырқау сәт еді бұл. Нұрбай ауылымың жанындағы қырқаға жиналған жүрт екі рудың намысын көкпарша тартып, таласқа еніп еді. Бір ру мен бір үйдің таласы, ер намысы мен ана арының айқасы басталған сияқты. Сайысқа шыққандар білегіне қамшы іліп, тақымына шоқпар басып, қойнына тас

тығып бір-біріне өшіге шүйлігіп еді.

Оңтайға келсе шоқпармен соғып, жақындаста қамшымен жасқап, алшақ кетсе таспен атқылап аяmas, аянбас айқас бастады. Сілкілесіп-жұлқыласып, тіктесіп-тістеніп, беттесіп-белдесіп бір сойқанның әр пүшпағынан ұстасқан жайы бар.

Уш қайтара қақтығысқанда, Нұрбайдың балалары Нығмет тұқымының қорбандаған қолапайсыз үш жігітін шоқпармен қаңбақша қағып түсіріп еді. Алғашқы жеңіске желіккен Нұрбай туыстарының бір баласы қуанганнын қырдан қиқу сала көтеріліп, айқас ортасына жетінші боп

шауып кірді. Бұл сайыс шартын толық бұзғандық еді.

Онсыз да шыбын жанын шүберекке түйіп тұрған Нығметтің руластары өре тұрды. Менің қызы қанды ағайым Момынқұл өзінің жаман байталынан қарғып түсіп, әкемнің астындағы атқа келіп жармасты. Ат шылауын ұстап әкемді ер үстінен түсіреді де, өзі қарғып мініп, қарсы шабады. Ұзын бақанды қолға алғып, Нұrbай тобына сыйыра тиіп, қуып жүріп үшеуін құлатады. Жеңіле бастаган әuletінің намысын жерден қайта көтеріп алады.

Тағы бір айнала соққанда ағам төртінші етіп Нұrbайдың өзін сұлатып кетіп еді. Есінен танған Нұrbай қарт қара жерді құшып қала берді.

Айқас аяғы айқындалып қалып еді. Ағам ер үстіндегі Нұrbайдың ендігі екі баласын ауылына дейін қуалап, тоз-тозын шығарады.

Әкем сұлап жатқан Нұrbай шалға жүгіреді. Басын сүйеп, көтереді. Есін жиган Нұrbай кемсендеп: - Сенбісің Момыш, - дейді қалтыраған үнмен.

- Қайтейін, осыны қалаған өзің ғой, амалым не, ақсақал, бейбіт сөзге келмедің ғой, - дейді әкем оған.

Нұrbай күдер үзген бәсек үнмен:

- Ендігісін өзің білесің, Момыш. Би де, билік те сенде. Әлгі есерсоқ болмағанда бұл күйге ұшырамас едім-ау, Қайдан ғана келе қалды, сол найсан. Уәде бұзылған соң, үміт те үзілді ғой, - деп сұлқ түседі.

Әкем айқасты тоқтатуға белгі береді. Ат айылын босатып, дауласқандар екі күн ойлануға мұрсат алады. Үшінші күні Нұrbай ауылынан шабарман келді. Біздің адамдар қайта

кетті.

«Ата жолын аттап өтіп, баба салтын бұзғаны» үшін әкем Нұrbайға азын-аулак ат-шапан айыбын төлеңтіп ті. Ал байғұс Зәпира лажсыз сағы сынып, тұншыға қайтып келді.

Ағайым өмір бойы мақтанатын. Жалғыз Дәulet пен Нығмет әuletінің намысын ғана емес, бүтін аз ғана Үсен руының да арын сақтап қалдым деп көрінген жерде күпінетін.

Әкем оның бұл қылышын жақтырмаушы еді. Қарт Нұrbайға қол көтергенін кешірмейтін.

- Ұрғаныңа ұлдары да жететін еді ғой, - дейтін әкем кейісті үнмен. Ат астында ауып жатқан Нұrbайдың аянышты жүзі жүргегінде ұмытылmas бір түйткіл қалдырған-ау, шамасы.

Зәпираның сол бір кайғылы окиғасынан кейін, мен оны екі жылдан соң көрдім. Баяғы батылдықтан, еркіндік пен өжеттікten жүрнақ та қалмапты. Қатты шөгіп, ауымсауым халге түсіпті. Шамасы, бұрынғыдай бой түзеп, таранып, жинақты жүруді де ұмытқан-ау. Басындағы ақ жаулығы

да бозарып бітіпті. Жүрісіндегі өзіне тән ерке қымыл суға тұскен кесектей еріп кеткен сияқты. Жәудіреген мөлдір жанары бұрынғыдай нұр шашпай, жасаурап, солғында п кеткен. Айналадағының бәріне өшіге, жанымен жек көре қарайтын сияқты. Жұрт енді ол безілдеген Анаргұлдің жыбыр-жыбырына көніп болған, тіктен күйеуі дауыс шығарып, қол көтеретін де болыпты деп жүрді.

Осылайша қалыңмалдың қара күші, ескі әдет, тырнағы у боп жабысқан ру қатынасының ұзын қолы асау Зәпираның алқымына да бұғауын мықтап салып бұрап тастаған еді.

Жанындағы жарқын нұрды өшіріп, үлкен сезімнің тамырын қып біткен болатын. Енді жайнап тұрған гүл емес, күздің күлгін жапырағындағы күн сайын солып барады екен. Зәпира да әйел басына тұскен езгіні үнсіз көтеріп жүре берді...

1943 жылы ауылға демалысқа келгенде, қайтыс болған бір ағайынымның үйіне көніл айтуға кірдім. Сырттан елдің ең соңы болып белі бүкшиген, кір орамалы көзіне дейін түсіп кеткен бір әйел келді. Алғашында кім екенін танымай қалып, сәлем беруге орныман тұра бергенімде, әлгі әйел асқан бір жылы мейіріммен құшып, еркелете сөйледі. Киізге қайта жайғасқанымызда, менің хал-жайымды, денсаулығымды, мынау «қағынған соғыс кезіндегі» амандығымды сұрай

бастады. Өзінің ерте келіп сәлем бере алмағанына кешірім сұрап жатыр. Сонда барып майшамның алакөлеңкесінде әйелдің Зәпира екенін әрең танып едім. Әбден қажып бітіпті. Шүйкедей боп шөгіп, бүріскең күйі отыра берді. Шамның күнгірт жарығы әжімдерін адырайта айқында п тіссіз қушиған иегін де әйгілеп тұр.

Мен шыдай алмадым.

- Женеше-ау, қартайып кеткенің қалай?

Зәпира алғашында бұл сөзімді естімегендей бейжай қалпы ауыр бір күрсінді. Сонан соң мұнды жанарын маған қадап, жайғана үн қатты:

- Е, шырағым-ай, женешең не көрмел еді? Тобыңа сегіз күшік асырап қосқанда, жалғыз жанымның несі қалды дейсің? Әйттеуір аман жүргеніме шүкірлік еткейсің, шырағым!

Бұл сөзді ол толғанып, қайғылы үнмен айтып еді.

Ошақбай карт мына сөзді ұнатпай, бас шайқай берді:

- Асылық етпе, келін. Ауыл әйелдерінің бақыттысы өзің емессің бе Зәпира?! Есігінді соғыс сойқаны қаққан жоқ, байың да алдында, сегіз балаң да алдында. Бұдан артық не демексің Аллаға....

- Бөрік кигеннің бері азамат атын жоғары ұстап халқын қорғауға аттанғанда, Дәулет оған да жарамады ғой, - деп ызалы сөйледі Зәпира. - Анасы сол үшін туғандай менің қорушым бол жәрбиіп отырған жоқ па.

Оның үнінен мен сол баяғы қарсылық кегінің, зорлық көргісі келмеген бұлқыныстың, қалыңмалға деген қарғысының ұшқыны әлі өшпегенін аңгарып едім.

* * *

Енді әпкемнің бойжетіп, жар таңда, ұзатылған кезін баяндайын. Мамыттан қол үзгенімізді естіген жұт тұс-тұстан қыз айттырып, жаушы жіберуді көбейтті.

- Мамыттан кейін бар қалауды қыздың өзіне бергенбіз. Баар жерін, бақытын сеніп тапсырар азаматын өзі қаласын! - деуші еді әжеміз.

Әпкем әбден толысып, ауылдың бүрала басқан бойжеткені болды. Содан ба, оның қолын қара жұмыска тигізбей, тек өрнек тігуге отырғызатын еді. Әпкем кестенің не түрін, алаша тоқудың сырын, кілемнің өрнегін салуды үйреніп алды. Енді ол мойны мен кеудесін алқаға толтырып, шашына шолпы тағатынды шығарды. Үкілі кәмшэт бөркінің жиегіне де шетірмек тігуші еді. Саусақтары жүзікке толы. Ауылдың еркесі атанып, жиын-тойдың, айтыстың көркіне айналды.

Өзі де еркін жүріп, ән-күйдің ортасында өсіп, жасының жиырмада шығып бара жатқанын аңғармай да қалып еді. Кейбіреулер әкпеме «кәрі қыз боп отырып қалады» деген кінэрат та таға бастады. «Айттырып келгендерді алдаусыратып сыйпайы сөзбен сырғытып жібере беруші еді. Міне, жиырмада да келіпті. Мұның артын онғарсын» - дейтіндер де табылды.

Бір күні аулымызға екі салт атты келді. Бірі Батыrbек әuletінен шыққан Балтабай деген кісі де, екіншісі мұрты енді тебіндей бастаған жиырма бестер шамасындағы бейтаныс жігіт екен. Әкем үйде жоқ. Жолаушыларға самауыр қайнатып, дастарқан жайылды. Жас жігіт басын сәл иіп үнсіз отыр. Кеседегі шайын баппен ұрттайды. Әпкеме айтқан екі-үш ауыз сөзі үлеспеді.

Олар кеткен соң, біз ортаныш әпкеміз екеуміз әлгі жігіттің сыйданған түрі мен сыйылған қылығын салып, сөйлеген оралымсыз сөзін қайталап мәз болыстық. Алғашында үлкен әпкем қосыла күліп еді, кенет лезде ашууланды. Біз одан сайын мазақтап күлдік. Осылай көпке дейін үлкен әпкемнің мазасын алып қоймаған соң, ақыры шапалақ жеп тындық.

Кешке әкем үйге келгенде, біз бүгінгі қонақтар жайын айттық. Ұбиан үйден шығып кеткенде, ортаныш әпкем екеуміз әлгілердің қылығын жүріс-тұрысын, сөздерін салып мазақтадық. Соナン соң: «Жігіт Ұбианға ұнап қалса керек, біз күліп едік, қатты ашууланды», - дедік. Әкем бізді тыңдал алды да, жымып күлді. Сөйтті де бұл оқиғаны екіншілек еске алмауды ескертті.

Сөйтіп өзі бізге нақыл болар бір жайды айттып берді.

- Баяғыда байдың ерке өскен баласы ел-елден қыз айттырған екен. Бармаған жері, көрмеген қызы қалмапты. Қасы-көзінен нұр тамған небір сұлуларды көріпті, ақылына адам бойламас әдептілерін де көріпті. Бірақ біреуін де ұнатпапты. Енді ол алыс сапарға аттанып, жеті күншілік жердегі бөтен елге келген екен. Жүздеген ауыл аралап, тағы да ешбір қызды ұнатпапты. Осылай ел аралап жүріп ол бір алты қанат ақ үйге

кезігеді. Алдынан толықсыған ару шығып «аттан түсіп, сусын ішіңіз» депті. Жігіт атын желіге байлап үйге кіреді. Төрде отырып қыздан көз ала алмапты. Қыз мұны елемегендей жайбарақат мейманға дастарқан әзірлей бастайды.

Шай қайнапты. Қыз лезде дастарқан жайып, жігітті әдеппен асқа шақырады.

«Жігіт мен іздеген сұлу осындай-ақ болар. Көркіне тоқтадым. Ал ақылы соған сай ма еken, байқап көрейін» деп ойлапты ішінен.

Тұрулі есіктен сыртта жатқан томарлар көрініп тұр еken. Жігіт сынар жерім осы шығар депті де оқыстан сұрақ қойыпты.

- Құдаша, айып көрмесеңіз айта отырыңызы, көлік ат анау томардың қаншауын тартар еken?

Жігіт қызды сүрінтер сұрақ бердім деп ішінен масаттанып отырады. Сол сәтте қыз сәл жымып құліп жауап қатыпты:

- Жақсы ат болса бір-бірден тартар, жаманы болса екеуден артар.

Жігіт мырс етіп құліп жіберіпті. Мұнысы мұқатқаным дегені еді. Өзі іштей «бәсе ақыл мен көрік сай келуші ме еді. Мынау қыз ақылы кемдеу біреу болды» депті. «Әйтпесе жаманы екеуден артар, жақсысы біреуден тартар дер ме еді. Жоқ, бұл менің теңім емес. Жар болып жарытпас».

Осылайша жігіт ешкімге көніл тоқтатпай аттанып кетеді.

Үйге келіп әкесіне бар жайды айтқан еken.

- Жеті күн жол жүріп, қняндағы елдерді араладым. Өзіме тең таппадым. Бір көрікті қыз кездесіп еді, өкінішке орай ақылы шамалылау боп шықты. Сынай сұрақ беріп едім «жақсы ат бір-бірлеп тартар, жаманы екеуден артар» деп жауап қайырды. Ұлының сөзін естігенде әкесі күйіп

кетіпти.

- О, сормаңдайым-ай есуастың үлкені сен екенсің ғой, балам. Қыз сөзінің байыбына бара алмаған көкми сен болдың. Шамасы сен қомағай дастарқандағы бауырсақты қос-қосынан бұралақтап аузыңа тыққансың ғой. Қыз соныңды мінеген. Ол ақылды ғана емес, дана қыз еken.

Сонда жігіт бармағын шайнапты. Естерінде жүрсін, балаларым,-деп құліп еді әкем.-Бәлкім біздің үйге келген жігіт әдеп сақтап тартынған шығар. Шайды сыйзықтатып үрттады дейсіндер ме?

- Иә.

- Е-е, онда мен сендерге тағы бір әнгіме айтып берейін, - деп әкем сөзін қайта жалғастырды. - Баяғыда қыз айттырған бір жігіт шаршап-шалдығып, шөлдеп бір ауылға әрен жетіпти. Қызы бар үйге бас сұғып демін алған еken. Алдына дастарқан жайылып, шай келіпти. Шөлдеп ерні кезеріп отырған жігіт қыз ұсынған шыныаяқты ала салып үрттап

жіберіпті. Абайсызда аузы күйіп шайды әрен жұтады. Көзі жасаурап, қызға сездіргісі келмей аспанға қарай беріпті. Енді тіл қатпаса жеңілетінін біліп жігіт шаңырақтың ағашына көзі түсіп:

- Мынау, қандай жердің ағашы болды екен? - депті.

Сонда қыз құлімдең:

- Бұл саздау жердің ағашы, сабырсыз ердің жазасы, - деген екен. Жігіт өзге тілге келмей аттанып кетіпті. Біздің үйге келген жігіт әлгі айтқандай қолайсыз жайға ұшырап

қалудан сақтанған шығар.

Әкемнің бұл сөздері бізді ойлантып тастады. Кейін байқасам, қыз айттырған жігіт қыз сынаймын деп отырғанда оны ауылдың көрі-жасы түгел барлайды екен фой.

Арада екі апта өткен соң Балтабай қайта соқты. Әкем екеуі оңаша әңгімелесті де, қайтып кетті. Біз сияқты балаларға мұндай кеңестің жөнін айтпақ түгілі үй маңына жолатпай жіберді. Бірде әкем екеуміз қыстауға барғамыз. Әкем жоңышқа шапты. Кешке ауылға жиналып жатқанбыз. Ойда жоқта Балтабай келді. Әкем мені қайраққа жұмсап жіберді. Іздел-ізден таба алмадым.

Кенет атын жетектеген жігітті көрдім. Жұзі таныс сияқты. Ол мені қасына шақырып алып, атымды сұрады. Тәтті беріп, мактап жатыр. Ішім әлденеге сезіктенгендей болды да, бағдарлай зер салдым. Алпамса денелі, ебедейсіздеу, шықшыты томпайған құс тұмсық, қоңыр жігіт екен. Саусақтары шектен тыс үлкендеу көрінді. Тәтті ұсынғанда алақанының мүйізденіп қатып кеткенін байқап қалдым. Қағазға ораган үгітпе темекіні сорып тұр. Киімі әжептеуір екен, бірақ бөлтек-салтақ болып өзіне қонымсыздау көрінді. Әкемнің қасына қайтып келгенімде, Балтабай қоштаса бастады.

- Асып жатқан атағы болмаса да, адап жігіт. Табан акы, маңдай теріне сүйенген еңбекқор ер. Қарапайым болғанмен, жаны кең. Жақында ғана әскерден оралды, - деді Балтабай.

- Жарап-жарап, Балтабай. Ақылдасалық. Қабыргамызбен кеңеселік. Аздап мұрсат бер, - деді әкем.

Сөйтсем Балтабай жігітке қыз көрсетіп, қыз ұнаған соң, екі ел арасында жаушылыққа жүрген кісі екен. Сол жаушылық парызымен Балтабай ауылға талай келді. Қалыңмал мен кәде жайына дейін әңгімелесіпті. Сөйтсем әкпем мен Аюбай жиын-тойларда, жастардың сауық кештерінде бірнеше рет «кездейсоқ» кездесіп те үлгеріпті. Енді екі жақ берік шешімге келер алдында әпкемнің ойын білуге сұрау салды. Әпкем бұл сұраққа жауап беруден жалтарып, көзін

тайдыра беретін. Бар айтқаны «мен бір байлаулы бұзау емеспін бе. Әжем мен әкем кімге жетектетем десе еркінде» деген сөз болды. Бұл сөздің келісім сөз екенін сол кездің

өзінде қаршадай басыммен мен де сезгем. Екі аптадан соң Балтабай Аюбайдың ауылынан жеті кісі ертіп келді. Ел жақсылары арнайы құда түсіп, бата алысуға келген еken.

Қалыңмал жайы сөз болды. Келісім немен біткенін қайдам, әйтеуір әкем қыз ұзату тойы ең жақын дегенде бір жарым-екі жылдан кейін өтетінін айтып отырып алды. Құдалар жағы оған көнгісі келмеді.

Казір ойласам, әкемнің сондағы той мерзімін ұзартуға күш салып отырғанының түрлі себептері бар еken ғой. Біріншіден, әкем дәулеті шалқып отырған бай емес еді. Сондықтан қалыңдықтың жасауын қолма-қол әзірлей қоюға шамасы жоқ болатын. Ал бір жарым-екі жылдың ішінде әкем шәрі аралап, базар барып жүріп, қыз жасауын атына сай етіп әзірлеп үлгеретініне сенген сияқты. Екіншіден, болашақ отау тігетін екі жас бірін-бірі толығырақ білсін, қалыңдық дәуренін қызықпен өткізсін дегені еken. Убиан әпкем ренжімей аттансын, бойжеткен шағында көрер

тамашасын қысқартпай-ақ қояйын деген қамқор көңілден шыққан шешім еken. Құдалар жағы болса келіндерін ертерек қолына алуға асығады. Кім біледі, қайтадан айнып кетіп, қыз өзге біреуді қаласа масқара ғой. Сонан соң даурығып, дауласып жүргенің. Ондайда кейде өткізген малың түгел

өнбей, жырымдалып кететіні бар. Жігіт жағы соны да ойлап қыпышдаған сияқты. Өйткені қалыңмалы төленіп, енді-енді келін боп түседі деп жүрген кейбір қыздар Октябрь берген жаңа заманды арқа тұтқанына, сөйтіп өзінің сүйгеніне қашып кеткенін естіп те, көріп те жүр еді олар. Дегенмен құда түсіп, бата алысқан бұғауды көп ару бұза алмай, көнбіс әдетпен кетіп жатқан.

Базар күні еді, Аюбайдың ауылынан жиырма шақты адам келді. Сөз бастары, жөн бастар, жол сілтері Аюбайдың немере агасы Онғарбай деген ақсақал еken. Қонақтардың құрметіне

мал сойылды. Бүкіл ауыл барын құдалардың алдына тосып аяғынан тік тұрып күтіп жүр. Барлық сый-сияппаттан соң, екі ауылдың игі жақсылары тізе қосып отырып бата алысты. Қонақтар ат-шапан алып, көңілді аттанды.

Бір жұмадан соң бізді Аюбайдың ауылы шақырыпты. Құдалар қалыңмалдың бір бөлігін бермек еken. Әкем бұл жолы барған жоқ. Он шақты ауыл жігіттерін қасына ертіп көкем кеткен. Ертеңіне олар бес жылқы, екі өгіз, отыз қойды алдарына салып келді. Оның үстіне әрқайсысына жекелей сый-сияпат көрсетіпті.

Убиан мұнайып жүрді. Кім білсін, атастырған қыздың аяғына тұсау түскендей болатынын сезіп қынжылатын шығар. Көз алдында елі енші бөліскендей алыс беріске түскені де қина ма, әйтеуір әпкем сынық мінез боп алды. Мен әпкемнің қас-қабағын андып, бала көңіліммен шын қиналдым. Сөйтсем әпкемнің мұнысы сырт көзге көрсеткен мінезі еken. Эйел баласының айлалы қылышын алғаш осылай сезгенімде, мұзға отырғандай болдым. Өйткені әпкем маған

бауыр ғана емес, шешем сияқты еді. Жастайымнан көре алмай қалған ана мейірімін мен әпкемнен тапқандай болғам. Сондықтан да оны ешкімге қимайтынмын, жан біткеннен

қызғанып шиыршық атушы ем. Менің ойымша, әпкем өмір бойы осылай қыз қалпында қасымнан ұзамай қамқор боп

жүре беретін сияқты көрінген. Жоқ олай емес еken...

Көкемдер алып келген мал лездे сатылды. Көкем базаршы болып, жан-жақтан әпкеме жасау әкеле бастады. Ұбиан енді жібек киіп, жүріс-тұрысы өзгеріп, кесте тігуден басқа жұмысқа қол созбайтын болды. Үйіміз ою ойып, өрнек салатын, киім пішіп, кілем тоқитын шеберханаға ұқсайды. Әжем «табақ-аяқ, көрпе-төсек, жасау-жабдығынды түгелдеп, ине-жіпке дейін қалдырмаймын» деп отыратын.

Алты айдан соң Аюбай күйеу жолдасы Ондас екеуі інір қарандысын жамылып елге келіпті. Бұл болашақ жармен жүздесудің басы еken. Күйеу бала ауыл шетіндегі топ талдың түбінде бой тасалап қалыпты да, жолдасы екі қоржын арқалап жалғыз келіпті. Ондағы ойлары қызben, көрісіп, қалындық түнін бірге өткізбек еken.

Мол сыйлықты көргенде, женгейлер көңілденіп, көздері жайнап шыға келді. Онаша отау әзірлеп күйеуді құрметпен қарсы алудың қамына кірісіп кетті. Сол кезде құтпеген жерден әпкем тулап шыға келді. Күйеу баламен көрісуден бас тартып, бұлқан-талқан боп жүр. Оны женгелері, құрбылары қоршап алып, ақыл айтып жатыр. Бірақ бұның бәрі ем болмады. Әпкемнің өні қуқыл тартып, дауысы қалтырап, ентігіп отырып тіл қатты:

- Сұмдық-ай, не деген ұят еді. Бұл қай басынғаны. Сонша асырып жау қуып бара ма еken. Алдымызда әлі жыл жатыр ғой. Неге соны ойламаған. Мұндай женілтектігі үшін жек көріп кететінімді ескертініз. Мұнысы несі, менімен санаспай тосыннан-тосын тосырлатып жетіп келгеніне

қорланып отырмын.

- О не дегенің, жарқынам. Ата жолы сол емес пе? Енді сен қалындықсың. Қалындыққа күйеу бала келер болар, - деп бір женгесі жұбата бастап еді, Ұбиан тыйып таставы.

- Өз үйімнің оң босағасында отырғанда, сонша басынатын мен оның әйелі емеспін әлі. Егер ендігәрі қылжақтап осылай қылтиып келе берсе, қалындығы болуға қарсымын. Солай айтындар, - деп Ұбиан бетін басып отырып қалды.

Үнемі салмақты, үні қатты шықпайтын байсал-мінез әпкемнің дауыс көтере алатынын, қарсылық көрсете алатынын, бұлтартпай бұйыра алатынын мен тұнғыш рет сонда сездім.

Әпкем әлдебіреу күшпен жетелей жөнелетіндей тартынып, сандыққа сүйеніп тұр. Оның шырайлы өні сұрланып жұқа еріндері дір-дір етеді. Бұл қактығысқа ұлкендердің араласпайтыны қандай жақсы еді.

Қыз ықыласын ала алмай, ауылына қайтып бара алмай, Аюбай ағаш түбінде тұн жарымына дейін тұрыпты. Ондас әкелген қоржындарын қалдырмақ еді, Ұбиан бұған да қарсы

шықты. -Жо-жоқ айыпқа бұйырманыз. Басын әуреге салып, базарлығын алып қалар жөніміз қайсы. Қоржын болса келе жатар, он күн болса көре жатар.

Ұбианның бұл мінезінен құдалар жағы секем алғандай болған екен. Аюбайдың ауылынан әйелдер келгіштеп кетті. Әпкемнің жай-күйін сұрап, алыстан сыр тартатынды шығарды. Үйге келгендері женгелерімізben, Ұбианның өзімен сөйлесетін. Не айтқандарын біле алмай сыртта қала берем.

Ақыл айтып, қыздың алды-артын орап алатын женгетайлар көбейді. Сөйтіп жүргенде тағы да алты ай өтіпті. Ауылымыз енді асыға бастады. Киім-кешек жиі тігілді, кестелі бұйымдар молайды. Қолының ебі бар өнерлі әйелдер бар ниетін салып аянар емес. Алынған жиһаздарды, тігілген бұйымдарды қайта-қайта ашып көріп, нақ бір көрмеде жүргендей-ақ масайрап мәз болысады. Осындаи сәттерде әркім ойын ортага салып, жиһаздарың кем-кетігі мен

олпы-солпы жерлерін түзетіседі. Қолда бар мал сынашпа сусып кетіп жатты. Базар сайын сатылып, ақшасына жасау әкеледі.

Аюбай өзінің хабаршылары арқылы әпкемнен жақсы лебіз естісе керек. Бір күні кешке Ондас қоржын көтеріп тағы келді. Бұл жолы женгейлер күйеу бала мен күйеу жолдасты қолпаштай күліп, жайраңдап қарсы алды. Қалжыңмен қағытып, әзілге қарық болысып жатыр. Оңаша отау тігіліп, Ондасты базарлығымен қоса сонда алып кірді.

Отаудың ішін жиһазға жайнатып қойған екен. Екі жас алғаш рет осында жүздеспек. Аюбайды бір-екі женгей ішке алып кірді. Екі жігітті құрметті орынға отырғызып, женгейлер жүгірісіп жүр. Сол кезде ауыл жастары жинала бастады. Қыз-келіншектер қызыл-жасыл киініп-құлпырып алышты.

Бәрі де күйеу баламен жүздесіп, жақын таныспақ. Мұндайда әрқайсысы өткір сөзбен, онтайлы әзілмен, ойнақы қылықпен, жарқын күлкімен көрінгісі келеді ғой. Күйеу баланы жан-жақты сынап, биігін білгісі келгендер жағалай ұтымды сөз айтуда тырысады. Кейбіреулер жұмбақтай сөйлеп, астарлы пікірдің жауабын күтеді.

- Ай қай жақтан туар екен? - деп күлген бір женгесіне Аюбайдың тұра жауап бергені бар:

- Кеш батқалы қашан, ендігі ай да шықкан шығар. Аюбайдың аңғал айтылған адад шындығына біраз келіншектер шиқылдасып күлісіп алды.

- Шолпанның тұрағы қайсы екен, ай мекені қайда екен? - деді енді біреуі.

Аюбайдың жауабы тағы да қарабайыр болды. Тағы да көнілдегі шындығын айтып салды.

- Ай мен Шолпанның тұрағын үйде отырып қалай ажыратайын.

Келіншектер қайтадан құлісті. Аюбай қызарактап, күйеу жолдасына қарай береді. Қысылғанда көмек сұраған сыңайы бар.

- Жетіқарақшы жұлдызы қоныстасыңыз емес пе еді, - деп бір келіншек енді Аюбайдың қалжынға олақ қарадүрсін екенін қағыта сөйледі. Шошынған болып дауысын әдейі

құбылтып тұр. - Япырай, жарық жұлдызды жақын қондырғанымыз қалай болар екен. Қолды боп жүрмегей.

Келіншектердің мысы әу бастан басып алған Аюбай енді шын мәнінде қысылып жер шұқылай берді. Әлгі қалжынға берген жауабы тіpten ебедейсіз шықты. Үні де араз болған

баланың үніндей біртүрлі естілді:

- Жетіқарақшыныздың мекенін аңғармаған едім. Бірақ әйтеуір ұры болған жайым жоқ.

Келіншектер тағы ду күлісті.

- Айдың жүзі толар кез қашан екен? - деді бір қу тілді женгей.

Аюбай тағы ұтылды.

- Женгей ол жағын білмедім. Ай мен жұлдыз сырына үңілген ғұлама емес едім. Ауылымызда ондай тәуіп болған жоқ.

Күйеу баланың бұл жауабына елдің бәрі күлгені сонша, үй теңселе жаздады. Енді Аюбай тіpten жер болғандай күреңітіп еді.

Осы кезде арашаға күйеу жолдас түсіп, женгелеріне ұтымды қалжың айта бастады. Оңдас тіс қаққан қу екен, келіншектерге шалдырап емес. Дастанқан жайылып, алдымен шай келді. Әзіл-күлкімен шай ішіліп болғанда, ыстық ас әкелінді. Аюбайдың бүгінгі күні тұзы жеңіл тарта берді. Әбіржіп, қызарақтап, қиналып әрең отыр. Маңдайы тершіп, мазасын қоса алышты. Терін сұртем деп қайта-қайта орамалына жармасады.

Дастанқан жиналып, ойын-сауық басталды. Мұндайда алдымен айтыс жүретін әдет қой. Қыз-келіншектер жағынан екеуі қосылып сыйылта ән шырқады. Күйеулер жағына салмақ тастап, жауап айтып отыр. Алайда жігіттер жағы жуық арада ән айта қоймады. Аюбайдың мойны салбырап иіліп, бас көтерер емес.

Аспан ашық, ай жарық, күн жылыда,

Қол созыпсың аспанның жұлдызына.

Күйеу жолы жінішке деген сөз бар

Ізет көрсет ауылдың ұл-қызына.

Оңдас шыдай алмады білем, Аюбайды тұртпектеп отырып әнге жетеледі. Оңдастың әдемі ашық дауысы бар екен. Аюбай соның берекесін кетірді. Әдетте қолма-қол қиыстырып жауап қайтару шарт. Аюбай Оңдастың өлеңіне үйлесе алмай, дауысы барлығып мұдіре

берді. Екеуінің сөі екітурлі шығып, тоқайласпай-ақ қойғаны. Қыз-келіншектердің мерейі тағы да үстем болды.

Тұн жарымы болып қалғанын аңғармаппыш. Осы кештің үйытқысы болып жүрген үлкен женгеміз бәрімізді үйге қайтарды да, бір-екі келіншек пен әпкемнің қимас құрбыларынан екі-үш қызды қалдырыды.

Мен бұдан кейінгі оқиғалардан бейхабар едім. Өйткені мені енді ол отауға маңайлатпады. Бәрін кейін естідім. Үлкен үйде оңаша қалған Ұбиан әпкем бүкіл кештің барысынан хабардар болып отырыпты. Аюбайдың момындығын, жасықтығын, қалжыңға қарымтасы жоқ екенін де біліп алыпты. Енді ел тарап, екі жасты жүздестірер сәт туғанда, әпкем қасарысып отырып алады. Женгелерінің айтқанына да, құрбыларының тілегіне де көнбейді.

- Япыр-ау, бикеш-ай, бізді масқара етпекпісің шынымен. Өз ықтиярың болған соң келмеді ме ол екеуі. Енді көргенсіз ел атанбайық, - деседі женгелері.

Ұбиан сол ызага булығып қасарыскан қалпынан қайтпапты.

- Немене, ерке қыз дегенге, шолжаң болғың келе ме сонша. Ел рәсімінен, бұрынғының жолынан аттап қайда бармақсың. Бүйтіп бізді қорлама. Есті қыз өйтпес болар. Біз де өзіңдей қыз болғамыз, - десіп енді женгелері ашуға көшеді.

Ақыры таң алдында Ұбиан қүйеу бала отырған отауға баруға келісіпті. Бұл кезде кеш бойы сөзден жығылып, терлеп-тепшіп қысылған екеуі әбден қалжырап, оның үстіне қалындықтың соншама кешігіп, көңілдері қобалжып отыр екен. Осындай толқу үстінде тоқырап отырғанда, Ұбиандар кіріп келіпті. Адамның берекесі бір кетсе, аяғы тайғанай беретін әдеті емее пе. Аюбайлар тағы жаңылыс басады.

Қалындық кіргенде, қүйеу жағы ізет көрсетіп, орнынан тұрып қызды аялап қарсы алатын салтымыз ғой. Аюбайлар абыржып оны да ұмытқан көрінеді. Әпкемдер кіріп келгенде

орнынан тұрып қарсы ала алмапты.

Оң босағада отырған қызға бұдан артық қорлық болсын ба, онсыз да ызага булығып келген әпкем лезде тәқаппарланып кеткен екен. Жігітке ұол ұсынбақ түгілі мінін бетке басады.

- Жатыстарыңызға береке берсін. Жау қайтарғандай қалжырап қалған екенсіз, мазаларынды алмайық. Қызға сөз салардан бұрын, сөз мәнісін түсінер болар еді. Сөз қадірін

ұқпаған, өз қадіріне қалай жетпек. Кешіріңіздер, - деп бұрылып жүре береді.

Енді Аюбай намыстанып, ашулы аттанбақ болады. Женгейлер мән-жайдың тігісін жатқызып, жігіттің шымбайына батыра ақыл айтып, ашуын тоқтатып аттандырады.

Ондаң кешірім сұрап, бұл оқиғаның елге жайылып кетпеуін өтініпті. Салт бойынша қүйеу жағы таң атпай, ел көзіне ілікпей ауылдан аттануы тиіс. Екеуде лезде жүріп кетеді.

Ертеңіне Убиан әпкем тігілген киім-кешектерін лақтырып, жасауларын шашып қатты ашуланды. Соңан соң мұңдайып бір түрлі тұңғиыққа түскендей жүреді. Үй-іші басу да айтқан жоқ, ашу да айтқан жоқ.

Екі-үш күннен соң Убиан Аюбайдың бармаймын деп қығылық салып еді, бұл жолы әкем айбаттанып кетті:

- Екінші рет бата бұзып, есектің миын жеді деймісің мені. Елге қайта-қайта қарабет болар жайым жоқ.

Бұл кезде Аюбай да ауылына барып біраз талқыдан өткен соң ашылып, сөз қадіріне жеткендей болса керек. Екі айдан соң, ол қайтадан бағын сынап, елге ұрын келеді. Бұл жолы

ауылдың қыз-келіншектері еріндерін тістеп, еркін қалжыңға ерік берген жоқ. Сөйтіп Аюбайдың үйренген сөздері, ақыл-кесесі бұл жолы кәдеге аспады.

Уақыт өте берді. Қүйеу бала енді ауылға апта сайын келетінді шығарды. Убиан әпкем бұрынғыдай емес, «пешенеге жазылған осы шығар» деді де, бәрін үнсіз мойындарды. Қалыңмал қанша көбейсе де, қарамызға түяқ қосылмай азая берді. Бәрі жасау-жабдыққа жаратылып жатыр еді.

Ұзату тойы қоңыр күзге қарай, жиын-терін біткен соң басталмақ. Тойға әзірлік кезінде де басымыздан тақыр кетпеді. Ауылдық, болыстық әкімдер, сұраққа шақырып әңгір-таяқ ойнатуды шығарды. «Қалыңмал алғаныңды қағазға түсіреміз, уәкіл шақырып айдатамыз» дегенді де айтты. Алайда әкем бұған сескене қоймады. Өйткені «жығылып жатып сүрінгенге қүледі» дегендей, олардың өздері де қолдарымен қоқыс шенгелдегендер еді. Көрінгеннен пара алып, көрінгенге көз салып, алдынан өткенге алақан жайып, әбден алакөзденіп алғандар болатын. Әкем соны біліп сескенуден аулақ жүр. Тіптен беттеріне тіке айтып салыпты:

- Бұл аймақта көзге сүйелдей көрініп отырған жалғыз мен емес. Ел істеген тірлікті мен де істедім. Сендердің де құлқындарың мәлім. Жемсауларың бұлкілдеп отырғанын да білем. Ал егер біреуінің тамағынды тығындарасам, екіншің ауыз ашқалы дайын тұрсындар. Пара үшін жиған малым жоқ. Сендерге пара берем деп жалаңаш қалар жайым да жоқ. Өз қотырымызды өзіміз қасып, тыныш жүрейік те. Бәріміз де онып тұрған жоқпыш. Мен қызымының көнілі үшін күнәшар атансам, сендердің күнәларың онан да асып жатыр. Сондыктан қорқа қояр, жаси қояр жайым жоқ. Онан да әрқайсың күн сайын дікектей бергенше, үлкен бастыққа хабарландар. Не де болса, соның алдында жауап берейін, - деп әкем белсенділерді беттетпеді.

Ұзамай үлкен бастық да келді. (Шамасы біздің болысқа қарайтын милиция бөлімінің бастығы болса керек) Келуін келді-ау? Бірақ сорақысы енді басталды. Не болды дейсіздер

ғой. Тергеуге келген бастығымыз Убианды көргенде, ақыл есінен адасқандай телмірді де қалды. Көрген жерден қөнілі кетіпті. Енді ол бастықша сөйлеуден қалып, басқаша сайрай бастады. Сүмдіғы сол - ол әпкемді тоқалдыққа алуға бел байлапты. Бұл жолда қыруар қалыңмал шашып, қара басын саудаға салудан тайынбайтынын айтып кетті. Енді есігіміздің алдынан әлті бастықтың көлігі кетпейтін болды. Келгөң сайын сөз салып өзөуrep отырады да қояды. Алғашында қатты айтуға әдеп сақтап, жаймен түсіндіріп жүрген әкем, бір күні морт кетті.

- Шырағым, оттап жүргенің не осы? Ел сенімінен садаға кеткір езбесің ғой өзің. Қатын үсті ететін, сен сияқты ақымаққа кететін қызым жоқ. Сендер әділет жолын тұтынып жүрмін дейсіндер ме. Қой терісін жамылған қорқау неме. Сенің де зауалың табылар, - деп бетіне тіке айтты.

Бастық мұндан жауап күтпесе керек, орнынан атып тұрып есікке беттеді. Аттанып бара жатып әкемді қорқыта бастады.

Көп ұзамай әкем айтқандай-ақ, әлгі бастық кішірейіп, бөлімшемізден ауысты. Көршілес қырғыз ауылдарына кетіпті. Ол жерде сәрсенбі сайын базар болатын. Бір базарда әлгі бастықтың әкіреңіне шыдамаған бір топ қырғыз жігіттері дедектетіп жүріп сабапты. Әділдікті сақтай алмаған, ел сенімін ақтай алмаған шолақ белсендіні өкіметіміз орнынан алып, мұндан қызметтен мұлдем аластады.

Әкем бұл туралы тіс жарған емес. Шамасы, сондай солақайдың кетуіне себепкердің бірі әкем болса керек.

Жасау жағы біткен соң, әкем енді қызын күзде Аюбайға ұзататынын жариялай бастады. Той болатын күн белгіленіп, шақырылатын жегжаттарға хабаршы жіберілді. Тойға еki

апта қалғанда Убиан ағайын-туған, жегжат-жұрағаттармен танысуға аттанды. Әпкемнің қасына еki жігіт, үш келіншек ерді. Байқап отырсам, осынау дәстүрдің үлкен мәні бар екен ғой. Аулынан аттанып, қызықты дәуренімен қоштасар алдындағы қыздың ең соңғы рет емін-еркін салтанат құруы сияқты екен бұл. Бұдан кейін өз бетінше отау тігіп, өз тұтінін тұтететін кез тудады. Танысқан қыз әкесінің үрім-бұтағын түгел қалдырмай аралап, қайта қауышқандай, қайта табысқандай боп аттанады. Біздің де араласқан адамымыз, тараған бұтағымыз мол еді... Әкемнің төрт әпкесі, әжемнің еki інісі, нағашыларым, әкемнің нағашылары, өгей шешеміздің туысқандары, аталас ағайындарымыз алыс-берісі бар жегжаттары - міне, осының бәәрі Убианның серуендең қайтар

өрісі болатын.

Аттанар алдында әжем ауылдың қыз-келіншектерін, бар әйелдерді шақырып, қыз жасауын қызықтауға шақырды.

Күн ашық еді. Ауылдағы бар әйел біздің үйге ағылып келіп жатты. Тегіс жиналған соң өзара шай үстінде ақылдастып, жасау жияр отауды ауыл шетіндегі көкшалғын аланда тігуге келісті. Үй тігілген соң әйелдер біртіндеп жасауларды апарып көкалға жағалай жая бастады. Алдымен әжемнен келе жатқан үлкен кілем жайылды. Кілемнің өрнектері күн көзіне мың құбылып айналға әр бергендей. Оның қасына кішірек

кілем жайылды. Бұл шешемнен қалған кілем еді. Отаудың өзі арнайы тігілгендейтін бе, ішіндегі басқұр үықбауына дейін көз тартады. Алты қанат ақ отау ашық құнде ерекше әсем көрінеді екен.

Жасау-жабдық түгелденіп болған соң, әпкемді ертіп келді. Ауылдың үлкен женгесі алдынан қарсы алып, қолтықтады да, отауға қарай беттеді. Осы сәттегі әйелдердің толқуында

шек жоқ еді. Бәрі қыбырсыз тына қалды. Демдерін іштеріне тартып салтанатты сәт күткендей, кейбіреуі көзіне жас алып жатыр. Әлгі үлкен женгеміз босағаға жақындағанда Үбианға тіл қатты:

- Отауына оң сәт тілеп, есігін аштырғалы түрмиз, еркежан. Отаудың бақытқа толсын, иелері қайғысыз болсын.

Даусы біртүрлі қалтырап шықты.

Әпкем босағадан бірінші аттады. Қалғандары сонынан еріп, ішке енген соң әпкемді құшақтап, игі тілектерін білдірді.

Байқасам, әпкем жылап түр екен. Бұл елден кетерін сезген қыздың қимас көңілінен шыққан жас па, әлде ағайынның ықыласына деген ризашылық жасы ма, ол жағын анғара алған жоқ едім...

Сәлден соң әйелдер үйге үлкен екі сандық алып кірді. Іші толған асыл бұйымдар мен қымбат киімдер екен. Төрдің бір бұрышына апарып сол кейлектерді шығарып ілді. Іргеге әшекейлі ағаш төсек құрылды. Оған мамық салынып, үстін майда жібекпен көмкерді. Жерге киіз, кілем төселді. Енді зер салып қараған кісіге бұл отаудың мұнтаздай жаңа, мол жиһазды үй екенін бірден білер еді.

Жаңа отауда алғаш рет мол дастарқан жайылып, көл-көсір шай ішілді. Ер атаулыдан біз сияқты ерме балалар ғана қатысқан еді.

Шай үстінде жасаудың кем-кетігі жайлы келелі әнгіме де қозғалды. Енді немен толтыру керек екені сөз болды. Соңан соң женгейлер Үбианға түрлі бұйымдар қоса бастады.

- Жақсы көретін қайын сінлім едің, бикеш. Көзімдей көріп жүрерсің,-деп әрқайсысы кесе-табақ, білезік-сақина, алқа-моншақтар сыйласты. - Құдайға шүкір, бикешжан. Мұндай жасауға әркімнің қолы жете бермейді. Әжем мен қайынаға ризамыз. Бүтіндей бір үйдің ине-жібіне дейін түгендер, іргендей берік қондырғалы отыр. Мұндай жасаумен барған жерінде де мерейің үstem болады.

Осылайша шын тілектерін, адал көңілдерін білдіріп әйелдер тараса бастады. Мен дастарқан қызығына беріліп, өрік-мейізben алданып отырганымда, тыстағы жақсылықтан құр қала жаздаппын.

- Апа! Қыздың нөкер-серіктегі келіп түр, - деген көкемнің дауысын естігенде, тысқа атып шықтым.

Төгілте киім киген қос келіншек, бұралған бір жас қыз және екі жігіт жол жүргүре сайланып тұр екен. Әжем оларды үйге шақырды. Екі жігіт тыста қалды да, өзгелері кірді. Өйткені жаңа отауға ерлер бас сұқпауы тиіс екен. Қайшагұл келіп, Үбианды бауырына басып тұрып бақыт тіледі:

- Бақытты бол, бикеш. Сол бақыт жолының бастамасын өзіңе серік боп жүріп көргелі кеп тұрмыз,- деді ол.

Мұнан соң Үбианды киіндіре бастады. Раушан тұстес бүрме етек көйлекті кигенде әпкемді танымай қалдым. Керемет жарасымды екен. Көйлек сыртынан қынамабел көкбарқыт бешпет киді. Құндыз бөркінің төбесінде үкі желбірейді. Қос бұрымының ұшынан күміс тамшы төгілгендей, арқасында әсем шолпы сылдырайды. Аяғында биік өкше оюлы етік. Мойны моншаққа толы, қеудесін алқа көмкеріп тұр. Аппак білегінде қосқостан күміс білезік. Саусактары сақинамен безенген. Тырнағына аздап сүрме жақкандай көрінді.

Әжем күміс сапты қамшыны немересінің қолына ұстатты да, оң сапар тіледі. Бәрі тысқа шықты.

Көкем қарагер жорғаны көлденең тартып тұр екен. Бұған Үбиан мінбек. Сондықтан ба, ер-әбzelі ерекше. Ауыздықтан бастап сағалдырығына дейін күміспен күптелген жүген. Тоқымы мен тебінгісі барқытпен тысталыпты. Ер үстіне барқыт көпшік төсөлген. Өмілдірігі төгіліп тұр.

Көкем мен жігіттер әпкемдерді колтығынан демеп атқа отырғызыды. Осы кезде топ ортасына әкем келді. Аз үнсіз тұрды да, алақанын жайды. Жиналғандар тегіс алақандарын

жайысты. Әкемнің оң батасын алғаннан соң, серуен тобы жолға шықты. Бұқіл ауыл тысқа шығып, Үбиандар көкжиекпен астасқан алыс қырқадан асып кеткенше көз жазбай қызықтап қарап тұрды. Сонда әшекей бұйымдар қайдан табылды дей көрменіздер. Әкемнің зергерлік өнері бар еді деп айтқан едім ғой. Сол өнерін қызынан аямапты.

Әкеме күн сайын көкем де көмектесіп жүрді.

Үбиандар кеткен соң, ауыл енді бүтіндей той қамына кірісті. Көкем базардан базар қалдырмай аралап, қоржын толтырып қайтады.

Ауыл жігіттері білек сыбанып қолғабыс көрсетіп жүр. Әкем зергерлік ісіне біржола беріліп алды. Мен қасында тұрып, айтқандарын қалт жібермей зыр жүгіріп орындаимын. Әкенің тапсырмасын орындағаннан артық не ғанибет бар дейсін, шіркін.

Әкем ең алдымен балшықтан өзіне қажетті ыдыс жасайтын. Оған күміс тенгелерді салады. Оның үстіне жаңқа үйеді де, тұтатады. Біртінде шоқтанып бара жатқан ыдысқа қарап тұрған қандай рахат. Әкем көсеумен көмірлерді аударыстырады. Мен ешкі терісінен жасалған қол көрікті басамын. Бір кезде ыдыс бетін көгілдір жалын шарпиды. Сол кезде еріген күміс сынапша толқып шыға келеді. Әкем оны аздап сұytады да, алау тұстес ерітіндін сұық суға салып жібереді. Су быж етіп қайнап шыға келеді. Соңан соң балқыманы қолына алып, әкем білезік соға бастайды.

Өрнегін қаламмен сзып алады да, ұстараның жүзімен көртіп қондырады.

Мұндай кезде үй-іші қыбыр етпейтін. Бәріміз демімізді тартып, әкемнің тесіле қараған жанарына, аздал дірілдеген саусақтарына зер салушы ек. Өрнекті қондырып болған соң әкем енді білезікті құммен жұмырлап ысқылайды да, тұтілген жұнмен тазалайды. Сонан соң үстіне ақ мүсәтір

ұнтағын себеді де, аздал отқа ұстайды. Ұнтақ тұтанған кезде білезікті оттан тартып ала қояды да, тізесіне ысқылап жібереді. Сол кезде білезік жарқырап шыға келеді. Өз өнеріне деген сүйіспеншілігі шығар, әйтеуір әкем әңгіме айтқанда әшекей, өрнек жайлы, оның нақыстары жайлы көбірек сөз ететін.

Әкемнің өнері өзге ауылға да белгілі еді. Алайда өзі үшін болмаса, өзгелерден акы алғып ер-әбзел, зергер бүйымдарын жасаған емес. Әкемнің кейін қолдан мылтық жасағаны есімде. Мылтықты әшекейлеп, өрнекті шүріппе жасады. Бірақ сынап көргенде мылтық атпады. Сонан соң

әкем ызаланды ма, әйтеуір ұнғысына дәрі толтырып біздің көзімізше мылтықты талқандап тынып еді.

2-бөлім

Убиандар екі жұмадан соң елге оралды. Жігіттер алдарына төрт тай салып, мол сыйлық артылған түйе жетектеп қайтыпты. Бір таңғалғаным - бәрі үйдің тұсынан өтіп кетті де, ауыл шетіндегі жаңа тігілген отаудың алдына ат басын тіреді. Тұс-тұстан тағы да әйелдер жиналды. Бәрі құшақтасып көрісіп, қуанысып жатыр. Хал-жағдайын, жай-құйлерін жамырай сұрасады.

Отауга бұрқ-бұрқ етіп самауыр келді... Жиын-тойдың, бас қосқан ортанның қызығына алғашқы себепкер өзіммін дегендей иінінен демалады. Бұл отырыста негізгі әңгіменің ұйытқысы Убианның қасындағы құрбысы болды да, қалғандары ынтыға тындаады. Ол әдемі майда тілмен,

ұтымды әзілдермен сөз арасын құлпырта отырып қайда болғандарын, қандай кештерге қатысқанын, кімнің үйлері шақырғанын, Убианға кімдер қандай сый көрсетіп, не тілек айтқандарын тәптіштеп баяндаады. Тіптен ел қыдырып жүргенде естіген қызығылышты әңгімелері мен әсем әндерді де айтып берді. Барған ағайындардың әрқайсысының көніл қүйі мен көлгірлік пифылдарына дейін біліп келіпти.

Әйелдер ынтыға тындаап отыр.

Серкебай нағашым түйе жетектетіпті. Ал інісі Құлжабай тай сыйлапты, бір нағашы женгеміз тұсқиіз беріпті. Енді бір женгеміз барқытпен тысталған мамық сыйлаған. Әкемнің қарындасты кіші кілем мен аяққап тарту етіпті. Екінші қарындасты - жібек шапан және күміс леген беріпті. Осындаі сый-сияпат мол екен. Әйелдер бәрін жайып салып қызықтап отырысты.

Сонан соң әкелген сыйлықтарды жасауға қосты да, әйелдер үйлеріне тарасты. Убиан әдептегісіндей қайта киініп, әкеме сәлем беруге кетті.

Әкем қызын мейірлене қарсы алды. Шашынан сипап, маңдайынан иіскеді. Үбіан шыдай алмай жылап жіберді де, әке құшағына жасырына берді. Кеудесіне басын қойып ұзак

жылады.

Әкем өзін-өзі әзер ұстап, кереуетке отыра кетті де, қызын алдына алып теңселіп, жас балаша әлдиледі. Ортанышы әпкем Әлиманның бұрымы селтиіп, кереуеттің басынан ұстап қатып қалыпты. Оның да екі бетін жас жуып тұр. Мен әкемнің осыншама еміренгенін көрген емес едім. Әрқашанда сабырлы Үбіанның босағанына да таңырқадым. Содан ба, бедірейіп тұрып қаппын. Әлиман шыдай алмаса керек. Жүгіріп кеп, жұдырығымен қойып қалды. Кемсендеп әрең сөйлеп тұр.

- Сен неге бедірейіп тұрсын, тасбауыр. Көзіннен жас та шықпайды ғой...

Мен есемді жібермей, Әлиманды салып қалдым. Алайда көзімнен жас шығып кеткенін өзім де сезбей қалып едім... Әкем езу тартып күлді де, үшеуміздің де ыстық жасымызды төсіне басып, бауырина тыға берді.

Ертеңіне жаңа отаудың жанына жағалай үй тігілді. Тойға келетін конактарға арналған үй осылай молая берді. Байқасам, кешке қарай ауыл жанынан Үбіанның отауын ортаға алған жаңа ауыл орнап қалған екен...

Келесі күні барлық балаларды жақсылап киіндіріп, жаппай жасандырып қойды. Сол кеште қасына жеті жігіт ерткен Аюбайлар келді. Олар өздеріне арнап тігілген үйге тұсті. Енді қалыңдықтың отауы мен күйеудің отауы арасында қызыққұмар адамдар сендей соғылысты.

Әр үйден әсем күлкі, жарқын дауыстар естіліп, жадырасып жатыр. Желіде аттар кісінеп, ауыл іші жанданып кетті. Ошақтан көтерілген көп тұтін көкке қалықтап көлбендең барады...

Осылайша той да басталып кеткен еді. Біздер, ауыл балалары, назардан тыс қалып, қарангыда топырласып әр үйдің арасын жол етіп жүрміз. Қызық естіsek деген дәмемен әр үйдің жанын сағалаймыз. Алайда есік алдындағы самауыршы жігіттер маңайлатар емес.

- Әй, балалар, аулақ жүріндер. Сендерге бұл арада тұк те жоқ!

Кейбір көңілшектері басымыздан сипап, құлағымызға сыйырлайды:

- Айналайындар, алысырақ ойнаңдар. Меймандар көрсе, ауылының балалар бейбастақ екен деп кетер. Ұят болады, - дейді. - Бара қойындар! Топырламаңдар!

Әйелдер жағы бізге көз қырын да салар емес. Бәрі асығып, дастарқан көтеріп, кесе шайып, қазан басында күйбектесіп жүр. Қасына бара берсең, тезірек құтылғысы келгендей қолымызға үн-тұнсіз бауырсақ, тәтті қыстыра салады. Біз өзара күбірлеп сөйлесіп кете береміз.

Таң атты. Жаңа ауылдың қазаны елден бұрын көтеріліп, ошақ тұтіні елден бұрын өрледі. Ел тірлік қамына кірісіп, жаппай қарбаласқа көше бастаған кез...

Қонақтар баппен тұрып, бастау жаққа бара жатыр. Мөлдір суға кезектесіп бет жуысып сергіп қалады. Соナン соң маң-маң басып маңғаз жүріспен өздері тұскен үйге беттеді. Біз де солардың соңынан ілесіп жақындай береміз. Қонақ көзінше ұлкендер ұрыспайтынын әрқайсымыз жақсы білеміз. Алайда меймандарға сездірмей ала көзімен бізге қараған ауыл жігітінің сұсынан шошып шегіншектей береміз.

Меймандар керіліп-созылып ұлken сәскеде дастарқанға әрең отырысады. Шайды асықпай сораптап, бір-біріне оқта-текте еріншектене тіл қатысады. Бәрі маңғаз, бәрі кербез сияқты. Сызданып отыр. Шайдан соң қымыз келеді. Қымызды да салғырт отырып, самарқау ішіседі. Асығар жайы жоқ, уақытты үнсіз ұтқан сыңайлары бар сияқты. Кешегі даурықпа сөз, дабыра мінездің бірі де жоқ. Бәрі әлдебіреуді сарғая күтіп жатқандай. Ол кім? Ол күткендері сәті тұскен

кез, сапарға шығар уақыт, сағыныса көріскең жаңа қонақтар ғой. Құн ысып барады. Әркім киіз үйдің іргесін түріп жатыр. Біз енді-енді айқын көрдік. Жұқа шапанын иықтарына желбекей жауып қаз-қатар жастыққа жантайғандар...

Құн тұстен ауа бастады. Ауылдың ошақтарынан тағы да тұтін шұбалып, көпке көтерілді. Әр үйдің алдында самауыр сақылдайды. Қонақтар шайды рахаттанып ұзақ ішті. Онан соң алдарына ет келеді. Табақ тартқан жігіттер қаз тізіліп, әр үйге кіріп жатыр. Әңгіме аздал жанданған сияқты. Бірақ кешелі бері осынау бір сарынды сабылыс біз сияқты ерекше қызық күткен балаларды жалықтырып жіберіп еді.

Уақыт өтіп барады. Құннің қызызы тарап, ауа қоныр салқын тарта бастады. Міне, ақыры сонау алыс көкжиектен әлдекімдер көрінді. Бұлар қызыл-жасыл киінген қонақтар екен. Көрші ауылдардан келе жатқандар. Енді екінші жақтан бір топ аттылы кісілер көрінді. Тағы бір қарағанымызда ауылдың тұс-тұсынан бізге қарай жақындал келе жатқан жарқын топ бүкіл даланы гүлге бөлеп жібергендей еді. Сол топ дөңгелене келіп мынау ортадағы жаңа отауды алақандарына көтеріп, ауыл қызығын асқақтата түсетіндей сезілді. Біз әр жаққа бір қарап қарық боп қалдық. Ауыл

адамдары қонақтарды құрметпен қарсы алуға сақадай сай тұр. Міне, екі жақ құшақ жая қауышып өтті де, күлкіге күлкі, тілекке тілек ұласты. Эйелдер жағы көрісіп, ерлер жағы қол берісіп, төс тиістіреді.

- Тойларың құтты болсын!
- Тойларың тойға ұлассын!
- Ауылдарыңнан той үзілмесін!
- Ниеттерің баянды болсын!

Осылайша тілек білдіріп жадырасқан меймандарға ауыл адамдары да жауап қатады:

- Өздеріңмен бірге болсын!

- Айтқандарың келсін!
- Өздерің де осындай тойға жетіндер!
- Өмірлерің тоймен өтсін!

Сыңғырлаған шолпы үні, жүрекке жұмсақ күміс құлкі, жібек көйлектердің сусылы, бұрала басқан қыз толқыны кешкі ауылды көріктендіріп жіберді. Бізге әйелдер жағы жай сөз емес, - әуезді ән салғандай, жай ғана қаражаяу жүріспен емес - толқын үстінде жүзіп келе жатқандай сезілді.

Әйелдер жағы алдымен қалыңдықтың отауына бас сұғады.

- Бақытты бол, бағың ашылсын!
- Әр күнің бүгінгідей ашық болсын!
- Басыңнан жақсылық кетпесін!
- Босағаң берік болсын!
- Үйің қуанышқа толсын!

Әпкем бәрінің де ықыласына риза болып, шын жүректен алғыс айтады: «Жақсы сөз жан семіртеді, құлақ құрышын қандырады, үмітінді үдетеді, жүрекке қанат бітіреді... Сендердің жарқын жүздеріне көз тойдыраар емеспін. Жақсы сөз жарым ырыс дегендей, айтқандарың келсін. Өмір бойы ұмытпаспын сендерді».

Сонан соң әйелдер жасау көруге кіріседі.

Ерлер жағы алыстан-ақ аттан түсіп, күтуші жігіттерге тізгіндерін ұстаратады.

Мен таныс жұз кездестірем бе деп топ жігітке көз тастап едім, бәрі де бір-біріне ұқсас сияқты көрінді.

Жігіттер жағы дабырласып асыға бастады.

- Аққұл келеді! Аққұл келеді.

Аққұл құндыздай жылтыраған, қысқа жал, келте құйрық боз айғырмен келеді еken. Кәдімгі «ор текедей орғыған жүйрік» деп атайтын әйгілі сәйгүлігі. Қасына отыздағы үлкен ұлы Асылбай мен Тінәлі нағашым еріпті.

Аққұл жақындағанда, жиналғандар жапырылып жол берді. Бәрі қолдарын қеудесіне қойып, құрмет көрсетіп тұр. Аққұл ерде маңғаз отыр еken. Жиналғандардың көбін көзіне де ілген жоқ. Мандайын ақ орамалмен шарт түйіп алыпты. Бешпетінің жеңі түрліген. Түкті білегінің тамырлары адырайып тұр. Селдірлеу ұзын сақалы қеудесіне түседі. Белін жалпақ кемер белдікпен мықтап буынған. Денесін алға ентелете тастап ер үстінде еркін отыр. Жайдак табан қырым етік киген еken. Ұзенгіге бос тастапты. Ол бірден ауыл ортасында бір топ кісімен тұрған әкеме тұра тартты. Саусақтарының ұшымен ғана тізгінді іркіп еді, астындағы атының қос құлағы қайшыланып, кен танауы желбіреп

барып кідірді. Маған ер-әбзелі ақ күміспен көмкерілген боз айғыр мен иесі ақ сақалды Аққұл екеуі осы сәтте бір тұтас құйылған сом мүсіндей сезілген еді.

- Аманбысың, Момыш! - деп Аққұл өзінің құрдасына сәлем берді.

- Өзің де саумысың, Аққұл! - деп жадырады әкем.

Сонан соң тойға құтты болсын айтып, Аққұл өзінің кешігіп қалғанына кешірім сұрады. Аттан түспей жатып ашулы жүзбен ақыл айта бастады. Денесін оқыс бұрды да, қамшысын екі бүктеп бір шетте үйіріліп тұрған топқа сілтеді.

- Мынау өңшең әңгүдіктер шанқай тұсте көкпар дәметіп жүр-ау, шамасы. Есіл-дерті ентікпе шабысқа ауған шала милар өңкей. Өздерін аямаса да, атты аяса қайтеді. Қапырықта қаратерге түскен жүйрікте не қасиет қалмақ. Ыстық леп кеудесін қауып, шұбалма шаң өкпесін ыстамай ма, ат жарықтық қызы сияқты мәпелеуді қүтетін мал ғой. Аялай білмесең - аяғынан қалады. Аяқтан қалған жүйрік ақырған есекке де алдырады, -- деп Аққұл жастарды жазғыра сөйледі.

- Жайбарақат сұтып, майын сылып алудың орнына бұлар салпақтап жапалақша жалпылдай бергенді жақсы көреді. Алаөкпе тасыраңға ансары ауғандар ғой өңшең. Жақсы

шабандоз атқа ауыр жүк емес, қайта қанатында демеуші болар. Эйтпесе қаптаулы тезектей ерге теңселіп отырғаның несі қасиет. Аттың демі ауырлай бастағанда, тіптен өзіміз демімізді ішке тартып тына қалмаушы ма едік. Ал бұлар болса... Ей, қойшы... не бол кеткен бүгінгінің жасына. Жок, Момыш, бұларға қарабайыр сайгұлікті қор еткенше, есек пен өгіз міндірген артық. Сонда ғана көкпар деп өзеурей берер бұл шіркіндер. Ер үстінде отырыстарын қарашы өзің. Ай, жастар-ай!

Тінәлі әкем жаққа жалбарына көз тастап, мына ардақты ақсақалдың оу бастан дау ізденеген сөзіне тоқтау салуды ымдал тұр. Әкем бір құлліп алды да, Аққұлдың әлгіден бергі

ұзын сөзін бөліп жіберді.

- Жастар дедің-ау, Аққұл. Жастың аты жас емес пе қашанда. Жазғырмай-ақ қой. Заман басқа, адам басқа екенін неге ұмытасың. Заман жастардықі. Ойнасын, құлсін, әрі

арғымаққа отыруды да үйренер, өмірлерін жайнатуды да білер. Бары мен нәрі алдағы жас емес пе.

Аққұл әкеммен қайта сөз таластырмақ еді, Тінәлінің ымдауымен алып келген көк серкені бір жігіт оның алдына көлденең тарта қойды. Әкем алақанын жайып бата тіледі. «Ла аумин, Ақа» - дегенде Аққұл шынымен-ақ абыржып қалған еді.

Бір сәтке сақалын тарағыштап тұрды да, алақанын жайып бата жасады.

- Тәнірім тілеулерінді берсін, қастарыңа қыдыр ерсін. Қашан да оң жол болсын, қызықтарың мол болсын. Ат- көлігің мұқалмасын, азаматтар жұқармасын, аумин!

Сол сәтте көкем аса бір ептілікпен көк серкені жыға салып, тамағын орып жіберген еді. Әкем Аққұлға қалжындаған тіл қатты:

- Сен бүгін, делебен қозып, қыза берме, Ақа. Жастарға ерік бер. Әйтпесе көкпардың пүшпағын да ұстай алмай жүрер. - Күш атасын танымас демей ме, Момыш-ау. Жағаласып жүріп бұлар көкпарға жармасқанына мәз ғой. Әйтпесе қалбақтай шауып дүркіремей, қайратым бар деп қара күшпен

сілкілемей, еппен тартқанды білер деймісің бұлар шіркін, он кісінің ортасына түссен де, оңайлықпен беріспей, күшіңе айланы астар етіп сыйылыш шыққанға не жетсін. Қалың топ қаңтарылғандай қарап қалар еді, сен болсаң жарып өтіп көмбеге қарай көсіле берер ең. Қайран заман-ай.

Осы кезде көкем:

- Ақа, көкпар дайын болды, - деді.

Сол-ақ екен, Аққұл айтып тұрган әңгімесін ұмытып арқасы қозып шыға келді. Қомданған бүркіттей көзі жайнап, жүзі албырттанып қиқулап тұр:

- Ой, Момынқұл, сен де ыбылжып қалған немесің бе деймін, тәйірі. Қашанғы күтеміз. Манадан бері қарап тұрган жоқпыз ба, - деп лезде көкпар құмарына біржола еніп алды.

Көкем Аққұлға қатарласа жүгіріп серкені сүйреп барады. Ат үстіндегілер жаппай қиқуласып, лап қойып келеді. Ауылдан аз ұзаған соң шабандоздар сақинаша дөңгеленіп

тұра қалды. Ортада серкенің сирағынан ұстаған көкем. Кенет ол серкені тік көтеріп алды да, Аққұлдан ұзай беріп лақтырып жіберді.

Сол-ақ екен, қасқырға құйылған қырандай Аққұл ілгері ұмтыла берді. Жардай үлкен шалдың жинақыланып бір уыс боп кеткеніне таң қалдым. Денесі шиыршық атып, әлгі серкені жерге жеткізбей қағып алды.

- Пау, шіркін, - деп шу ете қалған шабандоздар дауысы сайыс аңсаған сұнқарлардың үнідей шаңқ етіп еді. Аққұл болса, ортада шыр айналып сайыс әдісін жастарға жария еткендей өзімен-өзі егесіп өнер көрсете бастады. Көкпарды ат бауырынан ары-бері ауыстырып, қарсыласын айламен алдағандай болады. Бірсеке ерден ауып түсіп, ат сауырын

сағалайды. Тағы бірде ат жалына жабысып, қуғыншыдан құтылғандай болады. Бозшолағын ұршықша үйіріп, топ ортасында жас жігіттей ширак дөңгеленіп жүрген шалдың қымылына қызықпаған жан жоқ. Тіптен көкем қасымда тұрып қайта-қайта айқайлайды, жер тебініп құлшынады. Ол өзін де, өзгені де ұмытып, бар дүниені көкпар қызығына салып тұргандай. Әкем алакөзімен атып, көкеме басын шайқап тұр. Көкем болса тек Аққұлдың икемділігінен

басқаны елер емес.

Аққұл ортани тағы бір айналып шықты да, гулеген шабандоздардың қарсысына тоқтады. Көкпарды көкке көтеріп, жігіттер жаққа атып жіберді.

Алапат айқас басталды да кетті. Манадан бері жұрт жігерлерін шындаپ, жүйкелері әрен шыдап тұр еken. Бәрі де лап қойды. Сарт-сұрт еткен үзенгі, сабаласқан қамшы, үзік-үзік әмірлі сөз. Тек қана ат құйрығы сыртқа теуіп, сансыз бас шоғырланған сияқты. Серкеге кімнің қолы жетері белгісіз. Әйтеуір кимелескен адамда сан жоқ. Тыптырышыған көп тұяқ отау орнында жерді дүбірлеткелі де біраз болды. Бірак көкпар алып шыққан біреу жоқ. Кейбіреулердің додаға

сүнгүінен шетке жаңқаша сыйылып шығуы оңайланып қалды. Мұндайлар дода сыртын айқайға бөрліктіріп босқа далбақтап жүр. Көкпар ондайларды менсіне ме.

Кенет осыншама мол тірестің арасынан әлдекім серкені ат сауырына салып сыйылып шыға берді.

- Япырай, не деген қайратты қол еді мынауың. Қолыңнан айналайын, күшінен айналайын! Ақыреттің арасынан алып шыққанын көрмеймісің. Жарайсың жігітім, - деп серпіліп кетті Аққұл.

Мен Аққұл атамды тек өзінен басқаны көзге ілмейтін тәкаппар, өзінен басқаны сүймейтін менмен, өзінен басқаны мақтамайтын сараң деп ойлайтынмын, жоқ, олай емес еken.

Сайыста көзге тұскенді көкке көтеруге даяр ақжүрек, әділ екенін аңғардым.

Суырыла шыққан шабандоздың соңынан қуғандар даланы аунақшытқандай іркес-тіркес ұзай берді. Күып жеткендері көкпарға жармаспақ еді, әлгі шабандоз жалт беріп құтылып

кетті. Енді тағы біреуі жетіп қалған еken, алғашқы шабандоз көкпарды көлегейлеп бұрыла берді. Нақ бір қуғыншыларды мазақтап жүргендей талай рет тақырға отырғызып та үлгерді. Аққұл сондай әр кезеңде жаны рахаттанып «әп бәрекелде, әп бәрекелде!» - деп тұр.

Көкпар ілген шабандоз осылайша кең жазықта бұландаپ қуғыншыларды жан-жаққа жамыраташып жіберді де, өзі зулап ағып бізге қарай беттеді. Қас қағымда жетіп келді де көкпарды тік көтеріп.

- Мінеки, Ақа! - деп кесекше лақтырып жіберді.

Енді ғана байқадым. Әлгінде ғана көкем атқа мініп додаға араласқан еді. Сөйтсем көптің арасын көк толқындаі тілгілеп жеке шыққан сол көкем еken. Терлеген жүзін шаң көміп қарауытып кетіпти.

... Ымырт кезі. Айналаның бері көкпардан дүрлігіп енді ғана басылғандай тына қалыпты. Кешкі қоңыр самал есіп тұр. Қалыңдық пен күйеудің отау үйлерінің іргелері түрулі еді. Кереге көздерінен бәрі көрінеді. Убиан өз отауында отыр. Үстіне ең сәнді киім киінген. Айнала қоршаган құрбы қыздары.

Аюбай да өз отауында күйеу жолдастарымен бірге отыр. Оның үстіне жаңағана көкпардан қайтқан ағайындары - бір топ байтаналар кірген болатын.

Жиналған халық керемет көп. Ауыл ортасында бір топ ерекк әлденеге керісіп тұр. Мен соларға жақындаپ келдім. Сөйтсем, біздің үсендіктер мен байтаналар тойды кім бұрын бастайды деп дауласып тұр екен.

- Құдалар, бұларың болмайды. Өз ауылымында отырып, өзіміздің ерке қызымызды ұзатып отырып, той тізгінін сендерге бере алмаспыз, - дейді біздің үсендіктер.

- О, не дегендеріңіз. Қыздың өскен жері сендер болсаңдар, өнер жері бізбіз. Олай бөлектегендеріңе біз де көнбейміз! - дейді байтаналықтар.

- Бұл сөздеріңіздің де уәжі бар. Бөлектейін деп тұрган біз де жоқ. Дегенмен қалыңдықтың ауылымдағы той иесі бізбіз. Өзіміз бастайық. Сендер елдеріңе барып той жасасаңдар, соны басқаарсындар.

- Бұл не дегендеріңіз. Ауылымында той өтпегендей көріп тұрсыздар ғой сонша. Біз де іргелі елміз. Шүкір, осыдан құзымызды аман-есен қолымынға қондырайық. Тойдың көкесін сонда көрсетерміз.

- Немене сонда, біздің тойды қомсынғандарың ба, бұл.

- Е, жоқ, о не дегеніңіз. Қуаныш ортақ, қызық ортақ болған соң алаламай-ақ ақыл қосып атқарысайық. Шөп тастасайық, кімнің шебі түссе, сол бірінші бастасын, - деді байтаналықтар.

- Шөп тастасып ет бөлісейін деп пе едің сонша?

- Мұныңыз енді, әбестік болады. Әділ шешілсін дегенім ғой.

- Мейлі әділдік десен җүгінейік. Ал жасыр шебінді, - деп Тінәлі байтаналық Оңалға әмір етті.

Екі жақ өзара күбірлесіп алған соң шөптерін бас киімге салысты.

- Эй, Бауыржан, бері кел. Мына біздің егесімізді өзің шешіп бермесен, болар емес. Бас киімге қолынды сал да, екі шөптің бірін алып шық. Сонымыз той бастаймыз, - деді Тінәлі мені шақырып.

Мен көзімді жүмдым да, қолымды тұмаққа сұнгітіп жібердім. Екі жақ та демдерін тартып тына қалыпты. Екі шөпті де ұстап көрдім. Қайсысы біздікі екенін біле алмай жүрегім лүпілдеп кетті.

- Ей, болсаңшы енді, - деп Тінәлі тұртіп қалғанда, қолыма іліккен бір шыбықты суырып алғанымды өзім де білмей қалдым. Тұмақ ұстаған төреші қолымнан әлгі шөпті алып жоғары көтерді де, дауыстап сұрады.

- Мынау кімдікі?

- Менің шебім, - деп Оңал жүгіріп кеп бас салды.

Мен ішім удай ашып өкініп тұрмын. Ауылымыздың жігіттері де үнсіз сазарып қалыпты. Шарттың аты шарт байтанаңықтар жеңіп кетті. Енді екі жақ та Оңалдың соңынан еріп, қалыңдықтың отауына бет алды. Ішке енген соң Ұбианға қарсы отырды да Оңал тойбастарын шырқата жөнелді. Мұнысы тойбастардан гөрі ауыл қыздарын, қалыңдықты мадақтауға ұқсанқырап

тұр еді. Әрі ел сұлуларын еліктіріп тілге шақырып отыр.

Біз келдік айдын көлден аққу көріп,

Аққудан таңырқайтын таптым көрік.

Ауылдан құс боп ұшып шығып едік

Бастаған бәрімізді бақ күнге еріп.

Ұбиан әпкем жымып езу тартты. Өзге қыздар беттерін алақанымен бүркесіп ұялған болады. Оңал әнін жалғай берді.

Адаспай алты ай жүрдім, жете алмадым,

Аққуға жетпей қайтып кете алмадым.

Ақыры алдыңызға келіп қалдық,

Арқалап еліміздің көп арманын.

Жиналғандар ду құлісті. Оңалдың тапқырлығына риза болысып жатыр. Әйткені осы ауылдың арасы небәрі бес шақырым еді. Оңал әнін қайта айтты. Енді тікелей Ұбиан

әпкеме арнап отыр.

Жол жүріп алты ай бойы көз ілмедім,

Ісімнің оңаларын сезіп едім.

Армысың, Ұбианжан, бақ иесі

Сондағы іздегенім өзің едің.

Ұбиан әпкем өрттей қызырып кетті. Қасындағы құрбысына басын сүйеп сылқ-сылқ күліп алды да, орнынан тұрып Оңалға ізет көрсетті. Құрбысы екеуі қосылып жауап айтты.

Толқумен отырған бұл кезімізде,

Құрбыжан, біз не дейік сөзіңізге.

Аққуға теңедіңіз, рахмет

Өзгелер ұқсан берсін өзіңізге.

Оңал бұл сөздің астарын түсіне қойды. Әпкем зіл тастап отыр екен. Енді Оңал жалтарып, Тінәліге тиісе бастады. Қыздарды одан қызғанатынын айтып әндettі.

Жаңылсақ елдің өзі-ақ кінәлі дер.

Танытқан жан бар ма еді шүбәлі жер.

Аққу деп әрқашан-ақ мадақтайын,

Кудалап жүрмесе егер Тінәлілер.

Жұрт тағы ду құлісті. Оңалдың қыып салма ақындығына таңырқасып жатыр. Убиандар орнынан тұрып, үлкен шәлі орамал ұсынды. Орамалдың шетіне екі-үш күміс сақина, бірекі білеzік, ақша

түйілген екен. Оңал орамалды мақтанышпен қолына алып, тершіген мандайын сұртіп қойды. Ал түйілген бұйымдарды қасындағы серіктегі талап алды.

Жұрт «той басталды, той басталды!» десіп гүілдесіп кетті. Кенет тәбемізге өрік, тәтті, бауырсақ жауып кетті. Әркім жабыла теріп, «тойдың тәбәрігі ғой» десіп алып жатыр.

Осылайша той басталды. Той дастарқаны жайылып, үсті алуан асқа толды. Қыз-жігіттер әр тұстан қос-қостап әріптесін тауып айтысып жатыр. Әр үйден тұн жарымына дейін ойын-күлкі арылмады. Бұл кеште бұрынғыдай біз сияқты балаларды қудалаған жоқ. Бастан-аяқ қызыққа қарық болып отырдық. Әр үйге бір кіріп, армансыз-ақ араладық.

* * *

Мені Әлиман жұлқылап ояты. Сәске болып қалған екен. Ел түгел жиналыпты. Палуан курес басталған сәтке дөп тұрыппын. Елдің бәрі ығы-жығы жайғасып, орталарына палуандарын шығарыпты. Екі жақтың палуаны белдеріне орамал байладап, білектерін сыбанып шарт та шұрт айқаса кетеді. Бірін-бірі сынап, бірін-бірі бағдарлап, бірін-бірі тексеріп топ ортасында алшандап жүріп алды. Иыққа иық тіресіп, білектері сіресіп сілкілесіп, біраз жүрген соң біреуі қарсыласын жерден тік көтеріп алды. Басынан асыра лақтырмақ еді, анау балтырдан шалып, қармақ жүтқан

балықтан бұлқынып тұрып алды.

Сонан соң екеуі де қайтадан әдіс аңдып біраз жүрісті. Жұрт гулесіп бол-болдың астына алуша. Кейбіреуі шыдай алмай, өз палуандарына тәсіл айтып айқайлайды. Айқайға құлақ салар сәт пе. Тек күш ырқына, айла-шарыққа ғана бағынып анау екеуі аңдысумен жүр. Ақыры біреуі жеңді-ау. Жеңген жақ палуаның аяғын жерге тигізбей дедектетіп, топ ортасына жасырып та үлгерді. Елінің ақсақалы келіп бәйгесін алды.

Бәйге де аз емес еді. Шапан киіп, ат мініп, атлас орамал алып жатыр. Палуан куресін балалар аяқтады. Осылайша қызықпен жүріп бұл күннің де аяқталғанын сезбеппіз...

Ертеңіне таң азанмен қалындықтың отауынан Убианның сыңсыған даусы естілді. Жеңгелері қыздың қызыл көйлегін шешіп, аппақ көйлек киіндіріп жатыр екен. Қыз дәуренінің

соңғы нүктесі қойылғандай сезе ме, әпкем булыға жылады. Жар-жарға ұқсас бір әнді созып жылайды.

Осылайша жаңаша киіммен безеніп Убиан отаудан шықты. Жеңгелері қолтықтап алыпты.

- Айналайын, бикешжан, бағынды ашсын, - дейді біреуі. Екіншісі:

- Ата жолы осындаі, еркежан. Ата-енеңнің жоралғысын жасап жатырмыз, айыптама, алтыным, - деп қояды.

Бір қарасам, Убианның үйін жығып, түйеге артып жатыр екен. Тағы бір түйеге жасау жайғасыпты. Бір жігіт Убиан мінетін сәйгүліктің тізгінін ұстап тұр.

Әкем соның бәріне алыстан қарап тұрып, көзіне жас алды. Убиан болса сыңсыны үдетіп барады.

Біз Әлиман екеуміз әкеміздің жанында тұрғанбыз. Өкіріп жіберуге сәл-ақ қалып тістене берем.

Бұл кезде жасау артылып, жұрттың алды атқа қона бастаған екен. Убианның да сәйгүлігін әкелді. Сол кезде әпкемнің даусы бұрынғыдан да зарлы шығып еді. Ауыл әйелдері бәрі құшақтап көрісіп, жақсы тілегін жаудырып жүр.

Елдің ең соңында әкем келді. Ол қызын бауырына басып тұрып иіскеді. Даусы қалтырап батасын берді де, көз жасын көрсеткісі келмей, тез бұрылып кетті.

Сол-ақ екен, Аюбайға еріп келген жетеудің ішінен екі күйеу жолдасы әпкемнің қолтығынан лып еткізіп көтерді де, атқа қондыра қойды. Ер үстінде ауытқып отырган әпкемді

бірі сүйемелден, бірі ат тізгінің жетелей жөнелді.

Сол сэтте Әлиман да сыңсып жіберді. Әлдебір келіншек әпкемнің басына көлдей ақ сәлкешті бүркей қойды. Құдды қара күрең толқын үстіндегі ақ желкендей теңселіп әпкем

ұзай берді.

Әжем, мен және сыңсыған әпкем үшеуміз жеті жігіттің жетегінде Аюбайдың ауылышына қарай бет алдық.

Біраз жол жүрген соң Убиан жасын тыйды.

Жарым жолға келгенде бір ауылдың тұсынан өттік. Бұл ауылдың қызы-келіншектері алдымыздан шығып, жігіттері арқан керді. Сый-сияпатын алған соң, енді ауыл келіншектері

жол шетіне дастарқан жайып сусын берді. Өздері жасау-жабдықтарды қызықтасып жатыр. Көп кідірмей бұл жерден де жүріп кеттік.

Күйеудің ауылына жақындағанымызда, бір топ қыз- келіншектер алаөкпе бол жүгіріп алдымыздан шықты. Ұбиан аттан түсіп, иіліп ізет көрсетті. Біз әжем екеуміз отырған қүйме тікелей ауылға тартты. Бізді ауыл шетінде елдің игі жақсылары күтіп тұр екен. Орталарында елтіріден тымақ киген, түйежүн шекпенді желбегей жамылған қарт кісі бар. Таяққа сүйеніп, еңкіш денесін әзер игеріп тұр. Мұрты қияқтанып, аппақ сақалы желбірейді. Әбден тарамыстанған салалы саусақтарымен сақалын дамылсыз тараشتайды екен. Сөйлегенде иегі дірілдейді.

Осыншама кәрілігіне қарамай, тістері әлі бүтін көрінеді. Денесінің сіріңке қаралығын аппақ сақал ерекше айқындалап тұр. Айналасындағының бәрі «ата-atalap!» елпілдеп жүр. Бұл біздің бас құдамыз - Аюбайдың әкесі Майлышбай ақсақал екен.

Бізді үлкен үйге Майлышбайдың өзі бастап кірді. Әжем екеуі қатарласа жайғасып, маған әжемнің сол жағынан орын берді. Өзге ағайындары жасына қарай, құрметіне қарай қатарласып отырды. Үйде бір сәтке тыныштық орнап, бәрі де бір-біріне жылы шыраймен қарасады. Әлден соң

Майлышбай әжеме бұрылышпамандық сұрады. Мен шалдан көз алар емеспін. Ол сөйлеген кезде, тамағы бейне бір қымыз толы сабаның бүлкіліндей тербеледі екен. Әжем де амандақ-есендік сұрасып жатыр.

Мұнан кейін Майлышбай бізді үйде отырған құдалармен таныстыра бастады. Үлкен ұлының сақалына да ақ кіріп қалған кісі екен. Ортаншысы қою кара сақалды, толық кісі көрінді. Одан кейінгі екеуі де жігіт ағасы бол қалғандар. Кенжесі Аюбай жездем бол шықты.

Ұбиандар бөлек отауда отыр. Тап қазір ол жақта не бол жатқанынан хабарсызбын. Қасындағы әр қыз «женешелеп» сәлкешінің шашағын тартқыладап отырған шығар.

Біз отырған үйге енді елдің қадірменді аналары, қарт кемпірлер келе бастады. Бәрі де әжеммен емірене амандасады. Майлышбай ол кісілердің жақындық жағын айтЫП таныстырып отыр.

- Ал, қара жігіт, - деді бір аппақ кемпір жас кезіндегі әдетімен, - кемсендеген шағында кенжеңе де отау тігіп, көнілің орнықты ма? Ақ түйенің қарының актаратын кезің енді келді.

- Иә, женеше, бұған да шукір. Біз екеуміздің соңғы қызығымыз осы шығар бәлкім, - деп Майлышбай кәрілігін мойындаі сөйледі.

- Жо-жок, жаман сөзді жаман адам ауызға алады деуші еді. Айта көрме, қара жігіт. Мен әлі талай тойды көріп, талай қызыққа куә болам. Асықсан өзің бара бер ол жағына, - деп

кулді әлгі кемпір.

- Бес ұл, он бес немере сүйіпсің. Не арманың бар. Енді ол дүниеге ойланбай аттана берсең де болады. Әйтпесе жұмақтың төрінде жарықтық әке-шешен аландап отырған шығар, - деп қалжындағы тағы бір кемпір.

- Аллаға шүкір, - дейді Майлышбай сақалын салалап, - Алланың мұнысына тоба. Баладан да, бақтан да тарықтырмапты. Асарымызды асап, жасарымызды жасап болған шақта балаларымның алдында алса, тәнірге ризамын. Бірақ мынау кенже келінімнен - Момыштың қызынан бір перзент иіскегенше асықпандаршы тым болмаса, - деп жалбарынғандай сөйлейді.

- Болды, болды! Немене сонша, бізді нақ бір жаналғыштай көріп жалынғаның. Тілеуіне жет. Бір емес, бірнеше немере сүй, лайым.

Кейін ес білгенде анғарсам, осынау кәриялар өлімнен қорықпай, қайта оны әзілге айналдырып, керемет ұстамдылық, батылдық жасап отыр екен ғой!..

Майлышбайдың үйі сегіз қанат екен. Кереге, уықтары сүйекше жылтырап, әбден мүйізденіп бітіпті. Басқұр, уықбаулар үзік-үзік болса да, бояуы она бастаған өрнектері көз тартады. Кезінде керемет шебер жасалған үй екені көрініп тұр.

Тыста абыр-сабыр ұдеп барады. Біздің ауылдағыдай мұнда да әр үйдің алдында самауыр қайнап, ошақтың тутіндері аспанға будактайды. Жұрт беташар мен некеқияр қызығын күтіп тағатсыз торуылдайды.

Майлышбай мен әжемнің ортасында ак сөлделі жирен молда отыр. Кірпігін сүрмелеп алыпты. Бәрі соны «таксыр» деп тәжім етеді. Ол ауыл адамдарының кез келгенін «жұрттым»

деп кішірейтіп айтады. Оны пір санайды екен.

Бірақ дәл бүгін елдің бәрі өзге қызықты андып, өзге біреуге табынғалы отырғандай сезіледі. Айтқандай-ақ жұрт:

- Өтеп келді, Өтеп келді, - десіп шу ете қалды. Ішке орта бойлы, тығыншиқтай келбетті кісі кірді. Жұрт жабыла қолтықтап ортадан орын ұсынып жатыр. Ол өзгелерден ерекше, биіктеу көпшікке келіп жайғасты. Өтептің қақпақтай кең жауырыны мені көлегейлей берген соң, мен әжемнің иығына сүйеніп тұрып, қызыққа көз салдым.

Бір әйел қызыл шоқ салған таба әкеліп Өтептің алдына қойды. Өтеп болса, екі жеңін түрініп, шоққа алақанын қыздырыды да, қолын созды. Сол кезде оның оң қолына өктау ұстатты. Өктаудың басына шеті түйілген орамал байлапты. Өтеп иек қағып еді, үлкен үйдің есігі ашылды. Ішке екі келіншек қолтықтаған Үбиан әпкем кіріп келеді екен. Басына төгілтіп орамал бүркепті. Әлгі екі келіншек босағадан аттай бере иіліп сәлем берді. Әпкем соны қайталады.

- Қадамың құтты болсын, қарағым! Үлкен босағадан, киелі босағадан аттадың. Атана құрмет көрсет, - деді отқа жақын отырған бір кемпір.

Әпкем иіліп сәлем салды. Соң соң екі қадам жасады да, Өтептің алдына келіп тұрды. Бүркеншектің шашағы жер сыйып, әпкемнің аяғына дейін көміп тұр.

Кенет Өтеп даусын бір кенеп алды да әндете жөнелді.

- Э-э-э-эй! - дегенде үйдің іші қыбыр етпей тына қалды. Өтеп тақпактай жөнелді.

Келін-келін келіп тұр.

Келіп үйге еніп тұр

Қайын жұрты алдында

Иіліп сәлем беріп тұр.

Келін-келін, келіңіз,

Елімізді көріңіз,

Ала-құла деменіз,

Атын айтып беріңіз.

Ақ тілеулі ағайын,

Көрімдігін беріңіз, -

дегенде жұрт шу ете тұсті!

- Береміз! Береміз! - Айналайын.

- Көрімдігі даяр.

- Ертерек бетін ашып көрсетсөнші.

Осылайша ынтыға ентелеп ел Өтепке қайта құлақ тосты.

Келін, келін келді ғой,

Келіп үйге енді ғой.

Көрімдігін бермесе

Көрсетпеймін, енді қой.

Алақанға алтын сал,

Етегіме күміс сал.

Ашық қолды халқым бар

Келін, сәлем дұрыс сал, -

деп Өтеп көрімдікті алдын ала беруін сұрады. Майлыбай ақсақал бір уыс күмісті Өтептің алдына төге салды. Сол-ақ екен жұрт жапа-тармағай көрімдік бере бастады. Лезде Өтептің алды ақ күміске толып кетті. Алайда Өтеп «көрсетер келінімнің көрімдігі көк төбе бол үйілмесе, көрсетпеймін. Өйткені келіннің көрік десе-көркі бар, ақыл десе-акылы мол», - деп отырып алды.

Аз алтының сеп емес,

Аз күмісің тең емес.

Осы тұрған келінің

Ай мен күннен кем емес.

Көп болмаса көрімдік

Көрсететін мен емес, -

дегенде, жұрт тағы да шу ете түсті.

- Ойбай, айналайын. Көрсетпеймін дегенінді аузына алма. Келіннен аянып қаларымыз жоқ.

- Көрімдікке көнеміз, сөйтіп барып көреміз, - десіп, ел тағы да күміс тастай бастады.

Өтеп оны да азырқанды. Өйткені «келін текті жердің қызы, батыр елдің қызы, өскен ортаның өрелі, өнегелі жаны» екенін ескертті.

Байтақ елдің гүлі бұл,

Бар ауылдың нұры бұл.

Өскен жердің қызы бұл,

Өнегенің ізі бұл,

Көрсетпеймін келінді

Саусағыма жұзік іл, -

дегенде әжем орнынан емірене тұрып, Өтепті маңдайынан иіскеді де, қолына алтын жұзік салды. Ел тамсанып гулеп жатыр. Убиан риза болып иіліп тәжім етті.

Отеп сонда да қанағат етпеді. Елдің тағатын тауысып, шыдамын кетіріп, көрімдік сұрай берді. Әпкемді мақтап өлеңін құрай берді.

Көздерінен нұр тамған,

Көмейінен жыр тамған,

Беті таза айнадан

Көркі қандай жайнаған,

Көрімдікті көп алмай

Құр қалам ба пайдадан, -

дегенде енді ел жалына бастады:

- Айналайын, Өтепжан, нысап сайын береке.

- Келінімізді алдымен көрестіші өзі, қарыздансақ та көрімдігімен құтылармыз.
Сонда барып Өтеп демін терең алды да.

- Э-э-э-эй! - деп үй ішін тағы дүр сілкіндіріп алды.

Енді өз елін Үбианға таныстырып сайрап жөнелді.

Бұлақтары жосылған,

Ұрандары қосылған.

Үміт күткен досынан

Біздің ауыл осы маң.

Үбиан иіліп тағым етті. Өтеп енді термелей әпкеме ұзак өсиет айта бастады:

Үлкендердің алдында,

Тайрандама, келіншек.

Жон-жосықсыз желігіп

Сайрандама, келіншек,

От басына барғанда,

Отырып алма, келіншек,

Су басына барғанда

Сумандама, келіншек.

Бозбала көз салғанда

Қунаңдама, келіншек.

Қонақ келсе қорсылдан

Баланы ұрма, келіншек.

Енелерге торсылдан,

Жала қума келіншек.

Ұрыс-дауға үймелеп,

Үйір болма, келіншек.

Көрінгенді кимелеп,
Сүйір болма, келіншек.
Қайта-қайта қазбалап,
Шиыр болма, келіншек
Ағайынды мазалап,
Қиыр болма, келіншек.

- Ой, айналайын-ай!
- Көмейіңнен айналдым, жеңстандайым!

- Саған берген алтын да арзан шығар, - десіп ел ерекше серпіліп, дауылдастып кетті. Соны басқысы келгендей Өтеп құйқылжыта берді. Сол әлгі сарыны:

Өнегенің ортасы,
Тұрақ болсын, келіншек
Жақсылығың таусылмас
Бұлақ болсын, келіншек.
Бала-шағаң басыңа,
Шырақ болсын, келіншек.
Ұсақ болмай мінезің
Ірі-ақ болсын, келіншек.
Бекіл ауылға қашанда,
Үлгілі бол, келіншек.
Ізет-құрмет дегеннің
Білгірі бол, келіншек.
Сыйласуға келгенде,
Дұлділі бол, келіншек,
Тірлігіңде өмірден,
Кемдік көрме, келіншек.
Жамандыққа ешқашан,
Теңдік берме, келіншек.

Ел ұйып тыңдал, ауыздарын ашып қалыпты. Әжеме қарасам, көзін сүртіп отыр екен. Өтептің сөздеріне риза болып тебіреніп кетсе керек.

Бұл екі арада Өтеп ел жақсыларын, ауылдың абыройлы адамдарын таныстыруға көшкен еді. Солардың атын атап, Үбианға арнайы сәлем салдырмак.

Ең алдымен Үбианның атасы, ауылдың ең қадірменді қарты, жасы да үлкен, орны да бөлек - қуаныш иесі Майлышбайға сәлем салдырыды.

Сексенің де женілген,

Көргені көп өмірден.

Майлышбайдай атаңа

Сәлем салшы көңілмен.

Үбиан ерекше құрмет көрсетіп иілді.

- Көп жаса, шырағым! Өркенің өссін, - деді Майлышбай дауысы тағы да қаңылтырша қалтырап.

Өтеп енді ауылдағы өз құрдастарын, Үбианның абысындары мен қайнағаларын таныстырып, кемшіліктері мен жетістіктерін жырға қости. Ел қыран-топан құлкіге батып қалыпты. Бір абысының Өтеп былай таныстырыды.

Ызбайланып сзылған,

Бойы келген ұзыннан.

Ұрыс десе құлшынып,

Түрі лезде бұзылған.

Отырғандар ду құлісті. Әлгі келіншек қызарақтап Өтепке тиісе берді.

- Сені ме, осыдан сазайынды бермесем бе, сен заржақтың.

Өтеп бұл кезде өзгелерді өлеңге қосып жатқан.

Аулымыздың ағасы,

Аулымыздың жағасы.

Аулымыздың панаңы,

Аулымыздың данаңы,

Үлкен қайнағаңа бір сәлем.

Майлышбайдың үлкен ұлы көтеріліп қалды:

- Е, бар болғыр, бар бол, - деді Өтепке шын ризашылықпен. Ауылның бетке ұстар пысығы болса керек, Өтеп бір қияқ мұртты кісіні асыра мақтады:

Даңқы елден ары асқан,

Парқы көкпен таласқан.

Елдің көркі Ерболдай

Ағалармен жарасқан, - деді.

Ортаныш ұлы Жартыбай Өтеппен құрдас екен. Қурайдай қылқиган, арық бойы сидиып ебедейсіз қозғалады. Жағына пышақ жанығандай, сүйектері шодырайып, ұрты үнірейіп тұр. Әр жерден үрке шыққан сирек шашы едірейіп, кірпінің түгіндегі тікірейеді. Бір шөкім сақалы әйтеуір сақал бар деген атқа иеленіп, иегінің ұшында шоғырлана қалыпты. Мұрны да таңқыш екен. Өтеп бір адамның басындағы осынша мінді майда әзілмен түртпектеп керісінше келтіріп отыр. Жұрттың күлкісін тоқтату қыын. Бірі көзін уқалап, бірі ішін басып, енді бірі аспанға қарай шалқалап күлкіден ақтарылып жатыр. Жартыбай болса бүрісken торғайдай әркімге бір жалтақғап, қызырақтай береді.

Жау жыққандай қанарлы,

Жарты құлаш сақалды.

Бұйра шашы ұйысқан.

Сом денесі - құрыштан.

Нар санындаі білекті,

Нақ арыстан жүректі.

Нағыз қайрат кезінде,

От ойнаған көзінде

Басқан жері ойылған,

Сақтанып жүр дойырдан.

Тасмұсіндей таймаған

Осы сенің қайнаган.

Бітімі де ерекше.

Сәлем салшы, бөлекше, -

дегенде Үбиан иілді. Жұрт бір-бірін шымшылап, бір-бірінің санын соққылап, әйелдер жағы беттерін шымшылап мәз. Жартыбай судан тұншығып шыққандай енді қыбырлады.

Өтепке қызырақтай қарады да:

- Ой, у жеген ит-ай, ақыры сол уынды құсып тындың ба?.. Келіннен ұят болды-ау, - дей берді.

Тағы бір құрдасының лыпылдаған мінезін мінеп, Өтеп

аңы тілмен түйреп алды.

Елпілдеген құрактай,

Көлкілдеген сынаптай.

Ешкі ішінде шұнақтай

Анау тұрган жылтырға

Сәлем салшы сұратпай.

Жұрт риза болып қол соғып жатыр. Өтеп енді екі жастың татулығын айтып, өмірде сыйласып

өтіндер деген өсиетті айтып кетті. Әрі ағалық ақылын, әрі ауылдың артқан міндеті осы деп айтты.

Қаптың аузы бос тұр деп,

Құрт ұрлама, келіншек.

Өзің жатып байынды.

Тұр-тұрлама, келіншек.

Бір нәрсеге керісіп,

Сұнқылдама, келіншек.

Ер атағын ескермей,

Еріңе сен дес бермей,

Әрбір сөзін өш көрмей,

Ерте кетіп, кеш келмей,

Ынтымақта бол дейін.

Ата жолы сол дейін,

Өсиетті ұмытсан,

Жарың сенің қор дейін...

Осы тұсқа келгенде жұрт ішінен бір кемпір:

- Айналайын-ай, ел көкейін тауып айтып отыр ғой, көп жасағыр, - дей берді.
Өтеп термесін жалғастырып отыр:

Ал, ағайын, ал дейін

Келініңіз бал дейін.

Бет ашайын тап қазір

Көрер көрік бар дейін.

Оған дейін, шырағым,

Маған сәлем сал дейін.

Өтеп осы тұста әпкемнің басындағы төгіліп тұрган сәлкеш орамалын, қолындағы оқтаудың ұшымен іліп алып көтеріп таstadtы. Жұрт жамырап бата бере бастады. Ұбиан әпкем иіліп сәлем салып тұр.

- Көп жаса, балам.

- Алдыңдан жарылқасын.

- Ізетіңе ризамыз.

- Әмісег солай бол, шырағым!

- Үлкенді сыйлаған қор болmas!

- Босағаң құтты болсын.

- Етегіңе бала жармассын.

- Еліңнің сүйіктісі бол.

Ел осылайша дүркіресіп отырғанда, Өтеп алдына жиналған ақшаларды жиып алып сыйылып шығып бара жатқан. Бес-алты құрдасы қуа жөнелді.

- Ә, қу, бізді қуралақан қалдырмақпсының?

- Тәбәрік болсын, бізге де бірдеме бер.

- Мынауың ырымға жаман ғой.

- Біз де саған тілеулемес бол отырдық қой, - десіп сыртта Өтепті ортаға алыш жатыр. Анау құтылмасын білді-ау деймін, үлестіріп тынған сияқты.

Осылайша отқа май құйылып, Ұбиан да ошақ иесі болып шыға келді. Келіндерін ел он босағаға жайғастырып, жаңадан дастарқан жая бастады.

Бұл кезде қожа енді ояна бастағандай еді. Манадан ел беташардың қызығына беріліп, ерекше көңілденіп жатқанда, ол самарқау мұлгіп отырған болатын. «Мұның маған қатысы

жоқ. Өзіме тиесілі несібіме келгенде көрермін» дегендег манаурай берген. Енді аздал тіл бітіп, елдің сұрағына жауап беріп отыр. Кеседегі шайын қос колымен бүркеп алыш, оқта-текте әрек ұрттайды.

Әлден соң ол ишарат белгі берді. Сол кезде кәрлен кесеге толтырып тұнық су әкелінді. Майлыбай оған күміс теңге таstadtы да, қожаға ұсынды. Қожа судың бетін ақ орамалмен

бүркеп, әлденені құбірлеп оқи бастады. Бір қарасам, екі жігіт Аюбайды дедектетіп ішке алып кірген екен. Мен некеқияр басталғанын сезе қойдым. Екі жұбай үйдің екі босағасында қарама-қарсы жайғасты. Қожа әлгі екі қуәгер жігітті шақырып алып, жұбайлардың аты-жөнін біліп келуді тапсырды. Әлгі екеуі Аюбай мен әпкемнің алдына кезек-кезек тақақтап барып, қайтып келді. Қожаға баяндап жатыр.

- Күйеу бала - Аюбай, Майлыбай мен Зылиханың ақ некесінен туған ұл. Дінмұсылман. Жасы жиырма бесте.

- Қалыңдық - Үбиан, Момыш пен Рәзияның ақ некелі қызы, жасы жиырма бірде.

Қожа енді қуәгер екі жігіттен: «Бұл міндетті бұлжытпай орындауга Алла алдында, халық алдында ант етесіздер ме?» - деп сұрады. Аналар «ант етеміз» десті.

«Күәге жүрер алдында жуынып-шайынып, адалданып, құнәдан арылып келдіңдер ме?» - деді қожа қайтадан. Анау екеуі «құнәдан пәк» екенін айттысты.

- Барындар, екеуінен де сұрандар! Бұл неке көнілдің қалауынан, жүректің балауынан шығып па? Көнілдің көркімен, жүректің еркімен қосылып па?

Екі жігіт қолдарына ұсташқан орамалдың ұшынан тізбектесіп қосыла сайрай жөнелді.

Куәдүрміз, куәдүрміз,

Куәлікке жүрәдірміз.

Таңың қасында

Дәл бүгін халық қасында

Ақ куәлік берәдүрміз, -

десіп, куә қимылмен Аюбайға жеткенше айтып та үлгерді.

Аюбайдың алдына келген соң, олар тергеуге ала бастады.

Момыштан сыйған,

Рәзиядан туған.

Үбиан перизатты адал жар тұтуға ризамысың?

Аюбай сәл қызарактап отырды да, ұялғаннан «ризамын» деп мұрнының астынан сөйледі. Куәлер енді осылайша әндетіп Үбианға да жетті.

Майлыбай сыйған,

Зылихадан туған,
Аюбайдай арысқа,
Жар болуға ризамысың?

Ұбиан қыбырсыз отыр. Қасындағы абысындары тұртпектеп, «айта ғой, келінжан», «тақсырды көп тостырма» деп ақыл беріп жатыр. Ұбиан батылы жетіп айта алмады. Куәлар жауап алмай кетер емес. Мен әпкем жаққа тесіліп қарап отырмын. Әлден соң әпкем төмен қарап басын изеді.

- Е-е, бу бомиду да! Өз аузынан естіmesек болмиды, - деп қожа қазак сөздерін созып, бөлекше мақаммен айтты.

Әлгі екі жігіт тақпақтай әндегіл әпкемнің қасына қайта барды. Енді арашага әжем түсті.

- Тақсыр-еке, үлкендердің алдында жас баланы ұялтып қайтесіз. Бас изегені бәріне ықтиярлығы емес пе? Некеңізді қия беріңіз.

- Солай болсын, тақсыр, - деді Майлыбай да.

Қожа қайтадан кеседегі суға тәніп, әлденені оқыды да, бетіндегі орамалын алды. Сөйтіп куәге жүрген жігіттерге ұсынды. Олар кеседегі суды Аюбайға апарды. Ол суға ернін тигізіп қайтып берді. Соңан соң куәлар Ұбианға апарды. Әпкем де ернін тигізді. Бұдан кейін куәлар неке суынан дәм

татты...

Осылайша үйде отырған елдің бәрі неке суынан ішісті. Кеседегі су таусылған соң, қожа екі жастың некесі қыылды деп жариялады.

Майлыбай бір текше ақшаны қожаның алдына қойды. Енді кайтадан қазан көтеріліп, жас келіннің қолынан дәм тату үшін жұрт дастарқанға қайта отырысты.

Ертеңіне Майлыбай әжеме алғыс айтып, алдынан кешірім өтініп отырды.

* * *

Ұбианды барынша ырғап-жырғап Аюбайға ұзатып, Мамыттан алған қалыңмалдың қалдығын қайтарған соң, біздің үй мал-мұліктен мүлдем тақырланып, көпке дейін түзеле алмай жүрді.

Огей шешеміз осы тарыққан сэттерімізде әкеме тиісе беретінді шығарып алды. «Қазаныңда май қалмады, қатықталған шай қалмады, жайғасатын жай қалмады. Бір қызыымды ұзатам деп аш өзек етіп ұлытып қоймақпысың» деген сөздер жиі естіле берді.

Бірбеткей әкем мұндай сөзге шыдай алмады. Эйелінің төркіндерін шақырды да, бәрінің басы қосылған соң өкімді сөз айтты:

- Ағат кетсем айып көрменіздер. Бірақ осыншама қартайған шағымда қанқу сөз есітем деген жоқ едім. Өгей деп өнменінен итермес, өзім деп бауырына басар деп ем балаларымды. Адасқан екем. Кеш болса да, жөнімді табайын. Табалау табына қүйгенше жалғыздықпен жағаласып өткенім жақсы. Қыздарыңызы ала кетсеңіздер екен. Салғыласып

отыра алатын жайым жоқ, - деді.

Сол-ақ екен, өгей шешеміздің апасы қызына ұрысып, ұуырып жеп жібере жаздады. Әкем мұндай ашық әңгіменің арасында болғысы келмей, Әлиман екеумізді әжемнің үйіне алып кетті.

Бұл оқиға әжеме, әсіресе, қатты батып еді. Көзіне жас алып, қамыға берді. Шешемізді еске түсіріп:

- Қайран ырымалды келінім-ай, Рәзияшым. Мандайыма сыймай кеттің-ау. Оны алғанша, мені алмадың ба, тәнірім-ау, - деп отырып алды.

- Қойыңызшы, апа. Тағдырмен тәжікелесер шама бар ма бізде. Онан да немерелеріңіздің тілеуін тілесенізші, - деген әкеме әжем бар ашуын төкті:

- Немене, мені жаңа туды деп пе едің! Менің тілегім сендердің бірліктерің мен тірліктерің емес пе.

- Қойдым, апа, қойдым, - деп әкем күле берді. Бұл кезде екінші үйдегі кісілер де өзара кенесіп біткен еді. Екі үй бас қосып отырып, бір-бірінен кешірім сұрасты. Шешеміз «абайламай айтып қалыптын. Енді ондай қайталанбайды» деп уәде берді. Шешесі:

- Қарағым, Момыш, қызыымды алып отырған соң, сен де баламсың. Анам десен, бір жолға тілегімді қайтарма. Татулықтарың бұзылmasын. Енді ерні қыбырлап, бейпіл сөзге үйір болса, қызыымның жон терісін сыпырсан да ризамын, - деді.

Сөйтіп бұл үйде керіс қайталанбайтын болып еді. Бәріміз соған қуандық.

* * *

Мен әпкемнің ауылына жиі баратынмын. Аюбай жездем де ат ізін сұытпай келуші еді. Үйде екі-үш күн болып, біраз шаруаны тындырады. Жер жыртып, дән сеуіп беретін. Шөп жинап, қырман бастыратын. Өз туыстарына «балдызым жас, атам шал. Үлкен ұлындағы болғандықтан, үй тірлігін бітіріп берейін де» дейтін.

Келесі жылды әжем ауырды. Көп жатқан жоқ. Төсекке құлаған соң үш күннен кейін әкемді қасына шақыртты. Ентігіп жиі дем алып, денесі от боп жанып жатқандай еді. Ақ жастыққа селдіреп шашылған бозғылт шашы үлбіреп тұр. Әжімдері қатпарланып, әбден қартайған өңін онан сайын қажытып жібергендей. Алайда, әжем ешбір қиналмаған кісідей, дыбыс шығармай сабырлы жатыр. Қайта әлдебір сапарға дайындалғандай көңілі біртүрлі көтерінкі сияқты.

Әкем келіп қасына отырғанда, әжем мейірлене көз тастады:

- Момышжан! - деді әлден соң дауысы қалтырап, - Кыздарым мен немерелеріме хабаршы жібер. Жүздесіп қоштасайын.

- Қойыңызшы, апа, оныңыз не! - деп әкем шоршып тұсті.

- Сен алдымен сөз тыңдап ал, - деп әжем қатал әмір етті. - Тәуіп іздел таусылмай-ақ қой. Әзірше молданың да керегі жоқ. Онан да Момынқұл екеуің кезектесіп қасыма

келіп отырындар. Тәнірден иманымды тілеп мінәжат етіндер. - Аз ғана тыныс алып, әжем ойланып жатты да, сөзін жалғады. - Серкебайды шақырма, бәріне айқайлад әңгіртаяқ ойнатып жүрер. Ал егер өзі келіп қалса, Момынқұл көзіне түсіп көнілін бұза бермесін...

Әкем әлдене айтпақ боп оңтайланып еді, әжем тыңдаған жоқ.

- Бар-бар, енді айтқанымды орында, - деп сабырлы әрі қатал сөйледі.

Қыс кезі еді. Бәріміз үрейленіп аяғымыздың ұшынан басып жүрміз. Әкем мен көкем кезектесіп әжемнің қасында отырады. Бізді кіргізбей қойды. Әйелдер әжемнің киімдерін қағып-сілкіп, жуып-шайып әлек боп жатыр.

Үш күннің ішінде хабар алған екі қызы мен Убиан әпкем де жиналып еді. Сонда ғана әжем бәрімізді өзіне шақыртты. Біз кіргенде, әжем жастыққа сүйеніп әрең бас көтеріп отыр екен.

- Ал, шырақтарым, менің де аттанар сәтім жеткен сияқты,- деп барып деміп алды. Сөйтті де болмашы езу тартып, сөзін жалғады.

- Кәне, маған деген «жасау-жабдықтарынды» көрсетіндерші.

Мұны естігенде үлкен апамыз Пияш көзіне жас алып дауыс шығарып еді, әжем әмірлі үнмен тыйып таstadtы.

- Көз жасынды көрсетпе, былай!

Әкем қинала отырып, қолы қалтырап әжеме арналған бұйымдарды көрсете бастады. Содан соң әжем Момынқұл көкемді қасына отырғызды да, құран жолдарын дауыстаташып оқытып көрді.

Әжем тап қазір көз жұмады екен деп үрейленген бәріміздің де зәре-құтымыз қалған жоқ. Әсіресе қолына құран ұстаған көкем біртүрлі өзін-өзі игере алмай теңселіп кетті. Құран

бетін әзер ашып отыр. Сол күйі даусы бұзылып оқи бастап еді, әжем қолынан ұстап тоқтатты.

- Е-е, балам-ай, «бисмилла рахман рахимді» қайда тастанап кеттің. Қайтадан баста.

- Бисмилла рахман рахим. Агузибила имене шайтан ражим... - деп көкем даусы сүрініп қайта оқыды.

Әжем көзін жұмып, біртүрлі рахаттанғандай біраз тыңдал жатты. Соң соң бәрімізге тіл қатты.

- Ал, енді шырақтарым, барып демалындар. Тағы да өзім шақыртамын.

Біз екінші бөлмеге кеттік. Сәлден соң көкемді қалдырып әкем де шықты. Кенет үрейлі үн бәріміздің миымызға ине шаншығандай дегбірімізді алып жіберді.

- Апамның жайы нашарлап барады. Апам әлсіреп барады. Көкемнің осы дауысы бәрімізді төсектен жұлып-жұлып алды.

Әкем жүре киініп жүгіріп барады. Таң қылаң беріп келеді екен. Әлиман екеуміз әжемнің үйіне жақындағанымызда, шеткі көршіміз Аршабектің үйінен таңды ауаны қақ тілген әйелдің ашы даусы естілді. Оған зер салуға мұрша қайда, жүгіріп ішке кірдік. Әкем аурудың бас жағында дауыстап құран оқып, дем алып отыр екен.

Әжемнің көзі жұмұлы. Кірпігі болар-болмас қыбырлағандай. Көкем көзіне жас алып:

- Апа! Апатаң! - деп әлдене айтпақ еді, әкем зекіріп таstadtы.

- Дем салып болғанша тыныш отыр.

Осы сэтте әжемнің қеудесі сәл көтерілді де, аузын ашып, дем жұтқандай болды да сұлық түсті.

Әкем жасқа бұлығып:

- Хош бол, анашым! Ақ сүтінді кеше гөр!- деді де, әжемнің бетін ақ матамен бүркеді.

Көкем мен жеңешем көз жасына ерік беріп, бар зарымен дауыс салды. Айнабек келіп әкеме көңіл айтып, өзгелерден сабыр тіледі:

- Бұғін таңда тәңірім бір сүйікті құлын өзіне алып, біреуін бізге жіберіпті. Шүкіршілік етейік, - деді.

Біз сонда барып түсіндік. Әлгі ашы дауыс Айнабектің әйелінің толғақ үстіндегі үні екен. Жарық дүниеге жас нәресте - қыз келген екен. Кейін ол қызға әжемнің атын беріп, әжемнің қызы атанаип кетіп еді. Ауыл тегіс жиналышп қалды. Ауланың қары күреліп, онаша үйге әжемнің денесі

қойылды. Жиналған ағайын-туғандар құзетіп отырды.

Әр жақтан «Апам-ай!», «Апам-ай!» деп дауыс салып келген жақындарымыз мол еді.

Үйімізде қазан көтерілмей, келгендер көршілердің экелген тамағынан дәм татысты. Сүйекті үйде түнетіп шыққан соң, ертеңіне жаназа шығаруға қамданды. Ел өте көп жиналған екен. Ауыл-ауылға, ата-атаға арнап жыртылды. Осылайша менің ең

сүйікті әжеммен қоштасқан едік. Әжемді апта сайын еске алып, жұма күндері шырақ жағатынбыз, көкем құран түсіретін. «Үлкеннің өлімінің

арты той» деп әншейін көңіл жұбату үшін айтылатын сөз екен. Әжеміздің жоқтығы алғашқы құннен-ақ сезіліп, көпке дейін жетімсіреп жүрдік.

* * *

Әжемді, әсіресе, көкем көбірек сағынғандай еді. Үйді бір түрлі ауыр зіл менде алып еңсемізді көтертпей қойды. Бұрынғы ашық-жарқын әңгімеден тыйылып, үйіші құбірге көшкендей. Көкем болса шалқадан жатып алып, көкке телмірумен болады. Мен-зен құйден арыла алмай ауыр

курсінеді. Мұндай сәттерде оны әкем сейілткісі келіп әрі- бері жұмсап, тірлікке араластырғысы келеді. - Момынтай! - дейтін әкем баяу үнмен.

- Басыңды көтерші, шырағым. Сейілсеңші. Бар, малды жайғап қайта ғой.

Көкем үн-тұнсіз орнынан сүйретіліп тұрады да, ілби басып далаға шыға береді. Сыртқа шыққан соң қой-ешкіні суарып, шөп шашады да сонан кейін жүресінен отырып алып, бейжай қүйі ұала береді.

Әкем енді оны үйге шақырады.

- Тұр енді, ішке кір, шай ішейік.

Көкем тағы да үн-тұнсіз орнынан тұрып, әкемнің соңынан ілесе береді. Құннен-құнге қабағы қатып, кірпігі ілініп барады. Баяғы қуақы мінезі, содырлау қылығынан жүрнақ та қалмағандай. Бәріміз де қолбасшысынан айрылған жауынгердегі жалтақтаумен жүреміз. Әжем үйге кіріп келетіндей үнсіз күтінеміз. Біз әжемнің зілсіз айғайын, мейірбан тілегін, қатал мінезін, қайырымды жүрегін, адалдығы мен ақ батасын әбден ансадық. Әжем бардағы алаңсыз дәурен басымыздан кетіп, әрқайсымыз енді ғана тірлік қамын ойластырғандаймыз. Алайда, ешқайсысы да

әжем сияқты үййтқы болар міндеттен қаймыға ма, әйтеуір әлі біреуі де бел шешіп берік мінез көрсете алған жоқ. Тұс көргендегі аңтарылған сәтімізден әжем келіп құтқарап ма еді. Қайдан болсын ондай құн. Құн өткен сайын ардақты анна бізден алыстай берген екен.

Атамнан қалған ағаш төсекке енді әжем жата алмайды. Үйдің сол қанатында жилюлы қүйі тұр. Бұл төсек атам мен әжемнің көзіндей қымбат қой. Қараған сайын қамыға береміз. Тұнде сол төсектің баяу сықыры, әжемнің қақырынған үні естілгендей елеңдейтінді шығардық.

Сейітіп жүргенде әжемнің жетісі де, қырқы да өтіп кетіп еді. Ел жиылып, құран оқып, тиеберсін айтысқан.

Иә, қазекем жаңа келген нәрестеге жан-тәнімен қуана да білетін, қазаға қалың жүрт боп қайғыра да білетін халық қой, шіркін.

...Бұл кездे әкем алпысқа шығып қалған еді. Мен ЕС білгелі оның самайында ақ бар болатын. Алайда әжемнің тірісінде ешкім де әкемді жасы ұлғайған кәрия деп

елемейтін. Өйткені өле-өлгенше әжем әкемді «балапаным» деп өтті ғой. Әжем барда ол жайғана біздің үйдің үлкені

болатын. Енді ауылдың ақсақалдары қатарына қосылыпты. Сөзі де өситетке жақындал, бізге арғы-бергіден әңгіме айтып отыратынды шығарды.

- Біз үйміз, біз елміз, біз халықпаз. Адам туады, адам өледі. Ал халық ешқашан өлмек емес, қарастарым, - дейтін ол. - Бір анадан екі ұл, алты қызы қалыпты. Ал, немерелері, Аллаға шүкір барышылық қой. Бір еменнен отыз бір бұтақ жайыпты. Сендерден де ұрпақ тараپ, өніп-өсесіндер әлі.

Әкем өситетін осылай шүкіршілікпен аяқтаушы еді.

* * *

Көктемде біздің үй Кузьма Гончаров деген орыс мұжығымен ортақтасатын. Ол жириен сақал, қызылт қабақ, бет-аузын әжім басқан жүқалтаң шал еді. Өзінің бала-шағасы көп. Үлкен ұлын - Сашке, одан кейінгісін - Некоди, үшіншісін - Тишко, төртіншісін - Керилля және

менің құрдасымды - Босиль деп отыруши едік. Кемпірін - Мәтке, екі келінің Сәнке және Мәнке дейтінбіз.

Қазақтар кісінің мінез-құлқына, жүріс-тұрысына, сөзі мен өзіне қарай ат қойғыш халық қой. Қызыл Жагор, Григорийді - Жұғөрі, Дмитрийді - Метрей, Луканы - Илуке, темірші Иван, тілмаш Антон болып атала беретін.

Кузьмамен ортақтасудың өз шарты болатын: жер біздікі, тұқымдық дән тең ортақ, ал көлік күші олардан. Біз жақтан көктемгі егіс кезінде және жиын-терін уақытында көкем жүреді. Дәм-тұзымыз бірігіп, айран-сұтке, бар болса, таршылық жасамаушы ек.

Гончаровтар көктемде тайлы-тұяғымен түгел көшіп келетін. Екі арбаға жүгін, темір соқа, тырмасын арта жүреді. Әкем мен Кузьма шал қатар жүріп жерді өлшейді де, көп аландамай өндеуге кіріседі. Көкем соқа ұстап, атқа қамыт кигізуді үйренген соң, құлшынып жер жыртады.

Екі соқа тізбектесіп, қара жердің қыртысын толқындей тіліп бара жатады. Құйқалы қыртыс дөңбекшіп барып жалданып қалғанда, мен соқа соңынан қызықтап жүгіруші ем. Парлап жеккен төрт жириен ат соқаны қиналмай сүйретін. Біз Василий екеуміз атқа мініп тырма бастырамыз.

Гончаровтың кемпірі әртүрлі жапырақтан тәтті көже жасайтын. Бәріміз соған таңырқаушы едік.

Гончаровтың үй-іші, үрім-бұтағы жайлы кейінрек айтармын. Әзірше өзге жайға тоқтала тұрайын.

* * *

Қыстың бір сарынды қысқа күні мен созылған шұбалаң тұндері таусылып, көктем келді. Наурыз айы ерекше бір көрікпен, ерекше сәнімен, бар мейірбан мінезben өлкемізді жайната берді.

Шуақты күн молайып, шұғылалы сәттер елді қызықтырған кез. Жер бетіне тебіндеп шыққан шөп төнірекке жасыл кілемін жая бастады. Ағаштар бүршік атып, жапырағын жаймақ. Атам еккен жеміс ағаштарының да бұтақтары бадана бүршікке кенеліп тұр. Төніректің бәр бусанып, баяу балқып жатқандай. Тек Алатаудың мұз бүркеген шындары міз бақпай ызғар шашады. Аспанда тырна тізбегі көрініп, айналадан құс даусы естілген болады. Мал төлдеп, рахаты мол мазасыз сәттер көбейді.

...Бір күні қасқа сиыр бошалап, көкем бұзауын тартып алды. Үлбіреген танауына еппен үрледі де төселген сабанға жатқызды.

Үрпақ деген қандай тәтті еді, шіркін. Әлгінде қиналып жатқан сиыр орнынан тұрып, керемет қызғанышпен өз төліне төнді. Маңына жан адамды жолатар түрі жоқ. Жақындаған

кісіні мүйізімен жасқап қойып шаранасын жалай бастады. Бұжыр тілі бұзаудың тықыр жүнін жалаған сайын төлдің үсті кеүіп әлдене беретін сияқты. Енді ол мөлдір тамшыдай таза

жұмсақ тұқтаратымен жер тартып ұмтыла бастады. Осынау тірлікке келген соң, жұмыр жерді нық басқысы келгендей денесін әрен көтереді. Сидіған әлсіз аяқтары қалтырап, ұзак тұра алмай, қайтадан бүгіліп кетеді. Бұғау сабанға сауыры тиіп жатып қалады. Енесі болса, тұмсығымен сүйемелдеп бауырына икемдейді. Бұзау да алғашқы шарасыздыққа көнгісі келмей ұмтыла береді, ұмтыла береді.

Ақыры алғашқы қадамын да жасады. Енді ол тұмсығын әзер көтеріп, енесінің бауырына апара бастады. Уыз сұтке жетуге ұмтылады. Алайда ебедейсіз улken басын көтере алмай қайта сүрінеді. Тағы да ентөлей тұрып, емшек іздейді. Осы сәтте көкем жақындарды да, алакөзденіп қызғаныштан шатынап тұрган сиырды айқайымен жасқап, бұзауын теліді. Ана мен баланың табысқан сәтінен тәтті нәрсе жоқ екен ғой. Әлгінде ғана бізге мүйізін қадап, қызғаныштан тыным

таппай тыптырыған қасқа сиыр бұзаудың ерні желінге тиісімен біртүрлі рахатқа бөленіп, көзін жұмып тұра берді. Оқтын-оқтын мейіріммен мекіренген үнінен біз мал екеш малдың да қуанышын шын сезінгендей едік.

Бір қарасақ, қойнына қоңыр қозыны қысқан күйі жалаң аяқ, жалаң бас зыр жүгіріп Әлиман келеді екен. Мәз-мәйрам боп құліп келеді. Сонынан жанұшыра маңырап қара саулық қалар емес. Төліне ұмтылып, Әлиманның төнірегін шыр айналады.

Сонау беткейде әлі қыстық жүні түлей қоймаған жабағылар тасырандай ойнақтап, көктем қызығына өз үлесін қосып жүр.

Күні кеше еңсені басқан қыстың ауыр күндерінен белгі қалмағандай, бүкіл дүние ерекше шаттыққа еніп кеткен сияқты...

* * *

Жұрт көктемгі егіске қамдана бастады. Көкем балта-балғасы қолынан түспей сока-саймандарын жөндеумен жүр.

Әр үйдің алдында үлкен қара қазан асылып, наурыз көжениң исі шығады. Ырыс алды, кеңшілік басы, молшылық жолы осы наурыз көжеден басталатындей, бұл күні еш әйел қазанына таршылық жасаған емес. Қайда барсаң да қатығы мол бидай көжеге қарық боласын. Ел жана жылын - жарқын кезеңін осылайша ашық пейіл, ақжарқын көңілмен қарсы алады екен гой.

Онсыз да қонақжай халқымыз, әсіреле, наурыз күні қабақ шыткан емес. Қай үйге болсын қаймықпай кіріп, қалаулы қонағындей төрінен орын аласын. Ел топ-тобымен қыдырыстап, дастарқан үстінде ортақ тілектерін тоғыстырады.

- Аман-есен наурызға жеткізгеніне шүкір Алла. Көрер күніміз, есітер жырымызың бар екен де. Келесі наурызға да төрт көзіміз түгел жетейік,- десетін олар.

Келген қонақтар наурыз көжени салт бойынша түгелдей тауысып шығуы керек. Кейбір әзілкой әйелдер осындайда құрбы-құрдастарын аспен «жазалауға» тырысатын. Топ ішінде өзінің қалжындастып жүрген адамы болса, оған наурыз көжени үлкен шараға құйып әкеледі. Әрі салттан

аса алмай, әрі санадағы діни сенімінен қаша алмай, әлгі құрдасы азаптанып отырып шарадағы көжени әрен тауысар еді. Өзгелері құлкіге қарық болатын. Оның үстінеге дастарқан иесі құрбысына тілек айтқан боп әзілдейді.

- Іше ғой, көкжалым, іше ғой. Тілегімнің зор екенін көрдің ғой. Өзгелерден артық деп, жөнің бөлек деп, сыбағаңды асырып отырмын. Бақытың алдындағы шарадағы дәннің санынан да артық болсын, - деп құледі.

Әлгі жігіт аз дем алып қасыққа қайта үмтүлады.

- Ниетіңе рахмет, айналайыным. Бұл жақсылығынды ұмытпаспын, - деп булыға мінгірлейді.

Қасындағы кісілер онан сайын құлкіге мәз.

- Тезірек алсаншы, сұып қалады ғой. Бағың сұымасын десен, наурыз көжени ыстықтай ішер болар, - деп қоймайды әйел.

Жігіт көжени үнсіз үрттай береді, үрттай береді. Ол осылайша көжемен арпалысып отырғанда, өзгелері құлкілі әңгіме айтып, қызықты шежіре қозғап, ән салатын. Салтанат алды басталғанын сезіп, бала-шаға шексіз қуанушы ек.

Жазғытұры қалмайды қыстың сызы,

Масатыдай құлпыраң жердің жүзі.

Жан-жануар, адамзат анталаса,
Ата-анадай елжірер күннің көзі.
Жаздың көркі енеді жыл құсымен,
Жайрандасып жас күлер құрбысымен.
Көрден жана тұргандай кемпір мен шал,
Жалбаңдасар өзінің тұргысымен...
Түйе боздал, қой қоздап - қорада шу,
Көбелек пен құстар да сайдада ду-ду.
Гүл мен ағаш майысып қарағанда
Сыбдыр қағып бұландалап ағады су
Көл жағалап мамырлап қу менен қаз,
Жұмыртқа ізделеп, жүгіріп балалар мәз.
Ұшқыр атпен зырлатып тастағанда
Жарқ-жүрк етіп ілінер көк дауылпаз.
Құс қатарлап байлаған қанжығаға
Қызы бұрандалап жабысып, қылады наз.
Шіркін, Абай, көктем көркін, жаз алдының жарқын сәттерін сенен әрлі, сенен нәрлі етіп жырлай алған ақын бар ма екен, сірә!

Әкем көңілді кезінде бізге Абай жайлышты айтушы еді. Балаларым, сонау «жеті өзеннің» ар жағында, бізден алыс ауылда Тобықты руынан шыққан Абай деген кісі тұрады. Бүкіл елдің арын қорғаған ақылды азамат, оған қоса асқан ақын. Оның өлеңін ел біткен жаттап, әнін бүкіл дала шырқайды екен, - дейтін.

Сөйтсем ұлы Абайды өлді деуге қимайтын халқымыз өмір бойы өз орталарынан оған орын сайлап сөйлейді екен ғой.

Көкемнің сонау бір қызын жылдары ат айдаушы болып істеген бекеті Фрунзе-Ташкент жолының бойында еді. Жүрт оны «қара жол» деп атайдын. Өйткені ауыл сыртындағы қыратты қуалап жатқан жолға алыстан көз тастасаң, шексіз қара жолаққа үқсайтын. Мұның өзі егіндік жер мен шабындықтың шекарасы сияқты еді. Алатау жағына ел малын шығаратын да, еніс жерге егін еgetін.

Алатаудың әр қырқасы текшеленіп, көктемі де кезектесіп шығатын сияқты. Содан ба, ел қырқа қуып көшіп отыратын. Жеріміздің осындай құбылмалы мінезін Тоқмырза әзілге қосып отыратын.

- Алла Тағала жерді жаратқанда біздің аймақты ұмытып кеткен еken. Таңертең шаршап тұрса, бір аймақ үнірейіп бос қалыпты. Ашуланған тәнірі Гималайдың мұзды шыңын сындырып лақтыра салса, Алатау орнапты. Сөйтіп жан-жағына қараганша, әлгі мұз еріп селденіп, барады еken. Мұны көрген жаратушы түстік таулардың бірінен бөлшегін жұлып алыш, арқырап аға бастаған мың бұлақтың алдына тастай салыпты. Сөйтіп мына Қаратай орнаған дейді. Ал үлкен бөгетке ұшыраған су жинала-жинала, ақыры тікелей арна сала алмай теріс ағыпты. «Теріс» өзені солай пайда болса керек. Осылайша жеріміздің әр пүшпағы әртүрлі болып шыға келген еken. Бір жері жемісті, бір жері егісті, бір жері асқақ, бір жері тастақ, бір жері шыңды, бір жері құмды болатыны да содан деседі. Адамдары да алуан, аны да мол. Жанға керектің бәрі бар, - деп құлетін еді Тоқмырза ақсақал.

* * *

Бір болыс елдің ортасындағы жапандығы жалғыз кірпіш үй - Бекет станциясы. Қызыл кірпішті үй алыстан мен мұндалап, оқшау дараланып, үлкен жиындар сол жерге шақырылушы еді. Ауыл адамдары әр тұстан андыздан кеп, аймақтағы осынау тұрқы тұзу үйге көп бас қосатын.

Аттылы-жаяулы келіп жатқаны. Жұздеген ат бас түйістіріп, байлаулы тұрады мұндайда.

Бүгін де ел осылай бет алды. Бұл бас қосу Садық Аблановтың келу құрметіне арналған еді. Садық бұл жолы Бірінші Май күні келді.

Аблановтар үш ағайынды болатын. Үлкені Ізбасар жұртқа жұғымы жок, жүгенсіз, данғой, дарақы біреу еді. Үездегі орнына ісіп-кеуіп өзінен-өзі тасып жүретін. Бір өзі бүтін дүниені тіреп тұрғандай екі иінінен дем алыш, екіленіп кететін. Алдына келгенін ала көзімен атып, қоқыланып

бітуші еді. Жұрт осысын жек көріп, жұғыса қоймайтын. Ел ішінде сыйы да шамалы кісі еді. Сонысынан тапты ма, әйтеуір қызметінде көп тұра алмапты. Мұны есіткен жұрт аяудың орнына «өз сазайын тартқан еken» дейтін.

Ал Садық Аблановты ауыл адамдары ізетпен қарсы алыш ілтипат көрсететін. Адал, ақпейіл, турашыл, жұрт қамын ойлайтын естияр жігіт деп мақтаушы еді оны.

Ізбасардан жұрт қорқатын. Бірақ сыйламайтын, Садықты іш тартып құрметтейтін. Ағайынды екеуіне деген ара-қатынасын ел ерекше жіліктеп, жіктеп айтушы еді. Ізбасар Абланов, Садық Абланов деп арнайы аттарымен ажырататын.

Ізбасар елге даурығып, әбігер салып келетін. Жиналысқа да ол өзінің арнаулы адамдарынан басқаны қатыстырмайтын. Қатысқандардың кейбір жақпагандарын аузына келгенін

айтып балағаттап, ел көзінше абыройын төгіп, қарсылық білдіргендерді қара тізімге жазып, «Сібірге айдатам» деп, сары сүн сыртына шығарады еken. Ауылға қабағы түсіп, қажып, қалжырап қайтатын ондайлар. Ізбасар кетісімен, әркім оның ожар қимылын, орынсыз дөрекілігін салып,

ашық күлкіге айналдыратын.

Ізбасар әскери коммунизм кезеңінің томырық, топас, солақай, ұр да жық, көкірекқақпай жүгенсіздерінің жиынтық бейнесіндегі халық аузында қалып қойып еді.

Садық өткізген жиын, керісінше, салтанатқа ұқсайтын. Адамдар көп жиналып, ақыл-кенес құткендей ынтыға түсетін. Онымен кездесу үшін, дидарласып сөзін тыңдау үшін ақсақалдар тұрмак, бала-шағаның өзі, тіптен қатын-қалаштар да асығатын. Жүргт Садықты абыройлы етіп, ел

алдында ажарлы көрсететін оның қарапайымдылығы мен іштартымдылығы десетін.

Жаймашуақ жадыраған күн еді. Бұдан бұрын Бекетке Садықтың келетіні хабарланған болатын. Ол: «Тыңдаймын деген кісілер келсін, бас қосып әнгімелесейік», - депті. «Ақсақалдармен, ағайын-тұғандармен, қарындастармен бас қосып, сыр шертісу - үлкен ғанибет қой», - депті.

Әкем мен ағайым мені де бірге ертпек болды. Мен апыл-ғұптыл киініп, ағамның артына мінгестім. Жол бойы біз бір топ салт аттыларды қуып жеттік. Олардын ортасында ауыздықпен алысқан «Көкшолағының» тізгінің тарта Аққұл ақсақал да келеді екен. «Көкшолақ» - сәйгүліктің ішіндегі мақтаулысы еді. Ал Аққұл атам болса, кәнігі саяткер шабандоз. Аққұл әдсттегі әуенімен байсал ғана амандасты.

- Саумысың, Момыш?

- Аманбысың, Аққұл.

- Садықты тыңдауға барасың ба?

- Иә, Аққұл.

Ағамның атына мінгескен мені байқаған Аққұл таңырқай үн қатты.

- Уә, жігітім... Саған жол болсын?

Абыржып қалғанымды байқаған ағайым ер үстінде бір қомданып алып, мен үшін жауап берді:

- Садық ағасың тыңдауға барамыз, Ақа!

- Иә, - деді шал даусын созып,-жақсы лебіз тыңдасаң, жарым ырыс деген ғой!
Сен де тыңда, балам, сен де тыңда, - деді.

Осы кезде жолаушылардың арасындағы бір жас жігіт аты арықтан қарғи бергенде, ер үстінен қопаң етіп, ауытқып барып түзелді. Мұны байқап қалған Аққұл ашумен дүрсө қоя беріп еді:

- Көлік қадірін білмейті неме екенсің ғой. Атты аясаншы. Бұл сенің тербетілер желбесігің емес. Ат ырғығанда, кісі шалқайып отыра ма екен. Мұндайда сен сияқты қопалдардың салмағынан аттың бел омыртқасы үзіліп кетсе қайтер ең?

- Абайламай қалған ғой, Аққұл-ау! - деді әкем әлгі жігітке ара түсіп.

- Қойшы ондайды, Момыш! Құдай үшін қоя тұршы! Ат мінген адам өзі түгіл, көлігіне де көлденең кесір жолатпауы тиіс! - деді Аққұл. Әлгі жігітке тағы бір ашулы қабақпен қарап, ендігі сөзін соған арнағандай болды.

- Бұғінгі жастар не боп барады осы, Момыш. Қапшық сияқты бірдеме әйтеуір. Ат үстінен ауып қалардай ебедейсіз боп барады ғой. Бишара аттар сондай құмға толған ауыр

қапшық сияқтыларды арқалап қор болды-ау.

Осылайша Аққұл ақсақал Бекетке жеткенше ешкімге сөз бермей, атқа мығым отырудың әдіс-тәсілдерін айтумен болды. Барлығы да оны ат үстінде ұйып тыңдал келеді.

Астындағы жүйріктерін бірыңғай бүлкілге салып, ақсақалдан енді қайтып кекесін ескертпе есітпейін деп жіті отыр.

Мен үйден шығысымен-ақ көңілсіз күйге түсіп едім. Ағайым өзіме жеке ат ерттеуге рұқсат етпеді. Енді, міне, ат құйымшағында отырып, оның қақпактай жауырына ызалана қарап келем. Алайда Аққұл атамның әлгі сөзі аздап жуасытқандай болды мені.

Біз Бекетке де келіп жеттік. Станция маңын топ-топ етіп айқастырып қойған аттар жайлап алыпты. Жұрт тәбешікке жиналып, шекпендерінің етегін төсей беріп, жамбастап жайғасып жатыр. Ел мол жиналыпты: ақсақалды қарттар, егде кісілер, жігіттер мен бозбалалар да жұр. Бір шетте жақын ауылдан келген әйелдер тобы көрінеді.

Бәрі де тағатсыз күйге түсіп, станция жаққа қарайлай береді.

- Әне келе жатыр, әне келе жатыр, - деп күбірлесе бастады жиналғандар.

Қасында почта бастығы мен болыстық басқарманың бір топ жігіті бар орта бойлы, сұр шекпеннің өнірі ашық күйде, жалаңбас бір кісі келеді еken. Бәріміз де бар ықыласымызбен тесіле қарап қалыптыз.

Ол қасындағылардың біреуімен сөйлесіп, байсал басып келе жатыр. Жұқа өні қаны қашып сартаптау болған, мандайы керекарыс кісі еken. Қабағы аздап домбыққан, жанары жабырқау, сиректеу жібек мұртты кісі топ ортасына келіп те қалды.

Ол тәбешікке шықкан сон, төрдегі ақсақалдардың қолын жағалай алып шықты. Қалған топпен қолын кеудесіне қойып, бас иіп ізетпен сәлемдесті.

- Армысыздар, ардақты қауым, - деді ол аздаған қарлыққан дауыспен. - Аман-есенсіздер ме, қадірмен қариялар. Дендеріңіз сау ма? Тұған-туыстарыңыз, малжандарыңыз аман ба? Ол осылайша алдымен ақсақалдарға амандасты.

- Рақмет, қарағым Садық. Өзің де аман-есенсің бе?

- Денің сау ма, Садықжан?

- Балаларың өсіп жатыр ма, қарағым, - деп шалдар шетінен саулық сұрасып жатыр.

- Рақмет, - деді Садық ақ тістерін көрсете жымыш. - Әзірше аман-есенбіз... Ақа, «Көкшолағыңыз» бабында ма? - деп енді ол Аққұлға бұрылды. Ол Аққұлды бұрыннан

біледі екен.

- Сенің лау мінгіш милицияларыңнан қайда жасырарымды білмей жүрмін ғой, - деп шымши сөйлемді Аққұл.

Жұрт ду күліп жатыр. Садық Абланов елжірей күлгендей болды.

- Сіздің «Көкшолағыңызға» ешкім тимейтін болсын, Ақа. Мен солай деп айтты деңіз.

Ол байсалды жауап берді.

- Мың жаса, шырағым Садық... Әйтпесе балтап мінуді білместен, жатқан бір, орыс арбасы мен біздің аттарымыздың соры болды кейбір милицияларың. Өрт шыққандай шапқылап, аттардың сілікпесін шығарушы еді...

- Садық өз шешімін айтпады ма, - деп Аққұлдың сөзін әкем бөліп жіберді.

- Енді өзін тындастық.

Аққұл әкеме ала көзімен қарап, еріксіз жым болды. Садық Аққұлдан кешірім сұрағандай сәл илді де, төбенің басына көтерілді. Айналасын жайлап шолып алды да, еркін көсіле

сөйлей жөнелді.

- Қадірлі ақсақалдар, сіздерден рұқсат болса, бір-екі ауыз сөз бастайын, - деді ол қарттарға қарай.

- Айта бер, Садық, айта бер!- деді қарттар бір дауыспен.

- Қадірменді қарттар, менің құрбы-құрдастарым, жас жігіттер, сендер де, боз балалар, сендер де, құрметті әйелдер, сіздер де, - деді ол баршага сөзін арнап. - Бүгін бізде көктем күні, жер бетіне қуаныш нұрын төккен күні. Бұл көктем кімді қуантпайды? Кімді тебірентпейді? Шуақты күн жерімізге нұрын төгіп, бойымызды жадыратады. Дәл осындағы табиғат түрленіп, құлпыра бастайтын көктемнің күнінде, бұдан отыз бес жыл бұрын жұмысшылар мен жер

бетінің еңбеккерлері бұл күнді еңбектің, бостандықтың, достық пен туысқандықтың мерекесі деп әлемге әйгіледі...

Әңгімесін осылай бастаған Садық Бірінші Май мерекесінің мәні мен мақсатын, оның шаттығы мен шалқыған шабытын, еліміздегі жағдай мен жер бетіндегі басқа елдер халқының Май мейрамын қалай қарсы алатынын қарапайым қазақтың жалпақ тілімен жиналғандарға баяндал берді. Ұлы көсемнің ұлылығын, Ленинді неліктен данышпан дайтінімізді де ұғындырды, жиналғандардың жүргегіне үялата білді, халықтар достығы мен

туысқандығы жайлышты төбірене толғап, революцияның қазақ даласына әкелген шарапаты мен шапағатын айтты.

Жұрт сілтідей тынып, үнсіз бас шүлғып қалыпты. Садық олардың бәрін жылы лебізben ұйытып тербете түсетін сияқты...

- Бақытты деп ерікті адамды ғана айтамыз! Біздің бар халқымызға большевиктердің тілейтіні осы бақыт, осы еркіндік, - деді ол сөз сонында. Өз сөзін аяқтағанда ұйып отырған жұрт дүр сілкінгендей лездे гулеп кетті.

- Дұрыс айттың, Садықжан!

- Мерекеге мерейлі мезгілді таңдаған екен!

- Ақылды шешім!

Садық жұртты тағы бір шолып өтті.

- Мен сіздерге үлкен жұмыспен келіп едім. Оны кейін айтартмын. Ал бүгін Бірінші Майды мейрамдайық.

- Көкпар тартамыз! - деп дауыстап қалды Аққұл.

- Көкпар! Көкпар, - деп даурықты жастар жағы.

Садық жадырай күлді де, қолын сермеді. Не дер екен дегендей ел жым болды.

- Көкпар десеніздер, қалауларыңыз болсын, - деп кесіп айтты Садық. Қайтадан жадырап күлді.

«Көкпар» деген жалғыз сөз топ ішін кезіп, әркімді елеңдетіп бітіп еді. Садықтың алдында жұрттың бәрі әдеп сақтап жүр. Тіптен кейбір содырлау милиционерлердің өздері де, қыныр сөзге

қылыштай өткір «ат өнерінің ерен жүйрігі» Аққұлдың өзі де бір сүйем шөгіп кеткендей өздерін шектен шығармай, әдеп сақтап жүр.

Көкпарға жиналғандар қарақұрым бол қаптап жүр. Ел мұны мереке құрметіне Май көкпары деп атап еді.

Кой бастаған серкедей Аққұл елден ерекше көрінеді. Оның осынау тұлғасы мен тұрқы ойынды дәстүр шенберінен шығармауға мойыннататын еді.

Дүркіреген ат шоғыры құйынша құйғытып тақтайдай тегіс жердің бұйра шаңын көтеріп, көкпарды ортаға ала жөнелді.

Аққұлдан басқа қарттар Садықты қоршап, әрі көрермен, әрі төреші болғандай тамашалап тұр. Олардың ортасында менің әкем де бар. - Біздер, большевиктер, әркімнің көңілі

шат, өмірі дарқан, қуанышты болуын қалаймыз. Жер бетінде жаман халық жоқ, сол халықтың кейбір жаман адамдары болуы мүмкін. Бірақ ондайлар ұлы теңіздің ұсақ

тамшысындай-ақ. Халық деген қадірмен қауым, әлуетті қауым, әулие қауым. Біздің әрқайсымыз өлімнен қашып құтыла

алмаймыз. Ал халық мәңгі жасамақ... Біздер, большевиктер сол жасампаз халықтың даналығына сенеміз.

«Жастығымда еңбек бер, картайғанда дәulet бер» деген сөз бар. Сол айтқандай, жастарымыз еңбек пен тұрмыста жандары өссін. Ал қарттарымыз ақ сақалды, сары тісті жасқа толып, дәulet рахатын көрсін. Эркім өз еңбегінің өз ісінің жемісін көріп, эркім аты мен абыронына лайық жас үрпақты тәрбиелеп өсірсе дейміз. Өз қауымының, өз ауылының, өз елінің, өз жерінің мақтаны болатын жеткіншек тәрбиесеңіздер еken дейміз. Біз ұл-қыздарымыз бен немерелеріміз өздерінің әкелері мен бабаларының әлуетті ісіне, олардың қүресі мен табысына, салып берген жолына мақтанса, соларға еліктеп өссе дейміз. Ал ата-аналарымыз сондай салауат иесі боп өсіп келе жатқан ұл-қыздарына сүйсінсе дейміз. Өздерінің жақсы ісін, жарқын дәстүрін, саналы салтын ту етіп ұстап, тұзу жолмен келе жатқан мұрагерлеріне мақтанса дейміз. Біздің үрпақ адамзаттың

ізгілігі мен инабаттылығын, олардың әділдігін бағалай беретін байыпты азamat болса дейміз! Сондықтан да біз достық пен тендіктің, туысқандықтың туын көтереміз! Адамзаттың адал еңбегін бағалай білейік!..

Біздің жауларымыз осындағы адал ниетімізді көре алмай өсек өрбітіп, қиянат қылышын жаландатады. Біздерге, адамның бақытына балта шабушы деп жала жабады. Өкінішке орай, біздің арамызда да осындағы өсекке елігіп, жалаға алданып, жау қиянатына бас шүлғитын, санағы жетпегендер кездеседі. Ондайлар тұзу жолдың көшіне, Ленин салған тұра жолдың даңғылына, оның жолаушыларына оралғы, кедергі болады. Қисық арба қыңыр тартады дегендей, тең басқан аяғымызға байлау болады. Біз осыдан сақтанып, ондай адасқандарды ақиқат алаңына апаруға көмектесейік. Жоқ! Біз әр халықтың игі салты, жақсы дәстүрі, ел мақтаны болатын елеулі ғұрпы гүлдене берсін дейміз.

Садық бұл әңгімелерді көкпарға көз алмай қызыға қарап тұрып, қарттарға жайғана айтып беріп еді. Енді мен әкемнің атына мінгескен болатынмын. Өйткені ағайым көкпар десе арқасы қозып, жұлқынып шыға келетін. Бұл жолы да түрленіп, желігіп алды. Ауылдан шығардағы өкпем әлі тарқар емес. Жеке ат мінбей, біреудің желкесіне үніліп отырғаным жаныма батады. Дегенмен қарттармен бірге Садық тобында болып, олардың әңгімесін есіткеніме қуанып отырмын.

Кенет тастүйіндей шоғырланған көкпаршылар додасын бұзып өтіп, біреу суырылып шыға берді. Кім екенін аңғарып ұлгергенше, әлгі шабандоз көрермен топ алдына құйындана келіп қалып еді. Аққұл атам көкпарды Садықтың алдына лақтырып тастады.

- Мә, Садық, саған салғаным,-деді де лақты Садықтың алдына тастап, «Көкшолағын» кенет бұрып, ойқастата шауып, қайта оралып келіп тізгінді ірке қалғанда, әлі қызу екпінін баса алмаған «Көкшолақ» серіппеше шиыршақ атып, танауы делдиіп, бір орнында тағат таппай аспанға

ыршыды. Аққұлды өкшелеп қуған шабандоздар тобы көкпар Абылановтың алдына тасталғанда, тұмсықты жартасқа соғылған толқындей қақ жарылып екіге бөлінді.

Мен өзімнің жастығыма өкініп, осынау құрыш білек жігіттерге қызыға, қызғана көз тастаймын. Солардай болып, осылармен бірге додада ат белін талдырып жүрсем деп ойлаймын.

- Ақа, сіз көкпардың көркісіз ғой, - деді Садық Аққұл атама бұрылып. - Мен сіздің өнерініздің ел аузында аңызға айналып, өзініздің жасқа жендіріп қатардан қалып қойғаныңызды қаламас ем.

- Ә, мен әзірше қарттыққа бой беретін жайым жоқ. Асықтырма, шырағым Садық, - деді Аққұл өкпелегендей үнмен. - Жо-жоқ, мені шеттетуге асықпа!

- Қазақтың салты бойынша көкпарды шабандоз қызы бар үйге салады. Сол үйдің қызы кестелі орамал алып шығып беруші еді. Сіз, Ақа, жігітті үйге салып отырсыз. Кестелі орамалдың орнына мынаны бүгінгі ұлы мейрамның туындей көрініз, - деп қойын қалтасынан қызыл жалауша ұсынды.

- Мынау сізге, ең шабандоз жігітке! Бірінші Май бәйгесі болсын!

Аққұлдың жүзі құбылып, толқып кетті білем. Ат тізгінін тарта Аққұл ер үстінен бір қарыс көтеріліп, ізет көрсетті де, әлгі сыйлықты Садықтың қолынан алды. «Көкшолақ» иесінің алған сыйына қол соққандай аяғымен жер тарпып тұр.

- Ал енді, бізбен бірге болыңыз, - деп өтінді Садық.

- Ендігі көкпар қызығын жастар тамашалай берсін.

Аққұл Садықтың қасына келіп тұрды. Көкпар аяқталғанша осы топта болды. Көкпар ымырт жабылғанша созылды. Садық құйынша құйқылжыған шабандоз жігіттердің қимылынан көз айырап емес. Оның бар ынта-ықыласы осы көкпарға ауып, өзге дүниені ұмытқан сияқты. Алайда,

төңірегіндегі кіслердің сұрақтарына сабырлы жауап беріп, ойлы пікірлер айтқанына қарағанда, ол ел қамын ұмытпай, ауыл ақсақалдарының да көнілін жықпасам деп толқып тұрған сияқты.

- Момеке! - деді ол менің әкеме. - Қонақасы беруге қалайсыз.

- Үлеспеген еншіміз, Садықжан. Сендей шақырса да келмейтін кіслер менің үйіме қонақ болуы - мен үшін ұлken абырой, - деді әкем.

Барлық жұрт біздің жаққа қызыға, қызғана көз тастаған сияқты. Мұны көріп мен өзімнің атқа мінгесіп жүргенімді де ұмытып кетіппін. Мен Садықтың біздің үйді таңдағанына мақтанып отырмын.

Әкем ағайымды шақырып белгі беріп еді, анау аққебік болған атын ойнатып жетіп келді. Тер мен шаңнан қүренденіп кеткен жириенін ол кілт тоқтатып тұра қалды.

- Садық біздің үйдің қонағы болады, - деді әкем ағама қарап.

Әкемнің соңғы сөзін естір-естімeste ағам атын кілт бұрды да, ауылға қарай құйында жөнелді.

Бұл кезде көкпар да біткен еді.

- Сіздер де Садықпен бір болып, дәм-тұзбен ортақтасыңыздар,- деді әкем жүртқа.

- Қойыңыз, Момеке, жүрттың бәрін шақырып, әбігерленіп қайтесіз, - дей берген Садықтың сөзін әкем аяқтатпады.

- Құдайға шүкір, Бақтияр әuletі az емеспіз. Мал-мұлкіміз, қазан-ошағымыз бөлініп көрген емес. Қанша қонақ болса да, көтерер шамамыз бар.

Шынында да, Бақтияр әuletі bіраз едік. Жетпіс жаны бар он төрт отау болатын. Садық Абланов пен оның жанындағы жиырма шақты жолдастарын күтіп алу ешбір қыындыққа

түспейтінін мен де сезіп тұрмын.

Садық ортада келеді. Екі жағында ентелеген аттылы кісілер қоршап алышты. Садықтың әр лебізіне құлақ тосып, құныға тындейдьы.

Күн Құлан тауының тасасына тығылып, айналаны інір қараңғысы түмшалап алыш еді. Мен күні бойы ат соңында мінгесіп жүргендіктен бе, шаршағанымды әрең жеңіп келемін. Ат жайлы жүрістен ауып, шоқыраққа басқанда, жауыр болғанымды анғардым.

Осынау тымық кеште ауыл ошақтарынан шыққан тұтін қаздай қалқып аспанға өрлеп барады. Қораларға жайылымнан қайтқан малдар да жайғасып үлгерген екен.

Алыста үйірін шыр айналып, жалын жалбыратып боз айғыр жүр. Ауыл жақтан тәтті астың исі келіп, танауды қытықтайдьы. Балқыған бауырсақ, үлкен қазандағы былқығат ет иісі сияқты. Самауырдың қошқыл тұтіні де тік көтеріліп, соның арасынан үшқындар жылтылдайды.

Қонақты қарсы алуға шыққан ауылдың ер кісілері үй сыртында топ-топ болып байсалды тұр. Әйелдер үй арасында жүгіріп, абыржып жүр.

Қонақтар жақындаған бергенде, ауыл адамдары лап қойды. Әрқайсысы ат тізгінің ұстап, қонақтарды қолтығынан сүйеп түсіріп жатыр. Енді бірі аттарды жетектеп кетіп жатыр. Күні бойы ер үстінде отырып, езіліп қалған сандарын жазу үшін кейбіреулер аяқтарын әрең басып, ары-бері жүр.

- Қош келіпсің, Садықжан, менің тұңлігім осы болады, - деп әкем қонақты үйге қарай бастады.

- Шаңырағыныңдан шаттық кетпесін, Момеке, - деді Садық ақсақалдарға жол беріп тұрып.

Алдына бес-алты ақсақалды салып, Садықтың өзі де босағадан аттады.

Оның қазақ даласында қалыптасқан ежелгі әдет-ғұрыпты ізетпен сақтағаны жиналған жүртқа ерекше әсер етіп еді. Енді бәрі де оны бауыр тартып, жаңына жақын тұтып алды.

Қалған конақтарды да үйді-үйге жайғастырды. Мен де елдің соңын ала өз үйіме жүгіріп кіріп, босағада анырып тұрып қаппын: карасам үй іші танымастай өзгеріп, жайнап кетіпті. Басқа үйге кіргендей танымай да қалдым. Ағайым маған көзін алартып:

- Эй, Бауыржан, үлкен үйге бар! - деп қақпайлай берді.

- Бұл сіздің мұрагеріңіз бе, Момеке! - деді Садық, маған жымия көз тастап.

- Иә, менің ұлым, Садықжан, - деді әкем.

- Бізben бірге отыра берсін, - деді Садық жылы жұзбен ағайға тіл қатып. - Бұл жігітті ортамыздан қуып жібергеніміз жараспас. Оның үстіне күні бойы қасымызда жүрмеді ме?

Осылайша Садық мені ағамның қақпанынан қорғап қалды.

Мен үйді енді жақсылап көре бастадым. Құлпырган жасау көз жауын алды. Еденге көл-көсір етіп кілем төселипті. Кілем үстінде жалт-жұлт еткен шәйі көрпелер жайылған. Жағалай жастық қойылыпты. Жарқырауық шыныаяқтар бір қанаттан орын алған екен. Киіз үйдің ортасында аспалы шам нұрын төгеді. Жап-жарық. Мен әр кілемнің нақышынан, әр заттың белгісінен қайсысының қай үйден келгенін байқап отырмын.

Намысқой ағайым бар ауылдың іліп аларын осында жинап әкеліп, үй ішін жайнатып тастаған екен. Мына жасау біздің үйді ең тұрмыстылар қатарына қосқан сияқты. Ауылдың ауызға алар бакуаттысы болып шыға келген түріміз бар.

Қонақтар көсіліп-көсіліп жайғасып жатыр. Мақтаншақ ағайым өзінің бүгінгі тірлігіне мәз болып, әкем жақтан құптау белгісін көргісі келгендей жалтақтап қояды.

Ол ауыл жігіттерінің бәрін кісі күтуге ұйымдастырған екен. Алдымен біреуі қонақтың қолдарына су құйды; екіншісі дастарқан жайып жатыр; біреуі бауырсақ төксес, енді бірі торсықты әкелді. Тағы бірі қымыз құйған кеселерді таратып тұр. Әр жігіт өз қызметін мұлтікіз атқарып, болғандары аяғының ұшымен басып, үнсіз шығып жатыр.

Қонақтар алдымен қымыз ішіп сусындал алды. Қымыз үстінде бүгінгі Май мерекесі жайлы, қызықты көкпар жайлы әңгіме шертісті.

Садық Абланов өзінің ескертпелерін айта отырып, соңғы сөзін бас төреші Аққұлға берді. Аққұлдың төбесі көкке жеткендей маңғазданып алды.

Аққұл қарттың алдында менің ағам сөзге ретсіз араласып, бір-екі ескертпесін айтып еді, әкем ала көзімен ата қарады. Мұны көрген ағайым сыртқа шыға жөнелді. Біраздан кейін ол ақ қой жетектеп келіп, ақсақалдардың алдында бата сұрады.

- Аумин!

Карттар тіксіне қалып, большевик Садыққа қысыла көз тастады. Абыржып қалған сияқты. Өйткені бұрын келген қонақтар батаны діни әдеп деп, ескінің қалдығы деп рұқсат етпейтін.

Мұны сезген Садық мұртынан күліп, алақанын жайды:

- Ақа, сіздің жолыңыз үлкен ғой. Қонақжай үйге қол жайып, жақсы тілегіңізді беріңіз. Бәріміз де естиік, - деді.

Аққұл бір сәтке ойланып қалып еді, бірақ абыржымай алақанын жайды да әндете жөнелді.

- О, жаратқан ием! Алдымен атыңды атап жалбарынам. Бүгінгідей ашық күн жайнай берсін көгімде. Осы күннің астында гүлдей берсін елім де! Жүрсін лайым әмісе бақыт қана серік боп, тұрсын лайым әмісе қуаныш көрік боп! Ұлы өмірдің өзіндегі жайнай берсін жасымыз; енді қайғы көрмесін ақ қыраулы басымыз! Жаңа Садық айтқандай, (Садық қызырып кетті) барлық халық тең болсын; бір-бірімен қауышқан дос-туысқан ел болсын! Арандатқан адамды қасқунемдер жойылысын; мал-басымыз мол болып, ел ырысқа тойынсын! Күніміз ұлысты болсын; жеріміз ырысты болсын! Өрісіміз малға бай дүбірлі болсын; келіндеріміз жанға бай үбірлі-шұбірлі болсын! Ер жігіттің ту етер ар- тұрағы болсын; қанат беріп тулетер арғымағы болсын!..

Аққұл атам осылай ұзақ шұбыртып, батасының аяғын қалай аяқтарын білмей қысылыңқырап та қалды. Тап осы жерде жүрт та ду күліп жіберді де, Аққұл келте қайырып, «құдай қабыл қылсын!» деп сақалын сипады.

Қойды қайта алып кетті. Аққұлдың діни әдеттерді ұстамайтынын жүрттың бәрі де білетін. Сондықтан да оның батасы әдеттегіден тыс ерекше еді. Садық Аққұлды көтермелеп, күлкісін тыя алмай қоштау сөз айтты:

- Жақсы айттыңыз, Ақа! Ізгі тілектің бәрін білдірдіңіз-ау. Халыққа коммунистердің тілейтіні де осындай жақсылық қой.

- Сіздің осындай ақынжанды адам екеніңізге сеніп едік, Ақа, - деді біреу қалжындан.

- Ақындықтың рухы етек астында емес, ер үстінде болады, - деді Аққұл әлгі кісіге. Шамасы оның әйелжанды адам екенін білетін болса керек. Бәрі ду күлді.

- Әйтсе де біздің Ақаң тек ақынжанды адам ғана емес, саясатшы да ғой, - деді Садық. Сөйтті де сөз арасында:

- Біздің саясатымыздың, өзі де халқымыздың қашаннан жинақтаған ізгі тілектері ғой. Туысқандық пен достық бір-бірін құрметтеуден артық не бар. Мәселен орыс халқын алайықшы. Қарапайым шаруа таңыңың атысынан күннің батысына дейін егін даласында еңбек етеді немесе біздің өлкемізде өз қолымен теміржол салған жұмысшыны алайық. Олар да біз сияқты адамдар. Олар үшін ешкім де еңбек етпейді. Өздерінің тамағын адал енбегімен тауып жейді.

- Сөзің рас, Садықжан, орыстар еңбекті сүйетін және еңбек ете білетін халық қой...

- Садықтың сөзін бөлмесендерші.

- Міне, сол орыс халқы - тамаша ғой. Олар біздің ағамыз сияқты. Қазаққа қысым көрсеткендеге келсек, олар патша шонжарлары болатын. Енді жағдай мұлдем өзгеше: сол орыс халқының өздері патшаны тағынан жұлып түсірді.

- Демек, Ленин турашыл, қамқор жан екен ғой.

- Иә, - деді Садық, - біздің Ленин нағыз қамқоршымыз.

- Не, сонда Ленин патшаның орнына отыра ма? Бұрын Николай еді, енді Ленин бола ма? - деді әлдебіреу істің мәніне шын түсінбей ақырып.

Садық құлімсіреп отырып жауап берді:

- Біздің Ленин патша емес, көсем ғой. Ол жаны таза адамдардың ішіндегі ең ақылдысы.

- Енді мынаны айтшы, Садықжан. Сенің Ізбасар ағаң ауылға келсе, «Алла деген жоқ нәрсе», «сендер қараңғы халықсыңдар» деп тұқыртып бітеді ғой. Үйге түскенде мал сойып, бата сұрасаң, қолын бір-ақ сілтеп, «қайран қараңғылық-ай, апарындар да соя беріндер қойларынды» дейді. Патшаны патша дейік (патша көп қой), тақты тақ дейік. Аллаға тіл тигізіп несі бар. Ұжданымызға тиіп несі бар? Салтымызды неге бұзады...

- Не деп тантып отырсың, ей, сен. Ізбасар Садықтың туған ағасы емес пе, - деп Аққұл әлгі адамға ақырып қалды.

Садық жадырай құліп, оң қолын көтерді де, әлгі аузы батыр адамды Аққұлдың қаһарынан қорғағандай сөйлемді:

- О не дегеніңіз, о не дегеніңіз, Ақа! Әділ сөзді қақпайлағаныңыз қалай?

- Ленин дінге сенер ме екен, әлде жоқ па? - деді әлгі батыл кісі.

- Мен өзім Ленинді көргенім жоқ. Ал Ленинді менен жақсы білетіндер көсеміміз әділ де, турашыл адам дейді. Дінді қайдам, халыққа әбден сенетін кісі. Сондықтан да қалың ел соынан ерді емес пе.

Садық аздап езу тартты да сөзін жалғастырды: - Ал өз ағам туралы не айтамын, ол менен үлкен кісі. Алайда Ізбасардың теріс мінезі сыналып, қызметінен босатылғанын да білесіздер ғой...

Қолайсыз тыныштықты Аққұл бұзды.

- Жарайсың, азаматым! Әділдік азамат көркі дегендей ашығын айттың-ау, Садық. Халқымызға Ленин сенсе болғаны. Ең негізгісі осы ғой.

- Халқымызға Ленин сеніп еді, сол сенімін халқымыз да ақтады, - деді әлгі батыл кісі.

Бұл әзілқой, қалжынбас, тілі өткір, көңілді Тоқмырза деген қарт еді. Боза ішкендердің тұрақты төрағасы, жиын-тойдың сәнін кіргізіп отыратын жалғыз атты кедей болатын...

- Дұрыс айтасыз, Тоқа. Біз енді өмірді қалай жақсартамыз, қалай тұрмысымызды түрлендіреміз? Ол үшін не істеуіміз керек? Мен сіздермен осы жайлыштың ақылдақалы келіп отырмын.

- Айта бер, Садық.

- Біз саған қандай ақылшы болар екенбіз...

- Өздеріңізден артық ақылшы жоқ. Біз бүгін сіздердің ақылдарының ізбен Бірінші Майды жақсы өткіздік. Көкпар да тартпадық па...

- Тамаша бір мереке болды ғой, Садықжан, - деді Аққұл оның сөзін бөліп, енді жыл сайын өзге халықтар сияқты біз де Бірінші Майды мейрамдайтын боламыз.

- Немене, сен Аққұл, жыл сайын май сыйлығын алғып тұрмақсың ғой? - деп қалжындауды Тоқмырза.

- Жоқ, мен сен сияқты сараң емеспін, - деп Аққұл Садық берген қызыл жалаушаны қойынан алды. - Мен бұл жалаушаны келесі Май мерекесіне дейін сақтаймын. Сонда көзге түскен жігітке тапсырамын. Соған дейін балаңа ат арқасын алдырмауды үйретесін.

- Ау, әңгіменің шырқын бұзбасандаршы! Садық бізден кеңесемін демеді ме. Айтарын айтып болсын да, - деп сөзге әкем араласты.

- Иә, қадірлі ақсақалдар, мен сіздерден кеңес сұрамақпын... Сіздер өмір көрген, жақсы мен жаманды білетін тәжірибелі адамсыздар. Халыққа жаңа тұрмыстың жайын жақсырақ түсіндіруге көмектессеніздер деп едім.

- Ал сенің лау мінер милиционерлерің аттарды неге босқа зорықтырып жүр, - деп бүрк ете қалды Аққұл. - Бас-көзге қарамай жануарды қамшымен төпеп бітеді. Сенің атыңа милиционер мінді дегенше, шаруасы бітті дей бер. Тепектетіп, шоқырақтатып титиғын шығарады.

- Қойшы осы, Аққұл, атың жайлышты жауапты Садық әлдеқашан бермеді ме.

- Менің қай жерде қалай сөйлейтінімді үйретпе маған, Момыш... Мен Садықтың орнында болсам, оларды әлдеқашан атып тастар едім...

Жүрт күлкісін әрең басты. Садық Аққұлға жауап берді:

- Ақа-ау, мен, әрине, милиционерді атпаймын. Өйткені ол біздің қолқанатымыз. Олай етуге рұқсат жоқ. Алайда кейбір ат қадірін білмейтіндерін қызметтеннен босатуға тұра келер.

- Иә, иә, Садықжан, - деп тебіреніп кетті Аққұл, - сөйтіп аттан түсіріп, жаяу салпақтатып қойшы бір.

- Солай етейін, Ақа, - деп құлді Садық, - Ақаң да, өзгелеріңіз де жақсы айтып, құнды пікірлер беріп отырысыздар. Біріншіден, бұдан былай Май мерекесін тойлап тұрамыз. Екіншіден, кейбір лау мінер милиционерлер халыққа зәбір көрсетеді еken - оларды ауызыңтау керек. Бүгін екі мәселені орынды шешуге жақсы кеңес бергендеріңіз үшін көп рахмет сіздерге құрметті ақсақалдар...

- Айта бер, Садық, айта бер, - деп түйіле сөйледі Аққұл, - жақсы сөзінді бөліп жағаласқанымыз үшін біз сияқты кәрі мылжындарды кешіре гөр.

- Енді тағы да ақылдастып алар екі мәселе бар еді, - деді баяу үнмен Садық. - Бұл мәселені сіздердің көмектеріңсіз жалғыз шешуім қынға соғып тұр...

- Айта бер, Садық...

- Менің барлығыныңдан жасым кіші, құрметті ақсақалдар. Мен сіздерге әке де, аға да емеспін. Бар болғаным інілеріңізбін. Айтайдын дегенім - орыс адамдарымен ара қатынасымызды жақсартайық. Әлі күнге дейін біздің кейбір қызу қанды адамдарымыз ескі әдетпен орыстарды жек

көреді, базар болды дегенше, тәбелес болды дей беріңіз...

- Немене сонда, Садық, енді жаңа заманда да басынды ие бер демексің бе? Арқамды қамшысына баяғыдай қайта тілдір дейтін шығарсың? - деп ентіге сөйледі Аққұл.

- Жоқ, жарқынның, Ленин «Барлық адамдар тен» дейді еken - ендеше орысынан әкірендегендеріне қамшы үйіртіп қоймаймын. Менің сақалымды сыйлай алмағандарды мен

де аямаспын. Оған ара тұрма, Садықжан...

- Сен де оңып тұрған жоқсың-ау. Өзің де қазақтың қырт әкіреңбайы сияқтысың ғой, - дей беріп еді әкем.

- Сен, Момыш, өз үйінде ақылшы болмай-ақ қой. Әлде менің кеткенімді қалап отырын ба, - деп дауыстап жіберді Аққұл.

- Ақа, Ақа! - деді Садық жалбарынып. - Егер мені сыйласаңыз, отырыңыз. Келелі жайды сөз еткен екенбіз, ашуланбай, қызбаланбай әнгімелесейік те.

- Аққұл, кешіре гөр, мен ретсіз сөз айтқан екем. Қой енді. Садықты тындаібық, - деді әкем.

- Солай жөніңе көш, - деп торсылдады Аққұл, - әйтпесе бүйірден сұзбелеп біттің ғой.

- Біздер қарапайым орыс адамдарымен қатынасымызды қалайша бауырларша жақсарта аламыз? Тимофей Водопьянов сіздің досыңыз деді ғой, Ақа? Сол рас па?

- Тимошка ма?.. Ол әділ, жақсы адам. Ал, керісінше оның туысы жирен Иван - жаман адам.

- Ал біз Кузьма Гончаровпен бірге жер жыртып, бірге шөп шабамыз, бірбірімізді қонақта шақырып тұрамыз, - деп қалды әкем, - менің інім Гончаровтардан көп шаруаның мән-жайын үйренді...

- Жагор (Егор) маған қыын-қыстау кезенде көмектесті, - деді Тоқмырза...

- Ал менің Метрейім (Дмитрий) үй салуға көмектесті...

Садық күліп қойып, осынау жылы сөздерді жымия тыңдал отыр.

- Тимошка, Кузьма, Жагор, Метрей, тағы басқалар өздеріңіз айтқандай жақсы адамдар еken. Ал Тимошканың туысы ғана жаман адам бол шықты ғой солардан, - деп күлді Садық. Сөйтті де Аққұлға бұрылышпен сауал берді. Ал сонда орыстарда қанша жақсы адам бар еken, қаншауы

жаман болғаны?

- Жақсыларының көп болғаны ғой. Сол жирен Иванды қойшы! - деп бүрк етті Аққұл.

- Ал өзіміздің қазақтардың арасында сол жирен Ивандай желіккендер қанша еkenін білесіздер ме?

- Несін айтасың оның, - деп сөзге араласты Тоқмырза - бізде де есерсоқтар жетеді ғой.

- Ақылға салып көріңіздерші, - деді Садық, - толғанып, кенесіп, өздеріңіз ара қатынасты қалай жақсарту керек еkenін айттыңыздаршы. Рас, анау айтқан шиеленіскең жағдай болмағанымен, кейбір адамдар келісті тірлігімізді бұзып жүр ғой... Сіздермен ақылдасайын деген тағы бір жай - жер мәселесі еді. Бізде жер көп, бірақ соны пайдалануда береке жоқ. Ленин - кім жақсы пайдалана білсе, жер сонықі дейді. Ал біз ше? Біреудің жері шамадан тыс көп, енді біреуде түк те жоқ. Осы да әділдік пе? Міне, осы жайлыш сіздерден салауатты ақыл күтемін, ақсақалдар. Ойланып-толғанып, кенесіп-келісіп екі-үш күннен кейін қауым атынан жауабын берсеңіздер деймін.

- Сенің айтқаның жөн, Садықжан, сенікі жөн, - деп гулесіп кетті жұрт. - Ленин әділ бөлейік десе - бөлу керек. Бізге біраз күн мұқсат бер, кенесейік те өз тоқтауымызды айттайық...

Бұдан кейін Садық өзінің түрмеде болғанын, Сібірде айдауда жүргенін, 1916 жылғы қазақ көтерілісі жайлыш байыппен айтып берді. Өзінің орыс жолдастары туралы жылы лебіз білдірді.

Мен әкемнің тізесіне жантайып, демімді ішке тартып, үнсіз ұйып тыңдал отырмын. Алайда бала қиялым барлық жайды толық түсінбей, әңгіменің оқиғалы жағына ойыса

берді.

Мен Садықты екінші рет 1924 жылы мектепте оқып

жүргенде көрдім. Садықты үйіміздің қарсы алу мен шығарып салу сәті әлі күнге дейін есімнен кетпейді. Бұл бір ең қызықты сәт еді. Осы кеште ағайым тамаша ұйымдастыруышы атанып, содан

бастап үй тірлігінің тауқыметі өз қолына көшіп еді.

Жиналыстан кейінгі көкпар сияқты кеш бойы, түнімен сол кездесуде Бірінші Май құрметіне ән айтылып жүріп еді. Содан бастап бұл күн біздің ауылда дәстүрлі мерекеге

айналған болатын.

Көкем қыстаудағы шаруашылығына күнде барушы еді. Өлденені тындырып, түскі асқа келіп қайтатын. Бұғін де түскі тамақтан кейін азгана мызғып алмақ болып жатқан. Шаршап келген бе, лезде ұйықтап та кетті. Маған қораны сыпсырып қоюды тапсырып еді. Бар ынтамен жұмысқа кірестім. Әлдебір әнді ыңылдалап көңілді жүрмін. Тіптен айналадағының бәрін ұмытқандай, ешнәрсені де елер емеспін.

Оқыс шыққан айқайдан селт ете қалдым. Қарасам, Аққұл шал келтек ұстаған бір топ адамды ертіп алып, біздің үй жаққа айқайлап адымдап келеді еken.

- Ей, жаман сәуріктей болған қасиетсіз Момынқұл, шық бермен. Ар алдында әділ жазанды тарттырайын, - деп барынша айқайлады Аққұл.

Түрі бұзылып, жауар бұлттай түйіліп алыпты. Ешнәрседен аянар түрі жок. Шүнірек көзі қанталап, өз ашуына өзі буынып тұр.

Мына топтың бір сүмдыққа бел буганына шошынғаным сонша, киіз үйге сүріне-қабына сұңгіп кеттім. Даусым қалтырап, тізем дірілдеп әрең сөйледім.

- Ағатай, көкетай! Тұрыңызы. Аққұл атамдар сені сабауға келіпті! - деймін нені айтып, нені қойғанымды өзім де білмей.

Ұйқысынан әлі толық оянбаған көкем менің дегбірсіз сөзіме түсіне қойманты. Орнынан ұшып тұрып:

- Не деп оттап тұрсың. Есің дұрыс па өзіңің, - деп зекіп қалды.

Бұл кезде тыстағылардың даусы да қатты шығып еді. Жабыла даурығып, жамырай сөйлеп жатыр...

- Қалай екен, қалтырадың ба, қоян жүрек сұмырай! Шық бермен деймін, жаның барда шық бермен. Естіп тұрмысың ей сен.

- Өз шаңырағынды бүркеніп бұғып қалмақсың ғой!

- Ер болсаң шық бермен! Әкеңнің әруағын сыйлап үйінді сабай алмаймын, тысқа шық.

- Ақымақ басыңың мылжа-мылжасын шығарайық. Көрінемісің көзге, өзің?

Босағадан кимелеп, зікірлеп үйге бас сұғу, отау ішінде ойран салу салтымызда жоқ нәрсе ғой. Сондықтан да Аққұл тобы ішке кірмей, жиырма-отыз қадам жерде даурығып тұр. Көкем сыртқа шықса, лезде тұтіп жеп, көк ала қойдай етпек.

Оқалақ тиген малдай отауга сүйкеніп, үй ішінде ұрыс салған адамдарды бүкіл жұрт айыптайды. Әруақты қорладың, от басының ырысын шаштың, ошағымызды бұздың, ата-

баба ардақтаған төрімізді сыйламадың деп кінәлайды. «Торғай да бұтаны паналайды, ал сен болсаң үйге тығылған адамның өзін өкшелеп қоймайсың. Көргенсіздің ісі ғой мынауың» дейді ел-жұрт.

- Ер болғаныңды ұрайын! Сүжүрек! Қорқақ! - деп жұлқынды жалпақ бет, жайынауыз Жақсыбай. Ол Аққұлдың үлкен баласы еді. Бет әлпеті өзгеріп, түсі бұзылып, онсыз да

келісімсіз өңі адам көргісіз болып кетіпти.

Мына сөз өзге түгіл, жас болсам да жанымды жыланша шағып алды. Ішімді у өртегендей күйіп барам. Бойымдағы қорқынышты жеңіп, тыска жүгіріп шықтым. Мынау анталаган ашулы топқа:

- Көкем қорқақ емес! Ол ұйықтап жатқан болатын. Қазір киініп шығады! - дедім кіжіне сөйлеп.

- Әй, қаршадай болған жүгірмек, шіңкілдемей мұрнынның боғын сүртіп ал! - деп баж ете қалды Жақсыбай.

Оның үрейлі түрінен шошынып, үйге қайта қойып кеттім. Көкем сырттағы өзіне айтылған былапты сөздерге әзер шыдап асыға киініп жатыр екен.

- Қазір! Қазір! Асықпасан, салпы аузың қанға толар! - деп тістеніп алыпты. - Үй ішінен қолға ілінер нәрсе іздел еді, көзіне ешнәрсе түспеді. Көп кідіруге шыдамай құр қол

жүгіріп шықты.

- Міне, мен де шықтым, не боп қалды, - дей бергенше, Аққұл тобы әй-шайға қарамай, сойылды басына жаудырып жіберді. Айқайладап, шулап, бастырмалатып төпеп жатыр.

Аққұл болса, өз тобына сүйсіне қарап, одырайып бір шетте тұра берді.

Көкем болса, жауып кеткен таяқтан басын қорғап, кез келгенін аяғымен тепкілеп жүр. Менің көмейіме тас тығылғандай ыздан булығып, өзіммен-өзім іштей арпалысып тұрмын. Болысайын десем, мына жұлқынған топтың аяғының астында тапталып қаларым анық. Оның

үстінен менде қай шама бар дейсің. Көзім жасқа толып, бақырып жіберуге әзер шыдап тұрмын. Сарт-сұрт еткен таяқ өз денеме тигендей түршігіп барамын. Сай-сүйегім сырқырайтын сияқты. Жабыла талап жатқан тобырдың әділетсіздігіне қүйінемін.

Әйелдер шулап, азан-қазан болды да кетті. Жұлқылап, алсызып ырсылдаған ерлердің қырылдақ үніне, әйелдердің бажылдаған ойбайы қосылып құнірентіп барады.

Кенет көкем қарсыласып, біреуінің таяғын тартып алды да, қоршаудан сыйылып шықты. Сөйтті де кілт бұрылып, Аққұл тобына қырғидай тиді. Көкемнің бойына әлдеқандай

күш құйылғандай құлшынып шыға келді. Әлгілерді бет қаратпай шетінен сұлатып жүр. Олардың колдарындағы қаруын қағып түсіреді де, өзі шүйлігеді. Қарсы жақтың жігіттері жауырыны қайқаң етіп, шоқып қала береді. Ең соңында Аққұлдың ұлы Жақсыбай да жалпасынан тұст. Бәрі

де топырак қауып, тырманып жатыр. Жаңа ғана өн бойым дірілден, қорыққанымнан не істерімді білмей алақтап тұр едім, енді мәз-мәйрам болып қалдым.

Мына қорлыққа Аққұл шыдай алмады білем. Баласының сұлап жатқаны сүйегіне батты ма, кенет қолындағы таяғын көтеріп, көкеме қарай көрі арыстанша айбат шеге ұмтылды.

Көкем бұл жолы қорғанбады. Қолындағы келтегін лактырып тастап, екі қолын артына ұстаған күйі ашулы шалдың алдында тұра берді. Қанша қағажу көрсе де, үлкенге қол көтермегеніне менің де ішім бір түрлі жылдып сала беріп еді. Бірақ көзі қарауытып кетті ме, әйтеуір Аққұл шал әдепке тосылған жоқ. Қолындағы таяқпен көкемнің қақ маңдайынан періп жіберді.

Жарылған бастан қара қан бұрқ ете қалды. Бетін қан жауып кетті. Аққұл таяғын тағы сілтей беріп, кілт тоқтай қалып, мұңайып төмен қарады да, еңесі салға кеткендей бұрылып, сонына қарамастан бүкірейіп, кібіртіктеп басып өз аулына тартты.

Женілген жігіттер оның соңынан бөкселерін сүйретіп, бастарын салбыратып бара жатты. Көкем қанын сорғалатқан күйі бықсып жатқан ошақ қасына келді де, текеметтің шетінен кесіп алып, жарылған жерге киіз күйдіріп басты.

Кешке әкем келді. Біз бәріміз тұс-тұстан дуылдан жанжал жайын айтып жатырмыз.

Көкем ұрыстың неден шыққанын өзі де білмейтінін әкеме барынша түсіндіріп бақты. Бірақ әкем үнсіз отырып, «Әй, қайдам» дегендей басын шайқай беріп еді...

Қақтығысқа себепкер болған орынсыз құдік екен. Шөп шабатын көп сайдың біреуінде шөбі белуардан асатын бір сай бар еді. Сол сайдың етегінде шөп жапырылып, тапталып қалған шұңқырға біреудің көзі түседі. Ауылдың бір адамы осы арадан өтіп бара жатып: «Е, мына жерге ғашық біреулер аунап-қунап, мейірлерін қандырған екен ғой», - деп көңіліне құдік секем алады. Кім болды екен, адалды арамдап жүрген қай антүрғандар екен деп әлек болады. Кенет ол жаңа келе жатқанда осы тұстан менің көкем өткенін, көп ұзамай Жақсыбайдың әйелін алыстан көргенін есіне алады.

«Демек солар ғой көзге шөп сап жүрген. Шалғынға аунап, үрлых сезімдерін осында қосқан екен-ау. Бәсе, жайқалған шалғын бекерге жапырыла ма? Қой, бұл жүгенсіздікті көріп

біліп тұрып айтпағаным күнэ шығар. Мына адал некелерін бұзып, қос қарғыс атқанды дер кезінде жөнге салу керек екен», - деп әлгі кісі жерден жеті қоян тапқандай Аққұлдың үйіне тұра тартады. Ұялмай-қызармай өз ойын болған істей түгел баяндап береді. Тұнлікті үйге мұнан артық масқара бар ма? Бетке шіркеудің ұлкені де, жұртқа құлқінің шегі де, шаңырақabyroйын айрандай төгу де осы емес пе? Өсек ойран салды дегендей, байыбына барып болмай Аққұл әулетінің аттан салғаны да осыдан екен.

Сол бір қақтығыстан кейін екі қатар қоныстас ауыл қырғи-қабақ болды да қалды. Ағайын боп араласып, алыс- берісі жүріп тұрған қос ауылдың арасына із түспей, құлаққа ұрған танадай тынып еді. Аққұл ауылдың ер-азаматы біздің жақта қайтпас есесі кеткендей тістеніп жүр. Жайдары ауылды жабырқау зіл басты. Апта бойы екі ауылдың адамы ала көзбен атысып жүрді.

Күйеуі сілейте соққан сорлы әйел бір сырлас әріптесінің үйіне тығылыпты. Қанына қарайып алған Жақсыбай шаңыраққа кіруден бата алмайды. Сөйтіп әйелі осы үйде паналайды.

Аққұл әкеме адам жіберіпті. Мына қақтығыстың билігін өзі айтып, ұлы мен келінің ажыратып берсін, адал некені былғаған күнәкарларға үкім шығарсын деп сәлем айтыпты.

Әкем хабарманнан кайта сәлем жолдады. «Біріншіден інім мен сенің келініңдің арасындағы күненің ақиқатына көзім жетпейді. Екіншіден - аппақ сақалыңмен ақ-қараны ажыратпай жатып зәбірлендім деп жар салған өзіңсің. Сондықтан басқа қалың рудан би шақырып дауласу - сенің міндетің, Аққұл. Екеуміз де соның алдында жүгінейік. Ол қалыстығын айтар. Мен болсам жауапкор ретінде алдыңа бармақпын, сен де жауапкерлігінді ойланып баарсың» деп

қайтарды әлгі хабарманды.

Екі аптадан соң ел ағалары жиылып, үкім айтуға билер бас қосты. Әдете мұндайда екі жаққа да қалыс ағайын ғана үкім айтады. Бір жағына бүйрекі бұрмай аралық әділдігін солар білдірмек. Билікті Жарымбет ақсақал жүргізеді екен.

Ұзын бойлы, ет-женді қарт өте жабырқау еді. Иштей езіліп, қатты қииялып отырғаны түрінен білініп-ақ тұр. Жұртқа қабағының астынан түнере, тұнжырай қарайды. Аққұл тобы он жаққа жайғасты да, айыптылар тобы саналған біздің жақ сол қанатқа тізе бүкті. Мұндайда айтыс

арасында ақ жаулық атаулыдан бір жан қатыстырылмайды. Солардың сыртынан тон пішіп, үкімін айтатын да ерлер. Еркектердің ісіне қол сұқпайтын қатал әдет өз қүшінде еді.

- Да, халайық. Тірі пенде тірлігінде не көрмейді. Ашының да дәмін татып, ауыртпалық та арқалайды. Күнәға белшесінен батып, ары алдында азапқа да түседі. Біреудің

обалына да қалып, көз жасына да ұшырайды, - деп бастады сөзін Жарымбет бәсек үнмен. - Жұмыр басты пенденің бәрі - күнәһар. Бірақ соны біреу білместікпен істесе, енді біреу албырттықпен алданып қалады. Тек сол күненді шын жүрекпен адал мойындал арынша жүгінсең ғана, сол күненің ауыртпалығын бар болмысыңмен сезіне білсөң ғана қаныңа

түсken қара күйені кетіре аласың. Жауласқан жұрттың жұлдынын босата аласың, ағайынның араздығын жоя аласың. Сендер, екеуің де - бір атанаң ұлысын. Қысылтаяң кезеңде бір арнаға бірігіп, бір рудың намысын ту етегін туыссындар. Бір дәннен көктеп шыққан жеміссіндер. Біріңің жаның қиналса, екіншің қанат астына қымтап қамқор болар ағайын едіндер, - деп барып тағы тоқтады Жарымбет. Ауыр құрсініп алыш, сөзін қайта жалғастырды.

- Менің төрімнен көрім жақын кезімде сендер мені ауыр нәрсені шеш деп шақырып отырсындар,- деп шал тағы бір құрсінді. - Аталас елдің атына лайықсыз, туысқаннан түңлігін қаралайтын көргенсіз тірліктің үкімін айт дейсіндер. Қиналып отырмын, қынжылып отырмын. Жұздеріңе тік қарай алмай жүйкем құрып отырмын, ағайын. Айтындаршы өздерің. Әділін ақтара айтындаршы. Қалысын айту маған да онай соқпай отыр ғой. Алдымен сен сөйлемші, Аққұл, - деп
он қанатқа мойнын бұрды.

Аққұлдың әжімді жүзі жыбырлап, өзі құрысқандай бір уыс болып, бозарып сала берді. Қанын ішіне тартып қатайып алышты. Қамшысының сабымен жер тіреп жүгініп отырып ашынып сөйлеп кетті:

- Нені айт дейсің, мен бейбаққа, Жареке? Қартайғанда жарық дүниеге тұра қарай алмай, бетім күйіп қалған жоқ па? Ақ сақалыма қара күйе жағылды, ақ басыма қара дақ таңылды. Несін айтайын, бетке шіркеу белгілі күнә емес пе, Жареке-ау, - деп Аққұл кенет қалшылдаپ, қамшысын көтеріп, байбаламға басты. Қалш-қалш етіп орнында әзер отыр. - Мына жаман сәурік менің шаңырағымның арын былғады, әuletімді күлкі-мазак қылды ғой.

- Сабыр ет, Аққұл. Егер сен оңды-солға қарамай аузына келген былапытты ақтара беретін болсан, қамшы көтеріп қайта дүрліксен, әділдік ізден несін шақырдың. Бізді аулынан қуып шық та, бұдан былай да білгенінді істей бер! - деді Жарымбет сұстанып. Аққұл абыржып жым

болды. Жарымбет оған жанашығандай қарап, енді жайлап үн қатты:

- Өзің ойлаши, Аққұл! Өзің де кішіге ақыл айттар, жұртқа елдікті айттар жасқа келдің. Құдайға шүкір, бір елдің ақсақалы аталып, құрмет тілейтін жасқа да жеттің. Тым болмаса сол сияқты біздің сақалымызды сыйлап, қызбалығынды додарсаншы. Аққұл үн қатпай отырып қалды.

- Сен сөйле, Момыш, - деді Жарымбет әкеме қарап.

- Жареке, бұл жай туралы жарытып сізге еш нәрсе айта алмаймын-ау. Бұл қақтығыстың басы-қасында жоқ едім. Көрмеген адам көнілмен болжағанмен, әділін айта алмай

жүрсем, айып емес пе? Інімнің өзі сөйлесін. Өзін-өзі ақтауға, ақиқатын айтуға, әділдікке жүгінуге жарап қалған жоқ па. Өзі баяндасын, Жареке! Мұның өз тізгінін өзіне бердім.

- Ал сөйле, Момынқұл! - деді Жарымбет баяу үнмен, көкеме қарап.

Көкем абыржыған жоқ. Үлкендерге ізет көрсете жүгініп отырып, сөзін бастап кетті:

- Жареке! Әміріңізге құлдық. Мен Аққұл ақсақалмен айтысып, бет жыртысып жатуға ұяламын. Үлкенмен тіресіп, жарыса билік сұрау менің бойыма сыйынын биіктік емес. Өйткені Аққұл ақсақал - туысқаным, ұстазым, ақылгөйім, тәжім етер ағайым. Айтқаныңыз болсын деп алдыңызға басымды тігуге бармын. Қылша мойнымды қылышыңызға да тосар едім. Ауыртпалығыңызды аянбай көтеріп, азабыңызды мыңқ етпей арқалауға әзірмін, Ақа. Бірақ бетіме ыстық судай шашылған осы бір ұятты жала түсінбестіктен туып отыр. Бұл өсек сөздің бықсыған отына тірідей қақтаумен тең емес пе, ақсақалдар-ая. Байыбына бармай байбалам салған

Ақана қатты ренжулімін. Жылан тілді бір өсекшінің әзәзіл сөзі үшін ағайынның беті күйіп, байғұс келініңіздің жүзі төмен боп отыр. Аппақ арына сасыған қоқсықты аямай төге салмадыңыздар ма? Әйел жаны осыншалық әділетсіздікті көтере ала ма? Біздер әйелді адалдықтың айнасы, тазалықтың тұннығы деп білмеуші ме едік. Сол бейкүнә тазалықты өз қолдарыңызбен былғадыңыздар ғой.

Осы тұста:

- Өшір үніңді, күшік. Қарғыс жаусын саған, - деп ышқына айқайлады Аққұл карт.

Жарымбет Аққұлды ала көзімен атып жібере жаздады. Шыдамай зекіп жіберді.

- Бәлкім менің орныма өзің би болып отырарсың, Аққұл?

Аққұл тағы да жым болды. Осы үнсіздікті пайдаланып, көкем қайта сөйлеп кетті.

- Ақа, мен сізді тұған ағамнан артық көріп суюші едім. Әлі де сол сезімдемін, - деді көкем басын таңған орамалды түзетіп қойып. - Сіз мен туралы не ойласаңыз да еркінізде.

Алайда әзәзіл біреулер сізді ақ жолдан тайдырып отырғанын түсінсөніз деп тілеймін. Ант етейін, алдыңызда арым таза. Мен сізге қол котерген жоқ. Сіз таяқтады деп тағы да өкпелемеймін... Бас жарылса, бөрік ішінде демей ме, үлкен ұрса, іні шыдар. Ал қалған топтан тек қана қорғануға тұра

келді. Қарап тұрып өлем бе, жабылып сабағанына шыдай алмадым.

- Мен саған мына шіріктерді шетінен ұрып құлатты деп кінәламаймын,- деп Аққұл өз тобына жиіркене бір көз таstadtы. - Өңшең мұндай шіріктерді сен ұрмасаң, басқалар ұрып жығар еді. Шірік, шірік,- деп сұқ қолымен өз тобын сұғанақтады.

Көкем мұнан соң Жарымбеттің сұрағына жауап беріп, қақтығыстың қалай болғанын айтты. Жарымбет көкемді зейін қойып тыңдал алды да, қырау шалған қабағын тұнжыратып, қасын қинала керді. Сонан соң Аққұлға ала көзімен қарады.

- Жайбарақат жатқан адамға жабылғаның қалай, Аққұл? Он адамға келтек беріп, бір адамға айдан салып қарап түрғаның қалай? Саған тағылар бірінші айып осы болмақ. Жасынды сыйлап, басынды сыйлап, сақалды сыйлап қол көтермеген адамға таяқ жұмсағаның қай сасқаның, Аққұл? Үлкендігің осы ма? Саған тағылар екінші айып осы!

Аққұлдың басы салбырап, жер шұқылап отыра берді. Кенет шеткі отаудан әсем киінген сымбатты келіншек көрінді. Ол батыл басып, әйел бас сұқпайтын мынау даулы ортаға

қарай келе жатыр. Жұрттың бәрі аң-таң. Аққұл өз келінін көріп шоршып тұсті. Екі қолын ербендетіп, сасқалақтап жалбарынған үнмен:

- Қайт, балам! Қайт, балам! Қайта ғой, шырағым, қайта ғой,- деп қалбалактады да қалды.

Иә, оның үнінде бұйрықтан гөрі жалыныш, зекуден гөрі жалбарыну басым еді. Бірақ әйел жалынышын естімегендей топқа қарап қадамын соза басып келеді. Әйел жақын келді де, үлкендерге иіліп сәлем берді. Әкесінің касында бүрісіп отырған күйеуіне жек көре бір қарады. Қанын ішіне тартып бозарып кетіпті. Жанары ызалы ұшқын атып, жас тығылыш түрғандай.

- Көргенсіз деп жүрменіз, айналайын атажан. Үстімізге баса-көктеп келді деп қөніліңізге ауыр алмағайсыз, жарықтық! - деді ол Жарымбетке бұрылып. Үні мен қымылтының батылдығы сонша, тіптен отырғандардың біреуі де «тәйт әрі» дей алмады. - Мен де біреудің перзенті едім. Жат-жұрттық боп жаралды демесеңіз, мен де ата-анамның аялап өсірген баласы едім. Қызы боп туғаныма қорланбап ем, мына қорлық сай-сүйегімді сырқыратты ғой. Сіздер де ұл-қыздың атасысыз ғой, жарықтық. Сіз үшін ұл мен қызының арасында ала-құласы бар ма? Екеуінің де бақытын тілең, әлдилеген әкенің бірі сіз емес пе едініз? Перзенттің бәрін бірдей көру, бәрін бірдей аялау ата-ананың парызы емес пе еді. Мені де әке-шешем маңдайымнан шертпей, ұлдан кем көрмей өсірді. Босағамды онғара көр деп ақ тілеумен алдарыңызға алғаш келгенде, алалау көрем деп ойлаптын ба? Өзге табалдырықты аттап, өзге отаудан, өзге елден бақыт іздел

келін бол келгенде, қағажу көрем, қақпай көрем деп өнімде ойлап, тұсімде көрем деппін бе? Келіннің қуанышы өзге қуаныштан кем бе еді, ата! Мен де сіздің балаңыз емес пе едім?

- деп Аққұлға қарады. - Мен де осы босағаны сондай ізгі үмітпен аттап едім. Амалым қанша, алдаған екен үмітім.

Жарықтық, алдыңызға мен де бір балаңызын деп келіп түрмyn. Амалсыздan әдепсіз көрінгендей жайым бар. Айыпқа бұйыра көрменіз. Келмей тұра алмадым. Кеудемді бір жалын кеуlep, запыран құсқандаймын қазір. Тыңдай көріңіз мені. Рас, мен жалғызыбың, қорғансыз әйелмін. Маған ара тұrap адам жоқ. Жаман еркектің әлі жақсы әйелге жетеді дегендей, тап қазір қай еркек болса да сабап, тіптен өлтірем десе де шамасы келеді. Табанда осы жерден қуып шығамын

десеніздер де еріктерінізде. Алайда мені тыңдауға, аз ғана көніл бөліп, жайымды ұғуға дәтіңіз шыдай ма, жарықтық? Тыңдайды деп келіп түрмyn!

Бұл сөздің бәрін келіншек бойындағы дірілің, кеудесіндегі ызасы мен толқуын жеңіп тұрып, колмен қойғандай, шегемен қаққандай айқын баяндады. Адал адам

ғана осылай батыл сөйлей алады деп ойладым мен ішімнен. Өйткені оның сөзі жан сезімнің нұрын шашып, жалаға қарсы жалындаған түр еді. Әйелдің бүкіл бітімі, жан дүниесі, тіптен киімінің әр түймесіне дейін әділетсіздікке деген айбатын айқын танытатын сияқты. Қаны қашып, сұрланған жүзі қуқылданып көрінсе де, батыл шешімнің, ұстамдылықтың, ежеттіктің нышанын әйтілей түседі.

Жарымбет ақсақал да, өзге жұрт та келіншектің батылдығына қайран қалып ұйып отыр. Қарт келіншектің бетіне тұра қарап еді, одан сезіктенуді, әлде имену нышанын аңғара алмады.

- Айта ғой, балам, айта ғой, - деді Жарымбет абыржып.

Сөйтіп екі қолымен сақалын кезек-кезек сипай берді.

- Мен алдарыңызға келгенде,-деді Зәуре өзін-өзі әдепті ұстап, - сіздермен айтысайын, тартысайын, сottасайын деп келгем жоқ. Ондай күн туса, ол үшін жаңа заманның

соты, Советтің әділ заны бар. Алдымен соған жүгінем. Ол соттың алдына ерлермен бірдей өз сөзімді өзім айта алам. Маған арашалаудың керегі жоқ. Бірақ айтайын дегенім ол емес еді. Мен сіздердің алдарыңызда, мына қүйеуіме өз шешімінді естірте кетейін деп келіп тұрмын. Өйткені

осының байбаламымен жұрттың бәріне күлкі болдық. Сөйтіп тектен-тек мазақ болып, жұрт көзіне тұрткі бол тұрмын. Таза жүрегім өсектің қозына көмілгендей, өне бойым ұялтан өртеніп барады. Енді бұл күйікке шыдай алмаспын. Жаңа өкімет еркіндікке, теңдікке ерік беріпті. Сол теңдігімді енді пайдаланам. Масқара бол жүре алмаймын. Сондықтан, бұл үйден біржола кетуге бел байладым.

Қараниеттің қасында қалуға енді менде шама жоқ.

Мына сөзді естігенде, отырғандар ауыр күрсініп алды.

- Келgelі өзінізден кейіс естіп көрген жоқ едім. Қабақ шытып, көңіліме тиген жоқсыз. Мұныңызға мың да бір рақмет, ата. Алдыңыздан өтіп, қоштаса кетейін деп келдім, - деді Зәуре енді Аққұлға бұрылып.

- Не дейсің, балам, не дейсің! - деп кемсендей берді Аққұл. Бірақ Зәуре бұл сөзді естімегендей Жарымбет жаққа бұрылып:

- Жарықтық, мені төркініме жеткізіп сал деп, бір жігітке тапсыруға жарайсыз ба? Сізге айттар тілегім осы еді, - деп Зәуре енді қүйеуіне тесіле қарады да. - Ал, сенің босағаңнан тірі жүріп аттамаспын, - деді.

Ақсақалдардың алдында тағы да кешірім сұрап, келіншек бұрылып жүре берді. Жұрттың бәрі томсырайып, төмен қарап отырып қалды. Қолайсыз тыныштықты ешкім бұза

алмады. Жарымбет ақсақал абыржып, алақанын уқалай берді. Ақыры қатты күрсініп:

- Байғұс бала-ай, әбден қорланған екен-ау! Төрімнен көрім жақын кезінде оған мен тоқта деп айта алмаймын. Төркініне апарып салындар. Біраз атанаасының алдында жүріп ашуын басар, ойланар!.. Менің айтарым осы, көшілік, - деп карт орнынан тұрып, атына қарай жүріп кетті.

Қайтарда Зәуре жайлыш әркім әрқалай толғанып келе жатты. Алайда бәрі де бишара әйелге керемет қиянат жасалғанын іштей мойындан еді...

Кенет арт жақтан әжемнің даусы естілгендей болды: «Есуас болсан да, бүгін өзінді ақылды үстадың», - деді әлгі даусыс. Мен бұрылыш қарасам, сөйлеп келе жатқан әжем емес, әкем екен. Әкемнің үні мен даусы әжеме ұқсас еді. Қатарласып келе жатқан інісіне айтқан екен әлгі сөзді.

* * *

Ақ жауын нөсерлетіп төгіп тұр. Әулиеата көшелері лай судан көлкіп, батпағы молайып, миы шығыпты. Қалың жаңбырдан ықтап, елдің бәрі біреулері ағаш тұбін, біреулері

сарай, үйдің ығын паналап тұрған кезі. Осынау жауын ғана билеген тым-тырыс көшеде батпақ кешіп, ат сабылтып жападан-жалғыз біреу келеді. Басындағы қара бөркінен, үстіндегі сұр шекпенінен су сорғалап, ат жаңынан аунап түсіп жатыр. Оны байқап келе жатқан ол жоқ. Табиғаттың осы бір бейжай сәтімен тақасқандай ешнәрсені де елемей ат үстінде жайбарақат келе жатқан сияқты. Қашаннан қамшы салдырмай үйренген «Көкшолақ» мінерінің, сырлас

саяткерінің осы сәттегі мұңды қүйін сезгендей, ұзын мойнын ілтері созып жалынан аққан жаңбыр суын жан-жағына бұркіп, аяғын көсіле тастап келеді. Атты кісі ешқайда бұрылған жоқ. Қала орталығындағы уездік комитеттің үйіне келіп, аттан түсіп, шылбырынан бір ағашқа байлады. Құлақшының қолына алып, бір сілкіп таstadtы да, әлгі кісі ішке батыл еніп кетті. Ол бірден уездік

комитет секретарының есігін ашып еді.

- Ау, Ақаңбысыз, ассалаумалейкүм, Ақа! Ақ жауынның астында сізді не айдал келді?

- Арым айдал келді, Садықжан.

- Онда жоғары шығыңыз, ағатай. Ал тыңдадым сізді, Ақа.

- Құдай да менімен бірге жылап тұр ғой, шырағым. Жылаған жан жылы орын іздемейді екен. Жауыннан жасканатын қандай халім қалып еді менің, - деп Аққұл даусы дірледеп, дегбірсіз үн қата берді.

- О не дегеніңіз, Ақа. Не боп қалды? - деп Садық қарттың малмандай су болған шекпенін өзі шешіндіріп, шегеге іліп койды.

Аққұл үн қатқан жоқ, кірпік-қасына тұрган жаңбыр сұзы қыстың қырауындағ
жылт-жылт етеді. Ол қаз тізілген орындықтың біреуіне сылқ етіп отыра кетті.

- Естімеп пе едің халімді, Садықжан? - деді Аққұл аз үнсіздіктен соң
тұнжырай тіл қатып. - Осынша жасқа келгенде шерменде болып, алдыңа арыз айта келіп
отырмын. Келінім кетті, үйім берекесіз болып қалды. Бір әзәзілдің өсегіне еріп, өз
куанышыма балта шауыппын мен

бейбақ. Кінәсіз, құнәсіз келінімді халық алдында қаралап, қас масқара болыппын.
Көргенді жердің көркем қызы еді.

Өсек сөз жарқынымның өзегін өртеп жіберіпті ғой. Шыдай алмады. Отаяума өсек сөз
ойран салыпты. Бізді тастап төркініне кетіп қалды. Мен жерге отырып қалдым. Бір
акымақтың бұлдіргенін, жұз ақылды түзете алмайды демеуші ме еді. Менің жайымды
Жарымбет те, Момыш та түсінбеді ғой. Айтқанымды өткізе алмадым оларға да. Ел-жүртқа
беделің бар, жасың кіші болса да, талай жүртқа ақыл айттар азамат едің, шырағым
Садықжан. Сенен көмек сұрай кеп отырмын. Құдаларыммен сөйлесіп, келінімді
ошағымның басына қайта қайтаруға септігің тиер ме деп

кеп отырмын. Келінімнің береке екенін де, мереке екенін де енді түсінбедім бе мен бейбақ.
Амалым таусылып, ақылым алжып, алдыңа келген жайым бар, жарқыным. Қайфыма ортақ
болғын, қарағым!

Аққұл бұдан ары сөйлей алмады. Иегі кемсендеп, көзінен жас парлап бара
жатты. Садық осынау ел алдында өзін еркін ұстайтың, ауылшының алға тұтар ақсақалы
болған

манғаз Аққұлдың еңсесі түсіп езілгенін тұнғыш рет көріп отыр. Кәрі көзден шыққан жас
бетінен сорғалай ағып, ақ мұрты, салалы сақалынан мөлдірлей тамшылап аққанда, Садық
ішінен жылап жібере жаздады. Бірақ та ұстамдылық өз орнын алды. Жүрегіндегі ақиқат
лебізін, шындық сөзін

айтпай отыра алмады.

- Солай ма еді, Ақа-ау! Қын болған екен ғой. Мына жай менің де
қабырғамды қайыстырып отыр, Ақа... Әйтсе де, Ақа, менің билігім Зәуреге жүрмейді.
Оған сіз дұрыс

түсініңіз. Мен сіздің жүрегініздің шын сөзін айтып отырғаныңызды білем. Орны толмас
опынуға да түскеніңізге де түсінем. Әйтсе де құдаларыңызға бара алмаймын. Зәурешті
сіздің қолыңызға қайтар дей алмаймын. Әділдік дегеннің, әділ заң дегеннің мәні де
осында ғой, Ақа. Оған менің бұйрығым жүрмейді. Зәуре арқа сүйеген, Зәуре медеу тұтып,
батыл шешімге келген әділдік аты сіздің айтқаныңызды қабылдай алмайды. Осыны дұрыс
түсініңіз, Ақа.

Екеуі томсырайып үн қатпай, бір-бірін сынағандай орындарынан қозғалмай
отырды. Тек сырттағы жауынның тырс-тырс етіп терезеге тиген тамшылары ғана «ей,
бейшаралар» дегендей естіліп тұрды. Әлден соң Аққұл орнынан тұрып:

- Айтқан ақылыңа рақмет, қарағым Садықжан. Ақымақ бақыттың басына қонғанын білмestен, үшқанын бір-ақ сезеді деген осы екен fой,- деи күрсінді.

- Рақмет, Ақа, тұсінгенізге! Бұл сөзді сізден басқа болса айтпас еді, сізден басқа болса бұлайша өкінбес те еді. Ағат жібергенізді аңғарып, қартайғанда ауыр кінәнің азабын бір басыңызға арқалап, ақиқатқа, әділдікке жүгінгенізге рақмет, - деп Садық Аққұлды киіндіріп,

кебісін қойып, қолтықтап сыртқа шығарып аттандырыды.

* * *

Зәуренің ісі жылға созылды. Құдасының ауылына Аққұлдар талай-талай ат салыпты, кешірім сұрап келінің қайтаруды өтінді. Бірақ Зәуре айтқанынан қайтпады. Ақыры өз қалауымен қалыңсыз-ақ ерге шығып кетті. Аққұл болса, өмірінің соңғы шағына дейін Зәурені ойлап бармағын

тістеумен өтіп еді.

Бұл біздің аймақтағы жаңа заманың, жаңа өмірдің жақсылығын көрген алғашқы әйел болатын...

* * *

Ауылдың айналасындағы сай-сала шұрайлы шөпке тұнып тұратын. Ел әр сайды иемденіп шөбін шауып алады. Шөп піскенше, төнірек самал желге толқып, теңіз бетіндей

тербеліп жатушы еді. Пішен шабыс келгенде сол толқынның әр шетінен орақ тиіп, жал-жал шөп қалып жататын.

Гончаровтардың үй-іші шабындық кезінде де бізben бірге болады. Уәделі күні арба жегіп, ат жетелеп, шалғысын қайрап келіп тұрғаны. Жаз бойы қырқа күшпі, шөп шауып жүргенде, бозғылт денелері күн көзіне қақтанып күреңітіп болады. Сол сэтте бәрі ажарланып кеткендей көрінетін. Гончаровтардың шалдан өзгесі түгелдей жалаң аяқ, жалаң бас жүретін. Тек шалғана жамаулы етігін тастамайтын. Ыстық күнде аяғын желдетпеген соң шуаш иісі бұрқырап журуші еді.

Гончаровтар шетінен бөз көйлек киетін. Желпінуге ыңғайлағаны ма, әйтеуір кең етек далбағай көйлекке күмар-ақ.

Олар арба-аяғын салдыратып асығыс келеді де, жау қуғандай құйындастып шабындыққа асығады. Шай қойып, дастарқан жаюға да мұрша бермейтін.

- Жұмыс қалып барады, Момыш. Жайбарақат жататын кез емес қой. Бесбармақты кейін жейміз, - дейтін Кузьма

шал.

Әкем мен көкем ат ерттеп асыға бастайды. Мен Гончаровтардың үлкен арбасына жайғасамын. Мұндай көлікке бұрын-соңды мінгенім осы еді. Біртүрлі қорқып отырдым. Арба орнынан қозғалғанда, мен шабағынан ұстай алдым. Жүрген сайын секіректей береді еken. Гончаровтар маған күліп жатыр.

Василийдің мақтанғысы келді ме, әлде мені батылдандыра ма, әйтеуір ешбір сескенусіз-ақ арба үстінде ары-бері жүгіріп қояды. Алайда қалжыңбас Тишко аттарға қамшы басып, желдіре жөнеліп еді, мен жақтаудан айрылмастай жабыстым.

- Тишко мұның не? - деп айқайлайды Манька, - жаймен айдасаңшы. Әйтпесе мына қара қазақтың көзі тас төбесінен шығатын түрі бар. Тишко маған бұрылып қарады да, карқылдай күліп тізгінді тартты. Ат аз ғана кідіргенде, арбадан секіріп түсіп, каша жөнелдім. Василий қуып жетіп, арбаға қайта мінгізбек еді. Мен тырысып болмадым.

- Соны қойшы, Василь! - деп айқайлайды Манька. - Өз обалы өзіне. Жаяу жүре берсін, сайтан. Василий мені көндіре алмағанына ызаланса керек, жағымнан салып қалды да, арбаға қарай жүгірді. Мен қуып жетіп, бөз көйлегіне жармастым. Екеуміз де қайтпай төбелестік. Тишко жүгіріп келіп ажыратып жіберді.

Ашуым тарқар емес. Жерден тас алып арба сонынан атқылап келем. Бір тас Маньканың жауырынына тиіп еді, Манька баж ете қалды. «Ой, тентек қазак! Шайтан!

Албасты!» деп кіжініп тұр. Мен әлгі сөздерді қағып алып, өзіне қайтарып айттым. Шамасы орысша сөздерім мандымаса керек. Гончаровтар іштерін басып күлкіге кенелді де қалды... Бұл ашық күлкі біздің татуласқанымыздың алды еken. Тишко Василий екеуміздің арқамыздан итермелеп,

бір-бірімізге жақындаатты да, қолымызды алдырды. Сонаң соң мені өзінің қатарына отырғызды.

Біздің шабындығымыз жазықтау алқап еді. Гончаровтар мұнда келісімен аттарын тұсады да, бірден жұмысқа кірісіп кетті. Шалғылар шындалып, жүзіне қайрақ жүрді. Сонан соң

Кузьма шал бір шалғыны алды да, жайқалып тұрған нұға сұңгітіп жіберді. Сол-ақ еken, әлгінде ғана жайқалып тұрған шалғын жапырылып түсе бастады. Шалғы сұңгіген сайын, бірқалыпты сусылдақ сыйбыс есті де отырды.

Біраз жерге дейін шалғы сілтеген Кузьма ентігіп барып тоқтады, үлкен ұлына дауыстады.

- Сашко! Сен немене, орақты дұрыс салтамағансың ба? Белдемесін де дұрыс орнатпапсың. Сілтеген сайын зіл тартып, омыртқаңды үзе жаздайды.

Сашкосы қолына балғасын ұстап жүгіріп келді.

- Қазір, еке! Бәрін де орнына келтіреміз. Ұстараның жүзіндей қылпытып берем. Майға салған пышақтай сузып жүре беретін болады, - деп баласы жүре сөйлеп шалғыны жөндей бастады.

- Сөйт шырағым, сөйт,- деді әкесі мейірлене сөйлеп.

Сашко балғасын еппен жұмсап, орақтың мойнын біраз тықылдатты. Соңан соң сабын жөндеді.

- Белдемесін жоғарырақ жылжыт, балам.

- Өзім де сөйтіп жатырмын, әке - деді Сашко қайысты тартып тұрып.

Шалғыны жөндеп болып, ол ары-бері сілтелеп сынап көрді де, әкесіне әкеп берді.

- Енді қатып кетті, әке! Өзіңіз байқаңызы. Шал шалғыны қолына алып, сынады да, ұлына ризашылық білдірді.

- Дұрыс бопты, шырағым.

Шал өзінің бастап қойған жеріне барды да, бал тарта берді. Енді оның тек екі қолы қимылдан туғандағы сезілді.

Орылған жердің қыртысына дейін көрініп, шалдың соңында түп-түзу ұзын жол қала берді. Әлден соң шал соңына көз таstadtы да, дауыстап әмір берді.

- Ал, балалар, орақты бастаңдар!

Сол-ақ екен, Сашко, Мефодий, Тишка тізбектесе тұра қалды. Алдымен Сашкосы, соңан соң он қадамнан кейін Мефодий, оған ілесе Тишка тұсті. Бұлардың соңынан ала көкем шалғынға шалғы сұнгітті. Енді бір қарасам, қатар тізілген бес жолақ нұшөпке жарыса сұнгіп барады екен.

Шал төрт жігіттің алдын тосып, ақыл айтады.

- Сашко, сен асықпа.

- Мефодий-ау, мұның не? Тас лақтыргандай құлаштайсың ғой.

- Тегістеу ал, Тишкожан.

- Момынқұл, сен жауырыныңа жүк артқандай құнжиып алышсың. Бойыңды тіктеу ұстасаң, өзіңе женіл тиеді ғой.

Алдыңғы төртеу бір қалыпқа түскендей бірінен-бірі қалысар емес. Сайма-сай қимылдан, сап түзеп барады. Көкем қатар бұзбайын деп қанша тырысса да болмады.

Шал «таусоғар» көкемнің қолапайсыз қимылына шыдай алмай қасына келді. Көкемнің шалғысын алып, өзі шауып көрсетті.

- Міне, осылай шапсаншы, Момынқұл. Құшінді босқа тауысасың ғой.

Тишка бұл сөзді көкеме аударып түсіндірді. Бұдан кейін Гончаровтар қайтадан сап түзеп бірқалыппен алға жылжи берді. Көкем қалыспай-ақ келеді. Бірақ терлең пара-парасы шығыпты. Шаршағаны соңша, тіптен сілтеген шалғысы аспанды қаңғалақтап барып тұмсығымен жер сүзеді.

Осылайша екі-үш балдан тартылды. Көкем ентігіп, екі иығынан дем ала бастады. Ал Гончаровтар әбден әккіленіп алған ба, сыр білдірер емес. Алға сырғып барады. Төртінші

қатарға түскенде көкемнің шалғысы жерге қадалды да, сабы морт сынды. Көкемнің өзі орақтың жүзіне құлай жаздал жер тіреп тұрды. Дүлей күшке шыдасын ба, шалғы қақ бөлінді. Кузьма шалдың шыдамы таусылған екен. Көкемді тұтіп жіберердей төніп келіп, айғайға басты. Ел ішінде жүріп үйренген жалғыз сөзін қайталап «ахмақ!» дей береді.

Сонан соң қолын оңды-солды сермен, ұлдарына әлденені орысшалап нұқи бастады.

«Әйгілі тілмаш» Тишко әкесінің бастырмалата сөйлеген сөзін аударып үлгере алмады. Мен өзіме таныс «Сайтан! Албасты!» деген сөздерді айнытпай ұфып тұрмын. Көкем ұялғаннан басын төмен салып, бірдеме деп қазақша мінгірлеп еді, оны өзінен басқа ешкім де естіген жок.

- Әкем айтады, - деді әлден соң Тишко, шал аздап басылғанда, - Момынкул сенікі үлкен ақымак, башка аз-маз істейді. Сенікі орак емес, арбаны да сындырады. Кузьма шалдың осынша күшке таңырқағанын сезген көкем көтеріліп қалды. Құліп жіберді де, кешірім сұрады.

Ертең базардан бірнеше шалғы сатып әкелмек болды. Ал Кузьма көбірек ескертпе жасаса, тезірек үйреніп кететінін айтты.

Мұны естіген Кузьма да жұмсарап, көкеме өз шалғысын ұсынды. Өзі қатарынан қалмай көкемнің қимылын бақылап, үйретумен болды. Әкем арбаның көлеңкесінде отырып алып, шалғыларды шындаиды. Біз Василий екеуміз әлгінде ғана жол үстінде шекіскенімізді ұмытып, көбелек қуып мәз болып жүрміз.

Біздің міндетіміз - тұсаулы аттарды бақылау. Аздан соң Василий екеуміз әңгімеге көштік. Ол шіркеудің қоңыраулары қалай соғылатынын айтып берді. Тап осы сэтте алыстағы

орыс поселкасынан шіркеу қоңырауының даусы талып естіліп еді. Василий әр қоңыраудың дауысын танып, үніне қосылғандай басын изеп құптаиды. Алғашында құнғірлеген жуан дауыс естіліп еді, бірте-бірте жінішке үн молая бастады.

- Тыңдашы, тыңдашы, - дейді Ваєилий ентелей құлақ түріп. - Мына дауыс - ең кішкене қоңыраудықі. Екеуміз де кішкене қоңыраудың үнін ұннатьық. Мен Василийден:

- Ауылдарыңа барып, шіркеулеріңнен қоңырауды көруге бола ма? - деп сұрап едім, ол жолатпады.

- Жоқ, саған болмайды. Әулие атамыз мұсылмандарды шіркеуге жібермейді.

Менің лепірген көнілім басылып, кәдімгідей мұңайдым. Өйткені шынымен-ақ орыс шіркеуін, әсіресе үнді қоңырауларды көргім келіп еді...

Василий екеуміз қазақша жақсы түсіністік. Бірақ ол ағасы Тишкодан азырақ біледі еken. Гончаровтардың өзге адамдары, ауылдағылар айтқандай, қазақшаға келгенде «таза мылқау» еді. Өйткені олар бізбен Василий және Тишко арқылы немесе ымдал қимылмен түсінісетін.

Василий екеуміз шалғынға бауырымызды төсеп жатырмыз. Әрі бітік, әрі биік шөп бізді бүркемелеп, күн көзінен қорғанғысы келгендей қайта-қайта жапырыла тербеледі. Көліктер ұзаққа сілтемей, маңайлап жайылып жүр. Біздің кісілер әлі шөп шабуда. Оқта-текте қайраққа жаңыған қысқа дыбыс естіледі.

Василий екеуміз қатар жатып, дүниедегі бар білгенімізді айтып тауыса алар емеспіз.

Кенет ол әлдене ойына түскендей, оқыс аунап түсті де, жанқалтасын қармана берді.

- Мә! - деп бір уыс қуырылған пістені алақаныма үйе салды.

Өзі де пістені лыпылдата шағып, қауызын түкіріп тастайды. Мен бұрын пістені аузыма алған емес едім. Досым берген пістені аузыма құя салдым да шайнай бердім. Әбден аузым көпіріп кеткен соң түкіріп жіберіп едім, Василий орнынан атып тұрды. Маған аңтарылып қарап қапты. Соナン соң ішек-

сілесі қатып құле берді. Арасында әлденені орысшалап та, қазақшалап та айтқан болады. Бірақ құр міңгір мен қулкіден басқа ешнэрсе аңғара алмадым. Осылайша ол қарқылдан ұзақ құлді. Көзінен жас парлап кетті. Әлден соң барып қулкісін тыйды да, пістені біртіндеп таңдайына салып,

қалай шағуды үйрете бастады. Қауыз бен дәнді араластыра жұтып жатып, Василий берген пістені тауыстым-ау. Ол тағы бір уыс пістені ұсынып еді, азар да безер болып алмадым. Өйткені тілімнің ұшы ойылып зар қақсан тұр еді.

- Василь! Василь! Қайдасың?

Кузьма шалдың оқыс даусынан екеуміз де ұшып тұрдық.

- А-а-у! Мен мұндамын.

Шал ұлына дұрсе қоя берді. Сөйтсек көліктер көк шөпке тойып алып, енді шабындықты жапырып аунай бастаған еken.

Екеуміз ұшқан құстай жүгіре жөнелдік. Шал артымыздан жұдырығын түйіп, ашуын тарқатада алмай қала берді.

Шабындықтың тен жарымы орылып болған еken. Айнала жал-жал болып сұлап жатқан шалғын тоқтап қалған толқынға ұқсайды. Арба маңында әйелдер түстік әзірлеп жүр. Көлеңкеде әкем әлі орақ шындалп отыр. Кузьма шал қайтып барып орақшыларды іске жұмылдырып кетті. Түске қарай қөкем әбден жаттығып, Гончаровтармен теңесіп алған еді.

- Қараши, - деді Василий жеңімнен тартып, - Момынқұл жақсы шабатын болыпты.

Шынында да, көкем енді ғана көсіле бастаған жүйріктей үдең келеді екен. Әлгінде ғана Кузьма шалдың оны «ақымақ!» дегені есіме түсіп, құліп жібердім.

- Ха, менің әкемнің жұрттың бәрін «ақымақ» деп сөйлейтін әдеті, - деді Василий қолын сілтеп.

- Сені ұра ма? - деп сұрадым одан, жана ғана әкесінің жұдырық түйгенін еске алып. - Аямай ұратын шығар.

- Ұрады! - деді ол миығынан құліп, менсінбей. - Ұрады. Бірақ мен зытып берем де, қашан ашуы басылғанша көзіне көрінбеймін. Содан ол ұмытып кетеді.

- Онда сен қазір жақында ма. Эйтпесе соғып жүрер.

- Жоқ, - деді Василий сенімді дауыспен. - Әкем біздің аттардан көз жазып қалғанымызды әлдеқашан ұмытқан. Ал сенің әкен ұра ма? - деп сұрады ол енді менен.

- Менің әкем балаға қол көтеріп көрген емес, - дедім мен мақтанышпен.

- Әкеңнен көбірек қорқасың ба, жоқ әлде көкеңнен бе?

Мен көкемнен көбірек қорқатынымды мойыннадым.

- Ал мен ағаларымнан тырнақтай да қорықпаймын, - деді Василий, - егер олар тие қойса, әкем маған болысады.

Күн тас төбеге көтеріліп, айналаны қуырып барады. Тіптен шегірткенің езі көлеңкеге тығылып қалғандай...

Кузьма шал тынығуға мұрсат берді. Орақшылар аяғын әзер сүйретіп, терге малшынып, көлеңкеге беттеп келе жатты.

Біз Гончаровтардың тамағына ортақтаспай үйге қайттық...

Гончаровтар содан шөп жинауға бір апта өткен соң оралды.

Қазақтар әдетте шөпті шөмелелеп үймей, маялап жимай, баулап болып, үй төбесіне жинастыратын. Шөптің көлемін баумен өлшештін. «Мына үймеде мың бау шөп бар», - деп

есептеуші еді. Маяға берілетін азықтың мөлшері де баумен өлшенетін. Қөктем шығып, көкке аузы тигенше малға қанша шөп кететінін де баумен есептейді.

...Шөп кеүіп, сарғая бастаған екен. Гончаровтар арба жегіп, пішенді арта кетуге келіпті.

- Ал, Момыш! Шөпті маялаймыз ба? - деп сұрады Кузьма.

Әкем келіскендей бас шұлғып еді, көкем қырын кетті.

- Мен өзімізше баулап жинаймын, ал сендер шөмелесала беріндер, - деді ол. Тишко көкемнің сөзін әкесіне аударып еді, ол тулап ала жөнелді.

- Бұл не дегені. Тірлікке Момыш қожа ма, әлде Момынқұл ма? - деп әкеме қарады.

Әкем Тишко арқылы Кузьмаға көкемнің үй шаруасына ие екенін түсіндірді. Сондықтан көкеме ерік беретінін айтты.

Бұл сөз Гончаровтарға ұнамаса керек. Біразға дейін өзді-өзі құнқілдесіп сөйлесіп алды. Бұл кенеске бізден ешкім араласқан жоқ. Шал ұлдарына айғайлаап, қолын онды-солды

сермен әлек боп тұр. Өзгелері көндіргісі келіп басу айтады. Ақыры бәрі бір тоқтамға келгендей болды. Сонда барып Тишко аудара бастады.

- Әкем біздің бау баулап жүретін уақытымыз жоқ дейді. Оның үстіне бау әртүрлі буылмай ма, - дейді. - Егер Момынқұл өз білгенін істей беретін болса, бізben несіне ортақтасып жур. Әрине, біз оған шөмелеп сал деп күштей алмаймыз. Бірақ біз де бау түйіп бас катырып жүрмейміз.

- Онда біз былай бөлісейік, - деді көкем өз ойын ортаға салмақ боп.

- Тишко, мынау не деп тұр,-деді Кузьма дегбірсізденіп. Ұлы түсіндіріп еді анау тағы тулады.

- Қалай бөлмек? Десте де әртүрлі, шөптің шығымы да бөлек.

- Ол оңай, - деді көкем сонда. - Оң жақтан бастаймыз да, екі дестені біз алып, бір дестені сендерге қалдырамыз. Үштен бір ортақ сонда тұра шығады. Кімге қандай десте түссе де, өз несібесінен көрсін.

Тишко бұл ұсынысты аударғанда, әкесі аз ойланып тұрып, қолын кесімді түрде бір-ақ сілтеді.

- Мейлі осының-ақ айтқаны болсыншы. Бұдан кейін сенімен ортақтаспаймын енді.

Көкем бұған да келісті.

Барлығымыз шабындықтың оң қанатына шықтық. Кузьма шал екі дестені бізге қалдырып, үшінші бір қалыңдауын өзіне меншіктенді. Бірақ төртінші рет үлеске түскен дестесі

мардымсыз боп шыққанда, Кузьма шал қайтадан қынырайып шыға келді. Балаларына тиісіп дауыс көтерді. Уәденің аты уәде ғой. Балалары әкесін ақыры көндірді. Осындаи бөлістен соң екі жақ өз тірліктеріне көшті. Гончаровтар қол тырмамен тырмалап, айырмен шөмелеп салды. Біз әкем

екеуміз баулық түйіп, көкеме әзірлеп тұрдық. Көкем тең-тең шөпті дөңгелетіп лезде баулап келеді.

Біз үш күн бойы шөп бауладық. Мен баулық жұлып, көкеме тасып қолғабыс тигіздім.

- Шүкір, біздің Бауыржан азамат болып қапты, - деп қуанды көкем.

Мен әбден сілем қатып шаршағанымды сезsem де, әкем мен көкемнің мақтауынан нэр алып қуаттана бердім.

* * *

Батыр мен балуанның өмірі кездейсоқ оқиғаға толы. Жазым болар, майып болар, наубат болар жайлар қадамын басқан сайын кездесері хақ. Қатты созған ішектей қылтылдаған қауіп-қатерге де кездеседі. Бірақ олар үнемі ерлікті аңсайды. Биікке құмартады, женіске құлшынады. Бұл ретте халқымның мінезі бәйгенің сәйгүлігіне, даланың дауылпаз сұнқарына ұқсайды. Өр қазақтың ат десе, алғыр құс десе арқасы қозып тұратыны да осыдан болса керек.

Астындағы аты үшін небір қияметке де көнуге бар. «Жалғыз атты кедей» деген атаққа да мойнын ұсынады. Ол ешқашан да атсыз қалып, «қу томар» атанғысы келмейді.

«Жүйрік ат аяғынан қалады», «сұнқар қанатынан қалады» деген мақал текке айтылмаған. Ал егер жігіт осы екеуінен де мақрұм болса, онда ол ер атаулының санатынан қалады. Халқымыз осылай намысқа тырысып өскен. Өйткені «Атсыз ер - қанатсыз құспен тен», «жаяу қалсан - жау қолына түскенің, сан қорлықтың запыранын ішкенің».

Міне, сондықтан да әр қазақ астындағы атын өзімен тең санаған, оның желдей жүрісін жанына ем санаған. Өзін қалай күтсе, көлігін де солай мәпелей білген. Атқа ретсіз ауырлық

артпаған, айылын жөнсіз тартпаған, ақ-көбік етіп атойлап босқа шаппаған, алқымын судан, қарқынын дудан сақтаған. Болса егер жүйрік бойында шабыт шарлаған, қазақтар оның мойнына қамыт салмаған.

«Төл атынды төреге де берме» деген сөз бар қазақта. Бұл атты ардақтаудың биік шыны болса керек. Жүйріктің қасиетін, сәйгүліктің бағасын бұдан артық ешкім де ұға

алмас. Тіптен бәйгеге қосар тұлпарға «етегі ауыр нәсіл» деп әйел атаулыны мінгізбейтін болған. Киелі малдың құны осылай бағаланған.

Жүйрік аттан айрылған жігіт жолдасын жауға бергендей қайғыратын болған. Әйтпесе «Құлагерді» ардақты Ақан әнге қосып зарламас еді, халқымыз әлі күнге сол әнді асқақтатып

шырқамас еді. Ертегіге үңіліп, ән-күй тыңдасаныз да, поэма мен эпостарға зер салсаңыз да, ат туралы айтылған жылы сөзді естімей қалған емессіз. Осы күнге дейін жақсы ат көрген жан «бір сұлудың құны бар жүйрік» екен деседі. Бұдан артық жүйрікке кім таңдана алады, кім әділ баға бере алады екен.

Дәл сол сияқты Аққұлдың «Көкшолағы» оның өміріндегі ең соңғы сәйгүлігі еді, ал өзі жүйрік үшін ең соңғы серігі еді. Жүйрік те, иесі де бірін-бірі қия алмаған дос сияқты бір күнде көз жұмып, бұл тірлікпен бір күнде қоштасты. «Шіркін-ай, екеуі де әулие екен-аяу» деп еңірегендеге, елдің

қабырғасы қайысқандай болған.

Аққұлдың соңғы сөзі де, соңғы өсиеті де біреу еді. Ақырғы демі атына арналды: - Өле кетсем денемді «Көкшолақтың» терісімен ораңдар, - деп көз жұмды ол.

Аққұл атам өзінен соң «Көкшолағының» біреуге қалатынына қайғырып көп жатыпты. Ат пен адамның шыбын жаны егіздей, ақыры екеуі де бір күнде үзілді. Енді сол жайлы аздал әңгіме қозғасам деймін.

Әжемнің тұңғышы Айша деген қызы еді. Ол менің әкемнен он жас үлкен болатын. Осы үлкен әпкемізді Қазығұрт етегіндегі Шегір руының Жантөре деген жігітіне ұзатқан

екен.

Жездемнің ауылына бару үшін алдымен Шақпақ асуынан асатынбыз. Орыстар бұл жерді «Кремень» деп атайдын. Өйткені бұл араның жылтырақ шақпақ тасы мол болушы еді.

Қараңғыда екі тасты бір-біріне үйкесен, ұшқын шығатын. Содан қазақтар «Шақпақ», орыстар «Кремень» деп атап кетіпті.

Шақпақтан өткен соң, Майлыкент, Тұлкібас жазығын басып өтіп, Қарақшы белден асасын. Соңан соң Машат ойпаңымен жүріп отырып, Ақсу бойын жағалайсын. Ақсу десе - ак су. Соңан тау шыңынан басталатын өзеннің бүкіл арнасы ақкөбіктеніп арқырап жатқаны.

Ақсудан өткен соң, Сайрамнан асып, Ленгер арқылы Қазығұртқа жететінбіз. Ауыл мен Қазығұрттың арасы атты кісіге үш күншілік жер. Қазығұрт жайлы айтылатын аңызды тілі шыққан баладан бастап елдің бәрі билетін.

Сөзінде бұрынғының бар ма жалған,

Басында Қазығұрттың кеме қалған.

Басында Қазығұрттың кеме қалған,

Болмаса ол әулие неге қалған.

Тұбінде жетім бала бұғып жатып,

Жарықтық адам ата содан қалған, -

деген өсиет өлеңді жас кезімізде әжемізден, аталарымыздан, әкелерімізден талай естігенбіз.

Бұл аңыз адамның жанына жылы тиетін, көкейінді сәулелендіретін аңыз еді. Еске сала кеткен артық болмас деймін.

Ертеде жер бетін топан су қаптап, тіршіліктің бәрін толқын жұтыпты. Осы сұрапыл ажалдан өмірді қорғап қалам деп Нұқ пайғамбар арпалысқан еken. Кеме жасап,

жан-жануардан түкым алып, адамдарды отырғызып, топан суда жүзе беріпті. Су болса қырат-қырды, жазық жапанды жұтып, биік шындарға өрмелепті. Нұқтың кемесі тоқтайтын жер, паналайтын ықтасын таба алмай, толқын үстінде шарлай береді, шарлай береді. Толқын болса, жалғыз кемені жапыраққа да теңемей лақтырып ойнайды.

Нұқ пайғамбар тірлікten үміт үзбейді. Дауыл басылар, топан қайтар, өмір жанданар деп сенеді. Сол сенімді нысана етіп қалқи береді. Дауыл кездерінде кемеден жанқаша қағылып қалған көп жан-жануар суға кетеді. Сонда да кемеге таяныш табылмайды.

Осындай қысталанаң кезде тау шындары таласқан еken.

- Менің кеудем биік, менің асқарым айбынды. Топан су маған ғана жете алмайды, мені ғана көме алмайды. Нұқтың кемесі іліксе, менің ғана шыныма ілігеді, - десіпті биік шындар.

Қазығұрт Алатаудың аласа жоны ғана ғой. Биік шындармен таласа алмай үнсіз мұлғи береді. Мұны көрген шындар мазақтап күлген еken:

- Немене, Нұқтың кемесін қүте-қүте шаршадың ба? Саған тоқтайтын шығар. Өйткені көп ұзамай топан судың астында қаласың ғой, - десіпті.

- Тағдырдың жазғанын көрерміз. Одан артық не бар? - деп мұңайыпты Қазығұрт. Осылайша Нұқтың кемесі бір дауылдан өтіп, екінші бір дауылға көміліп келе жатқанда, ішіндегі жан-жануар суға кетіп таусылуға айналған еken. Кенет кеме түбі қатты нәрсеге тиіп, сықыр ете қалғандай болады. Нұқ пайғамбар байқап қараса, кемесі бір таудың басына іліккен еken. Содан топан су толастап қайта бастайды. Кеме ішінде жалғыз бала бұғып жатқан еken. Тіршілік қайта жанданып, осы жерден қайта өрбіпті десетін аңыз айтушылар.

Айша әпкем сол аты аңызға айналған Қазығұрттың баурайында тұратын. Біздің әулеттің » қыздарының ең алысқа кеткені де - осы әпкем. Сондықтан сағынысып көрісетінбіз.

Жантөре ерте үйленіп, әйелінен ерте қалған еken. Өзі он алтыға шыққанда, он бес жасар әйелі толғақ үстінде өліпті де, артында Болат деген ұлы қалыпты. Менің атам Жантөренің

әкесімен алыс-берісі бар, сыйластығы жарасқан жандар еken. Жантөренің бұрынғы әйелі де біздің рудың қызы болатын. Аққұл атамның немере әкесі еді. Атам бұрынғы жегжаттығынан ажырасқысы келмей Айшаны ұзатыпты.

Ол кезде әпкем он жетіде еken. Осылайша қайтадан сүйек жаңғыртыпты.

Жантөрені әкесі ерте үйлендіріп, он төрт жасында-ақ күйеу бала атандыған көрінеді.

Жантөре мен Болат тетелес өскендей болыпты. Сұңғақ бойлы, шымыр денелі, ат жақты қараторы кісіні Жантөренің баласы деу қыын еді. Інісі сияқты тізе түйістіріп жүретін. Ел іші ол екеуін «тете шал» десетін. Ал айқындалап ажыратқысы келсе, «әке-шал» «бала-шал» деп бөлетін. Жантөре мен

Болат кәнігі көкпаршылар еді. Көкпар десе көздері жайнап шыға келетін. Аққұл атам сияқты өз аймағында атағы жер жарған шабандоз атанаып жүреді екен. Тіптен нағыз додада екеуі әкелі-балалы екенін ұмытып кетіп, кәдімгі әріптес шабандоздарша сілкілесетін көрінеді. Ел мұнысына әрі қызығып, әрі қызғанып қарайды екен.

Ол күні біз төрт көзіміз түгел үйде едік. Күн екіндіге таянып қалған. Айнала албырттанып, аспанда қызыл арай молая бастаған. Біз үй іргесінде отырғанбыз. Алыстағы қырқадан төрт аттылы көрінді. Бәрі де батар күннің алдында зорайып, қарауытып көрінеді. Баяу жүріспен қатарласа тізіліп келеді. Орталарында ақ жаулықты жалғыз әйел. Бәрі сол кісінің

ыңғайына қарайтын сияқты.

- Бұл кім болды, екен, ә? - деп әкем елең ете қалды. Қолын маңдайына апарып, тесіле қарады. Соң соң көкеме бұрылып әмір бере бастады. - Шамасы, Айшалар, әпкемдер болу керек. Жүгір, Момынқұл, алдынан қарсы ал. Үйге киіз салсын де. Осыны айтып әкем тағы да жолаушылар жаққа көз тікті. - Иә, Айшалардың өзі екен. Эне, анау Жантөре ғой. Атқа отырысынан танып тұрмын. Ер үстінде еңкіштеу отырғаны Болат. Ал анау тыптырышып келе жатқаны Асқаржан ғой. Ұлken үйге түсіріндер. Бол-бол тез. Келіп қалады енді. Кіші үйге әпкем түспейді. Тез қамданындар.

Жолаушылар ат шаптырым жерге жақындалап қалды. Әкемнің айтқаны рас екен. Келе жатқандар әпкемдер болып шықты. Айша жирен биені жорға бүлкілге салып келеді. Өзгелері қоршай қаумалап майда желістен ауар емес. Әпкем астындағы ат тұяғы туған жердің топырағын, баба жерін, ел мекенін басқанына масаттанып, кәрі кеудесін маңғаз көтеріп келе жатқандай еркін отыр. Сырт қараган кісіге әлдебір тәкаппар қатал әміршіге ұқсайды. Ал төңірегіндегі ер кісілер соның қошеметшілері сияқты.

Әкемнің жүзінде күлкі ойнап, әрең шыдап тұрды да, әлдең соң елбелектеп жүгіре жөнелді. Сол күйі әпкемнің тізгініне жармасты. Кемпір лезде босап, еміреніп кетті де, иегі кемсендеп інісіне телміре қарап тұрып қалды. «Айналайындар, алтындарым» дей береді.

Әкем де тізесі қалтырап, тұк сөз айта алмай, Айша әпкемді қолтықтады.

- Аттан түсінізші, әпке. Жол соғып, қажып қалмадың ба, айналайын қамқоршым менің. Арқалап жүріп өсірген едің. Келші өзім қолтықтап түсірейін, - деді әкемнің дауысы

жарғышақтанып.

Інісінің мына сөзі кемпірдің жүйкесін тіptен босатып жіберсе керек, көзіне жас алған қүйі, әкемнің созған қолына аунай берді. Әкем ол кісіні көтерген қүйі жерге түсірді де,

құшақтап жұбата бастады.

- Қойынызышы, әпке. Шаршап қаласыз ғой. Шүкір, аман көрістік. Неге сонша босайсыз, үйге жүрініз. Тынығынызышы.

Келте мұрын, томпақ көз, сүйір иек, жұка ерін ақ сұр кемпір бәсен ұнмен інісіне жұбату айтып тұр:

- Алтын апамнан айырылып жетімсіrep журмісің, құлымын?

Мына сөз манадан бері әрең шыдап тұрған қөкемнің тығынын ағытып жіберсе керек, еңкілдей жылап Айша әпкемнің қеудесіне басын сүйей берді.

- Қой енді, Айша. Басу айта ма десем, жасу айтып тұрғаның не? - деп сөзге екі беті нарттай, аппақ сақалды әдемі шал араласты. - Апам жарықтық жақсы адам еді ғой. Топырағы торқа болсын, кім жаман көрінгенінен өлімге қиды дейсің. Тағдырдың жазғаны сол шығар. Ағайындарынды қайта-қайта жасыта беріп қайтесің? - деді әлгі шал бәріне тоқтау айтып. Бұл Жантөре еді.

Шетте тұрған арық шал - Болат болатын. Ол да әпкеме:

- Апа, мұныңыз не, ауылдан шығарда, өзіме берік боламын деп уәде еткениңіз қайда? - дейді жымылып.

Жарау қара сәйгүліктің тізгінін ұстап күлімсіrep тұрған мұрынды, қияқ қасты, қысық көз, қара торы, өрімдей көрікті жігіт Айшаның ұлы Асқар еді.

Біз сияқты бала-шагаға көніл бөлуге кезек жетпей келгендер үлкендермен әлі шүйіркелесіп тұр. Тек амандық сұрасып, әбден жайғасқан соң ғана әпкем айналасына көз салып еді. Әлгінде ғана әкемді жас балаша аймалап, елжіrep тұрған көңілшек кемпірдің ойына енді түссем керек, қасына шақырып алды да, мандайымнан сипады. Тіл-көзден сақтасын деген ырымын істеп, жан-жағына түкірінді де, әкеме тіл қатты.

- Сенің ұлың осы ма, Момыш? - деп сұрады. - Менің де тентек немерем өсіп келеді. Аллаға шүкір.

Бүкіл ауыл «әпкелеп» жапырыла күткен кемпірдің тіptен атымды да ұмытып қалғанына қатты өкпеледім. Қайта Болат көніл жұбатар сөз айтты.

- Аманшылық болса, бұл әлі жігіттің төресі болар, - деді арқамнан қағып.

Әкем осынау қуанышты кездесудің әсерінен әлі арыла алмай отыр. Жантөре әпкем екеуінің бүгінгі қылышын мысқылдан қояды. Болат сөзге оқта-текте қосылып әдел сақтап отыр. Асқар әлі аузын ашқан жоқ. Қөкем қонақтардың қамын ойластырып сыртта жүр.

Шай алдында Айша әпкем өзімен келген қоржынын алдырып, аузын сөкті. Бала-шаға өрік, мейізге қарық боп қалды. Әйелдерге көйлек әкеліпті. Көкем екеумізге кестелі тақия кигізді. Әкеме қаракөл құлақшын тігіп әкеліпті.

Жанына отырғызып алып, жас балаша аузына өрік-мейізді тықпалай береді. Жиналғандар бұған ду құлсіп жатыр.

- Кемпір-ау мынауың не? - дейді Жантөре кеңкілдей күліп. Онан да балаларға үlestірмеймісің, - дейді.

Әпкем жездеме:

- Алдымен Момышжанның тилемелісін өз қолыммен жегізейін. Өзгесін кімге берсендер де жұмысым жоқ...

- Момекеннен балалары тартып жер деп қорқамысыз, - деп күлді Болат.

Әкем мәз болып күлді де, әпкемнің қолынан базарлығын алды.

- Бәрін осы шырағым үшін әкелгем жоқ па? - дейді кемпір шынымен-ақ. - Өз қолыммен жегізбей көңілім тынбайды.

Осылай мәз-мейрам болып жатқанымызда, Аққұл атам келді. Меймандармен құшақтасып көрікен соң, ол Жантөренің қасына барып отырды.

Амандық-есендікten соң Аққұл аз қысылып отырды да, әпкеме қарап тіл қатты.

- Айналайын, Айша апа, мен бұл шаңырақтың алдында айыптымын. Бетім қүйіп келе алмаушы едім. Өзініздің хабарыңызды естіген соң шыдай алмадым. Бет моншағымды

белге түйіп, босағадан әрен аттадым. Сізге сәлем бергелі келдім, апа. Арамызда болған ыңғайсыз жайды естіген шығарсыз. Бәріне кінелі - аппақ сақалыммен өзім болдым. Сөйтіп қас масқара болған жайым бар.

Жантөре жер шұқылап үнсіз отыра берді. Болат ауыр күрсінді де дастарқанның шетін уқалай берді. Асқар баяғы қалпынан ауған жоқ.

- Келгенің жақсы болды, Аққұл. Ризамын, - дей берген әкемнің сөзін бөліп жіберіп, әпкем ашумен айқайлап жіберді.

- Қайда әлгі үя бұзған үятсыз, шірік, - деп жұдырығын түйе сөйледі. Көкем самауыр алып келе жатқан.

Табалдырықтан аттай бере естігені қарғыс пен қарақұйын ашу болды. - Сен шірікті біздің үядан үшты деп кім айтады? Бойыңды шайтан жайлаған сүмелек. О! О! Өлер

шағымда естиін деген сөзім бе бұл, көрейін деген сорым ба? Шыққыр көзім кімді көріп тұр? Онан да жер жұтып кетпеді ме сені. Бір жатырдан шығып ек, бүгін келіп бетіме қара қүйе жаққаның ба, жүгермек? Өлім-ай. Өлім-ай!

- Айша! - деп зілдене сөйлеген Жантөрені әпкем елеген де жоқ.

- Құдай-ау, мен енді Айша емеспін, адасып қалған бейбақпын, - деп көзіне жас алды. - Мына қарабет албастының әпкесімін ғой. Бетіме салық етіп жүрерсің. Осында қалдырып кет енді, - деп ол қатпар-қатпар әжімді қолын көкем жаққа сілтеді. - Тыфу, тыфу, кәпір. Бетің күйсін, жузіқара.

Көкем ан-таң боп тұрып қапты. Кемпір онан сайын ашуланып барады.

- Құдай-ау, бүйткенше неге алмайсың мені? Кіндік кескен шаңырағымда отырып қас масқара болғаным ба, шынымен? - деп өзін-өзі жерлей сөйлемеді. - Не жазып ем, тәнірім-ау! Жоғал, жоғал көзіме көрінбей. Сен де бір шіріген жұмыртқасың, - деп көкемді сұқ қолымен туýрей

нұсқады.

- Момынтай, бара қойшы, шырағым, - деді әкем түкке түсінбей аңырып тұрған көкеме. - Әпкем мән-жайға түсінбей жатыр. Ашуына тие бермей-ақ далада журе тұршы.

Көкем мойны салбырап сүйретіліп шыға берді. Үлкен сыйлаудың ең биік үлгісін көрсеткендегі еді көкем. Мен оны қатты аядым. Соңынан еріп тысқа мен де шықтым. Байғұс көкем аулада мен-зен болып, жүзі күнгірт тартып, ызадан жарылардай боп тұрды...

Кішінің құні осы екен ғой. Әжем Момынқұлға кеюші еді. Серкебай нағашым келген сайын қамшы үйіретін, тіптен әкем де бірде оны «ақымақ» деп үрысқан. Ал бүгін мынау тәмпіш

кемпір апшысын қуырып алдынан қуып шықты. Көкеме қалай да қол ұшын беріп, арқалаған ауыртпалығының, көтерген соққысының жарымын бөліскім де келеді. Бірақ көкемнің қасында, мен де кішімін ғой. Бірдеме деп зекіп тастаса қайтем. Көкем сонау алыс көкжиекке мұңая қадалып

қимылсыз тұра берді. Әлден соң менің қасында тұрғанымды сезіп, жай ғана сөйлемеді.

- Бара ғой, Бауыржан. Ішке кір, әкеңе шай құюға көмектес...

Ішке кірсем, бәрі де үнсіз шай ішіп отыр екен. Бір-біріне қарауға да қаймыққандай, кеседен бас алар емес. Әпкемнің жүзі қуқыл тартып кетіпті. Ашу үстінде босқа

балағаттағанын білген соң, іштей қиналып отыр-ау, шамасы. Әйтеуір ыстық шайды үсті-үстіне өшіге ұрттайды.

- Мәселенің мәнжайын алдын ала неге түсіндіріп қоймайсың, - деп әпкем енді әкеме тиісе бастады.

- Ойбай-ау, әкпе. Аузымызды ашуға мұрша бермедіңіз ғой.

- Мұның бәрі әзәзіл сөзге еріп, түсінбестікке ұрынғанның кесірі, Айша апа,- деді Аққұл күрсініп. - Өсек сөзге еріп қалдық қой... Келінім де бірбет еді. Кешіре алмады. Бұл оқиға өтірік болмаса, мына киелі шаңыраққа бас сұғар ма едім. Кешірім сұрағандай келіп отырмын ғой.

Ал, өзіме сол керек еді. Алжыған қақбаспын ғой,- деп Аққұл енді өзін кінәлай сөйледі. - Келінім кетіп қалды. Артынан адам жіберіп, алдына жығылып ек: «Мені аямаған, менің ұттымды ойламаған, арымды аяққа таптаған үйге енді бас сұға алмаспын», - деп қайтарыпты.

- Сендер әйел баласын аяусыз қорлапсындар, қатыгездікпен қаралапсындар, Аққұл,- деді Айша әпкем енді солай бұрылып. - Эйелді қорлау үшін көп ақылдың керегі жоқ.

Бәріміз де өсек сөз бен әзәзіл отқа күйіп кетуіміз мүмкін. Сен кәрі төбетке не жоқ, қалайша жерге кірмей, тірі жүрсің? Өз қолыңмен келінінді қуып тынған қу томар екенсің ғой.

Әпкем Аққұлды жеп жіберердей шүйлікті. Аққұл болса тауы шағылып, маңдайы тасқа тиіп, әбден сұлесоқ болған кісідей тұнжырап отыра берді.

- Мені алжастырып жіберді ғой, Айша апа. Ашу үстінде ақылдан айрылып қалғанымды кейін білдім.

- Ал енді өз қотырынды өзің қасып мәз болған шығарсың, - деп кемпір улы тілімен шағып алды. - Бейбақ болған баласың ғой, әншейін.

Алпыстағы «бала» әпкесінің ұрысқанына ләм дей алмай, ұнсіз шайын ұрттап, кесе түбін тықырлата берді.

- Бишара Момынқұл айналайынды жерден алып, жерге салғандай ұрыстым ғой мен алжыған. Сонда да аузын ашпады ғой, мың болғыр шырағым, - деп Айша әпкем енді көкемді аяп көзіне жас алды. - Әдеп көрген бала емес пе, алдында қарсы тұрмады ғой. Сүт кенжеміз емес пе? Еркелетіп әлдилеудің орнына, ал кеп төпелейміз. Сонда да мыңқ етсейші, шырағым. Көзі жәудіреп, аңтарылып тұрғаннан басқа не біледі, күнім.

Айша әпкем енді шындал жылай бастады. - Шешемнің сүт кенжесін суға тиген мысықтай тұртпектегенім не менің! Алжыған басым «үйден шық!» деп зекігенімде, ұнсіз томпандал шыға берді ғой, шырағым.

- Қой, енді, сонша термелеп не көрінді саған? - деп Жантөре қатқылдау айтты. - Өзің ұрысып, өзің жыладың. Ешкім бетіңе келген жоқ. Енді тағы да өзінді-өзің кінәлап жасқа булығып отырғаның. Аздал ұялсаңшы.

- Сен өйтіп білгірсіме, былай! Бұл үйде мен сениң қатының емеспін! - деп ықылықтады әпкем. - Өзімнің кіндік кескен шаңырағымда, ата-анамның құтқана мешітінде

сен өйтіп қожаңдама. Төркінімде мен саған қатын емес, «қалыңдығыңмын». Соны да білмеймісің.

Осыны айтқанда, үйдің іші ду күлісті. Тіпті Асқардың өзі ішін ұстап, домалап жатыр.

- Эдепті күйеу болып жөніне отырсаңшы, - деді әпкем тағы да елді күлдіріп.

Жантөре тізесін алақанымен салып қалды да, жинақы қозғалып, жүрелеп отыра кетті. - Міне, ақылыңнан айналайын кемпірім-ау, баяғыдан сөйтпеймісің, - деді де лезде даусын өзгертіп, ұялшақ жігіт болып сөйледі. - Не деген көрікті едініз? Үйдің ішін нұрландырып тұрған сіздің ажарыңыз ғой! Жұрттың бәрін бұлбұл үніңізбен баурап алдыңыз. Қашанғы сайрап екенсіз, Айша? - деп әзілмен бастаған сөзін қатқыл ұнмен аяқтады, - Өзінді аяmasаң да, мына жиналған ағайындарды аясаншы.

Осы кездे үйге көкем кірген. Үйдегілердің әңгімесіне сырттан құлақ тосып тұрса керек. Қолайлы кезді күтіп тұрып, енді ішке енген сияқты. Көкемді көре сала, Айша әпкем қайтадан көзі мен сөзіне ерік берді.

- Бері келіп отырши, құлыным. Қасыма отырши, жаным, - деп жаулығының ұшымен көзін сұртті. Қолындағы кесені ұсынды: - Мә, Момынтай, өз қолыңмен шай құйып берші,

бауырым.

Әпкесі мен інісі осылайша ұғысып, табысты. Көкем кесені құрметпен алды да, қол құсырып қайта ұсынды.

Мұнан кейін әпкем еліне кеткенше біздің бәрімізді бір шыбықпен айдағандай әмір беріп отырды.

- Бұл шаңырақта дүниеге ең алғаш өзім келгем. Қуанышты ең алғаш әкешешеме өзім бергем. Ең алғаш аялағаны да өзіммін. Сондықтан менен үлкен қайсың бар, кәне? - дейтін әпкем.

Біздің үйдің адамдары бұл сөзге дәлел таба алмай, бәрі де осы тәмпіш кемпірді құрақша жапырылып күтетін.

* * *

Жантөрелер үйімізде бір түнеген соң, қолға тимей кетті. Әр шаңырақ шақырып, мал сойып, мамыражай болып күтеді. Біз меймандардың шашбауын көтерісп топталып ілесеміз.

Аққұл атамның немере інісі Дембай ұлды болды. Осынау жалпақ бет, үйрек тұмсық, жирен сақал, қисық аяқ қысқа кісі мен дүниеге келмей тұрып үйленген екен. Әйелі ұзын бойлы, арық келген сіріңке қара кісі. Ауыл әйелдері оның бойына қарай «сырық» деп атап кеткен. Көп уақыт бала көрмей, нәресте сүймей, екеуі де әбден

қайғырып жүреді еken. Құрсақ көтергеннен екеуі де құрақ ұшып, тәніріне құні-тұні жалбарынып жүріп көрген жалғыз ұлы осы. Бұл қуанышты құнге жеткенше екеуі қанша толқып, қанша дегбірі кетпеді дейсің. Тұн ұйқысын төрт бөліп, тілек тілеген кезеңдері де болыпты. Содан әйелі толғатып босанар құні Дембай бүріскең торғайдай үй сыртында бір уыс болып үнсіз отырып алыпты. Іштегі әйелдердің бірі жүгіріп шығып, «ұлды болдың, сүйінші» дегенде Дембай әлгі әйелді қалбалақтап кеп құшақтай алыпты да, мойнына

асылып емірене егіліп жылапты. Көптен күткен қуанышын ол осылай жария еткен еken. Мұны көрген өзге кісілер де шыдай алмай, қосыла жыласа керек. Дембайдың қуанышын құттықтауға да мұршасы келмей, ықыластарын шын пейілден шыққан көз жасымен көрсетіпті. Басына күтпеген

жерден қона салған мұнша бақытты көтере алмай есенгіреп қалған Дембай далбалақтап әркімді бір құшақтайды.

Әркімнен бір сұрайды:

- Шын айтасындар ма, жұртым-ау? Әке болдым ба, шынымен? Ұл көрдім бе? Үмітім жанғаны ма, халқым-ау! Е, айналайын жаратқан ием, көз жасымды көрген екенсің ғой. Жарылқадың ба, шынымен! Тоба! Тоба! - деп ол әркімнің қеудесіне басын сүйеп тұрып алады.

Біздің ауылға да сүйінші сұрап, елбе-делбесі шығып, бір бала жүгіріп келді. Әр сөздің аяғын жұтып, ентігіп әрең тұр. «Сұ-сұ-йінші! Сүйінші!» «Де-ем-бай кө-кө-ем ұлды болды»

- деп әрең айтты. Сонан соң ол Айша әпкеме тілегін білдірді.

- Аққұл атам сізге сәлем жолдады, Айша апа. Өзініз кіндік шеше, ал Жантөре жездем өкіл әке болсын деп сұранды...

Біздің үй тайлы-тұяғымен көтерілді де, Жантөре мен Айша әпкеме еріп Аққұлдың ауылына бет алды. Ауылдың ошағынан будақтаған тұтін молайыпты. Шамасы, шілдехана тойын бүгіннен бастамақ сияқты. Бір-екі жігіт үй арасында қой сүйрелеп жүр. Біз салтанатпен сабырлы келе жатқан Айша апамның қатарынан озбай әрең шыдаймыз.

Аққұл ауылының адамдары түгел жиналып, бізді күтіп тұр еken. Әйелдер абыр-сабыр болып, әр үйге жүгіріседі. Әйел қауымы қашан да осы ғой, шіркін. Қайғы болса шын

жүректен қайғыра алады, қуаныш болса бар ықыласымен қуанады. Адам көнілінің айнасындағы ғой әйел деген.

Аққұл атам аппақ түйежүн шекпенін жамылып топ ортасында тұр еken. Шекпенінің етегі кең болғандықтан тобығына дейін бүркеп тұр. Алыстан қараған кісіге ақ тастан қашалған ата мұсіні сияқты сезіледі. Жиегі жалпақ ақ қалпағы да біртүрлі сұс берін, атамды айбарлы көрсетеді.

Біз жақындағанда бергенде, әлгі тас мұсіндей тапжылмай тұрған атам алға қозғалып еді, қасындағылары да бізге қарай лап қойды. Елпектеп тез жүргенмен шекпенінің етегі желбіреп келеді. Манағы көз алдында елестеген сұсты мұсін енді қәдімгі өзіміздің қарапайым атамызға айналғанына таңырқағандай едім.

- Армысыз, әпке, - деп Айшага ентелеі қол созды.

- Қуаныштарың ққтты болсын, карактарым. Ұзағынан сүйіндіре көрсін, құлындарым, - деп Айша апам да елжіреп амандасты.

Бәріміз жапырласып құттықтап жатқанымызда, көрші отаудан Дембайдың өзі жүгіріп шықты. Тәттіге ұмтылған баладай арсаландалап, мойны бұлғақтап келеді екен. Қисық аяғы осынау жүрісін онан сайын теңсeltіp біrtүrlі қораштау көрсетеді.

- Айша апа! Айша апа! а-а-а! - деп еркелей келіп, әпкемнің құшағына енді де кетті. Әпкем оның басынан сипап, қәдімгідей жұбатып тұр. Бірақ Дембай ықылықтап болар емес.

Тұс-тұстан құтты болсын айтуда келген адамдар мол жиналды. Әйелдер дастарқан көтеріп мәре-сәре болысып жатыр. Сол бойы олар жұртқа бауырсақтан шашу шашып ерекше қуанысады. Елдің бәрі шашуды жерден теріп, кейбіреуі қағып алып жеп жүр.

Той осылай басталып та кетті. Балаға үшінші күн толғанда Дембай көкпар берді.

Көкпар күн көзі қайтып, мамық шуағын масайрай төгіп тұрған сэтте - бесін кезінде басталады.

Жантөре, Болат, Асқар және көкемдер ешкімге сенбей, аттарын өзі ерттеді. Ұзенгісін қысқартып, тартпаларын нықтап тартты. Бәрі де сәйгүліктерінің сауырын сипап, жонын қағып, мәпелеп жүр. Шабандоздар сайланып біткен.

Осы жолы маған да жеке ат тиіп жетісіп жүрмін. Құнан шығар қара жирен айғырды көкем ерттеп мінгізген болатын.

- Өзіңе абай бол. Додаға жақындаш жүрме. Көкпарға әлі шамаң жоқ, - деп әбден пысықтап алды.

Мен қызыққа шеттен ортақтасып, сырттай көз тігемін. Жантөре мен ұлдары әбден кәнігі болған шабандоздар екен. Бір үйме-жүйме доданың ішінен әлгі сымбатты шал суырылып көкпар іліп шыға келді. Өзгелер іркес-тіркес соңынан қуды. Жантөре ер үстінде еңкейе жатып, көкпарды

ұршықша үйіріп барды. Аққұл атам той иесі болғандықтан, бұл жолы тілеулестер тобында тұрған. Жантөренің әр қимылына риза болып желпініп қалады.

- Әй, кәрі тарланым-ай! Тізгінді қалай менгереді десеңші. Мұндайда аттың өзі қыбырлаған қыбынан-ақ, ыңғайынды ұға біледі, - деп төнірегіндегілерге тұсіндіріп

тұр. - Атты қақпайламай, еркіне жібер. Тек қимылыңмен, тақымыңмен сездіре біл. Сонда атың өзінен-өзі үйлесіп отырады... О, сақалыңнан айналдым, Жантөре, - деді ол кенет шабандоздың тәсіліне риза болып. Жездем соңындағы құғыншылардан құтылу үшін, оларды өзіне жақындастып

алып ат басын ірке қойған екен. Екпіндектен шабандоздар жанынан зулап өте шықты. Сол кезде Жантөре атының басын кері бұрып алды да, мәреке қарай тұра тартты. - Міне-міне, көрдіңдер ме? Ескінің көзі осында болады. Біздің кезіміздің шабандоздарына кім теңесе алады, тәйірі?

Бұғінгінікі әшейін ермек қой.

Кенет шаршы топтан жириен айғыр суырылып шықты да, Жантөренің ізіне түсті. Байқасақ, Асқар екен. Ол әкесін қуып жетті де, «әке, көкпарды маған ұзатыңыз», - деп

дауыстады.

Жантөре шабысын ірікпей, серкені көтерген күйі баласына қарай атып жіберді. Асқар да әбден машықтанып алған ба, көкпарды допша қағып әкете берді. Қызықтаушы жұрт тағы да таңдайын қағысты.

Жантөре жанамалай шауып, ұлына әлденені нықтап үйретіп бара жатты. Осылайша әкелі-балалы екеуі қатарласа отырып, дүйім шабандоздарды ентелетті де қойды.

Қас қаққанша керемет оқиғаның күәгері болдық. Тізерлесіп шауып бара жаткан әкелі-балалы екі шабандоздың аттарына қанат біткендей қарғып барады екен. Сол күйі екеуі де арғы бетке бірдей түсті. Құғыншылар тұмсығы тасқа тигендей аттарының басын тежеп, антарысып тоқтап жатыр.

Сөйтсек, әлгілердің аттары тау толқыны қазып кеткен үлкен ордан қарғыған екен.

Жұрт әрі таңырқап, әрі қорқып жағаларын ұстасты. Сөйтіп түрғанда Жантөрелер арғы бетте тек ұлы екеуі ғана екенін анғарған соң, ордан бері қарай қайта қарғыды. Тағы да қосарласқан сәйгүлік аспанға қас қағымда оқша атылды да, қалқып келіп бергі жағаға түсті.

- Мыналар ертегінің ерлеріндегі ғой. Өзім тугалы мұндай батылдықты көргенім осы, - деді топ ішінен біреу.

- Астарындағы ат емес, самұрық құс шығар, сірә, - деді екіншісі.

- Жүрегім тас төбемнен шыға жаздағанын қарашы, - деді үшіншісі.

- Иә, жақсы атқа нағыз шабандоздар осылай әмір етпек. Шын шабандоздың сырын аты әу дегеннен үгады ғой, - деді Аққұл.

Жұрт бір сәтке дамыл алғандай еді. Шабандоздар Жантөре мен Асқарға бәсекелесе алмай аңтaryсып тұрған сияқты. Екінші айналымға Аққұлдың шыдамы жетпеді. Додага белсене кірісіп, қақ жарып суырылып шыға келді.

Жиналғандар енді Аққұл атамды мадақтай бастады. Осы кезде топ ортасынан Жантөре суырылып шықты да, Аққұл атамның ізіне түсті. Өзге шабандоздың бәрі қызыққа қарап

тұр.

Аққұл құйындастып жеткізер емес. Жантөре жете берсе, кілт бұрылып ұзап кетеді. Осындаі бір сәтте Аққұл атам ұршықша үйірле бергенде, Жантөре еппен келіп көкпарды жұлып әкетті. Қос кәрі тарлан көкпар өнерінің өрнегін көрсеткісі келді ме, енді бір-бірін көтермелеп барады.

Жантөре атын құйындастып өте беріп, серкені атама лақтырып еді, Аққұл допша қағып алды. Сейтті де, тай шаптырым жер құйындастып барып, қайта оралды. Сол екпіндеген күйі

Аққұл атам да Жантөргө серкені атып жіберді. Жантөре де іліп алды. Әншейінде шал деп, шамасыз деп мұсіркей қарайтын мықты жігіттер мына екі ақсақалдың қайта түлегендей жанданып, жонданып кеткеніне аң-таң болп тұр. Не де болса айқас үстінде ақсақалдармен тіреспек болып шабандоздар лап қойып еді, екеуі қатарласа тартысып, тағы да ордың арғы бетіне ырғып кетті. Қуғыншылар қиқуласып келе беріп ат басын амалсыз іркіп жатыр. Тек қана сондарынан

созылған шаң «ендігі кезек менікі» дегендей, тоқыраған ат легінен өте беріп ор үстін ақ түтінге көміп жіберді. Екі шал болса емін-еркін арғы бетте тартысып жүр. Өзгелер осынау қызыққа алыстан көз салып, амалсыз тыптыршиды.

Қос шабандоз енді бір-бірінің намысын қайрап, әбден ұшқындалп алған сияқты. Екеуден-екеу тіреспіп, әбден сілкілесіп жан дәрмен жағаласқа еніп кетіпті. Аққұл атам көкпарды тақымына басып жүйткі жөнеліп еді. Жантөре ұзакқа жібермей жетіп қалды. Серкеге қол соза бергенде, Аққұл атам лып еткізіп тақымына ауыстыра қойды. Жантөре егес жетегіне еріп со бойда Аққұл атаммен қатарласа берді де, Көкшолақтың жалынан асып барып серкеге жармасты.

Әріптесін екінші қапталдан күткен Аққұл атам бұлай боларын сезбесе керек, ерден ауа жаздал, серкені босатып алды. Жантөре сытыла бергенде атам қайта жармасты. Екеуі де ат басын еркіне жіберіп тік тартысқа көшкен екен. Әрқайсысы ерден ауып, аттың өзін таяныш етіп

тартысқанда, жүйріктері жантайып кетеді. Серке екі жүйріктің ортасындағы көпір сияқты көріліп қалған. Сәл босаса, аттар жамбастап құлайтындей. Айтқандай-ақ, кенет екі ат екі жаққа қанғалақтап барып, аяғын әзер түзеді. Үстеріндегі шабандоздар үзенгіге ілінген денелерін менгеріп ер үстінде тік тұрысты. Екеунің қолында да көкпар, екеуі де серкелі.

Жұрт аң-таң. Сөйтсек, ұзак сілкілесуге шыдамай серке екі бөлінген еken. Намыс кернеген кос шалды осылай бітістіргендей көрінді маған.

- Не деген қайрат!

- Шал деп жүрсек, шағылмаған болат еken ғой, - десіп жұрт гулесіп кетті.

Сөйткенше болған жоқ, екеуі бірдей біз жаққа ат басын бұрды. Енді ордан қарғұға таласқан сыныайы бар. Жантөре Аққұлды куып жетіп, ордан қарғып кеткен. Аққұл атамның да аты секіре бергенін көргенбіз. Кенет ат та, шабандоз да көрінбей кетті.

- Ох, тәнірім, жазым болмағай, - деп шу ете қалды жұрт.

Бәріміз ат қойып жетіп келсек, алдымыздан жаңа ғана қопарылыс болғандай бір шынырау шаңытып тұр еken. Шынырау тұбінен аттың қырқыраған үні естіледі. Атам су

үнгіп кеткен апанға құлаған еken.

- Тез-тез шылбырдың бәрін шешіндер, - деді Жантөре жалма-жан оқыс дауыстап.

Сол-ақ еken, Жантөренің алдына сусыған қыл шылбырлар үйіліп қалды. Жездем дәл бір жылланың ордасында отырғандай шылбырды жалғастыра бастады.

- Бол-бол, тезірек қимылда. Ілмек жаса, - деп қасындағы Асқарды асықтырады.

Бұл кезде апан аузындағы шаң сейіліп, тұбі көріне бастаған. Кенет әлдекімнің даусы үрейлі шықты.

- Ойбай-аяу, Көкшолақ жауырынымен жатыр ғой! Төрт аяғы аспанға қарап тұр.

Жантөре жалма-жан аттың төрт аяғына да тұзак салып үлгерді:

- Тартындар, тек көтеріндер! - деп дауыстады.

Қалың топ Көкшолақты қаңбақша көтеріп шыққандай болды. Денесін шаң басып, аузы көбіктеніп, тұяғы дірілдеп, басын көтере алмай, бишара Көкшолақ теңкіп жатты. Үлкен

бадырақ көзі төңкеріліп, әлдекімді іздегендей көрінді.

- Жарықтық, иесін іздең жатыр! - деді біреуі.

- Эх-эх-эх-эх! - деп еніреп жіберді Дембай.

- Ақырын, қарақтарым, абыландар, алтындарым, - деп Жантөренің даусы төменнен қалтырап шықты. Қарасам бет-аузы қанға бөккен қыбырсыз Аққұл атамды құшақтап көтеріп келеді еken. Денем түршігіп кетті. Әлгінде ғана ат үстінде атой салып жүрген атамды дәл осылай қан жуып, шаңға көміліп жатады деп кім ойлаған?

- Үймелемей аулақ тұрындар. Ауа жұтсын, - деп ақырды Жантөре.
- Ой, ой, айналайын, әкетайым, - деп Жексембай зар еңіреп тұр.
- Мына жерге жайғастырайық. Көкшолақтың қасында болсын, - деді Жантөре баяу үнмен.

Суға кеткен шапқыншы да ауылдан оралды. Жантөре атамның басын сүйеп бетіне су бұрікті. Үлкен орамалымен қанын сұртіп, асты-ұстіне түсіп отыр...

Жасыл шалғын ұстінде қорқыраған Көкшолақ пен оның иесі Аққұл екеуді қыбырсыз жатыр. Қалған жұрт жандарын шүберекке түйіп, тілеу тілеп қалтырап тұр. Іштей жылап тұншығады. Көлбей түскен күн сәулесі атамның денесінен аққан қанды құлғіндендіріп жібергендей, біртүрлі үрей тудырады.

Аққұл әлі қыбырсыз. Жантөре басын сүйеп, кеудесіне құлағын тоса береді. Бетіне сұық су бұркіп отыр.

- Аққұл! Аққұл! - дейді қайта-қайта. - Естимісің мені?!

Аққұлда үн жоқ. Осылай өткен үмітсіз көп уақыттың үрейін қуып әлден соң атамның ерні қыбырлады.

- Аққұл! Аққұл! Қалайсың! - дейді Жантөре дамылсыз дауыстап. Аққұлдың кірпігі қимылданап, көзін әзер ашты.

- Сенбісің, шырағым? Қасымдамысың?

- Иә, Аққұл, бәріміз де қасында мызы.
- Ри-за-мын, - деп Аққұлдың үні бәсендей берді. - Су берші!

Жантөре атамның ерніне мұздай сұық бастау сүйен тосты. Атам мандытып жұта алған жоқ. Тек көз жасындағы мөлдіреген су атамның аппақ сақалын аралап, омырауына төгіле берді.

Атамның басы былқ-сылқ етіп, икемге келер емес. Құбірлеп әлденені айтқан болып еді, түсіне алмадық. Жалғыз ғана Жантөре аңғарған екен, тез әмір берді. Бір жігіт жүгіріп келіп Көкшолақтың ерін алды да, Жантөренің жанына қойды. Терлігін төсеп, ерін жастық етіп атамды

сонда жатқызды.

- Өз-өзіне келгенше орнынан қозғамайық. Ауылға жеткізе алмаспыш, - деді Жантөре бәсен үнмен.

Бұл кезде күн еңкейіп, Шақпақ жонынан асып барады екен. Айнала өрттей қызырып, біртүрлі айбарлы алау шашып тұр.

Імьарт үйіріліп, айнала күреніте бастаған шақта ес жинаған Аққұлды ауылға жеткізбек боп бәріміз жабырласып едік. Екі атқа керіп тартқан Көкшолақтың терісіне Аққұл

атамды жатқызып лек-легімізбен баяу ғана ауылға беттедік.

Ешкім үн қатқан жоқ, көңілді құлқі де естілмейді. Тек ат тұяғының тысыры ғана жүрек лұпілін жиілетіп бір түрлі қобалжып келеміз. Сол тұні Аққул өз шаңырағына түнеп шықты да, таңға жуық жарық дүниемен қоштасып еді.

* * *

Қолы бос кездерінде әкем өз бетінше оқытып, маған хат таныта бастады. Арабша еркін оқып, орысша сөз басын құрай біletіn болдым. Алайда бұл екі тілдің де мәніне жете

түсінбей, мағынасына жете мән бере бермейтінмін. Эйтеуір жеңіл-жеңіл есеп шығаруға құмар-ақ едім.

Биыл Гончаровтар бізben тағы да ортақтасты. Бұл жайлы жыл еді. Ел аман-есен, малдар күйлі, егін жайлы, жұрт сыйлы еді.

Бір күні Кузьма шал келді. Әкем екеуі жерді аралап шықты. Егінжайға келгенде ат үстінде тұрып бірнеше масақ жұлып алды да, күс-күс алақанымен үқалап уатты. Соң соң сапырылыстырып қауызын ұшырды. Алақанындағы моншақтай бадана дәнге қарап тұрып таңдана бас шайқады.

- Якши, Момыш, якши, - деді ол қазақша біletіn жалғыз сөзінің өзін жарытып айта алмай.

Әкем Кузьманың егін пісіпті, базар өткен соң, бүкіл үй-ішімізбен келіп, бидай орамыз дегенін қымылынан түсінді. Уәде бойынша беретін қойынды соң соң ала кетеміз дегенін де анғартыпты. Әкем де Кузьмаға жалғыз сөзбен жауап берді.

- Хараша, Козьма, хараша!

Айтқандай-ақ, апта өткен соң, Гончаровтар арба жегіп екі аттық лобогрейкасын сүйретіп келіп те қалды.

Қыстаудың басынан қырман сайлад, әйелдер шөбін шапты. Соң соң су құйып таптады. Біз Василий екеуміз арамшөптерді аулаққа апарып тастан жүрміз. Гончаровтың

ересек ұлдары бұл кезде біреуі тырманы жөндеп, бірі тасты қашап, енді бірі лобогрейканың жүзін қайрап жатыр еді.

Шалдың өзі көкем екеуі камыттарды тексерді. Әкем қол тырманы жөндеді. Осылайша кешке қарай бүкіл сауыт-сайманымызды әзірлеп ұлгердік,. Тишко мен Василь қойларын алып кету үшін бізben бірге ауылға еріп жүрді.

Біз келгенде, өрістен малдар да қайтқан екен. Әр үй малдарын бөліп алып, қораларына қамап жатыр. Көгендегі қозы-лақ, арқандаулы бұзаулар енелеріне ұмтылыш, азан-

қазан қүйге енген шақта келіппіз.

Мен қой сауған әйелдерге көмектесіп, қозыны алыстым. Василь де менімен бірге зыр жүгіріп жүр. Енелерінің желінің қақтап емген қозы, лақ, бұзаулар аздан соң емін-еркін

жайылдып бара жатты. Ымырт жабылғанда әкем Тишкины қораға ертіп келіп «тандаған қойынды ал» деді.

Василь бізben бірге қалмақ еді, Тишико көнбеді. «Қырман басына барып жатамыз» деп болмады. Алайда әкем сұраған соң бір тұнгеге қалдырып кетті.

- Ал, Вәсіл, бүгін сенен үлкен қонағымыз жоқ. Төрге шық, - деп әкем үйге алып кірді. Төрт көзіміз түгел отырып алдымен бауырсақпен қымыз іштік, сонан соң ет жедік...

Көрші үйдің баласы есіктен бас сұғып мені шақырды. Сөйтсем «ақсүйек» ойнамақ еken. Әкем «Василийді де апарындар» деген соң, бірге шықтык.

Тып-тынық қаранды тұн еken. Ауылдың балалары түгел жиналыпты. Біз келген соң, ойын да басталды. Ауылдың ересек кісісі «ақсүйекті» лақтырып жібергенде, бәріміз

қаранды тұнгеге сұңғіп кеттік. Жер бауырлап сүйекті тінтіп жүрміз. Кенет бір бала жүгіре жөнелді. «Ақсүйек» сонда екенін бәріміз де біліп қуа жөнелдік. Жетіп алып үйме-жүйме бол таласып жатырмыз. Ақыры бір жүйрігіміз мәреге жеттік-ау.

Бұл ойын кейін байқасам, балалардың қаранды тұндегі көкпары сияқты еken фой.

Василийге бұл ойын өте ұнады. Тіpten кезекті бір «ақсүйекті» іздеу кезінде ол ауыл балаларын алдаң та үлгерді. Ақсүйекті тапқан болып Василий зыта жөнеліпті. Өзгелеріміз соңына түстік. Бірінші болып қуып жеткен бала, біз барғанша, Василиймен жағаласып жатыр еken. Қанша айтқанмен құрметті қонағымыз ғой. Мен араша түсіп ажыратып алдым. Сөйтсем, Василий әлгі қуып жеткен баланың қолына «ақсүйектің» орнына ақтас ұстата салыпты.

Соған ыза болып төбелес шығарған еken. Бәріміз татуласып, әбден шаршап үйге қайттык.

Василий үйде қонақ болғанын, оны жақсылап күткенімізді, «ақсүйек» ойнағанын, төбелесте менің араша түсіп болысқанымды үй-ішіне айтса керек, сол күннен бастап

Гончаровтар мені іші тартып еркелете сөйлейтін болды. Бірақ әрқайсысы әртүрлі атап, атымды бүлдіріп бітті. Бірі - Бажан, бірі - Бардан, бірі - Буржан немесе Баржан деп тұрғаны. Ал ақкөңіл кемпір мені тіpten баласындау бауыр тартып, Буржан дейтін.

Егін орағы да басталды. Бір шетінен машинамен, екінші жағынан бел орақпен орып жатырмыз. Өйткені бұрын қол орақпен оратынбыз.

Біз Василий екеуміз әйелдерге қосылып қырманды әзірледік. Алдымен су сеуіп, сабан төседік. Сонан соң ат жегіп, таспен бастырдык. Әйелдер соңынан сабанның қалдығын

сыпрып таstadtы да, тағы да су септі. Қайтадан сабан төсеп, таспен жүргіздік. Тұс кезінде орақшылар келіп көргенде, шынымен-ақ мақтады.

Екі күн қатарынан астықты орып, үшінші күні қырманға тасыдық. Үш үйме астық жиналышты. Бесінші күні қырман бастыруға кірістік. Василий екеуміз ат айдаپ, тас бастырдық. Үлкендер сабанын қағып, шетке ысырып жур. Осылайша жұмыла еңбектеніп, үш күнде

қызыл көтеруге даяр тұрдық. Қырманда тау бол үйілген алтын дәнге бәріміз де қызыға қараймыз.

- Жиын-терінді көңілді аяқтап, ырысқа кенелгенімізге мал сойып, елге тараттық. Кешке Гончаровтар мен біздің үй асықпай-саспай, бажылдаспай-дауласпай емін-еркін отырып, тиесілі астықтарын бөлісіп алды. Гончаровтар бізді жексенбіге конаққа шақырып кетті.

Жексенбі күні ертемен Евгеньевка жақтан орыс шіркеуінің қонырау үні естілді. Ел базарға жиналып жатыр. Әкем мен көкем базарға мені де ілеңстіре кететін болды. Біздің қыстаудың жанынан өтетін қара жолмен мал айдаған базаршылар шұбап барады. Біреулер ат жетектеп,

біреулер қара мал қосарлап, бірі алдарына аша тұяқ уақ мал салып көңілді кетіп барады. Көкем сондай бір топқа төрт қой қосты. Біз сатпақпыз.

Базаршылар жарқын амандастып, жақсы тілек айттысады.

- Ассалаумағалейкүм, мал базарлы болсын.
- Алейкүм салам, айтқаның келсін.
- Сауданың сәтін берсін.
- Өзіңе де соны тілеймін.
- Мал пұлды бүйірсын!
- Періштенің құлағына шалынсын.

Осылайша бір-біріне игі тілек арнасып, дабырласып бара жатады.

Ол кезде қазақ үшін базар деген мал алып, мал сататын орын ғана емес, жүздесіп көрісетін, қол алысып, қошеметке бөленетін, тіптен сағынысып табысатын салтанат мекені

сияқты еді. Тіптен азын-аулақ дау-дамай, ауыл арасының бітіспей жүрген кірбені, келелі мәселелер де осындей бас қосуда шешілетін.

Жексенбі базары Бурное станциясының орталығында болатын. Айналасы ат шаптырым үлкен аланда адем деген құж-құж қайнайды. Алыстан көз салсан, ала-құла

сансыз доп дөңбекшіп жатқандай сезіледі. Кейде баяу толқын сияқты дамылсыз жылжып бара жатады. Құлағында ешкім

ұғып болмайтын біртүрлі гүжілдеген үн тұрып алады.

Осынау сен ішіне бір шеттен келіп біз де араластық. Базар шеті де қызық. Әр жерде шоғыр-шоғыр болып тізгін түйістірген аттар үймелейді. Кей тұста арбалар қаптап тұр. Бір шетте есектер азынайды. Екіншісі бөлек ауылдай бөлшек-бөлшек тірлік, әйтеуір.

Байқасам, базарға келмейтін жан жоқ еken. Алыс болыстың қазақтары, ала шапан өзбектер, тақиялы татарлар, күнқағарын басына киген қаба сақал орыстар, әр түсті әйелдер құмырсқаның илеуіндей құжынайды. Осы аласапыран, алабажақ, астан-кестен тірліктің ішіне сұнгідік те кеттік. Топ ішіне кірген соң, бағыт іздеп, басар жерді бағдарлаймын деу бос әурешілік еken. Сен қалай қозғалса, сен де солай жүре береді екенсін. Әйтеуір бет алдыңнан бір бұйымның кездесуі анық.

Байқасам, базар аумагының өзі ойдым-ойдым болып бұйымына қарай, сатар малына қарай жік тауып белінеді еken. Бір жерде қаз тізіліп, алдына бар дүние-мұлкін үйіп қойып өзбектер отыр. Бетіне қарағанның белін басып көріп, саудаға шақырады. Әлеміш бұйымдарын бұлғактатып, көзінді қызықтырады. Онан әріректе өрік-мейіз, жаңғақ-жармаларын сапырыстырған өзбектер жалаңдайды. Бір

бұйірде пияз-шөптерін бумарап орыстар отыр. Тағы бір жерде месті бұлк-бұлк қозғап қойып, қою қымызын кесеге лықытып қияқ мұрт қазақтар отыр. Сенмен бірге қозғалып жүре берсен, алдыңнан әнгелегін аспанға лақтырған қауыншылар шығады. Астық сатқан адамдар қабының аузын қайырып қойып, таразы мойнын тартқылайды.

Мал базары бұйірлеу тұста еken. Тұліктің түріне орай мұнда да қосақ-қосақ қой, қатарласқан жылқы, қайқы мүйіз сиырлар бөлек-бөлек. Сатушы мен алушы алақандарын сарт-сұрт соғып, бастарын дамылсыз шұлғысады. Араларында дәнекер боп дәм татып жүрген делдалдар қаншама!

Әкем алғашында мені адасып кетпесін деп жетелеп жүрді. Аздан соң бойым үйренгенін көріп, еркіме жіберді. Қолыма екі-үш күміс тенге де ұстартты. Тоқайласар жерімізді белгілеп, пысықтап қояды.

Мен өз билігім өзіме тиген соң, әр қатарға түсіп алып, базардың бұрыш-бұрышына дейін қоймай араладым. Осылайша орыстар отырған қатарды аралап таңырқап келе жатқанымда, біреу көзімді баса қойды. Мен бұлқынып босанбақ ем, оған болмады. Сөйтсем, өзімнің Василий досым еken.

- Жүр, - дейді ол қолымнан тартып, - анау жерде әкем мен шешем отыр. Соағн барайық.

Сөйтсем, бір шетте арбасын қарбызға толтырып, білек сыбанған Гончаровтар тұр еken. Сауданың қызғаны сонша Василийдің шешесі біздің келгенімізді аңғарған да жоқ. Біз досымыз екеуміз арбаның көленкесіне отырып бір қарбызды жарып жедік.

Біздің қарсымызда бір топ орыс жігіттері тізерлеп отырып алып, арақ ішуге кірісіпті. Одан шеткеріректе орамалдарын шарт түйінген күлімкөз орыс қыздары

сыбырласып күледі. Алдарында бұйра шаш, кестелі көйлегінің қисық жағасы жайлауға кетіп мәз болған орыс жігіті қобызын созып, ән айтады. Қыздар қылымсып, тылсым құлқілерімен арбап алғандай, әлгі жігіт айналсоқтап сол жерден шығар емес. Ақыры қыздарды биге тартып тынды-ау. Әлгі топ қыз мың құбылып, бірінен соң бірі жер тепкілеп әндегіп билей жөнелгендеге дүйім жұрт көпке дейін қызықтап тұрды. Біз осынау топтың арасынан әрең сыйылып

шыға бергенімізде, алдымыздан ұзындығы бір қарыс тәтті ұстаған өзбек шыға келді. Әлгінде әкем берген тиындар сол өзбекке бұйырды...

Осылай тәтті сорып, тамаша көріп келе жатқанымызда алдымыздан Аюбай жездем шықты. Ауылдың амандығын сұрап, әкемнің қай тұста жүргенін анықтады. Мені ауылына алып кетпек еді, Василий қонаққа шақырып койғанын айтты. Сонан соң ол екеумізді ертіп апарып өрік әперді. Ауылға сәлем айтты да, топ ішіне кіріп сіңіп кетті.

Тұс қайта базар тарқай бастайды екен. Жұрт сирепті. Мен Василиймен қоштасып, әкемдер жаққа бара жатыр едім, таные дауыс елең еткізді. Қарасам, сонау жылдары Убианның бетін ашқан Өтеп ақын екен. Қасында ерген екі жігіті бар. Өтеп ат үстінде тік тұрып, жар салып келеді:

Уа, жаңадар, жаңадар.

Құлақ сап маған қарандар.

Қарагер атты жоғалттық,

Кім көрді, қандай адам бар!

Иесі мына ер жігіт,

Жинайтын дәйім адал мал.

Күміс жал, күржік желкелі,

Құйрығы оның келте еді.

Құлыннан қолда өсірген

Қиқу көрсө көсілген,

Жүйрікке қошқар атаймыз -

Табылса, сақтап кесірден, -

деп тақпақтап, тәптіштен өтіп барады. Әлгі атын жоғалтқан кісі «бәрі дұрыс» дегендег бас шұлғи береді.

Бері қайтқанда Өтеп енді сол жағындағы жігіттің өтінішін айтып жар салды. Ол жігіт әкесінің жетісін бермек екен, соған елді шақырыпты.

Әкесі жақсы кісі еді,

Жетпістен асқан мүшелі.

Иманды болсын жарықтық,
Нұр жұмақ болғай түсері.
Кісі екен жүрер көпті ізден,
Тірліктे қалған текті із көп.
Келіндер, қырқын өткізбек, -
Өтінді ұлы жеткіз - деп.

Осыны айтып қан базарды қақ жарып өтіп барады. Мен «базар деген хабар-ошардың, жарлық пен жалпы жаңалықтың да орны екен-ау» деп ойлап ем...

Біздер базардан ол-пұл қарыштап, Евгеньевкадағы Гончаровтардың үйіне келдік. Бұған дейін орыс қыстақтарында болған емес ем. Әйтеуір жыбырлаған үйлерге сыртынан қарап өте беретінбіз. Енді көшелерін аралап, үйіне де кірмекпін. Жол бойы біз базардан қайтқан евгеньевкалық тұрғындардың біразын басып оздық.

Жолдың бәрі барынша сәнді киінген адамдарға толып кетіпті. Екі ерекк қеудесі алқам-салқам, шашы әбден ұйпаланған бір мас жігітті теңселтіп сүйреп барады. Анау болса тартыншақтап жүрмей, бар даусымен барқырап айқайлайды. Тіптен балағат сөз айтатын болуы керек, қыз-келіншектер құлағын басып зытып барады. Көкем әлгі масты таныды - «мынау бұзық Иван гой!» - деді қасынан өте беріп.

Иван да танып ұлгерген екен, жетелеп келе жатқан екеудің қолынан сыйылып шықты да, жерден тас алып бізге қарай лақтырды. Бұл тас көкемнің атының жамбасына тиді. Сол-ақ екен, көкем ат басын бұрып ұмтыла берді. Бірақ әкем қатты зекіріп тыйып тастады.

- Маспен егесіп мас боласың ба? - деп ұрысты. «Бұзық Иван» тағы бір кесекті атып жіберіп, біз жаққа жұдырығын түйді. Сөйтсем, ол көкем екеуі өртеден бері егесіп жүреді екен.

- Бұл ит атқа мініп қорықшы боп жүрген кезінде талай тиіскен. Сонда-ақ қамшымен сабап ем. Енді құдайға шүкір, бәріміз теңбіз ғой...

- Оттама! - деді әкем әлгі сөзді бөліп, - теңдік сен сияқты тентектердің төбелесі үшін берілген жоқ шығар..

- Өзі тиісе берсе, жұдырығына жон тосып тұра бермекпін бе? - деп қызына сөйледі көкем.

- Сәлем, Момыш! - деді осы кезде арбада отырған ши қалпақты кәрі орыс.

- А, Тимошка, аман-аман! - деді әкем де жымышп. - Неге қарайлап тұрсың?

- Ей-ей, мына ақымақты апарып салмасам болмас, - деді шал мастың қылышына ұялғандай қызарақтай сөйлеп. - Бір онбаган болды ғой. Базар сайын ішіп алғанда жүтірінады да жүреді албасты.

- Тимофей аға, - деп айқайлап келе жатыр екен әлгі мас. - Момынқұлды ұстаңыз. Мен оның мойнын бұрап алайын.

- Ал жүре беріңдер. Мұнымен байланысып абырай таппассындар, - деді Тимофей бізге масты нұсқап.

Біз ілгері озып кеттік. Тұп-тұзу көшесінің қос жиегін көк терек көмкерген Евгеньевка Алатаудың алақанында жатқандай көрінеді екен. Аппақ әдемі үйлерінің төбесі өркештеніп аспанға өрлеп тұр. Сабанмен жабады екен. Әр үйдің аумағы да, ауласы да үлкен. Тор темірмен қоршап қойыпты. Тек қақпаға кіре берістен көпір жасалған. Шыны терезелер күнге шағылысып, әлемнің сәулесін молайтып жібергендей сезіледі.

Әр жылғаны, бастау басын қуалап үрке қонған біздің ауыл Евгеньевканың жанында ойыншықтай көрінеді. Қатар түзеген еңселі үйлердің мысы басып біртүрлі бол келем. Үлкен қалалар да осы сияқты шығар, бәлкім.

Біз үшінші көшені кесіп өте бергенімізде, бір үйдің қақпасының алдында тұрган Тишкины көрдік. Шамасы, бізге қарайлаған болуы керек. Тани салып қол бұлғап қарсы жүрді. Осылайша Гончаровтардың ауласына да кірдім.

Балшықтан соғылған кең аула тап-таза екен. Қақ ортада тырнамойын құдық тұр. Гончаровтың балалары біздің аттарымызды жайғастырып жатыр. Ал кемпірі мен шалы үйге бастап кірді. Аппақ етіп

әктеген үлкен бөлмеде ағаш кереует тұр. Үстін қолдан тоқыған бұркеншекпен жауыпты. Бір бұрышта үлкен орыс пеші. Биік сандық, стол, екі ұзын отырғыш, үш-төрт пәкене орындықтан басқа жиһазы жоқ, жер еден үй екен.

Пеш қабырғасында ішекше созылып, ұзыннан-ұзақ кенеп орамал ілулі тұр. Ішке кіргенде бұрышта каптаған икондарға бірден назарым ауды. Көзімді алмай қараппын да қалыппын. Суреттің жиек темірлері жалт-жұлт етеді. Мұнда қабасақал ата құдай бейнеленіпті. Оның оң жағында сәби көтерген ана құдай. Сол жағында Айса пайғамбар. Бәрінен төменіректе басы салбырап, қолы қадаға керілген біреудің суреті. Жан

тұршігер азапқа түсіп тұрғаны жүзінен аңғарылады. Дәл соның түбінен, балауыз шам жағып қойыпты. Көмескі жарық осынау күнгірт бұрышқа еміс-еміс сәуле шашады. Әр суреттің жиегін дала гүлімен көмкеріпті...

Менің шектен тыс таңырқап отырғанымды сезген әкем, егжейлеп түсіндіре бастады.

- Мұның бәрі орыс құдайларының бейнесі, - деді әкем суреттерді нұсқап. - Осы суреттерге бәрі табынады. Анау ақсақалды шалы - Ата құдай, мына сұлу әйел - Айса пайғамбардың шешесі, қолындағы көтергені пайғамбардың сәби кезі. Ал мына сол пайғамбардың есейген шағы. Төмендегісі Айсаны діңсіздердің азаптағаны ғой... Әкем біраз ойланып отырды да, сөзін жалғады. - Әрине,

орыстар жаңсақ діннің жолында жүр. Әйтпесе өздері салған суретке өздері табынар ма еді. Адамды құдай жаратты, құдайды адам жаратқан емес, - деп бітірді.

Әкем мен Кузьма шал шаруа жайын әңгімелеп отырғанда да, мен икондардан көз алмадым. Бұл кезде дастарқан да жайылып еді. Стол шетінде ысқырынып бүйірлі самауыр тұр. Қемпір сұлгімен шыны-аяқтарды сүрте бастады. Екі келіні Манька мен Санька, пышақ, шанышқы әкеліп, нан кесіп жатыр. Піскен картоп, қара өрік қосқан созба қойылды. Ең соңында буы бұрқырап шөген қазан келді.

Гончаровтар құдайларының қасына барып шоқынды да, асқа келді. Қемпірі шай құйды. Шал әкемді дәмге шақырып ишарат білдірді. Тишка бұл сөзді аударып берді.

- Әкем мына дастарканның үстінде шошқа атаулының исі араласқан тағам жоқ дейді. Міне нан, мынау шекер, мынау картоп, жеміс - бәрімізге ортақ. Қазандағы - құстың еті. Сондықтан Момыш тартынбай, жиіркенбей, сескенбей, өз үйіндей отырып тамақтансын, - деп отыр.

Тишконың тілмаштығынан кейін шешесі күліп жіберді.

- Мыналарың не деп жатыр, Тишка? - деп сұрады әкем әлгі күлкіден қысылып.
- Бұлар Момынқұл дастарқанға құдікпен қарап отыр, - деп күліп жатыр, - деді Тишка бізге қарап күліп қойып.
- Ал дәм алыңыздар.

Дастарқан басында бәрі де көнілді отырды. Мені Василий далаға ымдалашақырып жүр. Әкемнен рұқсат алып, сыртқа шықтым.

- Біздің бар байлығымызды көрсетсем, жалықпайсың ба? - деп сұрады Василий босағадан аттай беріп-ақ.

Алдымен құдық басына келдік. Ол құдықтың қақпасын ашты. Төмен үңіліп қарап жатырмын. Құдықтың қабырғасы таспен өрілген екен. Түбінде көздей тұнық су беті көрінеді. Василий тырнамойын інмен қалайша су тартылатынын көрсетті. Суы әрі мөлдір, әрі мұздай екен. Сонан соң ол мені атқораға, онан соң қамбаға, содан кейін бау-бақшаға ертіп апарды. Екеуміз бәрін асықпай аралап шықтық. Мен

бұлардың бар шаруасы тындырымды, тап-түйнақтай, өте жинақы екеніне қызықтым. Біздің ауылдың тірлігі мұның қасында ретсіз дүниедей көрінді.

Мен енді шіркеулерінді көрсетші деп едім, Василий басын сипап тұрып қалды. Сонан соң аз ойланып:

- Жарайды, тағы бір келгенінде көрсетермін. Бүгін болмайды, - деді.

* * *

Күз жаңбырлы болды да, сұық ерте түсті. Айнала көктайғақ боп, көнілсіз сәттер көбейген сияқты. Жазда шаң, күзде қақаған қара сұық, қыста алай-тулей боран әкелетін құбыланың желі күшіне қайта еніп тұр. Осындай құндердің бір кешінде әкем менімен қәдімгідей ақылдасты. Оку жайлы

сөз қозғап отыр.

- Сені орыс оқуына берсем ғой, өмірді жетігірек білер едің. Орыс оқуы тұрмысқа да, тұракқа да, ілімге де, білімге де жақын сияқты, -- деп бастады әңгімесін әкем.
- Біздің молдалар құранның екі-үш сұресін жаттаумен тынады емес пе. Ал орысша оқысаң жаза да білесін, басқа тілде кітап оқисың, орысшаға жетік боласың. Қатарынан кем етпейтін де осы орыс тілі сияқты ғой.

Көкем әкеме қарсы дау айттып, күдігін білдіріп жатыр.

- Момыш жалғыз ұлын орысқа беріп, мұсылмандықтан кеткелі жүр ме деп құлмей ме елініз. Сол жағын ойласаңызышы,- деді.

- Жұрт сөзіне еріп қайтеміз,-деді әкем інісіне. - Олай десен, пайғамбардың да арғы тектері дінсіз болған ғой. Ал, біздің Бауыржан, құдайға шүкір, мұсылманша көзі ашық емес пе. Орысша оқыдым деп діннен безе қоймас. Қазіргі заман ағымы да осы оқуды қалайтын сияқты. Анау Садықты көрмеймісің. Елдің сүйіктің болып жүрген жоқ па? Орыспен де тіл табады, істің орайын біледі.

Тұнімен ағайынды екеуі осылай айттысып отырып, ақыры ортақ мәмілеге келген сияқты. Мені орыс мектебіне беруге келісті. Ертеңіне көкем Евгеньевкаға барып қайтты. Кешкі ас үстінде ол менің Гончаровтардың үйінде жүріп оқитынымды айтты. Ол үшін мұғалімге бір пұт ұн, бір пұт жарма, бір

пұт бүршақ бермек болып келісті. Ал оқу құралдары қағаз, қалам үшін бір қой сұрапты. Гончаровтар менің жүргенім үшін пәтерақы алудан бас тартты. «Әйтеуір Бауыржанның өзіне жететін ет жеткізіп берсеңдер болғаны» депті. Көкем қой апарып беретін болыпты.

Таңертеңмен көкем екеуміз жолға шықтық. Көрпе-жастық, аздаған азық-тұлік алып келеміз. Жолда ауылдың бір кісісі жолыбып қалып, жөн сұрады. Біз мәнжайды түсіндіріп едік, ол тулап шыға келді.

- Апырау, бұл не боп барады? Демек, шоқындырғалы апара жатыр екенсің ғой. Ай-ай, масқара-ай, Момыш сияқты сыйлы ақсақалдар өзінің жалғыз ұлын орысша оқытса, өзгемізге не жоқ. Өле кетсек, құран орнына шоқынды сөзін айтқызыбақ па екен? - деп соңымыздан айқайлады.

- Жоқ, Бауыржан, әлгінің сөзі рас. Бұл болмайды екен. Ауылға қайтамыз, өзге балалар не күн көрсө, соны көрерміз,- деді көкем.

Мен үнсіз ілесе бердім. Осы бір оқыс оқиға менің оқуымды бүтіндей екі айға кешіктірді. Көкем орысша оқуыма мұлдем қарсы болып қасарысып алғаны. Аюбайдың ауылына барып, молдадан оқы деді. Бірақ оған қарсы әкем екеуміз едік. Ақыры жеңді-ая.

Сол жылы қыс қатал болды. Қар қалың жауып, аттатпайтын халге жеттік. Мал қолға қарап, жинаған шөпті жалмап бара жатқан соң, көкем бірлі-жарым майды Қаратая жаққа туысқандарымызға айдан апарып таstadtы. Малдың шебі таусылып, отыннан да жүтай бастадық. Бәрін үнемдеп жұмсамасақ, үрпісіп отырып қалатын түріміз бар. Әсіреке малды ауылда маза жоқ.

Көкем Головочевка жақтағы қыстаудағы малдарға жиі баратын болды. Келген сайын қабағы түсіп, қайғысы молайып қайтады. Бір бау шөптің өзі бір малдың құнынан асып кетіпті. Көкем бір орыстан шөп алуға келісіп, жартылай төлеп сенім пұлын тастайды да, өзі базарға мал айдан сатыпты. Қайтып келіп қалған ақшасын төлеп, шөбін алайын десе, әлгі орыс бас шайқап мәз болып отыр дейді.

Сөйтсе көкем алатын нарықтан да қымбаттатып өзге біреуге сатып жіберіпті. Бұған ашууланған көкем жанжал шығарып, ақыры аяғы төбелесспен тыныпты. Екеуін де бөлімше милициясы бір күн қамап жауап алыпты. Милиция өкілі бір ауыз да қазақша білмейтін адам екен. Көкемнің сөзіне түсінбей «бильмей» деп отырыпты. Содан не есесін ала алмай, не егжей-тегжей түсіндіре алмай, тіл білмей кор

боп келген беті екен.

- Бұл тілдің қорлығын-ай! Арызынды айта алмай, дәлелді жауап қайтармай, макау адамша иығынды шошандата береді екенсің, - деп күйіп-пісті көкем.

- Болды енді, түніле бермей, - деп басу айтты әкем.

- Қайта орыстар қайырганды сындырып, қаматып тастамағанына шүкір де.

- Неге өйтеді? Мен уәдемде тұрып, қалған ақшасын әкелдім ғой. Ол болса алдапты.

- Е-е, сонынды түсіндіре алсаң жақсы ғой.

Осы оқиға көкемнің шымбайына қатты батса керек. Мені орыс мектебіне оқытамын деп құлшынып шыға келеді.

Сол оқиғадан кейін көкем көп уақыт тұнжырап журді. Әсіреке малға қалған шөпті тараشتап шашып тұрғанда қатты қынжылатын. Мал мазасыз маңырап шулағанда, көкем еріксіз солармен сойлесетін еді.

- Болды-болды. Мұнан артық берерім жоқ, - деп қолын қаға бастағанда, ала сиыры келіп алақанын іскелейтін.

Көкем оған да тіл қатады. - Қоя ғой әукешім. Көктем шықсын. Сонда көк шөпке тойдырмасам ба сені. Көктемге дейін сүйегінді сүйреп шықшы, әйтеуір, - деп тұмсығынан

жайлап итеретін...

Құбыладан жел үдеп, боран бүрқап кетті. Апта бойы басылмай ақкөбігін шашып, долданып тұрып алды. Үй арасына қатынаудың өзі мұң болып, ел от басында

отырып қалды. Тек көкем ғана тонға оранып тысқа шығады да, мал суарып қайтады. Үйге келгенде үстіндегі қарын ұзақ қағып, тонын сілкілеп тұрғаны.

- Түу, айнала боз боран. Тіптен көршінің үйі көрінбейді, - дейді ол қолын уқалап. - Төңіректің бәрі құтырынып тұр.

Біз тонға оранып алып, тамақ ішіп, ертегі тыңдаумен күн батырып жүрдік.

* * *

Көкем мені Гончаровтарға алып келді. Бұлардың үйі жып-жылы екен. Сыртта сөмкелерін қолтықтаған балалар бір-біріне қар лақтырысып ойнайды. Арапарында Василий де бар екен. Ол өзінің қарсыласын қармен қадап ұрды да, үйге қарай жүгірді. Мені көріп қуанып айқай салады.

- А-а, Бауыржан келді!- деп құшақтай алды.

...Василий мен Тишко бізді орыс «молдасына» ертіп барды. Әкемнің молда деп жүргені ұзын бойлы, ат жақты, қыр мұрынды, шашына ақ кірген, кең маңдай орыс әйелі екен. Біз кіргенде, ол қамыр илеп жатты. Бізben қолын алжапқышына жасырып тұрып әңгімелесті. Тишко бізді таныстыруды. Әңгіме өте қысқа. Ол маған еңкейіп орысша бір-екі сұрақ берді. Мен жауап қата алмадым. Сонан ол Тишкоға әлдене деп тіл қатты. Тишко бізге аударып берді.

- Бұл кісі, Бауыржан орыс тілін білмейді екен. Түсінбеген соң қын болады той. Өзім болсам қазақша білмеймін. Қалай үйретіп, қалай ұғынысамыз деп тұр.

- Егер Бауыржан орыс тілін білетін болса, мұнда әкеліп әуреленіп неміз бар?
- деді көкем.

Мұғалім күліп жіберді. Әлден соң келісім берді.

- Жарайды, орысша оқытайдық деп талап қылған екен, қала қойсын. Көрерміз, бәлкім еңбегіміз жанып, үйреніп кетер. - Сөйтті де Василийге бұрылып: - Сен енді бұған көмектес?! Әйтпесе оқи алмай жүрер, - деді.

- Көмектесем.

Көкем «әдепті бол, ұқыпты бол. Бұзықтармен дос болма. Сабағыңа көбірек көңіл бөл. Шошқаның етін жеп журме. Орыс құдайына табынып журме» деп пысықтады да, ауылға аттанып кетті.

Көкем кеткен соң, Гончаровтың кемпірі отыратын орынды көрсетіп, жататын жерімізді белгіледі. Василий екеуміз пеш үстінде жататын болдық. Кемпір аз ойланып тұрды да оқыс сұрақ қойды.

- Сенің «қойың» көп шығар?

Мен сұрактың мағынасын аңғара алмай, үйіміздегі қойдың санын айттым. Кемпір күлді де, қойнына қолын салып тырнағымен әлденені алған болды. Сөйтіп сығып көрсетіп жатыр:

- Міне, осы сияқты «қойың» бар ма?

Не дерімді білмей, ызага булығып, кеміткеніне шыдай алмай, көйлегімді сызырып алып кемпірдің қолына ұстата салдым. Кемпір көйлектің бүкіл тігісін қарап шықты да, ешнэрсе таба алмай өзіме қайтарып берді. Сұрағына ыңғайсызданды ма, кешірім өтінгендей басымнан сипады. Арқамнан қағып, көйлегімді кигізіп жатыр. Мұндай қорлыққа шыдай алмай жылап жібердім. Шал кемпіріне бақырып ұрыса бастады. Гончаровтардың өзге мүшелері де шешесін жазғырып кінәлады. Бейшара кемпір сасқалақтап

актала сөйлеп жатыр... Мені жұбатқысы келсе керек, Василийді ұстап алды да, қыңсылағанына қарамай көйлегін шешіп тігістерін тексерді. Мен сонда да өзіме келе алмай, өксіп түрдым. Бәрі де мені аймалап, осы бір өкпеден тезірек жазып алғысы келгендей құрақ ұшады. Кемпір маған мейіріммен қарайтын болды. Біраз күннен соң мен өкпемді ұмытып кетіп едім...

Кешкі астан соң Василий сабағына отырды. Ал Тишко менің әліппемді алып әріп үйрете бастады. Мен бұл алфавитпен таныс едім. Бірақ әкем үйреткенде Б мен В-ның, К, Г және Х әрпінің; С мен Ц-ның, Е, И, Э және Й әріптерінің айырмасы жоқ сияқты бірдей естілуші еді. Ал Ъ, Ы, Б әріптері дегенді естіген емеспін. Гончаровтар бәрін анықтап ұзақ үйретеді. Амал қанша, жуығарақта басымға қонар емес.

- Ал, кәне, - Василий деп айтып көрші.

- Басиль, - деймін мен оған.

- Жоқ, Басиль емес, Василий,-дейді Тишко,-түсіндің бе, В, Ва...

- Бесиль, - деймін мен. Сөйтемін де одан - солай ма деп сұраймын.

- Жоқ, тағы да дұрыс айтпай отырсың, Бе емес, Ва, Ва-си-лий. Түсіндің бе?

Олар осынау қын әріптер кездесетін орыс және қазақ сөздерін мысалға келтіреді. Бірақ миыма кіріп жатқаны шамалы.

Орыс мектебіндегі алғашқы сабағым осылай басталған еді.

* * *

Василий пеш ұстіне шығады да, мені шақырады. Пеш ұсті ысып тұр. Мен әкелген көрпе көлдей, әрі түйе жүні салынған еді. Василий, мен келгенше, кеудешесін киіп, жұқа бөз көрпе жамылады екен.

- Ал, кәне, - деді ол. - Сенің көрпенді төсеніп, менің көрпемді жамыламыз ба? Үсып кетеміз ғой.

Екеуміз келісе кеттік.

Пеш үстінде жатып көрмегендіктен бе немесе жаңа ортаға үйрене алмай жатырмын ба, әлде ертең көретін мұғалімнің алдында қалай боларын ойлаймын ба, әйтеуір дөңбекшіп ұйықтай алмадым. Василий болса рахаттанып үйқыға кеткен. Денем қүйіп кеткен соң көрпені теуіп таstadtым. Көзім ілінер емес. «Мен мына жерде ыстықтан буынып жатқанымда, ауылдағылар үй ішінде қалтырап, қабат-қабат көрпе жамылып жатыр-ау» деп ойлаймын. Бір ой мен бір ой сапырылысып, әбден қалжыраганда қалғып кетіппін. Таңертең Василий мені тартқылап жүріп әрең оятты.

- Бауржан, тұр-тұр. Мектепке барамыз. Мен үйқылы-ояу әлденені айтып, Василийді итеріп жіберіппін. Әбден болмаған соң Василий аяғымнан сүйретіп еденте түсіргенде ояныппын. Ұйқымды аша алмай, сонда да жата берсем керек, Санька сөйледі:

- Сілкілесенші оны. Көзін аша алмай жатқанын көрмеймісің. Мына «қырғыздың» үйқысының қаттысы-ай, - деп қарқ-қарқ құледі. - Өз үйінің төрінде жатқандай жайбарақат қой өзі. Дамбалын сыпышсан тұратын шығар, бәлкім.

- Мама, мынаны қарашы, - деді Василий шешесіне, - Санька үйқытап қалған балаға құледі.

- Не десен ол де, Василий. Мұғалім екеуің босқа әуреленесіндер. Қалай оқытсандар да мынауын баяғы «қырғыз» қүйінде қалады.

Осынау тілі қыршаңқы әйелдің ұлы сөзінің мәнін кейін түсіндім. Мен тұрып киінгенде де, Василий мен кемпір екеуін қағытып, Санька келіні әлі тиіспін жүр екен. Тіпті болмаған соң кемпір келініне кейіп ұрысты. Соңан соң ол Василий екеумізді тамақтандырып, сөмкемізге бір-бірден созба нан салды. Василийді бұрышқа ертіп апарып шоқындырды да, мандайынан сүйді. Менің қасыма келіп:

- Ал, Баурбуржан, енді сен мұсылман болсаң да, құдай тілеуінді берсін деймін, - деп басымнан сипады. - Якши, жақсы оқы. Ал сен, Василь, бұған бас-көз боп жүр. Байқа ауылдың тентектері тиіспін журмесін...

Василий екеуміз мектепке қарай жүгірдік. Тысқа шықсақ, әр үйден кітап ұстаган балалар өріп келеді екен. Бізге келіп қосылған соң, бәрі мені түртпектей бастады.

- Бұл, қай «қырғыз», Василь?

- Бұл - біздің танысымыз Момыштың баласы, енді бізben бірге оқитын болады, - деді Василий.

- Өзі орысша біле ме?

- Аздап біледі. Үйреніп кетеді ғой.

- Әліппені біле ме, жоқ па?

- Оны аздап біледі.

- Жазуын қайтеді?

- Өзің қалай үйреніп ең? - деп дұрсे қоя берді Василий. - Сен сияқты бұл да үйренеді.

- Өзі қайда тұрмақ?

- Біздің үйде, менімен бірге тұрады, - деді Василий.

Осы кезде қонырау үні естіліп еді, балалар мектепке қарай жүгірді. Есік алдында көз нұры тайған, көнелеу тері құлақшын киген шал кішкене қонырауды сілкілеп, безілдетіп тұр екен.

Класқа балалардың соңынан кірдім. Оқушылар шешініп, сыртқа киімдерін іліп жатыр. Оларды көріп мен де шапаным мен құлақшынымды шешіп, ең шеткі шегеге ілдім. Мұғалім келді. Барлық оқушылар орнынан тұрды. Мұғалім сәлемдесіп еді, оқушылар бәрі де бір дауыспен «сәлеметсіз бе, Мария Ивановна» деді.

Мұғалім қабырғадағы қара тақтаның алдына тұрып алғып, оқушыларға құлімсірейді. Жұмсақ шашы желкесіне түйіліпті. Ақ жағалы қара көйлегі жер сыйады. Қынай буган барқыт белбеуі мықынын айқындаі түседі екен. Жоғарыдан біртүрлі тәкаппар қарагандай сезілді. Осылайша ол мені көрді.

- Бері келші, балақай, - деп шақырды ол мені. Қасына бардым. - Міне, бері қарандар, оқушылар, - деді ол өзгелеріне, - мына қазақ баласы бізде оқитын болады. Сендер зәбірлеп жүрмендер, араларындағы жалғыз қазақ қой. Өздеріндегі көріп, өгейсітпендер. Бұл - біздің Гончаровтардың танысының ұлы.

- Бұл орысшаны аздал түсінеді, - деді Василий мен үшін жауап беріп.

- Жарайды, жақсы екен. Онда енді оқуға кірісеміз, - деп мұғалім мені көкшіл көз, шашына бантік байлаған қыздың қасына отырғызды.

Мен отыра бергенде, әлгі қыз одырая қарап, партаның екінші шетіне сырғыды.

Сабак басталды. Мұғалім әліппені ашты да, тақтаға қасымдағы қызды шақырды. Ол үй тапсырмасын тақылдаپ айтып берді. Бормен қара тақтаға үлкен әріптің жазылғанын тұңғыш рет сонда көрдім. Қыз бірнеше сөз жазды да, оны өшірген соң орнына келіп отырды. Тақтаға тағы бір бала

шығып, әлгі сөздерді жазып еді, талай қате жіберіпті. Мұғаліміміз сол арада түзетіп көрсетті... Әрине, мен оның көбін түсініп отырғам жоқ.

Мектебіміз мені баяғыдан қонырау үнімен елеңдетіп жүрген шіркеудің қарсысында екен. Кәдімгі қам кірпіштен салынған еңселі үй. Күмбезденіп ойылған үлкен жиектері бар. Баспалдақтары ағаштан жасалған екен. Төбесі темірмен түнікеленіпті. Оның үстіне ағаштан соғылған үйшік бар. Үйшік толған үлкенді-кішілі қоныраулар. Ең төбесінде айқыш темір қадалған күмбез. Шіркеудің іргесіндегі поптың үйі. Аумағы екі-үш үйдің жеріндегі көсіліп жатқан шіркеу өзге үйлерге төбеден қарап тұрғандай сұсты көрінді.

Сабақ арасындағы үзіліс кездерінде балалар осы шіркеудің алаңында ойнайтын.

Екінші сабақта мұғалім оқушыларға тапсырма берді де, мені шақырып алыш қасына отырғызыды. Әліппені ашып, жеке түсіндіре бастады.

- Көрдің бе, әліппені біледі, - деді Василий қасындағы балаға.

Мұғалім менен әліппені сұрады. Алфавиттің бәрін айтып бердім. Мұғалім ретті жерінде түзеп отыр. «Ве, Ка, Ха, Це, Ша, Іе, Ю» деп ол мен дұрыс айтпаған әріптерді қайталады. Сонан соң әлгі әріптерді әдемілеп жеке жазды да:

- Міне, осыларды жаттап кел. Оқу мен жазуды кейін бастармыз.

Енді ол әліппені ашты да, бір бетіндегі жазуды жаймен оқып шықты. Мағынасын түсіндірді. Оқушылардың өздеріне оқытты.

Үшінші сабак - есеп екен. Қызықты өтті. Сабақ алдында мұғалім үйге берген тапсырманы шығардындар ма, деп сұрады. Оқушылар шығарып келіпті. Мұғалім тақтаға есеп жазды.

- Бәрің де осылай жазып келдіңдер ме? - деп сұрады.

- Бәріміз де, - деп шу ете қалды оқушылар.

Мұғалім дәптерлерді тексеріп, қателерін көрсетті. Шығару жолдарын тақтаға жазып көрсетті. Сонан соң жаңа есеп түсіндіріп, үйге тапсырма берді. Оқушылар тақтадан тапсырма көшіріп жатқанда, мұғалім менің қасыма келді. Дәптеріме анықтап түрып онға дейін сандарды жазып берді.

- Один-бир, два-еки, три-үш, четыре-торть, - деп аудармасымен түсіндіре бастады. Маған қайталатып еді, мұдірмей санап бердім. Өйткені орысша жүзге дейін мұдірмей санай алатынмын. Оқушылар мен жаққа райсыз қарап қапты. Мұғалім оларға жауап бергендей: - Иә, орысша санай біледі екен, - деді.

Мақтауға мәз болып, жиырмага дейін санадым.

- Жақсы, - деп құптады мұғалім, - бірақ «дбанасат» емес - «двенадцать, тринадцать» деп айт. «Шеснасат» емес, - «шестнадцать». «Дебетнасат» емес - «девятнадцать». Түсіндің бе? - деп сұрады. Василийге де менің дұрыс айтуымды қадағалауды тапсырды.

Менің орыс мектебіндегі алғашқы сабағым осылай басталып еді.

Гончаровтардың көмегімен мен жаман оқығам жоқ. Кемпір мен шалдан басқасы маған қамқор болып, сабақ үйретеді. Шал мен кемпірдің өздері сауатсыз еді. Есептен жүйрік боп шықтым. Бірақ есеп жолдарын дәптерге ретімен жаза бермейтінмін. Ойша шығарып, жауабын ғана жаза салам. Мұғалім бұған қиналатын. Сабақ сайын есеп жолдарын жазуды түсіндіреді. Тілді нашар білетіндіктен мұғалімнің түсіндіргенін шала-пұла ұғушы ем. Бірақ ол үйретуден жалыққан емес.

Әліппе оқитын болдым. Дәптеріме де бірлі-жарым өрнектер түсे бастады. Көп сөзді түсінбесем де, көшіре беретінмін. Сөздің мағынасына мән бермесем де, жаттап алушы ем...

Күн сайын орыс балаларымен достасып, оқуым да жақсара берді...

Бұл өз алдына бір әңгіме. Реті келгенде кейін айтып берермін.

TYCINKTEMЕ

Б.Момышұлының «Ұшқан ұя» романы әуелі орыс тілінде 1947 жылы «Наша семья» деген атпен жазылып біткен еді. 1947-1951 жылдары Қазақстанда идеологиялық жағдай ушығып, М.Әуезовтің атакты «Абай» романы әдебиет полицеілері тарарапынан ескілікті дәріптейтін туынды деп қаралып, қатты сынға алынып жатты. Осы себепті Б.Момышұлының «Наша семья» романы қазақ елінің отбасылық әдет-ғұрып, салт-санасын перзенттік сеніммен шыншылдықпен суреттеуіне жатырқай қарады. Баспа орындары, әсіресе, Қазақстандық баспалар бойын аулақ ұстады.

Б.Момышұлының «Наша семья» романы Ресейдің шеткегі бір облысы Калинин қаласының баспасында цензуралық біршама қысқартумен 1956 жылы жарияланды. Осы басылымда «Биографическая

справка» берілген «Предлагаемая читателю книга является первой частью автобиографического романа «Наша семья» (Бауыржан Момышулы. «Наша семья». Калинин. Книжное издательство, 1956, стр. 173),

- деп ескертүіне қараганда, автордың «Наша семья» романының екінші кітабын жазу мақсаты айқын көрініп тұр.

«Наша семья» романын жазушы Тұтқабай Иманбеков «Ұшқан ұя» деп қазақ тіліне аудару барысында автормен бірге жұмыс істеп, толықтырулар енгізді. Баукеңнен қалған архив мұрағаттарында «Ұшқан ұяның» екінші кітабын жазуға пайдалану үшін жиған дерек-мағлұматтары мен ол жайлы автордың жанама пікірлері жиі ұшырасады. Мысалы, Баукең балалық шағында әкесі үйреткен «Сұр мерген» қисссасын әпкесі, қарындасы, көкесі Момынқұлдың басшылығымен ауыл аралап айтқаны, тындаушылардан алғыс алғаны туралы айтылатын жазба деректер осының айғағы.

Баукеңнен бірде неге «Ұшқан ұяның» екінші кітабын жалғастырмадыңыз деп сұраганымда:

- Ол кітапты жалғастыру үшін дерек көздерін жинастырып жүрдім. Бірақ уақыт мүмкіндік бермеді. Әрі бозбалалық дәүір мен әртүрлі мектептерде оқып, сол тұста қатты

сапырылыстарға ұшыраған қазақ қоғамының қалтарыстарында өткен өмірлік жолының суреттері санамда қарайып ұмыт бола бастауы да кедергі келтірді, - деп отыратын.

«Наша семья» мен «Ұшқан ұя» романы кейбір цензура мен редакторлар тарапынан жасалған қысқартулар бастапқы қалпына түсіріліп, басылымға ұсынылып отыр.

M. МЫРЗАХМЕТҰЛЫ.